

近代中國史料叢刊第十七輯
沈雲龍主編

豫軍紀略

尹耕雲纂

文海出版社印行

豫軍紀略

盜賊之患歷代恒有其萌芽也
至微而其為禍也最酷國家全
盛之時師武臣力廟堂之上有
確然不拔之計主持於搶攘之
間疆吏一心權不中制猶必經
久而其亂始定勢使然也咸豐

初元粵寇倡亂江介騷然曾未
踰歲長驅中原北犯畿輔皖豫
亂民乘間竄起中州當七省之
衝無日不戰靡役不從自始亂
至戡定首尾十餘年
宵旰憂勤將吏勞苦賊勢之出

入去來盛衰分合諸臣辦賊之

成敗得失載於章奏文檄牘如

山積致亂之易如彼戡亂之難

如此鶴年幸得假手以告成功

深懼日久事忘傳聞失實匪惟

豫軍之勞不著而

廟謨堅確保大定功之烈亦不
可無以昭示來茲爰屬尹杏蓑
觀察排比歲月輯成一書佐以
康麥生方宗屏吳子珊三大令
釐為四目曰粵匪曰皖匪曰土
匪曰會匪題曰豫軍紀略亂不

始豫功不專豫曰豫軍者書成
於豫紀豫軍之勞也既州創復
况李子衡觀察參訂付梓余究
觀終始而喟然曰嗚乎理大物
博蘊芽始伏禍亂之興殆非朝
夕使然而撥亂反正雖曰天運

豈不以人謀哉自來平寇之策
無過剝撫兩端我

朝鑒賊反覆不輕議撫天戈所
指元惡巨憝罔弗授首乃皖粵
餘孽竟成流寇浸不可制迨合
圍之策立恢天網頓地銘箕張

翼舒虞之海隅一鼓遂滅論者
謂巨寇之平由統帥好謀不輕
戰以徼利疆臣并力無畫畛以
禍鄰然當飛走道窮靡駭豕突
任兵事者幾無以自堅非
聖明主持樞輔翊贊不撓浮議

不責近功其收效必不能如是
之速此則計成功立存事諸臣
所惕然思懼者矣刊成曰揭其
大要於簡端扶危定傾恃有成
算達成銷萌責審未然閱是編
者其念之哉

同治十有一年季春中澣三韓
李鶴年序



--	--	--

豫軍紀略

總纂

布政使銜河南記名簡用道尹耕雲

河南候補道李汝鈞

分纂

運同銜直隸州用河南候補知縣康曾定

同知銜河南候補知縣方昌翰

運同銜河南候補知縣吳保清

校對

同知銜河南候補知縣許以保
候選府經歷鈕金庚

總刊

鹽運使銜河南候補知府邵琦

監刻

河南候補典史徐澍

豫軍紀略目錄

卷一

粵匪一

粵匪二

粵匪三

卷二

會匪一

會匪二

會匪三

會匪四

卷三

土匪一

土匪二

土匪三

土匪四

土匪五

卷四

土匪六

土匪七

土匪八

土匪九

卷五

土匪十

土匪十一

土匪十二

土匪十三

土匪十四

土匪十五

卷六

皖匪一

皖匪二

皖匪三

卷七

皖匪四

皖匪五

皖匪六

卷八

皖匪七

皖匪八

卷九

皖匪九

皖匪十

皖匪十一

皖匪十二

皖匪十三

卷十

皖匪十四

皖匪十五

皖匪十六

卷十一

皖匪十七

皖匪十八

卷十二

皖匪十九

皖匪二十

皖匪二十一

皖匪二十二

皖匪二十三

豫軍紀略卷一

粵匪一

道光三十年六月廣西逆民洪秀全倡亂於桂平縣之金田村挾左道造偽書誑稱天父天兄蓄髮山箒間分途誘脅附從日多歛資財謀不軌以咸豐元年正月僭偽號於大黃江稱天王擾桂平武定等縣入象州境閏八月陷永安州建偽國號爲太平天國封其黨楊秀清爲東王蕭朝貴爲西王韋昌輝爲北王石達開爲翼王洪大全爲天德王秦日綱羅亞旺范

連德胡以晄等各受丞相軍師諸僞職十一月大學士賽尙阿以 欽差大臣督師合攻永安州戰屢捷城僂得會叅將李廷楷等陣亡諸將少卻賊復熾二年二月潰圍東竄官兵復永安擒僞天德王洪大全檻送京師磔於市賊遂以三月犯廣西省城四月陷全州五月陷湖南道州七月陷郴州八月犯長沙十月陷岳州十一月下竄湖北陷漢陽府十二月陷武昌全楚大震三年正月陷九江安慶二月陷金陵據之使僞丞相林鳳祥羅大剛李開芳曾立昌等率

賊東下二十一日陷鎮江府二十三日陷揚州府時
廣西提督向榮爲

欽差大臣率師追賊至金陵
戰獨力 上命前大學士琦善爲 欽差大臣

由河南信陽州偵賊進剿直隸提督陳金綬內閣學
士勝保先之以三月二十二日與賊戰於揚州廿四
橋法海寺破其土壘四月林鳳祥等留僞指揮曾立
昌踞揚州率二十一軍北竄軍數千人擾滁州踞臨
淮關旋陷鳳陽府勝保自揚州分兵躡剿是時江南
北大兵雲集湖南在籍禮部侍郎曾國藩倡練鄉兵

起湘潭楊秀清使劇賊僞丞相吉文元等由浦口擾
亳州與林鳳祥合股是月乘間入河南境陷永城河
南兵事於是始時陸應穀巡撫河南親督師禦賊失
利整軍淮甯賊遂犯歸德府知府陳介眉率兵勇出
援永城商邱縣知縣宋錫慶與在籍御史陳壇爲城
守計時承平久兵民間賊至皆股慄宋錫慶等出請
救五月初七日賊闖入府城官紳士庶格鬪罵賊不
屈死者甚衆事聞 上震怒褫宋錫慶陳壇職命
所在執獲就地正法陳介眉以先出褫職查問宋錫

慶畏罪逸或言死亂軍中陳壇以紳士無守士責後
得論滅死陸應穀自淮甯親督各將弁分道截剿賊
已由睢州直竄開封藩司沈兆雲臬司林揚祖署開
歸陳許道張昀等督率在城文武紳民分塚守禦十
二日賊至城下數來攻城上槍礮轟擊不得近賊攻
城長技恃地雷自牟工祥王黃水兩溢汴城外浮沙
丈餘近郊無大村落不能成隧道賊大隊踞朱仙鎮
距城四十里十三日攻城會大雨雷電交作野曠無
蔽賊藥火不能然城上礮發斃賊甚多開封府知府

賈臻祥符縣知縣何懷珍復募回勇壯丁繩城下殺賊梟其悍目數人會將軍托明阿提督善祿都統西凌阿督三鎮兵由睢州倍道進以十八日抵汴賊知不可逞乃由朱仙鎮竄中牟鄭州汜水沿河而西先是廷議河防緊要命詹事府少詹事王履謙赴汴巡察河岸禁商民懋遷船隻罷私渡查官渡河道總督長臻復率師駐廟工以故賊不能渡遂由汜水竄鞏縣鞏東十餘里爲河洛交匯洛河舊有民舟運煤糧上下賊掠以渡至中流水暴長舟覆溺死無算

其先渡者屯溫縣之柳林灘稍稍掠近村陳家溝民
陳仲生有拳勇率村農數十與賊鬪於溫縣城西斃
賊目大頭楊河內縣在籍侍讀學士李棠階方講學
河朔書院聞寇至率生徒號召鄉里得精壯數千前
禦賊戰始勝鄉兵非夙練無紀律賊出精銳以火器
突陣多潰散諸生有死者鎮標游擊穆奇賢兵單不
能禦賊乃徑逼府城焚四關時六月初二日也懷慶
知府余炳燾河內知縣裘寶鏞督文武紳民登陣禦
守賊恃衆驟攻輒敗退翌日復攻又擊卻之賊因分

掠四郊踞村舍於沁河北岸築木壘爲久困計日數
攻復累木石爲臺高與城埒守兵伺其將成以巨礮
擊壞之賊銳始減明日復來攻昇雲梯數百具騎者
游弋時隱禾黍間守兵誘之僞爲下城食賊揮衆突
進城上礮火遽發賊不及避死者枕藉因駭退越數
日勝保軍至壁城南托明阿善祿西凌阿軍亦至捕
殺坐龍錦褥服黃袍賊目二 欽差大臣直隸總
督訥爾經額理藩院尚書恩華率蒙古盟長察哈爾
勁旅由東北路進屯清化鎮山東巡撫李德越境勦

賊以所部與賊角偏賊而星城內人心益固惟以阻
木星糧不得通賊持之愈急穴地十餘所余炳燾裘
寶鏞用獄囚業煤者言覘識其處以計穿破之最後
一隧未穿藥發裂西南城牆十數丈掀寶鏞墮下面
體皆傷兵役掖之起賊方銳進寶鏞遽挺身堵缺口
守者競從之口立塞牆上槍礮旁擊或傾藥簍就燔
之煙焰漲天賊不得上兵民至益衆取樁實磚土夾
門扇案几縱橫填積城以復完賊死甚多守兵無傷
者賊由是氣奪不敢復攻城李德以東省有警引師

還勝保等軍轉攻賊壘先後血戰十餘復縱間離其
黨拔身投誠者數百人七月二十八日訥爾經額親
督諸將會城下分五路並進燬其木柵賊棄壘我兵
追斬三千餘級餘眾竄山西懷慶圍解時東北正南
皆我軍壁壘北阻太行西濱大河惟西北一徑達濟
源界連山西陽城垣曲其地有封陵口邵原關諸隘
重山沓嶺馬不連騎步不駢踵山西巡撫哈芬奉

旨撥兵嚴備而賊竟由此遁矣城既竄垣曲遂擾
曲沃陷平陽河東道張錫蕃知縣晏宗望戰歿勝保

率軍追賊先諸軍至收平陽訥爾經額旋師正定與
哈芬均逮問授勝保爲 欽差大臣 賜神雀

刀八月賊由洪洞屯留潞城黎城復闌入豫境陷涉
縣知縣李毓珍死之尋復竄直隸踞臨洺關擾深州
河南巡撫陸應穀由汝甯移營彰德爲畿輔聲援

上命惠親王爲奉命大將軍科爾沁郡王僧格林
沁爲參贊大臣總統四將軍督旗營察哈爾精兵會
勝保所部進剿賊之入山西也衆二萬餘楊秀清由
金陵復使僞官朱錫珉許宗揚率衆應援並所裹脅

不下二萬至直隸與林鳳祥等合勢益張其後由深
州連陷直隸山東諸州縣僧格林沁勝保分路追剿
所至皆捷賊得城不能守斃偽丞相曾立昌許宗揚
於曹縣偽副丞相陳世保於冠縣至五年正月大股
虜聚連鎮僧格林沁盡殲之生擒逆首林鳳祥四月
分股由高唐竄馮官屯僧格林沁引河水困之破其
壘生擒逆首李開芳及偽職黃懿瑞謝金生等檻送
京師凌遲處死髮逆無一得免者北軍凱徹旋京師
渡河之粵逆至是全滅其未渡河之賊回旋鞏汜間

以三年六月初五日竄擾新鄭長葛至許州陸應穀
簡駐省河北鎮標兵以懷慶左右兩營馬步二百五
十名配善祿率之渡河援懷慶以七百五十名及甯
夏馬步五百名收集陝甘潰兵五百名配河北鎮總
兵王家琳爲前隊游擊瑚圖凌額帶陝甘兵五百爲
中隊自督練勇四百爲後隊策應援許州令巴里坤
總兵經文岱以所部由黑石關進剿鞏汜餘匪飭南
陽鎮總兵柏山由汝州赴許會合初六日賊攻州城
知州金梁禦之初七日柏山敗之於八里橋賊由臨

潁南竄初九日夜又及之王店斃黃巾賊目二紅衣賊三童賊髮辮紅緯者三游擊伊里綱阿繞擊賊後又殺長髮賊百餘短髮賊二百餘辮紅緯童賊十餘燒死者不可勝計奪獲槍械牲畜無算時經文岱亦由鞏縣追剿殘賊至密縣陸應穀因令柏山會合王家琳等由西平一路進初十日柏山及賊於西平之小龍橋復戰生擒長髮二十五殺斃三百餘都司百順分隊鈔擊復斃賊數十生擒三十餘賊乃入遂平境時陸應穀移營赴汝甯兼辦南路土匪賊驟至遂

平知縣劉鴻勳城守汛蔣鳳岐會汝甯帶勇委員前
南召縣知縣趙曉擊賊於張堂頗有斬獲賊乘間闖
入縣城爲負隅計會柏山追至城南五里大雨如注
因止不前派兵由西北繞城南八里橋沙河以北左
右伏大隊夜馳繞城北爲疑兵以驚之賊聞礮委城
南走至沙河北岸水暴漲不得過我兵伏起呼譟震
地柏山大隊繼進賊前阻水殊死鬪我兵奮力合擊
斃長髮賊二百餘短髮賊三百餘投水溺死者無數
奪其大黃旗金帽生執僞丞相李姓斬之餘眾竄匿

亦有從上流淺灘晁涉者游擊全善都司蘇林邀之
先後接斬二十餘級賊勢乃蹙王家琳隊至西平淤
泥河梁黍中突出數十賊矛傷家琳左股千總魁齡
外委陳衛林奮身格鬪殲焉十二日柏山由西路田
渡口乘船渡河令游擊伊里綱阿由東路張堂束筏
渡沿途斬首百餘級十三日經文岱馬隊由密縣追
賊至會合進剿於確山縣之南京店斃悍賊數十餘
眾潰遁十四日黎明追及於五載河北岸賊方半濟
我軍薄之賊晁水渡溺死甚眾殺斃百餘是日全善

蘇林於三官廟遇賊斬首二十餘級十五日賊竄明
 港驛欲東南遁爲淮河所阻我兵追及斬首三十餘
 級乃循河奔逸十六日戰於肖店復斬數十級賊遂
 竄羅山正陽間殘敗略盡矣有竄回煙樓者爲遂平
 縣知縣劉鴻勳捕獲二十二日竄宣化鎮羅山縣知
 縣雷元昭伺便截殺賊乃由大勝關南遁入楚時豫
 省南汝歸陳土匪蠢起陸應穀別檄經文岱柏山他
 勦而令王家琳追粵賊入楚七月初二日王家琳追
 賊至宋埠獲賊謀訊稱楚師阻截欲回光山周家口

南竄家琳伏兵山溝驅泐勇前誘之伏兵踰溝鈔擊復斃長短髮賊百餘生擒者二奪僞將軍僞先鋒大黃旗二餘賊復竄楚爲楚省帶兵布政使唐樹義兵勇邀殺無遺明日家琳至界上樹義以書來止之且告捷此股粵匪亦滅而各路土匪因緣竊發遂致大煩兵力矣其後四年二月粵逆爲土匪勾結一竄永城夏邑旋遁去而犯鄂犯皖犯豫章中州所在設防三關之戍亦頻年不解云八年正月與皖捻合圍固始擾商城皆爲官軍擊退事在皖匪部茲不具載

粵匪二

同治元年官軍困賊於廬州僞英王陳玉成廣西人
眼有黑癍二號四眼狗凶桀嗜殺魁諸賊洪逆倚之
蹂躪數省至是爲楚師所威僞扶王陳德才隸玉成
股中亦凶狡玉成使陳德才僞端王藍成春僞遵王
賴汝洸僞啟王梁成富僞天將馬融和等率黨三萬
餘人勾結皖豫諸捻竄河南擾南陽邊界分楚師兵
力正月豫省土捻楊方衡袁安愚等煽合圍攻新蔡
縣城時豫軍勦汝捻正亟帶兵藩司張曜輕騎至項

城賊阻不得過復還汝甯巡撫鄭元善檄副將楊飛
熊率所部往援適穗子鋪官軍失利 欽差大臣

勝保羽檄調飛熊去新蔡圍愈急知縣韓承宣素得
民因激勵紳庶督率文武登陴固守賊始至晝夜攻
皆擊退乃穴地道十五日寅刻北面地雷轟發裂城
垣十餘丈逆衆萬餘冒火競登韓承宣督城守營外
委陳繼先等挺身堵禦兵勇繼之拋擲火罐火彈槍
礮矢石如雨賊相顧駭愕民夫乘勢搶護缺口歷四
時之久斃賊四百餘賊始敗退有先引去者二月初

二日至溱頭爲張曜擊敗西竄至乾莊縱橫數十里
初四日至確山初五日擾及泌陽之沙河店知縣溫
逢春集團禦之初六日分兩股攻泌陽東西兩門爲
溫逢春擊退西北竄唐縣澗嶺后青苔等鎮初十日
犯南陽府城知府金梁護南陽鎮總兵游擊徐榮柱
督兵勇抵禦十一日賊繞城圍攻復擊卻之派隊追
擊斃賊百餘賊遂敗竄鎮平有駛及唐鄧者其留攻
新蔡之賊復穴隧施地雷二十六日寅刻藥發塌城
八九丈承宣等禦之如初倥偬間北面地雷復發復

堵禦之先後四十餘日守益不懈賊知不可爲乃皆遁去奏入 上嘉之賞承宣佐勇巴圖魯陳繼先

千總用馬正心守備用馬荷龍把總用承宣由是心力交瘁未幾病歿照例議卹蔭其子入官先後西竄之賊並聚於南陽旨充官兵卷旗疾趨至鎮平內鄉入西峽口始縱殺擄折由西坪襲富水關入陝由商雒進擾尹家衛四月將軍多隆阿與皖軍總兵張得勝克廬州陳玉成遁壽州乞援於苗練勝保密飭川北道苗沛霖誘執之畀官軍檻送京師奉 旨卽

所在正法抵延津礫於市陳得才等聞急將赴援先
分股由商雒取道盧氏出宜陽東向赴皖旋折回擾
確山遂平往來游弋五月復分股竄鄖西陳得才自
率全股由華陰越潼關突豫境初四日陷閩鄉閩鄉
城久傾圮不可守知縣王其昌巷戰死之賊遂進圍
靈寶會陝西駐防委營總圖克唐阿率馬隊二百抵
境知縣杜翊納之與爲城守賊攻三晝夜皆擊卻昇
雲梯數十壘至先是修城掘地得明季舊礮一尊置
城上守兵發之適斃賊目乃駭紛退初九日圍陝州

河陝汝道廣隆率知州王詒固守礮斃攻城賊三百
餘賊將由城北緣道蟻附爲山西平陸守兵槍礮轟
擊不得上都司王永旺乘勝擊賊生擒僞灑天安李
萬受僞檢典劉洪登夥逆宮明性等皆斬之城圍遂
解十一日賊由硤石驛觀音堂竄澠池之英濠鎮澠
池縣知縣張應煒率勇禦之十二三日新安宜陽永
甯境皆有賊十四日副將楊飛熊自洛陽拔隊進駐
新安城東鐵塔山獲賊謀訊稱西來大股皆四川江
南湖北老賊志在踞城爲負隅計云十七日楊飛熊

進軍鐵門十八日與賊接戰賊先踞高坡我軍戰失利飛熊躍馬挺矛陷陣賊圍之數重臂骸皆傷戰益厲乘騎中礮蹶飛熊幾折踝守備趙鴻舉掖之起易馬突圍出退營鐵塔賊衆追壓數四趙鴻舉盧得勝堅壁拒之賊乃自澠池折竄宜陽我軍退保洛陽且扼其東竄汴梁路也六月賊由宜陽紛擾嵩縣寶豐南召葉裕桐泌諸境盤踞舊縣獨樹吳城等鎮前陷鄖西之賊亦擾及浙川之戴家河距荆子關數十里三路環逼南陽府城戒嚴鄭元善策以駐洛之師歸

手
卷一
叅將盧得勝暫統由汝邲兼程進剿並令前派援洛
之剛銳三營改道襄葉探蹤剿擊勝保復派副將王
佐臣馬隊千名由商水西平郟城會知縣王珠煒所
部勇隊取道舞陽與盧得勝各軍聯絡聲勢團練大
臣毛昶熙派宋營馬步千餘亦由省馳赴裕州一路
以厚兵力均歸南陽鎮總兵圖塔納統轄 上以

宛事方亟命助剿信陽之楚師移剿宛南復飭湖廣
總督官文湖北巡撫嚴樹森增兵協助鄖西賊犯唐
縣爲知縣高天寵截擊奔竄并樓安逢十八日游擊

徐榮柱統標兵與副將伊里綳阿會合擊賊後隊於
白林莊斃賊五百餘十九日午刻馳抵井樓我軍直
前鈔擊賊竄向畢店追殺十餘里適高天寵率團至
合力扼擊斃賊三百餘生擒髮逆齊有英等斬之餘
竄桐柏之平氏鎮其舊縣吳城踞賊亦合股於平氏
往來唐泌奔突靡定徐榮柱率兵急追七月初一日
賊直趨南陽郡城徐榮柱間道出賊前會民團截斃
礮斃馬賊數十圖塔納親督兵勇策應賊勢稍卻退
竄雙橋鋪栗河店時援兵未至賊三股合併衆約十

萬初四日乘夜梟渡白河圍攻府城並分擾近縣南陽文報不通近城十里賊壘周布築礮臺洩濠水掘地道運柴草糧食牛馬碓磨屯集四關援師不能進會楚師襄陽道金國琛候補道梁作楫率馬步十餘營越境馳援與圖塔納約內外夾擊鏖戰數日殺賊二千有奇生擒正法者千餘賊勢不支分兩股一竄鎮平一竄距城五十里之安皋十六日圍乃解其至鎮平者攻城極悍知縣李樹楨竭力守禦十七日夜乘賊不備選精壯縋城薄賊壘縱火伏兵繼之斃長

髮百餘獲僞丞相僞檢點及執照木戳官冊賊竄西
北叅將盧得勝軍抵縣人心稍定楚師以邊圉當要
衝將引歸鄭元善乃令署臬司洪貞謙率師赴宛自
率師赴洛陽援澠陝八月十六日洪貞謙抵葉縣適
有張鳳林夥匪二千餘竄縣境瓦岡店焚掠因督知
縣張延齡叅將盧得勝殺賊百餘生擒丁更等斬之
粵逆時攻浙川廳署同知馬筮乾力守九日擊退之
餘衆由李官橋沿河遁入楚荆子關向無城僅署副
將德培領弁兵五十駐守賊圍浙川時分股由馬蹬

攻陷之二十二日多隆阿派隊至賊悉走商維爲多
隆阿所敗折由浙川馬蹬竄入鄧州之厚坡圍鄧州
新野縣城侵唐縣臬司洪貞謙先飭游擊任治國馬
天祥都司劉鴻增張興邦秦安慶等督兵勇探蹤進
閏八月初六日馳抵新野迤北之趙莊遇賊斬殺甚
多初九日追至郭灘迤南三十里唐河北岸賊正搶
渡猝遇我軍殊死鬪我軍奮力合擊附近鄉團協助
賊且戰且渡俘馘二千有餘溺死者亦千計賊向楚
北棗陽隨州紛竄金國琛軍至棗陽賊已過應州洪

貞謙因徹還內鄉勦擒方賊之入楚也豫擒陳大喜竄西平確山官軍邀之復東竄其夥股由桐柏之平氏鎮入粵匪夥竄棗隨或言中有王廷幹股廷幹時投誠隨官軍破汝光逆寨實不從粵逆三年巡撫張之萬疏雪其事賊由是紛擾楚境至二年二月復入陝陷漢中城固等府縣與川逆藍大順藍二順相犄角亦屢爲官軍所敗

粵匪三

同治三年正月陳得才欲救金陵竄河南糾合皖豫各捻分股一由石泉漢陰出興安而竄鄖陽一由西鄉出紫陽磚坪平利而至竹山一由甯陝出鎮安而趨商州統於河南之南陽湖北之襄陽會齊東下時張總愚陳大喜俱會於宛南總愚竄盧氏因嗾賊入豫巡撫張之萬檄總兵張曜宋慶副都統善慶色爾固善道員葛承霖等軍西勦捻以扼粵賊二月二十一日張曜追捻至黑峪留副將保英李世玉軍防回

竄而自率張士元尹嘉賓步隊合宋慶軍馳繞廬氏
斷捻粵旬合之路簡選精壯分布要隘知縣單體晉
領豫勝親兵會靖淮輔衛兩營壁南召縣境之鍾店
分雷才貴所部屯黃墟堙爲疑兵二十六日賊大股
麇聚鎮平縣境之馬山口七里坪豹子灘單體晉等
率長槍馬步勁勇突至陣斬紅巾馬賊多名賊遂西
南竄二十八九日至內鄉攻縣城知縣朱錕禦之三
月初一日復分南北兩股攻內鄉叅將周兆常軍至
與朱錕合守城上開大礮擊殺賊數十雨雪忽作賊

夜避山凹擁火燎溼周兆常率兵勇潛縋城以噴筒
火箭燒賊死無算賊駭盡棄所掠西南竄由下瓦亭
入陝西商南境之龍駒寨竹林關穆家壩龍駒寨距
盧氏境之朱陽關僅百里張之萬預派守備賈文田
勇隊扼守復檄保英率王成豫勝等營往助保英未
及至賊闖入關賈文田以勇丁五百當賊數萬殺其
先鋒悍賊數十卒以衆寡不敵退屯湯河賊亦旋退
其時賊分數股蔓延山谷往來倏忽官兵隨所在擊
之於是西平一股僞端王統之犯內鄉城上兵勇擊

退之竄鄧州境之厚坡張十一林邊馬擾及鎮內又有鍾得終股犯荆子關爲總兵李殿元叅將裴政黃貴誠等設伏擊敗由屈元岡至內鄉旋復有分股由淇河莊猴兒山突入荆子關縣丞張鴻緒率勇抵禦李殿元裴政回兵擊之賊乃遁三月二十三日張曜善慶色爾固善等軍由馬山口追張總愚猝與粵逆遇粵賊大股由內鄉之西坪西峽口赤眉城南駛布滿山野衆且悍二十四日我軍游擊蔣希夷首陷陣斫殺悍賊十數副將尹嘉賓知縣單體晉從山下抄

賊後破賊壘二忝將程之偉奮勇直入賊殊死鬪善
慶色爾固善馬隊分兩翼包進廩戰四時斷賊爲二
賊不能支狂奔四散援賊翻山西南竄我兵追殺二
十餘里是役也斃悍賊七八百生擒二百餘陣斬僞
將軍唐姓僞指揮劉得保僞檢點何子整等二十五
日科爾沁親王僧格林沁由嵩縣伊陽魯山南召追
賊亦至軍威益振先是僧營統帶蘇克金派營總春
壽等帶隊赴鄧州時三月十五日也與賊遇於城東
北之茶庵斃賊百餘十六日戰於雙橋里勝之越日

賊拔營走復追殺三十餘賊十八日另股擾鄧北亦
爲春壽擊敗二十日復擊殺數十奪旗械無數蘇克
金自率馬隊援新野偵知粵逆全股會陳大喜股由
新野東竄楚界後股尙在鄧州桑莊腰店因扼白河
潛伏以待二十一日賊分四路乘夜渡河我軍突起
擊斃賊五六百追殺十餘里適新野縣知縣方承宣
率勇接應賊馬步橫亘十餘里折回抗拒我軍奮勇
合擊衝賊數處又斃賊六七百陣斬身衣團龍黃褂
賊目四二十三日黎明賊分三股渡河蘇克金及營

總烏爾圖那遜復擊斃數十而大股已由新野南新店鋪台總愚大喜諸股梟渡東奔棗陽矣僧格林沁親督馬步截殺於夾道溝大勝之遂追入楚其留豫境者爲僞啟王梁成富由鄧州元店南竄二十四日春壽擊之於軒西里殺賊百餘二十七日張曜色爾固善等追及於浙川泉山斬悍賊二百餘擒僞朝將林喜桂僞澍天安徐隆明梁正坤等并長髮百餘奔北山者一股我軍追戮悉盡越日五鼓梁成富自率醜類沿山衝突我軍分勦逾一時善慶蔣希夷率眾

奮擊賊始由板橋南蠻子營翻山遁我軍逐北間偵
知僞朝將邱陳李三賊糾領馬步七八千由西北至
張曜會同色爾固善善慶等部勒各隊於板橋川老
鶴河東岸狙伏伺之賊至我軍突起騎兵鈔擊斃賊
無算生擒邱陳二賊目二十九日追及浙川境之娘
娘洞我軍乘夜渡河與宋慶軍合復鏖戰賊中槍及
溺水死者甚衆四月初一日張曜等浮渡丹江由滔
河直越楚境翌日及賊於鄖陽屬之羊皮灘賊衆回
拒伏兩山以誘我宋慶突進先敗其伏豫勝親兵繼

之賊狂奔陣斃悍黨二百餘生擒長髮老賊五十餘
偽朝將一會大雨山水驟發河流暴漲賊搶渡淦斃
尤多張曜飭玉成豫勝等營先期冒雨渡河因截之
於南化集斬馘益眾賊西越大山直竄趙家川張曜
等追過郟西百四十里會楚陝兵至乃引師還時僧
格林沁追賊入楚賊方圍隨州楚軍血戰四時解其
圍賊始東敗遁追殺二十餘里馘賊千餘賊乃竄入
河南信陽州張之萬時在南陽急檄都司連美守備
賈文田馮聖傳李承先道員葛承霖等軍扼三關未

及至賊前股已闌入平靖黃土關窺伺州城馮聖傳
連美賈文田李承先等軍先後至聖傳壁西關營甫
立三里店賊大至勢將渡河急出隊邀擊賊乃回遁
謀言賊將以十八九兩日攻州城連美馮聖傳各率
隊覘賊行二十餘里有馬步賊千餘往來游掠見我
兵至不戰遽走我兵追殺十餘里所過要隘賊多柴
道列槍礮我軍未敢深入翌日葛承霖軍亦馳至謀
隨州大股爲僧格林沁擊敗由吳家太店竄信陽卽
堅築壁壘自率七成隊往覘賊十七日至馮家莊賊

方渡河東岸列陣以待副將張養吾游擊白定燮首
陷陣斃長髮老賊數十乘勝渡河追至夏家冲賊已
由雙河店白雲寺合大股東竄僧格林沁軍至諸將
稟節度十八日連美擊賊於楊柳河斃賊五百餘賊
遂由譚家河南向武勝關僧格林沁檄諸將從提督
傅振邦追勦十九日敗賊於譚河二十日敗賊於東
旺我軍營廣水驛賊由應山大新店雙橋鎮馳竄我
軍追及擒斬賊數十奪獲偽印一二十一日馬賊馳
至廣水驛前之長正河李承先迎擊退之又大股由

大山口駛至五色旗幟全踴奮進連美賈文田帶隊
突出張養吾鈔左白定燮鈔右李承先率騎兵襲賊
後葛承霖自扼其前鋒賊不能敵四散潰敗我軍拚
殺十五里至大山口突見黃巾賊首領千餘騎揮前
敗賊回鬪白定燮引眾直前突之賊復譁潰越山遁
我軍追至距廣水二十里之石塘復遇悍賊二千餘
死拒鋒十數交葛承霖揮隊兜擊賊始敗向小河司
盤踞其各股併由大新店竄羅山之姚家畝宣化鎮
及光州之白雀園先是張之萬派副將徐連陞駐防

羅山復以叅將邵春仁李大成等繼之賊至宣化鎮
踞大勝關卡窺羅山縣城薄生生寨徐連陞以生生
寨地扼要因進屯周黨店會練總知縣趙祖蔭舉人
丁振鐸文生樊紹心集團往援兵至永定店游擊徐
光志都司巴振德守備周興國分三路進連陞自督
馬隊策應賊瞭見我軍卽拔退我軍追至順河大勝
關踞眾突出連陞揮隊奮擊戰數合賊始敗入關殊
死拒徐光志選精壯三百越山繞關後縱火賊隊亂
遂奪復關卡乘勝疾追擣宣化賊巢賊乃盡東南奔

我軍追殺至清水塘墨斗關陣斃賊七百餘生擒之
賊斬以徇其由墨斗關竄向家店何家畝新店者復
爲光山縣知縣鄭家濂截殺退竄陡山河保復竄踞
光山新集擾潑陂河田家新凹西高廟環數十里焚
掠裹脅襲破曾家寨孟家寨邊馬四出張僞示勒索
各寨財物復圍攻連康寨圖久踞徐連陞旣克宣化
鎮留徐光志扼守自率李大成等隊往援陽山等寨
五月十五日連陞馳抵潑陂河與紅旗馬賊遇擊敗
之追殺二十五里至傅灣地方鄭店四面山賊踞各

寨同時收復二十一二日張曜宋慶色爾固善各軍
馳至解連康寨圍進屯潑陂河與徐連陞隊合豫兵
旣大集新集之賊聞風夜遁黃安與宣化敗賊合小
河司踞賊亦竄紫檀河柳子港新洲團風是時賊股
紛紜散漫而指曠統聽四僞王僞啟王梁成富爲張
曜等擊敗遁入漫川關竄商州與另股蔡逆合擾山
陽小河口米糧川孝義廳旋入楚僞端王藍成春與
陳大喜合竄黃州下巴河僞遵王賴汶洸與張總愚
合由黃陂亦竄黃州僞扶王陳得才與捻匪張佃江

合由安陸之阜市竄應山羅宗店於是諸逆先後並
羸集於楚六月大武告成協辦大學士節制四省軍
務兩江總督曾國藩督水陸諸軍克復金陵陳得才
愈窮無所歸乃由新洲龍山竄麻城踞白杲僧格林
沁親詣巴河與官文會議滅賊之策因合擊前後斃
賊數千擒首賊目死者甚多大股復竄皖境安徽巡
撫喬松年臬司英翰率總兵郭寶昌張得勝何紹彩
等初敗之於楊柳灣再敗之於上門河紅花界賊有
竄商城黃蘗山者有由白杲竄豫境閭家河者均爲

張曜蘇克金等擊退張之萬由南陽移營汝甯督防
七月二十二三日各逆分竄或東或西楚之羅田黃
安蘄州以及皖豫交界之羅山光山均有賊騎僧格
林沁派成保色爾固善宋慶善慶巴揚阿楊長春等
躡賊西馳令張曜徐連陞扼商城之長嶺關松子關
二十六日徐連陞行過羅田猝遇賊於滕家鋪急整
隊迎敵賊至益衆我軍力竭連陞身被十七創戰死
哨官把總陳華元白雲青隊長賈萬林李東昇藍得
勝同時戰歿是日張曜督隊至莫子店進屯長嶺二

十八日敗賊於班竹園殺賊百餘擒老逆徐會慶等
成保等與賊遇於羅山之蘇家河陳家河戰小挫八
月初二日藍逆併馬融和股將竄皖境張曜率營官
羅輔臣郝永剛楊春祥等以四更襲踏賊營殺傷甚
多得糧八十餘石初四日辰刻賊糾衆回鬪有大黃
旗書陳字知爲陳得才卽揮隊迎擊敗之追至東嶽
廟賊遂竄六安州之毛坪流瀑墮復至漫水河趨向
無定初九日張曜復擊之截殺另股幾盡賴汶洸及
張總愚任柱牛老紅等股以初五日困羅山之永安

寨初七日竄潘新店豹子山入倒座彎盤踞初十日
僧營提督陳國瑞擊敗之走竹竿鋪十二日賊之前
股又入光山之文殊寺十九日至人和寨陳國瑞成
傑色爾固善宋慶巴揚阿揚長春等合兵追之巴揚
阿戰歿賊遂遁麻城之界嶺是時各路統兵大臣奉
上諭以國家命將出師翦除凶逆原期與吾民
共樂昇平其甘心從賊者固爲法所難容然猶殲厥
渠魁脅從罔治至於被賊逼陷悔罪自新者皆在可
矜可赦之列嗣後各路統兵大臣於收撫難民誠心

歸順者勿論從賊久暫准一律薙髮寬其既往咸與
維新令下榜於通衢賊心益渙散頭目汪世第張啟
才李宏揚陳錦鳳等率衆二萬餘投張得勝何紹彩
軍乞撫安徽巡撫喬松年派總兵徐鶚馳往受降僞
夫將馬融和投英翰郭寶昌軍僞端王藍成春投僧
營翼長成保軍僞朝將魏康福范立川陳漢泰周天
順等投道員蔣凝學軍皆以其衆先後不下十餘萬
人僞扶王陳得才仰藥死蔣凝學因僞將高啟成掘
得其屍於長嶺送僧營判戮殘賊僅數千僞遵王賴

汶洗挈之入皖，捻任柱陳，二老淵股與張總愚合竄。襄脅復衆，易步爲騎。四年，忠親王僧格林沁戰歿於曹州，賊勢復熾，馳騁數省，寢爲流寇，益剽忽不可制。五年春，巡撫李鶴年蒞河南，以爲賊無宿糧，其不卽殄滅者，賊騎我步，以步當騎，走不相及，滅賊之計，非合圍必不能。勦賊蹤，延蔓凡三百州邑，因險合圍，固非一省兵力所可辦。第爲勦則必勝，計豫軍多穎亳人，與賊相習，其長技亦略同，宜若可用。乃添練兩大軍，曰毅曰嵩武軍，各萬餘人。察豫省宿將無如南陽

鎮總兵宋慶前布政使改用總兵張曜者奏起張曜
於家與宋慶各領一軍而以副都統善慶將騎爲游
軍與兩軍爲犄角授以方略視賊所向相追逐部署
甫定兩江總督曾國藩署兩江總督李鴻章奉

命督勦相繼入豫與李鶴年會籌制賊不流之策時
賊聚潁西築壘潁東以偪之圍未合賊潰出大掠齊
魯間南入楚楚將多戰死六年復犯豫豫軍敗賊於
潁西賊乃分張賊西入秦任賴二賊突出運河東走
青萊運河故有堤頗堅整於是今協辦大學士直隸

總督李鴻章復議偪賊於海隅徵各省兵緣運河膠河築重圍畫地以守李鶴年以爲圍剿二事如循環圍合賊必滅乃以提督馬德昭候補道段廣瀛守潼關備張賊餘悉遣赴齊圍始合六月賊騎犯膠防豫軍擊卻之賊不得逞七月乘隙旁出沙灘逸而南淮軍提督劉銘傳豫軍副都統善慶等追擊沂海間賊屢挫十月二十四日戰於贛榆賊目任柱素耐戰豫軍善慶槍斃之賊由是不能振往來海沫邳宿間諸軍縱擊一敗之於壽光再敗之於濟陽伏屍數萬賴

汶洸與其死黨數百人跳入江南境爲所在防兵截
殺略盡賴賊薙髮易裝從數人竄揚州甘泉縣之萬
福橋爲邏卒所獲送曾國藩讞問確繫獄以聞奉

旨就地凌遲處死粵逆之局遂結其張賊入秦一
股戰事具詳皖匪部巴揚阿徐連陞陳華元白雲青
賈萬林李東昇藍得勝皆議卹如制

豫軍紀略卷二

會匪一

咸豐四年秋九月禹州莠民劉化振作亂化振禹州東鄉人自三年夏粵逆犯豫各州縣奉文辦理團練於是紳民紛紛舉行聯莊會化振倡議自爲東鄉總會首邀張大鼃袁西成宋成等人會九月初九日張大鼃袁西成宋成王和尚赴鄭州會場置買刀槍歸途遇滎澤縣捕役吳青山爲宋成等所殺棄屍賈魯河灘歸至禹州隱其事時值開征錢漕化振因聯莊

會繼於費欲聚衆挾制求減錢漕遂糾集岳三教宋成張大鼃胡春有張麻子等一百六十五人入城見官而賀先彭木霍有成姚常聚等三十一人不從化振脅之以威賀先等懼而從之九月十九日化振率其黨岳三教等一百九十餘人入城賀先等三十餘人中途遁蓋尉氏縣抗糧殺差首犯王添佑爲化振之戚寄禁禹州獄化振陰議以見官減漕爲名入城劫獄賀先等故不從署禹州知州朱光字聞變會營汎帶兵勇往捕遇於城外化振卽率衆求減錢漕光

宇不允衆遂譁聞光宇飭兵勇查拏趙苙持刀徑前
爲光宇格斃化振見事不濟退至距城五里之張良
洞屯聚光宇遂請兵勦辦巡撫英桂檄開封府知府
王建泰前任獲嘉縣知縣王萬齡等督兵往勦化振
脅游民三百餘人圖劫王添佑直攻州城光宇閉關
嚴守匪衆圍攻益急王建泰兵至化振聞風逸官軍
追斬二三十人焚其巢散其脅從英桂慮王添佑久
禁禹州獄易啟戎心命襄城營都司瑞林提至省斬
之光宇等督兵勇訪躡各匪蹤跡知化振匿密縣境

超化鎮遂會同署密縣知縣胡燕清等圍擊化振自
經死其黨丁幅等潛匿禹州之七娘廟光宇會同瑞
林往緝格斃武宣汝王化蕓張金旺趙欠常羣成王
得章林痴子劉全王懋朱廣五董玉同擒王自修李
四保劉玉成等丁幅與吳大富董金榜賈沅慶逸去
官兵四出搜擊先後獲王永青賀先彭木霍有成張
振東朱金池劉西方焦成郭秀石王羸子等賀先王
永青彭木霍有成以不從化振入城劫獄後得減死
冬十二月匪黨楊藍楊穴楊合宋雪妮李芳春王豁

子禹州趙澱沅張富妮宋撞妮逃匿長葛縣之陳公
祠無量寺長葛縣知縣劉世勤派外委王永彪帶勇
往拏楊藍等殺傷勇役衆復逃散禹州及附近各縣
查拏嚴急乃於禹密交界方山爲匪張大鼈糾李賢
等爲一起胡春有糾王大林等爲一起張麻子糾劉
玉等爲一起袁西成糾蔣雄等爲一起岳三教糾周
三妮等爲一起王和尚糾金戈狗等爲一起閻魁糾
馮順等爲一起張鐵鎗糾劉汰等爲一起楊由奇糾
張紅林等爲一起張虎糾楊穴等爲一起馬登雲糾

許源頭等爲一起馬金勝糾焦同等爲一起李奎糾
徐淙兒等爲一起吳大富糾長葛縣趙澱沅等爲一
起其老官山則有宋成糾合陳小辮子夏三夏有河
宋旦妮等爲一起凡十三起麇聚山中時出劫掠行
旅於是石固驛錢店王家溝客車先後皆被劫各州
縣拏捕愈急遂成反噬明年正月乃有密縣之亂蓋
相距未一月也

會匪二

咸豐四年冬十月輝縣刁民戴瑩楊景幅史枕經瞿全義魏鳳池郭彬等土使游民曹得意糾衆作亂二十日在縣西二十五里趙固鎮設局脅衆花戶抗納錢漕燒毀糧差房屋二十六日衛輝府知府蔣斯崇同衛輝營叅將松志馳往查辦三十日戴瑩等率衆圍城至十一月初二日始漸退出關廂先是豫省自三年夏粵匪闖入歸德攻開封圍懷慶另股折回圍許州南竄羅山出九里關入楚土匪乘隙四起於是

各屬議行聯莊會爲守望相助計刁民恃衆煽惑鄉
愚則有懷慶府屬之河內開封府屬之尉氏禹州抗
官殺差滋事至是蔣斯崇馳書請兵巡撫英桂甫由
信陽徹防回省 朝廷方令英桂出省防勦於是
英桂奏言各縣抗漕滋事深虞相率效尤須分派官
兵搜捕兵勇之在本省已有不敷分布之勢臣已飛
咨河北鎮臣崇安酌撥北路防兵馳往輝縣並飭河
北道蔣啟敷相機解散嚴捕渠魁徹輝縣知縣周劼
任查辦起衅根由十一月十七日蔣啟敷稟輝縣刁

民戴笠等仍在趙固集及縣東之琉璃閣縣南之山西會館屯聚放百泉閘水阻官兵旬結四五千人傷勇役百餘十九日河北鎮崇安率彰德防兵六百餘人到郡會同河北道蔣啟敷示諭以百姓本爲身家而求減錢漕何至捨身家而同干顯戮况求減之錢漕不及刁徒之苛斂等語痛切詳明懸示遠近移知輝西接壤之山西陵川縣嚴加堵緝而附近之獲嘉新鄉封邱陳留諸處完納錢糧率多觀望有旨歸德擒匪未除或應駐陳州或應駐歸德英桂當體

察事機親往督辦但攘外必先安內賊氛不靖固當示以兵威至地方偶有刁民聚衆滋事則專賴管轄之道府州縣善於彈壓平時撫馭有方必不致抗官滋事之案層見疊出若因抗納錢糧卽須移兵動衆徒事煩擾且恐激而生變當嚴飭蔣啟敷等究其啟衅之由剛柔相濟總期分別良莠擇尤懲治不致釀成事端勤勞兵力方爲上策英桂奏言地方刁民藉聯莊會輒欲免納錢漕臣已再三諄誠本管道府務當解散脅從嚴捕渠魁正不敢遽爾興兵致涉鹵莽

准刁民糾衆數千任情抗拒恃其洶洶之勢挾制要
求當時竟有不可以理義曉諭者若徒事拊循必致
養癰貽患鄰近各縣率慮附從不得不示以兵威爲
之鎮懾現鎮臣崇安已抵衛輝經臣密函知照會同
蔣啟敷查明起衅根由分別懲治儻有負隅抗拒再
行相機辦理惟臣一經前赴歸陳則相距輝縣路途
寫遠深恐鞭長莫及且開封各屬亦無以資控馭現
當漕糧開兌催科緊要之時必期施措得宜方能補
救擬暫駐省城就近調度歸陳距省各三百餘里輝

縣距省二百餘里何路緊急卽往何路督辦斷不敢顧此失彼自干咎戾奏入英桂遂調撥官兵先駐衛輝府城聲言不日往勦派員馳赴輝縣愷切開導曉以利害爾時被脅之衆羣知悔悟相率解散趙固集滋事之匪畏罪潛逃合邑紳士呈懇願設法捕獲首惡戴鏿楊景幅曹得意等網送求免官兵臨境署知縣路璜親赴各鄉分別良莠擇尤懲辦四鄉紳耆翕服漕糧照舊完納二十八日英桂將輝縣安戢情形入告仍飭崇安蔣啟敷督率地方文武嚴拏首

惡自督大軍馳駐陳州布置邊防時濟源溫縣原武
各邑聚眾抗漕尚未散五年正月學政張之萬奏言
豫省去歲抗糧殺差糾眾之案層見疊出其尉氏許
州禹州輝縣各案均經撫臣先後入奏此外之旋聚
旋散未經入奏者尚復不少推原其故皆因連年豫
省兵差絡繹不能不借資民力而被賊竄擾之區疲
敝尤甚雖年穀順成而商賈不行銀價日貴穀價日
賤自湖北肅清以後大河以南銀價稍減而民間石
粟尚不得易一金且自錢法之行以制錢二串作銀

一兩河南各州縣糧銀完納大抵收錢其價亦非以銀爲低昂多者制錢三四串少者兩串數百不等若盡以兩串作銀一兩計之皆多贏餘而小民無知遂以爲國之正課皆係以兩串完納於是奸民得所藉口良民亦隨同附和假聯莊以聚衆託減糧以要官地方官催科不急則正課無著催科一急則動至激事此處一動鄰境因之生心此處甫平彼處效尤又起實在情形大抵如此現當國用浩繁之時以屢歲豐收而錢糧不能踴躍深爲可慮伏思奸

民之糾衆皆謂減價完納非敢謂抗不完納也皆謂求減差徭非敢謂不應差徭也尉氏許州之案其始皆不易辦而近日皆能拏獲爲首之奸民聯莊解散安靜者實由州縣盡去其多取於民有累於民之積弊但留實在辦公之項且與各紳民商推利弊酌定章程明白曉示而官民已相安於無事然則此卽辦理此等案件之定法卽當時愛民裕國之要務矣然亦非盡咎州縣也一切支應攤賠無名之費不能無所取於州縣州縣何能不取於民間若積弊之

有病於州縣者不除但去州縣之積弊則州縣不能多取於民必致多虧於國從前積弊未除州縣尚不能無虧况俱裁之則其虧必甚此又一定之勢矣請

飭下撫藩各臣揀派公正曉事素洽輿論之員逐縣清釐積弊並會同司道府廳各官通盤核實查其確爲辦公之項酌量減留其一切無名之費盡行裁汰事實其既往以去其諱飾之情法嚴於將來以杜其復加之漸則弊源先清民氣自靖然後嚴懲奸民確効虧短斯民困可蘇而國用亦不憂其不足奏

入有 旨命英桂按照學政所陳逐款詳查分別
裁革妥議具奏原奏尚有未備之處一併詳查列入
章程議未及行而有密縣鄭州濟源新鄉各邑焚署
圍城之事初禹州之亂匪首劉化振伏誅餘黨匿山
中久之誘集無賴出沒禹密交界之方山大紅寨半
坡山諸處各州縣此拏彼竄至是署密縣知縣胡燕
清捕獲李如意王景唐代理鄭州知州黃見三捕得
蔣二蔣三蔣四均繫獄匪黨遂謀劫奪正月十九日
掠密境東南大隗鎮胡燕清會同外委王青山帶兵

勦捕馳追遇伏王青山被戕胡燕清受傷走脫匪黨
已潛伏城中是夜放火焚署劫獄胡燕清之妻常氏
及一子一女幕友潘芷香刑書二人同時遇害典史
受傷監犯盡逸迨胡燕清回城匪衆已遁二十二日
竄至鄭州脅煤窑游民圍攻州城黃見三閉城堵禦
礮斃六七十人縋城擊斃四五十人匪衆退踞廣福
屯於是胡燕清黃見三同馳書請兵時巡撫英桂督
師駐陳州檄臬司余炳燾出省督辦令襄城營都司
瑞林佐領巴哈布帶兵二百名隸之令開封府知府

趙書升帶兵二百名益以練勇先往查辦並奏言密
鄭距省不遠開封所屬州縣近因錢漕觀望人心浮
動內患堪虞臣若自往恐南路有警未能策應故命
臬司帶兵勦辦如果情形日重當親往督勦 上
以地方官辦理不善削密縣知縣胡燕清職命英桂
體察邊境情形如皖防稍緩牛鑑張維翰等皆可派
往崇安於輝縣案辦結亦可帶兵會勦時趙書升等
勦賊於廣福屯斃賊數百餘匪退至孟家寨又經兵
練擒匪日袁西成及李賢等真諸法分路抄勦先後

擒獲王大林等百餘格殺數十鄰縣捕獲各數十胡
燕清擒獲焚署逆胡春有等皆斬之趙書升等親
赴方山大紅寨半坡山分兵窮搜焚其巢餘匪竄禹
州掠黃岡署知州朱光宇遣勇往捕傷歿十餘匪衆
乘勢攻城朱光宇率紳民袁鳳三登陴捍禦適趙書
升派兵追至礮斃紅巾賊二朱光宇率文武紳勇開
城出擊武生馬永清力戰陣亡火彈傷光宇頸猶督
勇奮擊斃賊百餘賊向西南竄逸州城圍解擒楊老
虎等梟示趙書升留兵五百鎮禹州余炳燾馳抵禹

州賊已殲除過半遂飭緝餘匪示諭聯莊會各保其鄉未幾胡燕清等於寶豐縣境香山寺擒獲首犯張成及其子張安妮又於舞陽縣境獲首犯岳二教傳首犯事地方於是劉化振之黨始盡五月十一日

上諭英桂曰地方團練原以保衛鄉閭近來河南彰衛懷及開封等屬抗糧滋事之案層見疊出皆因聯莊會借團練爲名糾衆抗官府縣平日旣辦理不善臨時又補救無方以致相率效尤後患何堪設想著英桂督飭地方官剴切曉諭不遵者嚴行懲辦現

北路軍務已平所辦聯莊是否可以裁撤並著酌量
辦理是時河內濟源沁水各縣刁民皆踵輝縣之弊
聯莊抗糧旋起旋止而輝縣首惡戴瑩楊景幅曹得
意等逃匿各鄉煽惑新鄉獲嘉濬縣原武陽武濟源
溫縣河內安陽林縣內黃各聯莊聚眾抗官河北三
郡人心騷動亂萌已見故有是

詔張炳者新鄉

縣之刁民也爲戴瑩等所惑於縣境龍泉寺聚眾抗
糧殺傷差役十八日聚眾千餘抵城下知縣祝塏率
勇登陴礮斃賊四匪眾退歸龍泉寺六月初四日匪

復率衆攻城祝壇出擊斃匪四五十匪黨愈集愈多
官軍斂兵入城賊遂盤踞東西北三門衛輝府知府
蔣斯崇募勇六百餘人命軍功霍振國帶領於新汲
接壤遙爲聲援時翰林院庶吉士傅壽彤方奉英桂
檄往來懷衛間解散聯莊既而知各屬匪黨相結已
成尾大不掉之勢非言語所能爲力亦令前武安縣
知縣高天寵招募壯勇駐亢村驛聽調河北鎮崇安
聞新鄉亂命都司穆特布守備魁齡各帶兵馳往懷
慶府知府高應元河內縣知縣師長怡亦各以壯勇

往援英桂督師信陽得報檄山東都司唐佐清帶兵
五百剋日馳往又於南陽信陽防堵官兵內抽撥五
百名令叅將全福千總張永芳分帶繼進檄山東游
擊王鳳祥帶兵五百名由陽武渡河令開封府知府
趙書升於汜水抗糧案辦竣卽帶所募壯勇就近由
滎澤渡河北趨各路官兵統歸崇安調遣仍令傅壽
彤會同在籍四品頂戴李棠階徧諭鄉民各安生業
飛咨直隸山東山西各督撫撥兵防邊堵其竄逸因
奏言賊匪近在德安防禦外寇固難稍寬而河北變

生肘腋勦除內患刻不容緩兼之黃河漫口徧地災
黎萬一奸民誘令附從則其勢益張辦理更形棘手
體察情形河北腹心之患實較南路尤爲緊要擬將
防堵事宜責成南陽鎮邱聯恩南汝光道邊浴禮臣
卽酌帶兵勇前往河北督辦得 旨允行並

詔直隸總督於防河官兵一千五百名內抽兵千名
赴新鄉援勦英桂正擬北行值楚省官兵失利西凌
阿退守隨州信陽三關戒嚴飛檄署臬司周士鏗募
勇先赴河北會同崇安督勦是時附近各縣聯莊知

官兵大集傅壽彤等又往來勸諭尚不致蠢動而新鄉匪黨脅聚幾萬人崇安等復請濟師英桂令增募鄉勇並檄催直隸官兵七月十八日崇安傅壽彤趙書升蔣斯崇等率兵入新鄉境沿路擄殺伏匪獲潘鐵妮等崇安由東路進賊分兩股拒敵官兵殲賊二百餘擒二十餘遂分兵赴東北兩關焚賊踞房屋祝壇見援兵至遣壯勇出城接應斃賊甚多賊向西南正北各村屯踞圍始解十九日崇安率將弁分隊擄勦於會家營殲賊數十擒賊十餘擄獲火藥雲梯槍

礮各器械賊踞龍泉寺掘濠築壘爲人踞計二十一

日署臬司周士鏗帶兵至衛輝大名鎮總兵史榮椿

大順廣道聯捷同時以兵來會二十二日賊竄西南

小集二十三日崇安周士鏗分路進剿傅壽彤蔣斯

崇趙書升各率練勇接應斃賊七十餘擒裴六妮等

匪首張炳逸去餘衆負隅 上益命英桂往衛輝

督勦八月十九日英桂至師崇安等戰益力獲匪徒

曹成玉趙心和等究出新鄉圍城獲嘉滋事皆戴鑿

楊景幅等同惡相濟趙固集收藏軍器糾衆不散思

抗大兵崇安周士鎰遂遣兵往捕抵趙固賊眾千餘
分股迎拒官兵馬隊衝進立斬百餘賊始潰散擒孟
得幅等焚其軍器局署輝縣知縣路璜滑縣知縣張
廷璽直隸游擊德魁分路追勦獲楊景幅戴瑩千總
馬騰蛟獲曹汝梅於山西陵川縣之衙衙密皆斬以
徇而張炳及獲嘉首匪郭象明尚未獲餘黨尚多其
林縣安陽湯陰原武溫縣濟源聯莊仍未盡散英桂
飭崇安史榮椿聯捷分駐新獲輝三縣嚴拏匪犯蔣
斯崇安撫居民方新鄉之圍也濟源抗糧之案雖已

解散而首惡未擒聞山西陽城縣侯井村趙連城滋事復思萌動而獲嘉聯莊會於是起焉恃眾要挾陽請赴新鄉曉以利害陰與匪黨勾結阻塞大路四門樹黃旗困委員候補知縣朱光宇於城至是聞官兵將至盡運器械出城周士鏗知其助賊卽與崇安分路迎擊至安村匪眾千餘在村外挑濠溝欲引衛水灌濠官兵越濠進斃賊數十擒二十餘餘眾潰散越日匪黨復裹脅數千竄踞登岡寺叅將全福等擊退之官兵會合追剿大勝都司唐佐清等復敗賊於贊

城郭莊脅從日漸解散英桂命周士鏗赴懷慶傅壽
彤赴彰德各就地方情形相機辦理於是安陽湯陰
臨漳林縣各聯莊皆紛紛呈繳軍械遣散會眾而修
武陽武溫縣孟縣諸處擒獻彭馬妮彭月觀王全喜
劉大林劉大合張大魁苗澍馮青元范六合苗志高
義馬六雲郭賓郭廷魁張士林等並呈繳馬匹器械
崇安史榮椿聯捷各遣所部拏郭香曹在訓岳在
兆彭羸妮王世俊孫世全曹保全曹文龍天岐等交
蔣斯崇訊明正法而江南礪山之賊時又竄入歸德

攻破馬牧集英桂恐移師南渡河北餘孽復萌於是酌抽行營官兵三百名令游擊巴哈布援勦以祝壇得歸德各屬團練之心令解新鄉縣印馳往歸德援勦捻匪九月初六日原武聯莊會匪聚於縣境東岳廟飭兵往捕獲首匪張秀生閔春榮婁中平郭保妮斬三保其鐵匠銀長幅張瀾等焚其巢賊黨張熙謨王萬和姚添正遁山西爲鳳臺陵川兩縣所獲張炳之弟張倫遁遂平爲知縣金益謙所獲解營斬之陽武聯莊會首彭鳳池濟源縣要犯段懷法商振邦等

亦次第就擒林縣匪聞傳壽彤帶兵往拏悉竄散獲
岳超凡寘諸法安陽湯陰內黃各邑匪犯屢經嚴緝
未獲湯陰之下扣南陽各村陽奉陰違居心尤爲叵
測英桂慮地方州縣因循粉飾貽患將來檄飭崇安
蔣啟敷會同史榮椿聯捷帶兵馳往十月十二日先
至湯陰之南陽下扣拏獲首犯索希孟申岳生及其
子申九功王斗南王道南路喜等十四日獲王知心
馬士沈楊春榮王乾元等又獲王幅青司法喜於濬
縣官兵正擬移師內黃適內黃聯莊會首生員王隆

章民人宗浩然宋飛等赴營自首悔懼認罪並約閭
邑紳耆出具永不滋事保結官兵遂至安陽二十四
日獲王老樂雷天雷施雨於伏思郃里等村獲李美
王牧宋明德於辛村獲胡純德等於大保村皆要犯
也毀其局仆其碑傳集紳耆剴切勸導皆俯首聽命
林縣各犯自岳超凡就擒餘悉潛蹤縣境少安乃以
搆緝逸犯責成邑令旋擒獲河內侯會鄭孟縣李興
禮原武李象賢濟源段起謨其獲嘉縣首惡郭象明
爲候補縣丞張鈞軍功杜來崇追至鹿邑縣汾塔集

會同縣令擒獲新鄉縣首惡張炳爲軍功冒如蘭及
王祿營兵丁獲於武陟境先後解營盡寘諸法於是
河北大定英桂復令崇安周士鏗傅壽彤帶兵千名
前往開封屬之鄴州陳留杞縣尉氏洧川滎陽許州
屬之襄城長葛河南府屬之洛陽偃師鞏縣登封解
散聯莊並擒獲中牟滋事首犯賈世清陳林鄭青雲
王光三尚占魁朱燕青汜水縣毆差抗官設立私渡
之杜邦彥王七任二紅安身王雪來周元良禹州匪
黨王建功新鄉縣首惡陳錫田陳得玉李在田解省

訊辦十一月初三日英桂以河北肅清入告督兵旋
省 上以辦理認真授翰林院庶吉士傅壽彤爲
檢討免其散館復開封府知府趙書升革職留工處
分在事出力文武論功陞賞有差

會匪三

咸豐八年正月阜陽教匪王庭楨等聚眾焚掠盤踞西爐村其地與項城沈邱新蔡各邑毗連居民驚恐項城縣知縣彭旭調團勇拏擊匪眾列陣迎拒另股賊從旁出撲傷團勇十餘會沈邱縣知縣秦篤新帶團驟至賊始退歸先是匪首王庭楨李潮仕李長四等習教傳徒煽惑鄉民始僅二百餘人糾捻首劉石滾張三等入夥集數百人陰結粵逆期以二月至阜陽相助沈邱項城二縣捕之急遂於七年十二月起

事裏脅附近鄉民焚掠村鎮於西爐集挑濠築壘爲負隅計至是焚阜陽屬之鮑陽城等十餘莊攻圍項城之新興集沈項縣丞鄧祥鈴督勇嚴守賊於集外縱火擄人聲言攻項城彭旭布置城守馳書告急時巡撫英桂駐師葉縣以固始縣城久未解圍羣捻蜂起隨營無兵可撥乃檄陳州府知府安奎汝甯府知府祁之銓候補知府蒯賀孫等督勇分勦奏請截留過境之陝甘官兵一百八十餘名赴沈項援勦正月初八日匪攻沈邱縣境之劉莊秦篤新帶勇馳往擊

退十一日夜匪衆三千竄至距沈邱城三里徐營十
七日秦篤新會同營汎由韓橋李增橋兩路進擊賊
亦分路迎拒互有殺傷二十二日陳州府知府安奎
陳州營都司雙麟會師進剿殺賊三十餘擒裴成等
二十三四等日賊竄阜陽境鹽店莊諸處擄糧焚殺
一空逼近汝陽所轄之陽埠廟灣汝郡震動賊以妖
言布散汝蔡沈項各邑鄉團聞賊有邪術飛刀殺人
見其服色詭異互相疑懼望影先逃二十七日汝甯
府知府祁之銓會同安奎分路兜擊安奎由西進兵

至吳橋遇賊列隊迎拒官軍奮擊賊辟易斬紅衣馬賊及匪黨四十餘擒劉小等追殺至賊巢遇伏匪衝動後隊前隊不能陣賊衆四面圍逼署新興汎把總麻金銘力戰歿並陣亡兵勇數十安奎雙麟等退守沈邱之新興集祁之銓由南進兵亦遇伏兩面受敵傷勇數名退守新蔡之龍口集賊衆誘脅沈項兩縣鄉民在李增橋周橋吳橋諸處大肆焚掠沈項兩城危如累卵英桂奏言沈項鄉團素稱得力茲以妖言惶惑盡皆四散教匪兇鋒所至已逼沈邱項城新蔡

汝陽四邑切近陳汝兩府城距周家口要地亦祇百餘里設有疎失省城必爲震動且皖境之阜陽豫境之汝蔡俱爲勝保袁甲三兩軍後路饒道若被阻隔關繫匪輕而臣所帶馬步官兵祇有三千名除頭起馬步官兵一千二百名已赴光固外二起官兵一千名亦已起程赴援當此教匪蔓延鄉團星散變生肘腋不得不先救腹心不得已將所派二起官兵截回計已行抵息縣飭卽由息改道徑赴新蔡並德楞額等馬步卽日啟行赴新蔡沈項相機進剿臣一旅偏

師兼顧爲難請 敕直隸督臣山東撫臣選撥精

兵各一千名遴派曾經出師得力將弁管帶迅速來

營以資調遣 上以直隸山東兵丁均難再行出

調 詔恆福選山西省勁旅一千名赴英桂軍營

調遣時勝保奏調陝甘官兵二千名業由甘肅起程

中旨如固始卽解圍此項官兵英桂尚可與勝

保分帶並趣英桂馳赴沈邱一帶督勦是時沈項汝

蔡各邑二百餘村莊咸苦匪擾東西百餘里南北四

五十里俱成赤地王庭楨李瀚仕等徧貼僞示僞號

順天軍師大司馬所踞西爐東爐劉莊新莊李家廬
等處挑濠築壘連立五圩結黨四五千分踞成犄角
之勢其西北河湖汗漫寬十餘里賊巢前後有洋河
坡河兩道其地田埂逼窄溝渠分繞惟南北兩路可
以進兵賊於要路設伏屢敗各縣團勇二月初二日
總管德楞額等進兵賊知官軍從北路來悉衆南向
圍攻汝陽之廟灣楊埠新蔡之龍口集郡城左右烽
煙相望英桂令祁之銓蒯賀蓀等援楊埠廟灣自帶
親軍駐汝甯督勦密令德楞額等馬步自北路折回

由龍口集進兵攻其南開封營游擊承惠等帶甘肅甯夏官兵自新興集進兵攻其北訂期夾擊初七日德楞額等南路官兵先由洋河渡至爐莊觀賊勢賊分兩路鈔截各千餘人官軍馬隊張兩翼應擊轉戰二時斃賊百餘乘勝追殺復斃二百餘至濠邊巢內賊齊出矢石雨下時已薄暮斂兵歸營獲牲畜器械無算初八日黎明德楞額等大隊由李新莊分東西南三路進攻令軍士人挾束薪至劉莊遇匪下餘出關中路步隊迎頭截擊斃賊數十東西兩路兵勇同

時馳擊賊稍卻德楞額先遣馬隊扼劉莊新莊李家
廬三巢要路斷賊援應於是三路並進賊衆敗奔退
入西爐老巢官軍至濠邊擲草填濠天津勇隊發噴
筒火箭奪開頭道濠門賊衆抵死拒槍礮如雨官軍
五入木柵傷亡百餘不得進叅領綏圖根敦札撲驍
騎校托克屯五品藍翎馬甲恩祥德星布賡音布勝
福干總王同聲外委張超等均受傷劉莊等三巢匪
衆齊出救應馬隊截殺甚多賊殊死戰官軍誓徹過
濠分頭迎擊北路承惠帶甯夏官兵馳攻其背南面

匪衆紛紛移向北抵拒承惠身先士卒捨過濠溝甯
夏官兵齊登北柵德楞額等見北路兵到鼓勇疾進
火器並發賊巢草柵先然會東風大作火勢猛烈呼
號鼎沸賊衆大亂官軍兩路攻入斃匪二千餘立毀
西爐老巢其東爐及劉莊等四圩並附近小莊見西
爐破同時潰竄官軍乘勝勦殺各巢俱焚毀追至湖
邊復斃賊四百餘賊向東北狂奔匪首王庭楨殪於
巢中是役也攻毀賊巢五掃平小莊零匪塵戰六時
先後斬首三千餘級擒任小妮等獲牛馬大礮軍仗

無算英桂以捷聞於朝賞德楞額黃馬褂營總
蘇克金伊勒固木圖巴圖魯名號加承惠副將銜擢
都司何建鰲京營游擊賞叅將綏圖花翎其餘出力
將士獎敘有差時敗匪數百人亡命竄至阜境之迎
仙店謝家園德楞額等躡剿斬馘四十餘賊復東竄
王家壩盤踞會德楞額積勞疾發以蘇克金代統其
軍十三日官軍進至艾亭賊復折向西南竄息縣所
屬固成倉十四日蘇克金等追及轉戰累時斃匪五
六十忽大雨如注賊逸去竄距光州所屬靠山埠十

五六七八等日官軍冒雨進兵泥水沒踝沿途搽殺三十餘賊勢蹙甚議投粵逆光州知州鄭元善息縣知縣周仁壽羅山縣知縣廖慶謀各派兵勇堵勒蘇克金等會之斬賊百餘賊竄光山縣所屬寨河集焚掠裹脅復增四五百人十九日雨止蘇克金等由集北進攻集南忽出悍賊一股官軍猝不及防有傷亡者游擊巴揚阿防禦滿堂均被創蘇克金分兵勇爲三隊自東西北三面夾攻光山縣知縣楊維宗委員任浩及廖慶謀等督勇由南而進擊官軍發火箭然

其草房自辰至戌轉戰六時斃匪二百餘四更時賊黨三百餘冒煙出兵勇緊躡追擊沿河斬首五六十級二十日黎明官軍渡河賊竄陳家畝圩蘇克金馬隊先到卽時進攻光羅各縣勇圍陸續會集賊以槍礮死守防禦永奎及兵勇均受傷將士憤怒攻益急賊黨紛紛越垣竄皆爲官軍所獲二十一日辰刻各軍攻入悍賊悉就誅賊首李潮仕張三等皆斃焉其二命他竄者開歸陳許道徐繼鏞督派員弁在新集擒獲賊目李龔子朱純修等委員黃以清等督勇在

三文坡擊殺多賊生擒十餘掘毀李潮仕祖墓挖獲
王庭楨族孫王五誅之廖慶謀督勇擊匪搜出偽印
二偽封官號及與粵逆句通違悖書字秦篤新拏獲
匪目王心名捻首劉石滾劉極匪黨張豹等彭旭獲
賊目張全等新蔡縣知縣馬筮乾拏獲劉金秀石興
云等於是教匪悉平

會匪四

咸豐十一年四月河北聯莊會匪餘黨李占標姚天英劉金山等作亂踞獲嘉之中和鎮張時中者新鄉進士貴州卽用知縣以辦團故留團練大用毛昶熙營遣赴河北招勇時中所部勇目李占標等藉招勇聚衆三四千踞中和鎮句結小冀鎮刁民牛存金爲犄角營器械繕牆濠李占標爲紅旗隊姚天英爲藍旗隊劉金山爲白旗隊煽新獲輝三縣聯莊餘黨四出搶掠值山東直隸土寇蜂起徧擾濮范大名各屬

豫邊臨內滑濬處處戒嚴李占標等陰議結束匪以
仇昔日之誅聯莊會者獲嘉縣知縣趙寶仁偵知之
語張時中速往鎮撫會時中已奉文停止募勇遂馳
往解散占標率隊道迎時中不能制巡撫嚴樹森督
師陳州聞變檄河北道王榮第率領叅將裴政帶衛
輝營官兵並汲新輝三縣練勇通判馬步瀛帶剛銳
左營勇會同總兵牛浩然乘其初起併力撲滅並絕
東匪救應四月二十四日賊由中和小冀分三股出
竄掠陽武之黑洋山新鄉原武交界之高莊賈莊管

正 才 能 拔 萃 工 作 如 此

總張清雲周占魁外委楊得山等率二十餘騎首先
衝入賊見官兵少率衆圍逼張清雲戰歿五品軍功
陳錫福身受二十一創官兵四突不得出適馬步瀛
馳至揮軍殺入獲嘉練勇橫擊之斬殺無數餘賊向
東南敗奔叅將裴政偕候補知縣尚賢繆萼聯督兵
勇踵至延津陽武兩縣勇練會之追斬二十餘里斃
賊五百餘奪器械羸馬甚多擒閭安妮韓玉法等賊
分兩股逸一竄滑縣之黃德集一竄新獲諸縣境裴
政等帶勇追至新鄉之辛店集賊方炊見官軍掠至

出巢迎拒裴政身先士卒馳入賊陣手刃數賊新鄉
知縣鄒鉞帶勇助戰殪賊二十餘擒馬賊六步賊十
三追殺十餘里復斃數十賊回竄中和鎮初四日裴
政等追至泰山廟與獲嘉知縣趙寶仁兩路夾擊斬
馘五十餘追至南務北務焚李占標姚天英巢餘賊
向西逸復結附近黨羽數百踞南務趙寶仁與裴政
議以窮追非計西北百里則山西陵川縣境以賊貽
鄰省尤非計乃調集勇練爲六路派游兵一路爲策
應以五路爲五衢合擊之法鄒鉞尚賢繆萼聯守備

萬鵬程等分將之銜枚而進初八日黎明抵南務賊驚起五路兵勇奮力環攻前後左右槍礮並發賊人馬盡斃僅五六馬賊於煙燄中突圍遁陽武縣拏獲馬奔中魏成妮斬之其東甯滑縣黃德集一股知縣徐振瀛擊殺二百餘延津知縣林大木督同練總候選訓導李王文閔廷等分帶勇練追至先約江西知縣暴大儒武舉于士修等集鄉團伏街中練勇大呼馳進賊衆死拒傷練勇數人官軍用連環礮轟擊有賊首乘轎車而逃者姚天英也未出集中飛礮死官

軍斬其首並斃夥黨二百餘擒夥賊三餘匪數十向西北敗奔官軍沿途追殺二十餘擒陳文學馬振清楊仁妮檢賊屍有水晶頂帽並功牌招勇諭帖令獲賊認之則賊首李占標也並言劉金山乘馬與姚天英同行俱死於礮於是賊股盡滅初 朝廷以此事衅由招勇令部議毛昶熙處分削張時中職迨不期月而匪黨悉平渠魁就僂出力文武悉邀懋賞嚴樹森奏言張時中一迂腐老儒傳見時對臣涕泣願立功贖罪是以號招鄉團協助官兵剋期奏捷請開

復進士原資得 旨允行並留於嚴樹森軍營差遣此一役也匪首李占標姚天英劉金山既伏誅而是年八月輝縣知縣韓經畚復稟有李占標聚衆於獲嘉竄至輝境之趙固集肆擾月餘歸入東匪是李占標猶未死云

會匪五

金樓寨在歸德府商邱縣馬收集之南十里寨首部
永清其先習白蓮教已三世矣爲離卦大宗海內承
平守令僅以邪教誅首惡永清之祖父皆伏法而子
孫幸邀寬典永清不悛乘中原多故其教中徒衆有
爲皖捻堂主者志益侈適堡寨之議興金樓寨築城
浚池倡於衆曰大劫將至欲免者入吾寨八卦旗捻
首劉狗至金樓謁永清執禮甚恭薪木無毀傷愚夫
愚婦益信其爲樂土歸之者如市咸豐十一年欽天

監言八月初一日日月合璧五星聯珠永清誑其衆
謂祥由己謀以其日僭偽號約皖捻王明李永年入
其寨復有吳廷瑞尤本立黑巴等爲之翼輔將襲馬
牧而進圖歸德事泄遂反時團練大臣毛昶熙駐宋
郡因勒兵至馬牧集合南陽鎮總兵圖塔納率諸將
邵春仁敖天印張倫興劉進貞程明禮左成元等進
攻復調蔣東才隊出亳回宋助勦諸將壁寨外師久
無功昶熙因令前御史尹耕雲往勞師且督戰事以
陳文舉步隊陳祿興馬隊從爲九月十六日也耕雲

至軍周視壁壘乃與圖塔納議近寨爲營掘地爲道
出地道土壘山以臨其寨用古人距闔法於是始以
隄南爲老營拔老營精銳營其寨之西北寨形狹而
長東西二門敖天印張倫興歷西門而北邵春仁營
正北劉進貞左成元營稍東陳祿興初至恃其勇且
生力兵至東門挑戰賊堅匿不出礮傷勇丁一人祿
興憤遂營於東門十八日試銅礮毀賊堞土山成復
於山外挖濠壘牆而移營就山愈逼近賊寨賊奔視
者良久二十一日東南風大作圖塔納尹耕雲令馬

隊繞至寨南施放火箭寨中火發煙氣蔽霄而守賊不亂復放銅礮斃其賊目夜三鼓賊大至由溝中直撲山營火彈及營中五營並出禦之槍礮兩集晦暗中見火光射賊身紛紛倒地後賊竄出前賊誤爲我兵截其歸路挺矛對刺死者益衆時賊中食充物乃謀於寨南控長濠斷其接濟二十八日復進攻蔣東才由東北陳祿興由東劉進貞程明禮由西北張倫興由西南約以火箭三發爲號各隊齊進諸將士或至外濠或越重濠已登梯近堞口寨內寂無人聲俄

頃間刀矛森列火光如晝槍礮磚石如雨發我軍死亡相繼耕雲等急傳令收隊先是蔣隊將登賊死拒絕而下與蔣相持蔣乃佯退賊越濠追之蔣反鬪陳祿興壓東門截歸路蔣東才袒而大呼與所部壯士攢矛刺殺數百人賊稍懼十月初一日復進攻邵春仁左成元皆受傷春仁中鉛子從右後肩入流至脇下明日賊毀我土山於是益增設礮臺三面環攻期必克會劉狗以馬步賊二萬餘來援將至圖塔納慮諸將不足恃令全軍徹馬牧候進止十三日陳祿興

行 卷四
二
蔣東才程明禮劉進貞四營先徹賊馬大至各隊均
有失傷邵春仁敖天印張倫興營不徹賊撲之我軍
斃賊五百餘其夜賊占各空營敖天印邵春仁等復
率衆逐之殲其醜敖天印血戰亦幾殆是役以徹隊
故爲賊所乘諸將知徹隊非耕雲意乃益暱就耕雲
稟號令耕雲乃令其材官王廂出募死士八百人散
伏於各寨擊樵蘇賊賊益無所得食諸將又出隊襲
之賊乃留常立升等以數百人戍金樓餘悉退邵永
清死寨中以其弟妻邵姚氏爲女酋嫠也當圍之將

該悍賊王明已挈衆遁回奶奶山苟援賊不至卽至而我營不徹稍持寨已破矣十一月復經營舊壘爲進攻計諸將鑿冰累土幾屢爲賊乘僅乃得立張倫興獨身馳覘賊爲賊所獲王雙樓寨首王冠山死其母居之爲宋喜元所紿奪其寨與金樓相倚角賊遂復熾同治元年二月科爾沁郡王僧格林沁率師至宋十八日出隊以炸礮攻寨毀西北角牆三段賊立八卦旗志甚得無餒意王怒撻礮兵或曰八卦旗所爲豈其然哉宜賊黨之爲所惑也二十三日復轟塌

賊牆十餘丈二十五日亦然二十六日進攻邵春仁復爲礮子所中劉進貞亦受傷是日礮發子落寨中風烈火起延燒數時始熄計所焚燬當十之六七諸軍爲重濠鹿角所阻猶不得進僧格林沁毛昶熙各率所部日親至寨下督戰愈力賊堅守如故留尹耕雲駐前敵任以巡察諸軍事日有戰狀不具載四月二十八日耕雲率小隊數十人巡哨至陳祿興蔣東才兩營濠上夜大風晦黑無所見忽成者然噴筒光徹濠外見披髮者林立繼復然睇之皆賊也賊疑我

覺乃大譁聲震數里守者愕眙相顧失色耕雲下馬
坐胡床止戍卒無錯亂先以手槍轟擊急調礮礮至
復擊之前賊仆後賊猶不退侵曉乃悉遁回寨是夕
苟無警備圍局將大壞蓋士卒久戰疲乏多困殆所
樹鹿角皆繫鈴悉爲賊拔而一無聲聞異矣賊由是
無出意降者日衆五月二十八日方合諸將圍偏有
羊角風起西南大可數十畝上亘霄際或黃或黑如
浮圖然至寨門數激蕩而後入入則冪全寨並圍師
於黑氣中咫尺不可辨久之乃移動出寨東門風沙

隨之極目力所至終不散至不可見而後已是日我軍戰無功圖塔納先已赴南陽總兵任故僧格林沁毛昶熙獨以諸將不力責尹耕雲且令諸將各具狀期以三日破賊耕雲集諸將告之願以戰不力爲己咎諸將皆憤請一戰以死至三十日兵悉傳塞外一鼓而登遂下之守賊猶巷戰時許盡殲之部姚氏爲軍士所殺獻其首尤本立自縊死部氏少子年十三率至見諸帥無懼色引頸就刃計所殺千四百餘口

金樓平

豫軍紀略卷三

土匪一

白粵逆陷金陵犯河南中州土捻乘間竊發所在蓬
起咸豐三年二月歸德府屬之永城縣有大股土匪
嘯聚薛家湖馬頭寺等處肆掠巡撫陸應穀檄中軍
叅將崇安開歸陳許道林揚祖督歸德知府陳介眉
及永城夏邑虞城各官弁分路捕勦先後擒斬著名
捻首陳毛等九百有奇六月南陽府屬桐柏縣之黃
岡一路復有土捻聚衆滋擾署知縣潘樹霖會同城

守外委率兵往勦賊據山抗拒施放槍礮潘樹霖策馬直上中槍陣歿外委受傷落水南陽知府顧嘉蘅檄經歷婁鼎亨率勇赴援不及時賊官爲首之賊尙不得主名陸應穀在鄆城行營據報以聞因檄南陽鎮總兵柏山移師桐柏會合顧嘉蘅勦捕別檄巴里坤總兵經文岱河北鎮總兵王家琳追勦粵逆請調陝甘精兵四千名來豫以三千駐歸陳以一千分駐南汝 廷議以陝甘官兵援勦河北不能分撥命咨商陝楚就近酌撥於是正陽虞城永城夏邑沈邱

諸縣揭竿並起六月二十三日正陽土匪糾衆突至圍攻縣城爲守城官弁擊退斃執旗匪目餘竄距城三十里署知縣周玉瓚以狀聞且言匪衆欲擾汝甯郡城時汝甯兵勇不多陸應穀檄知府廖牲募勇六百名紳士葉道垠武生王平募勇五百名派前歸德知府陳介眉已革鄧州知州徐柱臣管帶會合汝甯叅將伊里綱阿官兵四百五十名分撥防勦復咨調經文岱督帶叅將慶瑞回援正陽而虞城復有大股土匪圍繞縣城焚燬居民屋舍永城散匪復聚中有

周天爵行營散勇曾歷行陣槍礮器械畢具勢益剽悍光州屬之固始境亦有息縣捻首任二皮等糾集皖捻竄入搶掠勢將攻城虞城縣知縣張慶元永城縣知縣王樹漢固始縣知縣朱士廉各狀報請兵甚急陳州府知府朱帥濂狀言沈項交界之槐店有大股捻匪劉元吉等竄踞開封府知府賈臻狀言皖捻出沒不時欲至周口搶糧南陽解饟委員狀言確山老君堂有股匪樹旗阻運道山西殺虎口副將德克津布北樓營叅將丁存英以赴勦正陽經項城八里

夏地界軍火車爲賊所掠奏叅摘頂仍責令追捕自效於是陸應穀疏請旋省布置援勦事宜檄柏山赴固始堵勦已革兩廣總督徐廣縉及山西甯武營叅將苗樟赴歸陳勦捕而以正陽竄匪責成叅將伊里綱阿會同汝甯府知府廖牲勦辦桐柏餘匪責成南陽府知府顧嘉蘅率屬摻捕時夏邑捻匪以七月初八日竄犯縣城知縣徐本立自率兵役禦之令武生馬殿安等以鄉勇襲其後賊列陣抗拒相持自辰至酉兵勇奮擊斃賊首及夥黨數十猶死鬪因以大礮

轟擊斃匪三百餘生擒三十九餘衆始潰奪獲佛郎
機大礮三獲賊訊稱捻凡七股散首駱化南冉柱張
莊總首路舉均死於陣云沈邱捻匪劉疙瘡等以七
月十四日竄入劉莊知縣馮諫率兵往捕匪衆拒傷
鄉勇馮諫身被數創猶力戰以匪將襲城始退守經
文岱先得報令副將春明叅將慶瑞率所部急馳往
援已革叅將達凌阿帶兵繼進慶瑞等既至城捻首
侯姓率其黨逼城下以雲梯仰攻慶瑞親放大礮斃
侯賊奪獲雲梯十四具賊始退適項城知縣沈棠帶

勇赴援十六日與達凌阿會合抵柏樹林擊斃賊四十餘擒擒首劉元吉趙肖賈大小擒夥孫申等立斬之餘衆南竄歸陳之匪一創於夏邑再創於沈邱凶鋒稍挫陸應穀旋省據白其事因言歸陳爲南路門戶匪股衆多兵力不敷防勦歸德府城僅有游擊常有官兵一百名泰將樂貴官兵四百名沈項二縣本有山西存兵八百名近又抽調三百名赴汝甯徐廣縉苗樟所帶兵勇僅千餘名所請截留副都統托雲保管帶之吉林兵七百餘名已奉旨留於河北

軍營並托明阿留防永城之綏遠城兵五百名亦調赴河北陝楚乞師皆以不能分撥咨復省城存兵不滿二千行營鄉勇僅四百兵單賊衆請仍抽撥陝甘精兵四千並托雲保一軍來豫會勦而各省大兵方聚河北懷慶城圍未解畿輔扼重河岸設防勢難兼顧一隅議遂寢七月陸應穀復至汝甯巡視河岸旣訖事檄署廣西游擊常啟雲署山西叅將蘇林游擊德興額帶領兵勇先後馳赴歸陳聽徐廣縉進止八月初三日有大股捻匪乘夜冒難民闌入夏邑縣境

將攻城知縣徐本立謀知因督帶兵勇迎截立斃賊二百餘生擒賊二十餘遂逃散同時歸德屬境之馬牧集牛王垌諸處著名擒首宋喜元等各糾黨分踞滋擾知府王憲狀聞徐廣縉檄夏邑虞城及江南碭山等縣營約期會剿初十日徐本立以勇從徐廣縉進至三官集遇賊迎擊戰一時之久徐本立密遣練勇楊無黨等繞賊後夾攻斃擒首司喜號南面大王及夥黨二百餘獲賊謀鞫知另有大股將乘虛襲縣城徐本立因率所部急馳回縣令生員彭作元武生

馬殿安等分路伏自率前典史周爲芬督兵前進三更時大股賊千餘蜂擁竄至槍礮絡繹釋我兵佯北誘賊近城伏兵起併力兜擊殲斃約三百餘落水溺死者不計其數生擒擒首司慶雲等及夥黨四十餘奪大礮四餘賊竄逸馬牧之賊爲徐廣縉王憲等勦敗十二日追至夏邑境鄭家集陣斃百餘生擒擒首李大漢等千總張慕松手擒著名擒首姚廣德奪獲重五百斤二百斤大礮四十四日追至牛隄圈復斬擒數十匪竄碭山爲碭山兵勇擊斃百餘生擒二百餘

獲巨擒首盧四等餘衆四竄其躡入商邱者爲代理
知縣陸成沅署典史陳必受弋獲巨擒田谷禮等方
賊之戰於鄭集也徐本立以兵來會至李亢集遇大
股擒匪擊退之格殺二十餘生擒劉興傳等焚其巢
周爲芬偵知駱三羣等盤踞張家花園因會營馳往
設法捕勦賊恃衆抗拒兵勇受傷益死戰斃夥黨二
百七十餘生擒八十餘遂獲駱三羣等奪大礮旗幟
以歸是役也斬獲通一千七百餘著名擒首四十渠
魁略盡匪始震聳奏上請錄諸將士功 許之陸

應穀移營彰德以粵逆自懷慶解圍竄山西復至直隸故北路戒嚴先是武安涉縣山中有土匪乘機蠢動候補知府何懷珍署彰德營叅將全福奉檄以兵勇三百名往既以次捕獲懲辦至是復令庶吉士傅壽彤會合何懷珍帶勇五百名署內黃營都司陳楚書帶本營兵二百名駐楚旺署陝西副將春明帶陝甘兵一千二百餘名駐豐樂鎮彈壓備防請截留陝甘總督舒興阿所帶陝甘官兵二千不報九月二十四日內閣奉 上諭褫河南巡撫陸應穀職授山

東按察使英桂爲河南巡撫英桂以十月初四日馳抵汴梁受巡撫事 上命英桂徐廣縉進駐蒙亳

英桂以徐廣縉籍隸鹿邑素爲鄉里推重半載以來勦捕得力請留豫勸諭倡練資熟手 上從之河

南學政張之萬疏言沈項匪狀請飭新任巡撫嚴加考核察吏安民以求治本 上以疏示英桂始河

南藩司鄭敦謹督辦琦善糧臺駐宿遷及是趣命回任而以江南藩司楊能格代其事復命署臬司牛鑑交替印務馳往陳州會同徐廣縉專辦勦捕擒匪是

時豫省土匪自陸應穀調派官兵
跡惟確山之溝竹復有匪衆嘯聚
尤道麟泰督兵往捕至信陽五田
等屯聚卽督州營密往擒捕獲牛
風解散歸陳本境匪蹤稍戢惟
劉疙瘩等猶出沒沈項固始間
官兵亦時出境勦捕云四年二月
蒙城亳州竄陷永城夏邑回竄
土匪乘間復起徐廣縉應援夏邑

殺百餘生擒二十餘軍始得進是月二十八日沈項
擒匪千餘焚掠恣擾牛鑑率兵往勦擒斬甚衆比收
隊忽大股七八千自東南虜至我兵猝爲所乘傷亡
弁兵百餘壯勇十數十七日牛鑑偵知大股聚沈邱
之榮樓葺食以進旣至賊阻河抗拒我兵奮擊敗之
十九日追至李橋二十日至韋寨戰皆捷生擒擒首
劉東舉榮魁元等先後斬殺凡四百餘奪大礮刀矛
無數焚燬賊巢十餘所時方得 旨命牛鑑駐潁
州英桂疏請緩之永夏商鹿之匪益橫總辦團練太

康知縣祝塏激勵柘鹿永夏睢州甯陵諸邑紳庶輸
資募勇得二萬餘人竭三晝夜力奮殺窮追所戰皆
克斃悍黨千餘斬擒著名捻首宋書太周保善方鐵
頭姬連科朱洪得藍悅劉秉堂等盡犁其穴得大礮
三擡槍鳥槍等械地方漸以肅清南汝所屬自英桂
帶兵防堵隨時捕獲李在智王十一孟三等及餘匪
不下千餘皆寘諸法至是汝陽羅山正陽確山新蔡
信陽遂平等州縣先後擒獲首夥復二千餘署汝陽
知縣張紹英羅山知縣鄭元善署確山知縣黃衡偵

知擒首邱包張麻海鄧羸子劉文煥王殿成夏第四
于獅子范守信夏富沅張又周趙恩高何小毛何春
明盧羣李士道張格拉王記吏薛狗娃楊銅錘等嘯
聚訛搶諸不法狀因各率兵往捕計生擒四十餘凡
所斬殺亦四千有奇云六月上牛鑑等功加牛鑑按
察使銜餘升擢有差湖北捐升知縣廖慶謀以能練
勇勦匪奏留差遣七月署正陽知縣劉鴻勛捕獲沈
邱圍城擒首劉疙瘩楊倫署信陽知州袁詵捕獲桐
柏戕官擒首并世法并世魁並寘諸法驛聞十二月

上歸陳勦捕功

賞王憲花翎交軍機處記名遇

缺簡放代理商邱知縣彰德通判陸成沅等十八員
廣西游擊常啟雲等十九員紳士大挑候選教諭謝
謙等五員各進秩有差徐廣縉陳介眉祝塏功論最
陳介眉格吏議不得上徐廣縉以張之萬疏劾畏蒞
祝塏爲蒙亳民訟其越境恣殺方察治故皆不與按
擒匪蘇添福等數擾永夏爲祝塏所敗直傾其巢斬
殺過當所焚村莊屋舍甚多於是蒙亳間民有訟其
妄殺者論者或言皖擒本皆有室家以時出掠至是

寢成流寇未始非操之太感有以啟其覺端而商邱
武生李景瑞等復具呈都察院上祝壇迭次勦賊諸
功狀言匪情畏憚始倡言尋仇冀惑衆聽徐廣縉爲
賊所紿當祝壇勦辦得手之際輒檄調回豫且多方
沮尼云兼以狀抵學使者故張之萬劾徐廣縉畏蕙
不前論訐紛紜卽當時已見聞各異矣

土匪二

五年四月楚省官兵迭挫所募豫勇潰散潛回汝陽正陽確山息縣結捻肆擾所在州縣弋獲寘諸法散勇易添富林其賢朱明義等本著名巨捻至是糾衆於汝陽縣之馬鄉集遇調防外委陳大德呂作相劫奪軍裝器械詐稱官兵以二十日竄至息縣之烏龍集嘯聚光州州判駐烏龍集署州判汪兆琛率丁役往捕爲賊所戕署光州知州周注都司汪長清以兵進抵馬家集與代理息縣知縣劉宗岱會合二十二

日馳至烏龍集之任家堰猝戰失利兵勇傷亡甚多
時賊裹脅已衆聲言攻城周注劉宗岱各馳回戒備
息縣城久傾圮劉宗岱率勇駐東關堵禦二十五日
賊至勢張甚兵勇不敵劉宗岱中槍落馬賊擁入城
放獄囚肆焚掠汝甯府光州各請兵且言南陽鎮總
兵邱聯恩素爲捻憚請飭赴息勦辦巡撫英桂據報
以聞因言湖北巡撫楊需遣弁來豫募勇並不知會
地方官一律給予路票以致漫無稽考易添富等會
經充勇打仗與尋常土匪不同因飛咨邱聯恩移師

光息令河北鎮崇安帶兵五百馳赴南陽會同雲南
臨元鎮總兵慶德防堵先是英桂檄候補知府何懷
珍候補知縣廖慶謀守備百順山東曹右營都司盧
佑清等各帶兵勇赴光協勦廖慶謀馳至息縣會合
汝甯府通判耿潛脩搜殺匪夥卽日克復縣城匪因
西北兩路官兵阻截悉向東南分竄二十九日戌刻
至光州城下署知州周注率官弁紳民守禦匪衆環
攻兩晝夜各路援兵漸集擊殺悍匪數十城上礮斃
十餘始敗退竄光山大埠口署知縣張紹英方截殺

間賊忽梟水由間道闌入縣城會邱聯恩率廖慶謀及留豫縣丞張曜馳至與張紹英合隊圍攻廖慶謀勇隊進攻北門獲勝繞攻西門斃賊百餘匪衆負隅死拒英桂復檄南汝光道邊浴禮馳往會合邱聯恩等伺賊守懈於五月初八夜令廖慶謀張紹英率勇由東面缺城突入廖慶謀奮勇躍登大呼殺賊匪衆披靡我兵乘勢擊殺餘衆倉皇縱火奪門而逸縣城克復邱聯恩謀知賊向東南恐其由墨斗關新店一路復入楚境因自率叅將成景知縣廖慶謀乘夜急

追留都司穆奇賢駐守初九日追至文殊寺賊方與
何家坂團勇接戰我兵繼至邱聯恩揮令廖慶謀率
隊繞前截擊自與成景攻其左右立斃百餘賊向西
大山之鳳凰頭奔逸據山頂陳家寨槍礮滾石如雨
兵勇奮力仰攻斃其紅衣賊目餘衆驚潰追殺三百
餘生擒數十比及河盡棄槍械衣履梟水遁我兵渡
河復多所擒斬時已昏暮始收隊賊竄羅官店忠心
店其地直達羅山邱聯恩恐乘虛襲城因令廖慶謀
乘夜率勇繞赴羅山前自督兵逐北初十日抵孫鐵

鋪知已由竹杆鋪北走至河口寨爲署羅山知縣鄭元善截殺復竄息境爲兼理知縣耿潛脩截殺殘敗僅百數十人向東北鄉竄逸至包信集糾合散黨勢復振英桂以捷聞劾劉宗岱張紹英奪其官周注汪長清均革職暫行留任學政張之萬亦疏言始臣按試光州尙無匪蹤及試旋正陽息縣新蔡諸境匪已充斥使地方官加意勦捕原可卽時撲滅乃遷延月餘竟至愈集愈多卽聯恩鄭元善廖慶謀皆賊所素畏或居要地或任邊防不能兼顧匪遂益無忌憚州

縣雇勇多出臨時更難得力請分撥高唐奏捷奉

旨援楚之師二千名派大員管帶先由光州一路
剿滅此股再行前進 上以疏示巡撫詰責遷延

貽誤之州縣會劉宗岱等被劾邱聯恩等已檄調進
剿旬日間克復兩城事乃解時易添富在阜陽之艾
亭息縣之長陵糾衆數百將應援各賊林其賢在包
信集邱聯恩廉知急率廖慶謀張紹英分三路進至
包信斃賊數十匪遁集東三十里之黃胡店十五日
追至搗其巢斃賊六十餘首惡林其賢受槍傷匿禾

黍叢中武生姜作新文生彭長庚獲之梟其首十八日賊竄李莊橋十九日至三義廟皆爲廖慶謀勇隊所及斬殺過差二十日黎明至洪廟適邱聯恩邊浴禮周洸張紹英金朝棟鄭元善耿潛脩錢鏗各以兵至獲逆首王黨悍目梁小振葉路熊儀厚等二十四日逆首羅苗意與其夥黨潰圍出至馬鄧時深秋高粱徧地賊恃爲隱蔽我兵追及格殺四十餘生擒羅苗意王燦余小介彭墨王春江文西王喜道王東河等無漏網者於是易添富股匪首從各逆斬擒略盡

奏上請錄在事員弁功

許之英桂以易添富朱

明義尙未獲購之益急於是新蔡知縣馬筮乾弋獲
朱明義汝陽知縣金朝棟於汝陽洪廟率同勇目喻
洪安團長龐豁然捕獲易添富朱明義自殺不殊鞠
實卽其地正法檻送易添富大營凌遲梟首傳示以
徇按易添富本李士林夥黨李士林投誠充勇擊之
入楚迫李士林陣亡易添富等無所隸遂遁歸爲亂
朱明義本名朱貴充息縣役夙與皖豫諸捻匪通當
城陷時密結李士林之父李際田代書周之翰爲內

應罪惡綦重故皆置極刑檄各州縣擿拏餘匪於是
羅山知縣鄭元善獲任畚子趙麻子姚喜鮑等復獲
息縣監犯劉協堂及其子劉牛賊之攻城蓋劉牛陷
致云汝南通判耿潛脩獲王澱魁李拐張秉魁梁永
城孫亦仁曹汶岐等光州知州周注獲王鳳安韓春
等光山知縣張紹英獲羅山巨捻趙廷羣信陽淮甯
沈邱項城商水永城夏邑光州息縣光山羅山汝陽
遂平西平新蔡正陽確出各州縣先後獲攻陷光息
捻匪徐小洛楊小振彭二得等巨捻張瑞明及夥匪

祁紅磚劉安仁陳贏子徐小道王二雙刀郭勛周攻
劉紫軍馬強姚羊李大元韓谷子楊老小王闖王文
元任成沈月楊翠庭劉馬徐添賜羅漢定桑玉朗阮
馬等歸德知府王榮第在永亳交界渾河集獲潘逢
春等夏邑知縣郭鳳恩在寶鞍山獲呂西等邱聯恩
蒯賀孫周泚獲巨捻黃五雷蘇明義彭希孟等新蔡
知縣馬筮乾會同廖慶謀張曜在新息交界桃花店
獲捻首徐堡棚及齊鼇梁載滌于善國等又在西岩
獲易添富之姪易道貞廖慶謀復獲王路田玉脩張

羸等潁州知府陸希湜偵知趙集聚匪將渡河侵犯
阜陽卽率兵迎擊獲李洪鈞辛二等叅將慶瑞在烏
龍集劉家溝獲劉成貴等卽聯恩在己信集督固始
縣丞達德獲史國勤等復續獲易宗泰等邊浴禮獲
息縣戶書王永璣及通捻之翟振翼馬騰龍皆易添
富羽黨或奉 旨嚴擊之犯訊明皆寘諸法於是
南汝光肅清是役也通計擒獲不下千餘斬殺不可
勝算卽聯恩廖慶謀之功居多按察使銜牛鑑以老
病乞休 上許之命前福建按察使徐宗幹赴豫

幫辦勦匪事宜云六年四月上勦捕功 賞金朝

棟花翎知府用鄭元善花翎同知直隸州用廖慶謀
同知直隸州用馬筮乾同知用張曜知縣用山西潞
澤營參將慶瑞副將用汝甯營參將成景藍翎紳士
翰林院庶吉士盧士杰授職編修勇目喻洪安之子
喻協中藍翎把總用餘文職汝甯通判耿潛修等十
四員武職佐領松志等三十六員紳士戶部員外郎
劉尙書廩生王受誥等十七員各進秩有差復周泮
汪長清官易添富既平之後十一月復有散勇滋事

湖廣總督官文咨言軍功向憲章張玉桂耿立功等私將遣散各勇招集千餘豎立旗幟偽造咨文護票聲言赴安徽投效由河南魯山一路赴潁州恐沿途肆擾知會飭屬查拏尋據報商水縣有湖北散勇黃秀仁等四百餘人恃衆毆傷丁役撞門爬城奪船東走知縣張冲魁追至周家口察知非向憲章等而凶橫實甚縣役趙沅會爲所拒殺受傷多名適淮甯縣知縣王樹漢率團踵至擊斃數十落水溺死者亦數十焚其舟餘衆向東南潰逸新野縣有投誠川勇數

百由唐棗交界襄陽鄆家埠口諸處闖入所至焚劫
至水臺村爲舉人吳怡集團格斃五人傷四人知縣
倪正盦率勇繼之匪乃遁走鄧州旋出境巡撫英桂
請 敕下湖廣總督各統兵大臣嗣後遣散各勇
先以尺籍注姓名歲貫移會經過省分及原籍地方
稽考 上是之六年遂有襄匪竄陷鄧州之事十
月鄧州知州姚慶溥狀言初五日突有捻匪二千餘
竄入州境之構林關裏脅焚擄姚慶溥急以刁河防
勇數百名出城迎敵初七日匪股大至勇力不支退

守州城辰刻匪附城下圍東南西三面酉刻遂爲所陷署南陽知府何懷珍赴援不及賊踞城內外自白洛堰構林關北穰東迤南諸處賊旗林立裏人掠財四鄉幾徧獵及內鄉鎮平南陽諸境郡城戒嚴留防宛南候補道周煦徵亦以狀聞英桂時在鹿邑行營因疏言襄匪闖入豫疆既圍新野復陷鄧州恐成燎原之勢東南勦務方殷無兵可撥請 敕陝西巡撫吳振械酌撥精兵二千隸南陽鎮總兵邱聯恩統帶進勦因檄邱聯恩先率所部赴鄧州會同雲南臨

元鎮總兵慶德候補道周煦徵合力堵擊兼顧宛郡
署陝西巡撫譚廷襄奏派副將龍澤厚帶兵二千赴
宛 上命與邱聯恩會剿兼以匪衆由楚入豫詰
責官文胡林翼等不得以襄樊無事置豫省於不顧
期以三省兵力痛洗悉數殲除勿留餘孽於是邱聯
恩等至鄧州以兵力差薄激勵鄧州新野紳民在籍
知府高振宛等倡輸集團旬日間得衆數萬以初七
八兩日進攻連戰皆捷先後斃賊千餘生擒賊首程
四等州城克復復分派兵勇擊敗內鄉諸境各股擒

斬匪首劉二幌楊九先余富潰周小蠻及南召匪首
僧人覺明唐縣匪首殷四麻子鄧州另股匪首馬四
黑子林大川等匪遂回竄襄陽十一月搜捕餘黨焚
林家扒賊穴斃其黨百餘楚境秦家集有首惡秦大
富等盤踞因率衆進攻斃匪百餘執秦大富周祖惠
等四十餘鞫得破城焚掠狀皆斬之薛家集有分股
肆擾因會合湖北鹽法道常恩捕獲周小麻子王胡
論秦大賓等並寘諸法我軍方由黑龍集都司衙一
路前進會隨州大猗趙邦璧藉團練名招集痞匪橫

行鄉里湖北巡撫胡林翼檄叅將文明鮑超馳往捕
治以書來期會英桂檄信陽桐柏唐泌各州縣設防
而令邱聯恩合楚擊剿兼顧豫圍於是陳師境上邊
陲爲之肅清初英桂奏請楚省酌撥吉林黑龍江馬
隊數百來豫協剿楚以並居要隘不能分撥爲詞且
請豫省馬隊赴楚合擊至是令唐訓方率師赴襄樊
七年二月匪由均州房州復竄入豫省浙川內鄉諸
境內鄉知縣楊鏞率團抵禦賊伺隙闖入縣城知府
何懷珍及紳士高振宛高振洛各率勇團馳往會合

楊鏞勦斃匪衆收復縣城卽
時所部不滿二千十四日
數十人追二里許忽左右
顧失色卽聯恩連射數賊
賊騎賊無敢追者旣出圍
人圍拔出之凡數人入輒
易或瞠目立如偶不能仰
竭血冰刀環間索寸許比
涕自責親爲裹瘡傅藥衆

曲集賊聞大懼乃夜遁復回襄陽我兵追至楚約楚
軍夾擊以三月初六日至柏家集痛剿斃賊數百生
擒匪首余學中匪乃四散潰匿龍澤厚一軍時方至
宛初令至鄧州旋復調赴光州惟邱軍往來浙內接
除伏莽而角子山大坪頭匪已日熾十年正月巡撫
英傑請錄員弁紳團功報可

土匪三

咸豐七年三月上匪高汝升糾合張第三等在嵩虛
連界之樓子關明白川滋擾復有另股在嵩縣屬之
龍王廟諸處立大旗持槍礮嚇索錢財署嵩縣守備
吳師顏帶兵往勦匪衆緣山遁至汝源鎮沿途焚掠
復裹脅數百人依險抗拒吳師顏以汎兵寡添集民
勇奮力勦擊賊始退敗追及五里許賊分股由山突
出民勇傷亡甚衆吳師顏請兵勦捕河南府知府樊
琨以狀聞時巡撫英桂督辦三省勦匪事宜駐新蔡

得報據以入奏因言上年襄匪竄擾宛境本地土匪因年歲荒歉乘機竊發什伯成羣南陽所屬各縣訛搶焚掠之案層見疊出延及汝州所屬之魯山陝州所屬之盧氏近則嵩縣又有土匪聚衆竄擾若不嚴行勦捕迅速撲滅必致釀成巨患時兵力悉聚東南西北空虛徵調不及南陽鎮總兵邱聯恩追勦襄陽竄匪不遑內顧團練未成情形孔亟宛南一路岌岌可憂上以嵩縣完善之區豈容土匪肆行焚掠命英桂嚴飭河南府知府樊琨認真督勦迅獲首犯

解散脅從毋任蔓延陝西巡撫曾望顏就近酌派兵勇會合勦辦豫省各屬整頓團練於是巡撫英桂飛飭樊琨督帶兵勇往勦並檄南陽府汝州各率所屬一體堵截匪衆聞官軍且至由孫家店竄入魯山縣境汝州知州程廷鏡率魯山縣文武及寶豐郟縣兵勇迎勦合擊陣殲匪夥張第三等二百餘人生擒陳法清等二十餘人賊衆潰逃裹脅四散餘黨闌入南召縣境知縣符瀚率兵夾擊復斃賊百餘生擒匪首高汶升匪目王明照等並寘諸法餘匪竄逸入山官

軍接捕悉平之二十一日巡撫英桂在阜陽縣驛口
橋行營以聞宛南土匪抗拒官軍自此始宛屬裕州
泌陽舞陽汝屬西平遂平確山等州縣交界之角子
山素有匪蹤出沒號紅鬍子咸豐六年六月裕州土
匪李太春張五禿以年荒失業起意結捻訛索酒食
李太春有捻夥金小毛胡汶脩管紹堂王四劉綜林
邊長太宋五賊張九千歲王月李士旺張澱卿劉漢
元馬祥劉合任隊郭二瘋子陰立子李六麻陳顯明
張滿囤陳永亮曹十一羅秀李二魚陳毛丁射記周

大海許治王文行張蠻子王有合葛才王得成夏振
有石順郭毛鍾穴子鄂中獻關福林石磨頭薛懸李
太生李太祥齊剛胡康劉漣劉萬和萬小四胡堂胡
中劉擗把崔羣忠侯年秀王喜徐汝得楊順蔡四李
塊王四老虎等六十人張五禿有捻夥陳汰安宋老
五王東王寶張海雲鍾汝詳蕭大漢何鼇趙懶秀胡
旺張添成馬汝詳何喜任治禮王得西張十張蝙蝠
趙懶王老九杜得林李七閔王陳月臨張義漬陳濱
李俊黃二袁科崔六崔毛崔林崔忠王缺子胡玉脩

王亮王安楊心田許旺王懸孫驪子曹聚保余和尚
李泳清李幅石振玉王小羊馬有柯位張遂王雙明
溫得金小撓單得舒青山李道史紅青徐圪抵王進
潮等五十八人所至訛索酒食包送私鹽泌陽土匪
王四老虎有捻夥王充李中玉王四麻子李歪嘴李
二膽大傅大傅小麻子李進才買漢林杜大進高平
安趙倫陳坤陳七許連榮馬柱張驪子趙士祿岳湖
名李廣聚楊鐵鍾聶馬娃王烏彭之得李羣李中和
李磨頭賈萬祥劉林許毛陳迷楊松苗興馬洗順祝

成章袁明剛何第四郭金玉婉鬧崔大穩傳來關小
娃李八千歲李膽李蕤鄧林楊清沅張二瘋子張中
和盧振法郭萬興王汝富張萬機李狗李懸屈汝智
步第四徐老五徐老七程懶禿王太平等六十一人
自爲一捻以泌陽兵役查拏圖竄臨汝白沙一帶訛
搶私鹽因與李太春張五禿捻合猶以人數不多添
糾羅禿子李相劉仲陳驟子何全胡第二張潮敬謝
居李搭拉確山王保王全曹孟林李牛陳敬玉三李
和尚吳妮子江義孟第二江明張禮張二皮李大黑

臉茹林郭相喬松喬良喬潰毛麻子劉根唐狗黑閻
立閔明珠許扶許拴等三十五人瀕行時陳汰安管
紹堂又轉糾得不知姓名二十八人入夥於是總二
百四十二人會於角子山以二十七人各持槍刀器
械出山二十八日至裕州之破城楊樓訛索錢食爲
兵勇所逐八月初一日由葉縣新店龍泉至坡臺與
知縣王聯陞兵遇斃陳毛許治步第四楊順初三日
竄至辛店集劫奪號馬兵勇適至棄馬逃入平頂山
煤窰盤踞據窰工潘沅法朱來朱三董可強李明張

四兒王保邢六蔡喜李三搭李洛王青山曹漢沅段
三等十四人逼令入夥背負行李初四日葉縣知縣
王聯陞裕州小賒店外委韓殿元各以兵勇追至殲
其悍夥丁射記周大海羅禿子李相劉仲陳騾子許
毛陳迷何全胡第二李懸生擒婉開匪竄賀家渡口
復追殺不知姓名二匪生擒王汝行楊鐵錘張蠻子
王有合接獲財物槍械午後王四老虎等竄至寶豐
縣強陽鎮迤東之花石嶺知縣唐知銑兵至卽遁夥
衆徐汝得屈汝智劉林李俊黃二袁科劉萬和萬小

四胡堂胡中劉擗把崔六崔毛與不知姓名六人爲
官兵追及悉格殺之初六日至魯山雲臺觀山下劫
行商遂萬全羸馱爲知縣李昌時截回格殺王缺子
王亮王安揚心田許旺齊剛胡康李六麻劉淮陳七
杜大進及不知名十餘人生擒關福林王青山舒青
山史紅青李三塔袁明剛李洛董可強李明馬有岳
潮名潘沅法朱來朱三等匪因分股回竄角子山張
五禿夥百餘竄至郟縣墳頭鎮爲知縣姜麓擊敗生
擒王允李金魁搜獲財物槍械匪因四散巡撫英桂

以聞因檄屬按捕餘匪先後弋獲首夥匪犯王四老虎等提省勘問獄具斬王四老虎傳首以徇餘匪分別絞流杖徒傷病瘵死者勿議是時宛南土匪初事蠢動治爰書者猶按律定擬不以軍法其後始有坑拒官兵之事而陳汰安管紹堂亦遂分股蔓延大肆猖獗矣七年土匪李汰春復糾另股匪首李中顯王二黨等數百人窩聚角子山煽惑飢民勾結散勇時於近村訛搶四月由葉縣舞陽至禹州神屋鎮架人勒贖神屋鎮外委姚中道勦捕受傷知州程估會襄

城營都司瑞林帶兵馳勦匪竄汝州武巡店汝州知州程廷鏡率郊縣寶豐兵勇截勦匪向葉縣確山一路山徑奔竄程佶請兵勦捕時巡撫英桂在阜陽行營飭司由省派撥兵勇四百名檄開封營守備程金陞候補知縣金寶符管帶馳赴禹州勦辦匪衆旋由確山西平擾及鄆城初止數百人及至臨潁東三家店沿途裹脅衆已二千馬賊百餘復由臨潁竄許州之小繁城放火縱掠知州金梁率勇禦之勇役潰散五月初一日程金陞金寶符帶勇追及與金梁會議

初二日進剿戰於繁城迤西堪澗保街頭殲匪數十
餘衆退敗我兵奮追忽另股由西北襲我兵後腹背
受敵我兵全潰程金陞金寶符受傷祥符縣把總王
聰明死之巡撫英桂檄令總兵邱聯恩統帶南陽鎮
官兵候補直隸州知州李徵松募勇五百名赴許合
剿奏請將前調來豫之甯夏官兵四百名截留赴許
時南召內鄉鎮平交界之大坪頭復有另股土匪數
百人嘯聚滋事因復奏請 敕下陝西巡撫曾望
顏將調赴竹山防剿之署緩延鎮總兵龍澤厚一軍

飭回宛郡勦捕均得

旨允行五月檄按察使周

士鏜出省督辦十八日匪衆二千餘由西平竄泌陽
之牛蹠街知縣鄧國樑敗之斬擒百餘是日復戰於
老君廟陣斃二十餘擒斬匪目李祥蔚明尉十九日
鄧國樑駐沙河店匪衆分股來犯兵勇奮擊卻之二
十一日竄至確山之三尖山知縣姚鉅會合泌陽兵
勇截賊於樂山頂獲夥匪陳四麻子等立寘之法二
十二日候補知府葉法帶兵由西平之窪張分路進
勦匪竄錢店我兵追及陣斃數十匪衆越山東竄至

走馬嶺田北城諸處葉法由窪張會合西遂泌三縣
練勇偵知匪首任墜率黨百餘距窪張三十里之火
神廟盤踞因分兵襲勦戰於小頂山擊斬之擒許旺
女匪康李氏並寘於法遂平知縣金益謙諜知匪首
皆在泌陽遂平山中因以二十八日率練勇入山搜
捕約行二十餘里遇股匪數百兵勇奮擊匪亦力拒
自辰至未連接七仗斃匪百餘殺黑旗賊目追殺至
泌陽縣之大嶺適葉法以兵來會二十九日復夾擊
連勝之於北山溝起獲槍礮百餘適分股匪首許五

率黨二百餘竄至葉法令程金陞金寶符及前襄城知縣余錦淮分路擒捕獲許五斬之餘衆斬擒過半賊以我軍連日急勦因先據山下牛角溝恃險抗拒連開大礮程金陞金寶符西平知縣高慶頤各以兵進攻賊退守回馬嶺官兵逼至嶺下連環轟擊相持三時昏暮收隊甫抵牛角溝賊突下嶺呼殺我軍嚴陣待俟其逼近槍礮刀子奮力轟擊匪衆大敗死者枕藉自是不敢輕犯我軍臬司周士鏜由舞陽進駐窪張議以角子山袤延三百餘里闊九十餘里自舞

陽以南泌陽以北東界西遂西界裕葉重山疊嶂路
徑紛歧賊倚山爲巢非附近民團山行路熟導兵深
入不能窮搜請酌留兵勇防堵寇張而親率各隊入
山搜捕匪知南北兩路兵集因圖西竄周士鏜派兵
先至舊縣迎堵自由窪張節進窪張以西山路陡險
我軍魚貫而行比至賊已竄竹園爲裕州團勇所截
殺乘夜竄踞小頂山裕州知州李蓉鏡斬其紅衣賊
目吳毛追至牛心山斃匪十餘落崖死者無數由黃
莊拐河至核桃園復爲兵勇追殺始向西南敗逸周

士鏜以西路當魯山要道督兵自赴魯山迎截匪因折竄南召境之鐵牛廟南召練勇邀擊未利傷亡數人典史陳福年歿於陣周士鏜急馳往援而匪已翻山北竄我軍由魯山之西馬樓石坡頭岳村諸處追賊至汝州之打魚店禹州之神屋鎮沿途擒斬匪首王九魏根及賊謀王明鄭天等連日大雨山路泥滑我軍冒雨進賊在蔡寺北面山頂搖旗呼譟周士鏜麾甯夏官兵奪路上山靈州營把總杜仕珍戰歿十三日賊竄禹州新鄭交界之風谷山頂周士鏜檄李

徵松帶領淮勇與襄城兵勇進剿管帶淮勇東河主簿彭希良亦戰歿於是匪勢益張周士鏜請添兵助剿省城司道亦以禹州密近省城根本震搖請再撥兵英桂據以入奏祥符營千總王聰明靈州營把總杜仕珍南召縣典史陳福年東河主簿彭希良均贈卹有差至是而前調之署延綏鎮總兵龍澤厚副將閻丕敏陝甘兵四百八十餘名始陸續到營英桂飭令馳赴禹州新鄭與周士鏜會合進剿而風谷山之匪乃分擾禹密六月二十五日竄至汝州登封交界

之白沙溝又折向臨汝鎮鎮與洛陽連境往來大道於是河南知府樊琨謀知賊近率署嵩縣知縣王萬齡帶勇分路截擊王萬齡由閭莊青石嶺疾追至宋家嶺賊回拒死鬪兵勇疲潰王萬齡身受數十創歿於陣萬齡以進士服官河南補獲嘉縣署溫縣所至廉勤有聲至是陣亡時論惜之奏上照同知例從優議卹登封死事團長監生王弼元其子武童王銘閣監生張振綱唐進德從九品閭基田亦附奏賜卹有差於是匪踞禹州之大紅山時大坪頭之匪竄入嵩

縣之盤續溝傅店馬街伊陽之泰山廟上店諸處往來游駛英桂檄副將閆丕敏管帶陝西官兵五百名由鄧州會合候補道周煦徵南陽知府何懷珍河南知府樊琨分路進剿閆丕敏由馬市坪追賊至焦園賊竄伊陽之泰山廟伊陽團練猝不及防接仗略有傷亡裹脅漸多匪勢益熾然猶避兵而行於伊陽邊界此擊彼竄閏五月初四日閆丕敏何懷珍偵知賊聚黃莊因率兵勇急馳直擣賊列陣抗拒我軍連放火箭火彈然燒賊陣火藥轟斃賊匪數十匪欲奪路

東走爲南召練勇所截復折竄南路爲內鄉練勇所
截守備戴大春縣丞溫逢春陣擒匪首趙兆餘賊梟
水逸溺死甚多僅百餘人由山嶺竄越適樊琨率嵩
縣知縣陳時夏帶勇追及是日申刻復戰於飯坡殲
斃數十生擒詹潮等餘匪迸散初五日復接獲逃匪
李窠等先後奪獲槍礮百餘羸馬數十門丕敏等各
以狀聞英桂據以入奏因言大紅山踞匪裹脅日多
頃自禹州新密迄登嵩洛陽境均有匪蹤往來靡定
恐蔓延西路動搖山陝且以臬司周士鏗所帶本省

官兵僅二百名甯夏官兵暨龍澤厚所帶均客兵不相統屬事權不一請將督勦三省事宜暫交副都統銜勝保親率所部赴禹密一路督勦 上從之十

六日匪由嵩縣回竄汝州寶豐葉縣交界之炭窩嶺龍窩山諸處屯踞龍澤厚聞不敏李徵松各以所帶兵勇圍勦賊於山頂拋擲木石官兵不能仰攻因乘勢奔竄至舞陽縣之北舞渡二十日周士鏗會合龍澤厚與賊戰於土山復戰於泌陽之牛躡其時裹脅約四千餘始有馬隊署遂平知縣金益謙泌陽知縣

鄧國樑集團抵禦以衆寡不敵失利八月初九日巡撫英桂自潁州移營時太和沈邱兩潦載塗改由水路以十四日抵周家口賊在泌陽之沙河店周士鏜龍澤厚由洪山進兵會合汝甯知府祁之銓夾擊賊聞官兵將至竄繞洪山迤西晝夜狂駛由窪張東北竄舞陽縣南之窩溝麕聚距城三十里周士鏜等於初九日乘夜進攻賊壘賊竄王店尚店其地西通小頂山南達南陽賒旗店英桂得報急飭何懷珍杜賊西竄周士鏜龍澤厚扼其北犯賊已由裕境小史店

竄楊樓英桂策大兵趨裕州賊必回竄葉魯成尾追
之勢因自臨潁改道駐許州相機堵剿何懷珍以郡
城戒嚴尋亦帶勇回南陽十五日賊掠賒旗店衆約
五六千勢張甚於是英桂親督馬步隊自許州迎剿
二十七日抵襄城賊之入賒旗店也輜重多裹脅衆
因分三股一竄大河屯羊棚汎外委王銘新率泌勇
戰不利與團首貢生郝恆太皆陣歿團勇死者十九
人其二股竄至唐縣源潭鎮放火搶掠知縣任愷偕
湖陽汎外委張祥麟以壯勇八百駐城西四里橋備

賊二十一日黎明馬賊數十騎步賊四五百過河薄我軍任愷張祥麟揮衆擊之陣斃三十餘擒斬常林畢騰程汰宋老虎王五郝鐙兒賊由源潭復與大河屯匪股合併盤踞二十三日邏獲馬賊供稱匪首崔姓派探唐縣城守虛實欲合羊柵匪攻城唐縣兵勇少勢甚急二十六日龍澤厚閻丕敏以兵至城下人心始定賊聞官軍至乃竄泌境之雙廟鎮諸處英桂以賊情詭譎避兵而行必四面鈔擊方足制勝因檄河陝汝道夏雲岫親赴魯山督各縣扼西路汝甯知

府祁之銓赴遂平率各鄉團防東路南陽知府何懷
珍率鄧州勇由西南進合龍澤厚一軍相機擊勦臬
司周士鏜督候補知府葉法帶勇屯舞陽斷其回竄
特飭總管格綳額德楞額副將伊里綳阿雙慶等統
帶馬步隊一千三百名馳詣泌陽迎擊而自駐葉縣
調度策應雙廟之賊忽分四股由唐縣一路焚掠直
至泌陽二十五日圍城放火武生李干城李衛城率
衆伏關廂射卻之斃馬步賊數十城上復開礮轟斃
馬賊數十始敗退去城十里屯踞龍澤厚何懷珍先

後到泌匪由二十里鋪竄高邑王店鄧莊鋪諸處脅從愈多我軍僅二千餘衆寡不敵請濟師時謀聞裕州小頂山另有匪五六百將俟大兵進攻鈔襲我後巡撫英桂以小頂山爲進軍要路卽檄格縹額等由小頂山進兵先除此股再與龍澤厚等會勦泌匪仍飭龍澤厚何懷珍就現帶兵勇偵賊所向併力躡追九月初二日賊由溝竹刑店小常店竄確山去城十五里知縣姚錕嬰城守格縹額等軍至小頂山遇賊殲斃三百餘餘悉奔散葉縣保安驛丞胡慶祺邏執

匪首徐磚頭陳雷斬之初五日格縹額抵高邑與龍澤厚軍合援確山初七日抵城下匪適攻壞北面城門未及進聞官兵驟至卽返旗迎拒格縹額德楞額督馬隊衝突槍箭齊施殲斃甚多賊猶不退伊里縹阿雙慶率游擊冷慶承惠等督步隊衝入賊陣勢少卻復有賊三大股漫山堙谷蜂至接應我軍屹立不動於是知府何懷珍候補知州馬履泰候補直隸州知州李徵松候補知縣王榮烈分東西兩路繼進龍澤厚門丕敏帶兵由城下繞至賊後鏖戰一時各殊

死鬪忽馬賊四百餘橫衝我隊格縴額德楞額各以
親兵張兩翼迎擊先敗其馬賊兵勇益奮匪勢不支
始紛紛敗竄我軍追殺至五里山下是役也斬首一
千六七百級生擒一百餘奪槍礮千餘羸馬二百餘
刀矛旗幟稱是屍藉徧野餘匪六七十越山逃竄確
山城圍遂解我軍乘勝躡追由登秀山直至老樂山
復斃匪五六百生擒百餘軍功李鳴山執黃衣賊首
張景斬之鄧勇杜國楹格死肩輿紅衣賊目王黃衣
紅袴賊目十餘昏暮收隊屯確山城北朱胡同附城

匿賊接捕悉盡格棚額以匪衆被創膽落宜乘其喘息未定併力躡追初八日黎明馳至老樂山胡家廟接捕斬擒七百餘未刻始抵沙河店踞賊數百棄械紛竄奪獲千餘斤大礮一具姜莊追殺至張堂東突有賊數千我軍槍礮環擊復以馬隊鈔其竄路呼譟迎拒追斬數百擒紅衣賊目沈旺曹振清是役也斃匪復千餘奪槍礮刀子千餘餘衆竄入角子山我軍由山口鈔進五里許捕賊二十餘以深夜山徑紛歧未敢深入暫駐沙河店是日敗匪之竄至蔣河者爲

知府邢之銓遂平知縣汪斌才擊斃數十生擒匪首
劉遂等其至上渠下陽者復爲官兵擊斃角子山股
匪脅衆萬餘倡亂數月蹂躪十餘州縣至是始大受
懲創奏上得旨
在事出力員弁俟肅清後彙奏

請獎

土匪四

匪自張堂被創大股越山餘匪四竄英桂以老樂山
徑路紛歧檄龍澤厚由南路何懷珍由北路德楞額
等由中路約會進攻初十日中路官兵入山搽捕南
北兩路失期於是賊復竄遁十二日突至保安驛練
勇失利五品軍功方元燮死之時英桂駐葉縣馬步
各隊悉出捕剿惟餘親兵小隊四百餘令副都統銜
協領庫克吉太率以禦賊適德楞額伊里綳阿雙慶
等追至會合匪不敢戰由裕州郭橋竄花子溝衆二

三千登紅嶺抗拒潛以賊二百伏土山我兵悉殲之
擒其執旗匪目趙林乘勝搶登紅嶺冒雨直進匪衆
於半山搖旗迎拒兵旣交旋敗潰越山奔竄復追殺
百餘至四十里之碾盤莊張堂竄匪之至遂平橫山
者爲知府祁之銓截殺擒劉復義曹拴等至舞陽許
灣者爲候補知府葉法截殺擒李騾子張的蠟等至
姚溝者又爲葉法捕獲張圪意王成等至拐河者爲
魯山知縣高天寵在籍府尹宗元醇候補都司白兆
祥擊敗復於交口大戰斬紅衣賊目六匪夥百餘擒

王二劉五等奪大小槍礮數十刀矛不計其數追殺
一百四十餘里於是由張堂回竄之匪略盡 上
以陝西巡撫曾望顏奏南陽失守詰英桂以籌辦情
形英桂疏連日戰狀以聞因言府城並未失守前調
南陽鎮總兵邱聯恩自潁州來葉會勦至是嚴檄催
之効龍澤厚何懷珍失期請摘頂戴裕州知州李蓉
鏡西平知縣高慶頤堵勦不力請革職留任皆允行
紅嶺之戰生擒匪首梁道榮供言與陳汰安蕭況王
三辦子管紹堂爲五大股旗分五色梁道榮爲紅旗

首初蕭況與皖逆張樂行約欲攻下確山以九月至周家口合捻至是連敗計不得行十六日匪竄南召之曹集復糾合山內土匪二千餘德楞額伊里糊阿等急馳追及曹集在叢山之中因先以兵斷胡盧灣出路揮衆入集斃匪二十餘匪由集後竄入半山我兵銜尾躍登匪衆據高矢石交下我兵蒙木板以進斃賊百餘追殺八十餘奪獲槍械羸馬甚多時大雨如注山徑泥滑我兵亦有傷亡賊遂翻山由黑驪溝至李青店肆掠竄入馬市坪盤踞德楞額等規畫地

勢以馬市坪在略頭溝迤西溝長十餘里寬僅二十餘步三面皆山南面尤險惟東路繞山可以進溝山內溪澗紛纏水深二尺許人馬可涉議令龍汝元冷慶巴揚阿王榮烈乘夜分道潛進設伏馬市坪後時龍澤厚聞丕敏李徵松各以兵來會因令龍澤厚等於南面山後備邀擊十九日黎明大隊由確溝前進節節設伏德楞額親率馬隊入溝誘敵匪衆二千餘迎敵相持未決馬市坪煙燄突起我軍見賊後隊動知伏兵起奮力猛擊與龍汝元等前後夾攻斃匪七

百餘餘衆棄械登山復爲龍澤厚等邀截立斃四百
餘生擒數十追殺二十餘里至石洞嶺復斬首百餘
級生擒陳春王七兒等是日鏖戰五時之久斬馘千
餘奪匪首銅釘甲一銅僞印木截各一羸馬槍械不
可勝計餘匪四散逃竄其竄魯山者爲高天寵設伏
擒陳結生等格殺餘衆竄遂平者爲候補知府葉法
知縣汪斌才生擒衛槎張朗頭等格斃餘匪逃回泌
陽者爲練勇拏獲喬幘保李六雲等斬之於是裕沁
舞確尚有零匪潛匿山內是役也匪衆喪亡幾盡或

言王三辯子已死於兵蕭況於戰敗時棄甲登山死
亂兵中亦難指實我兵傷亡數十人京營候補游擊
龍汝元左手受矛傷直隸候補游擊冷慶左手左臂
受石傷英桂具以疏聞因言臬司刑名總匯地方庶
獄亟須清理奏令按察使周士鏗回省而以所帶甯
夏官兵交龍澤厚統帶其餘壯勇交葉法李徵松管
帶其風谷頂陣亡之候選主簿蘇雲龍保安驛陣亡
之五品軍功方元變大坪頭陣亡之泌陽汛把總張
士位均於事後奏請議卹云初賊之竄擾多在舞裕

平衍之區至是屢爲官兵所敗計窮力竭因謀所以
迂我師者始由嵩縣盧氏入山蓋山徑蜿蜒我軍馬
步不能成列用是遷延裹脅逆餒復張嚮使各練勇
嚴扼要隘不令入山則殘賊無多已就殲滅論者惜
之於是有三川街之戰賊自馬市坪分竄其小股百
餘至焦圍角村官兵追殺略盡其大股數百由嵩縣
孫家店搶掠竄至嵩盧交界之黑峪藥川先是藥川
山中有銀礦數處歷久封禁匪徒時或竊挖近數年
招集亡命漸多賊之始至不及四百糾合礦匪復有

衆八九百聞大兵追至復西竄其地叢山峻嶺徑路
愈窄兵勇皆裹糧攀附而上所至露宿十月初一日
抵欒川聞賊竄三川街奪食以進盧氏知縣黃縉昌
禦賊於白土街戰不利勇役亡潰陝州知州王詒以
兵赴援道遠不卽至初三日德楞額龍澤厚伊里緬
阿由楊樹嶺追賊至三川街三川距欒川百餘里土
壤沃饒地勢稍卽平曠橫徑五六里我軍規畫形勢
先以馬隊由街北鈔至步隊兵勇東西進攻賊殊死
拒我兵奮擊擒其執旗賊目數十斬首二百餘級賊

衆越嶺敗逃追殺二十餘里至八里堂山復斬首十七級生擒匪首崔大標等百餘餘匪僅二三百越山西竄是日奪羸馬百餘槍礮數十刀矛長竿數百抵暮收隊屯營三川街鞠據崔大標供言蕭況在馬市坪棄甲逃至黑峪樂川糾合礦匪復圖抗拒官兵今又被勦窮促其死黨止七八十殘匪不及二百欲自辛科嶺小溝河一路逃竄云賊遞降詞德楞額以蕭況等罪大惡極法所不宥且詭謀叵測不聽請因議令龍澤厚問丕敏由小溝河一路躡勦而自與伊里

綳阿諸將領由黑巖嶂繞越兜擊賊至小溝河官兵
踵至持之甚急賊復遞降詞官兵爲其所給猶豫間
賊已乘間免脫至七里砭朱陽關練勇二百人扼七
里砭賊不得過因向五里川奔逸官兵至七里砭以
書抵德楞額候進止越二日德楞額伊里綳阿雙慶
等由黑巖嶂繞至七里砭與龍門軍會合前進山路
盤折動輒數百里以故軍行濡滯賊之迂我師者以
此於是匪由五里川竄至陝西雒南縣境十二日我
兵追至雒南之灰池子偵知匪衆盤踞陶坪東西兩

山德楞額龍澤厚督兵進擊匪見我軍不敢迎拒遂分兩股一向西南欒莊一向東南大安山德楞額等議分兵爲兩西南爲陝省商雒等境龍軍追勦之於是德楞額等督馬步躡抵大安山時已昏暮乘夜進兵於三更後呼譟登山匪衆驚擾自相撞擊多落崖死者我兵奮擊復斃百餘餘匪越山狂奔比明追及復斬數十此股略盡時十月十四日也德楞額以欒莊竄股較盛龍軍單弱陝境山路益隘恐爲賊所乘因於是日未刻馳往策應比至欒莊始知龍澤厚一

軍出寬坪赴龍駒寨與賊相左而賊衆已於十三日
由樂莊竄至武關練勇接仗失利匪衆遂由清油河
諸處竄擾商南縣城爲守城兵勇開礮擊退始遁走
富水關一路回竄浙川廳境之西坪人數稍衆我軍
星馳前進十七日抵丁河店偵知賊自北山溝竄踞
北峪山時龍澤厚一軍尚未及賊十八日寅刻我軍
鈔進山溝先令馬隊於溝外斷賊鈔路德楞額等親
率步隊驀越亂石嶺奮勇進擊匪衆六七百蜂擁迎
拒兩山飛石如雨我兵連開槍礮斃賊七十餘匪勿

由山後鈔襲我軍爲馬隊截殺始敗退我軍馬步併力衝殺復斃匪數十匪向山僻竄遁時日已暮山深箐密恐有伏賊因收隊是役也兵勇亦有傷亡外委夏青山朱玉魁各受矛石傷獲夥匪于吉鞫稱逆衆因官兵痛勦情急竄避陝境又爲我兵及陝省防兵截回意圖竄擾朱陽關西峽口諸處並以山深路險官兵馬隊不能馳騁惟向山僻處行走俟裹脅衆多或回竄唐泌或駛擾陝境云陝西巡撫曾望顏添調固原官兵分赴商雒兩縣協力堵勦英桂因奏言我

兵馬步各隊自九月初入山追剿馳逐層巒嶂間
每日跋涉數十里或百里不少休息人馬疲乏必須
添派生力軍助剿於是飛檄邱聯恩一軍迅赴浙川
內鄉會合德楞額等相機剿擊時確山等境南路伏
匪先爲汝甯知府祁之銓督率遂平縣捕獲徐毛江
利害王小明劉相一等南陽知府何懷珍督率鎮平
營縣捕獲李朝玉李四旺等魯山知縣高天寵捕獲
常山等署葉縣知縣鈕達璋捕獲劉硬勁等及邱聯
恩兵至復督率地方文武抄剿游擊柏英在象河關

斃匪三十餘泌陽團勇在羊角北山斃匪十餘生擒
楊有書等祁之銓率團在豹子山老君廟溝竹等處
斃匪四十餘又捕獲匪首鄭成功匪夥李二能等署
遂平知縣汪斌才及委員陳宗閔在李店常玉堂等
處生擒杜疙瘩等候補知府葉法督同舞陽縣捕獲
匪首王柱子代理裕州知州韓潮捕獲李禿成等確
由知縣姚錕捕獲陳老九張滿昌等於是伏莽漸清
而邱軍奉調前赴浙川內鄉矣英桂以捷聞 上
以龍澤厚逗留不進遷延畏葸褫其職仍留營自效

土匪五

北峪之捷賊由內鄉竄米岩坪復竄軍馬河皆在萬山叢沓中十月二十五日我軍由蛇峪溝進至黃柏溝突與匪遇槍礮迎擊轟斃數十匪退入溝死拒拋擲木石紛如雨下山皆亂石無路可通我兵因繞越蛇峪由雁嶺溝石坡岬諸處規進獲賊諜鞠稱賊於黃柏溝分兩股一股蕭况爲首由板城至夏管欲竄嵩縣等境一股王三辯子宋魁爲首欲竄伊陽汝州一帶因言王三辯子實不死前獲犯皆妄供云二十

九日我兵追至夏管蕭况已率眾翻北山由青岡樹
葛條爬等處竄入嵩縣之龍王廟我軍卽由慶園追
躡十一月初二日及之於岱青溝賊於南山屯五隊
山口或疊亂石或刨坑坎以限我軍初三日德楞額
等奪路搶登南山斃賊數十生擒于安生等匪退往
北山復追殺十餘以昏暮而止察賊隊人數似稍增
者因鞠獲賊始知有崔狗娃者率二百餘眾新附焉
至是蕭况死黨有三百餘裹脅復六七百約眾千餘
云初七日匪由梨樹街竄至廟灣復至舊縣集盤踞

搶掠初八日我軍追及之由唐嵯沿河鈔至任嶺過
草橋擒斬賊卡夥匪賊退登鷄冠嶺北竄我兵銜尾
疾追匪衆越嶺阻伊河將焚橋阻追路兵至滅火修
橋且戰且進旣渡河斫斬悍賊十餘賊由楊坡嶺奔
竄入溝我軍追至山下德楞額相度地勢山後秋樹
嶺溝長十餘里兩山夾峙因派兵斷溝口親督各隊
分路搶登兩山槍礮轟擊匪衆卻退至秋樹嶺分踞
兩山頂各數百人山後突出悍匪三百餘與我軍短
兵相接各殊死鬪天津勇隊奮呼先登龍澤厚率槍

隊繼之立時轟斃二十餘匪始敗退我軍賈勇追殺
二十餘里先後斃匪三百餘生擒楊陵兒等解散脅
從甚衆是日大風雪士卒手足皆龜裂蕭况率其殘
敗遁至秋爬諸處初九日德楞額率衆追至秋爬賊
方聚食我兵掩至疾擊殺斃十餘生擒二十餘偵賊
由永甯竄逸十二日追至永甯之七里坪永甯練勇
與賊戰各有傷亡賊聞兵至由永甯之龍窩宜陽之
蔡店竄至汝州之臨汝集沿途招集散匪煽惑饑民
復有衆二千餘踞蜘蛛山負隅抗拒其在山下者我

兵追至殲斃百餘賊蝟聚山頂槍石交下德楞額等
謀誘賊下山陽令馬步退屯臨汝集潛於四路設伏
復令步勇數十拾賊所遺槍械誘致之賊見我軍退
接踵而下將近臨汝集二里許德楞額伊里綱阿等
四路伏兵鈔出槍礮齊施刀矛並進立斃悍匪三百
餘餘眾狂奔復踞蜘蛛山我兵乘勢上山復斃百餘
生擒十餘賊南竄觀山是役擒斬共六百餘奪駱駝
牛馬槍矛旗幟甚多委營總蘇克金追賊先登左手
受矛傷十七日德楞額等追至觀山賊屯踞距山十

里之葛料街因令馬隊先由嶺後鈔襲步隊繼進賊見官軍卽由沙菓園竄至寨山適龍門各軍天津勇隊汝州團練均馳至會合四路兜圍登山攻勦時已昏黑瘴霧迷漫賊飛石如雨我兵施放噴筒火彈然燒荒草樹株乘勢斫殺甚多悍賊數百向東奪路與汝勇混合鏖戰互有殺傷龍澤厚等率陝兵奮勇躍登與賊鬪於黑霧中左右衝突斃賊無數把總龐秀文武舉姚必泰劉開源外委李成李莊董積善徐鼎甲力戰陣歿守備戴大春爲賊所得罵賊不屈賊剗

其雙目以火藥置眶中轟死之十八日賊分兩股一竄水磨溝一竄風穴寺德楞額以風穴寺逼近汝州卽馳援而匪已遁由麻溝藍泉寺老山坪至風谷頂盤踞有馬賊四十餘步賊十倍之德楞額令步隊潛伏礮谷間以馬隊鈔擊賊敗東奔伏兵紛起迎殺斃賊八十餘生擒喬仗頭等百餘匪勢潰散馬隊追賊至密縣之苟堂集復斃賊四十餘奪贏馬槍械甚多殘匪僅百餘人跳澗逃逸逆首蕭況李聾子在焉二十日至大紅山寨我兵因一夜急馳百二十里比

明抵佛山及賊陣斬二十餘擒匪目徐炳義等餘匪
五六十徒跣奔逃二十四日卯刻追及柳架山復格
殺三十餘生擒石洪保張林張順等蕭况李聾子率
其死黨數十自禹州分竄李聾子爲知州程信弋獲
復獲李二王雙印朱成等二十二人格殺數十人而
風穴寺竄逃匪股殲除遂盡其水磨一股約四五百
人十九日五鼓竄至魯山縣境脅衆復有千餘知縣
高天寵率團迎擊斃匪三十餘團勇初勝繼敗委員
候補通判汪曦歿於陣英桂得報檄開封營守備羅

仲保督帶兵勇會合葉縣裕州分路堵擊復檄邱聯
恩督兵進剿二十四日邱軍至裕州小史店偵知匪
踞象河關因會合羅仲保裕州知州張應煒葉縣知
縣鈕達璋各以兵勇馳往兜擊匪衆登山抗拒我兵
槍礮環攻斃匪數十餘衆翻山南竄復追殺百餘此
蕭况分股也王三辨子分股由西溝口竄入嵩境之
湯營練勇迎剿擒其夥黨吳觀等旋復失利匪遂竄
入永甯境之程村先是經由宜陽知縣李佺率兵勇
擊之斃馬步賊數十餘復爲永甯知縣張濟截殺殺生

擒尙光澱等追至三鄉鎮而賊由鳴皋折竄伊陽之紅嶺知縣宋豹文蹙之十八盤中斬其執旗賊百賊又竄入汝州確子窰知州程廷鏡會合伊陽練勇復繫擒數十餘匪分兩股各二三百一竄州境之桐樹里陽樓諸處爲河陝汝道夏雲岫擒殺百餘殘匪不多復爲裕州伊陽兵勇追至併力合圍斬擒殆盡一由伊陽之峴山竄至魯山之北致逆首王三辨子在焉知縣高天寵會合把總徐春芳典史吳貢琛團總前府尹宗元醇各以兵勇合擊鏖戰數時徐春芳奮

勇手刃數賊執逆首王三辨子於陣中賊隊大亂投崖死者無算餘衆敗北追殺三十餘里殲除略盡匪首宋魁及張汝化等亦以次就擒首逆解大營斬首梟示餘悉併戮於市人心大快按角子山上匪以陳太安蕭况王三辨子梁道榮管紹堂爲五大股黨衆萬餘前後數十戰殲殄淨盡惟餘數十人竄入南路王三辨子梁道榮已就擒戮其蕭况陳太安管紹堂三人隻身亡命於是英桂奏言西路肅清河陝汝境已無賊蹤而南路伏莽尙多亟應剿滅因令德楞額

等移得勝之師與邱聯恩及地方文武會合搜拏以期淨絕根株無貽後患奏入 上嘉剿捕功開復

巡撫英桂革職留任處分加記名副都統傑勇巴圖魯總管德楞額頭品頂戴黑龍江委營總儘先協領蘇克金副都統銜擢千總銜藍翎魯山汛把總徐春芳以千總儘先拔補並加守備銜予候補通判汪瞰署陝西東江口都司陝甘督標右營守備戴大春陝西署循化營千總保安營把總龐秀文署秦安汛千總武舉姚必泰署定邊營把總武舉劉開源署略陽

把總固原營經制外委李成署鞏昌營經制外委額
外外委李莊西固營額外外委董積善署臨洮營經
制外委馬兵徐鼎甲俱照陣亡例從優議卹有差

上以皖省六安未復霍山繼失舒桐廬鳳徧地賊
巢大軍卽日克復金陵賊必盡趨安慶皖北喫重

命英桂回駐正陽關會合袁甲三扼守要隘英桂
以角子山大股雖就殲滅餘匪回竄入山難保不復
圖嘯聚逆首陳太安蕭况管紹堂尙未弋獲南路代
莽尙多非親督勦辦不能得力請暫緩行 上是

之南路伏匪其著名者如汪明陳國秀崔四等皆各有衆數百出沒不時其溝竹蠟燭山諸處復有另股土匪或二三百或一二百往來游弋英桂慮與南竄敗匪勾結合夥擄官軍及地方文武合力搜捕於是邢之銓汪斌才在母豬峽格殺執旗馬賊三人夥匪十餘人在確遂交界擒張殺曹庭瀾斬陳平及夥匪等在桃溝會合蒯賀蓀擒趙汶沖等五人張應煒在裕泌交界斃汪明股黨李二至等十二人擒王四老虎等三人羅仲保在裕葉交界會合鈕達璋擒郭三

林臧玉來等汝州密縣遂平裕州南陽確山西平舞
陽泌陽各州縣先後拏獲李金聲柴秉魁岳毛劉八
千歲張玉石余盛苗小發物喬二劉喜成趙花狼劉
來余海成袁甲等數十人郝之銓復拏獲巨捻房明
揚王添明等尹第二李歪子郭椿申王瘋子及逆首
蕭况之父蕭第五等何懷珍協同閔丕敏殲除崔四
一股劄賀蒸督率把總石三元在水田山拏獲角子
山首逆管紹堂伏莽漸稀邱聯恩德楞額兩軍始得
專意南竄之匪初南竄之匪由南召拐河圖竄角子

山自象河關敗後僅餘數十人南遁歷賈樓梅林寺
陳溝諸處沿途焚擾裏脅稍衆邱聯恩等躡及匪不
敢拒緣山繞避因令遂平知縣汪斌才率下陽團勇
於陽店一路堵截汝甯知府祁之銓候補知府劄賀
蓀各以兵勇由張堂進擊邱聯恩何懷珍自梅林寺
前進匪衆知我兵四面兜截圖奪路東竄先撲下陽
汪斌才率衆禦之匪退登歪頂山適邱聯恩等各以
兵至斃匪百餘追至大頂山匪衆登山飛石抗拒我
兵奮擊轟斃賊日復追殺翻山悍賊擒擒首張二紅

史玉等賊敗遁桐山經石滾河復爲練勇格殺餘匪百餘奔角子山老巢邱聯恩祁之銓何懷珍等分路追勦十二月初五日至泰山廟賊方造食兵至賊衆潰入大山我兵越嶺急追至牛寨沿途斬殺餘賊越山遁時德楞額自舞陽田北城進兵至大頂山而匪已南竄與汪明股合勢遂復振知官兵大至圖避楚境既至桐泌交界之黃岡爲外委黃懷太截殺邱德兩軍繼至擊斃百餘擒匪首胡倫修及夥黨數十復追至馬谷田復斃數十生擒劉振等而賊遂竄楚境

矣於是英桂檄邱聯恩追剿竄匪德楞額揆捕各山
兩軍遂分奏上揆捕伏匪功祁之銓 賞戴花翎

蒯賀蒸俟補缺後以道員用何懷珍開復失守所屬
處分及原官頂戴汝甯營藍翎儘先把總石三元免
補把總以千總儘先補用而以邱聯恩前調赴內浙
兵不卽至劾其遷延不進 上命摘頂翎示懲邱

聯恩者閩人世襲一等子累遷南陽鎮總兵勇敢有
謀每戰必身先士卒善以少擊多紀律嚴明士卒親
附時軍饑支絀邱聯恩所帶鎮標兵丁饑不時給餼

轉濡遲職是之故巡撫迫於功令雖據事叅劾旋以
討賊任之匪之竄楚也復結黃草坪土匪數百亡命
劫掠回竄唐縣之晒山龍泉寺十九日邱聯恩率知
縣任愷追及匪據山頂我兵奮攻先斃悍匪數十把
總胡鳳山深入陣歿匪衆乘勢下壓邱聯恩親督大
隊搶登山坡鏖戰四時賊始敗遁先後斃匪百餘兵
勇亦有傷亡任愷以練勇乘夜追殺三十餘里生擒
崔二程麻子等以歸賊復竄桐柏邊境黃草坪奏上
儘先千總信陽營三關汛把總胡鳳山照千總陣亡

議卹時六安逆捻句結粵匪意圖北擾徑撲商城之
開順街武廟集竄固始縣之郭陸灘副都統勝保移
軍固始旋馳往三河尖扼堵光州境之大河灣亦有
匪蹤英桂得報復檄德楞額星馳南援奏留經過豫
省赴楚補額之吉林黑龍江餘丁各二百名以資調
遣未幾 上以河陝汝境匪股已就殄滅南路竄
匪無多有邱聯恩一軍揆捕德楞額格綳額所帶馬
隊應移緩就急卽由新息赴勝保軍營復因金陵已
有克復之機攻破後逆眾必圖北竄命英桂親督大

兵前往陳州駐紮爲勝保後路聲援英桂得 旨

督勦益急二十四日賊由晒山黃草坪復至桐柏泰山廟我兵追及陣斬百餘生擒史七等敗匪回竄角子等山邱聯恩德楞額復由泌陽一帶山內追勦沿路均有斬獲汝甯知府祁之銓及裕州遂平葉縣舞陽各州縣先後擒斬渠魁盛第二小王黨屈小發物李盡法等匪勢窮蹙適沈邱項城教匪事起英桂因以餘孽責成邱聯恩會合南陽知府何懷珍督地方文武勦辦而自引馬步各隊赴援光固檄陳州知府

安奎馳赴沈項督各縣勦捕教匪因奏言前留吉林
黑龍江餘丁四百名頭起百名已由信陽赴楚僅留
後起三百名強半無馬軍械亦多不合擬添募壯丁
整製軍火一俟齊集剋期啟程復請將湖北駐防襄
郡之營總舒保所帶馬隊暫調來豫一併赴援光固
均得 旨允行八年正月賊在角子山毛草坪盤
踞時德楞額等馬步已抽調出山邱聯恩何懷珍督
帶兵勇以初二日抵毛草坪匪衆登山抵拒我軍槍
礮轟擊斃其前鋒悍賊勇目侯允升執旗躍登賊飛

石如雨侯允升陣歿兵勇奮呼繼進復斃悍匪數十
匪始翻山遁越祁之銓以兵來會追殺至石灰窰賊
衆正欲上山我軍疾馳遏殺生擒侯成等餘衆星散
追躡無蹤鞫據侯成等供言逆首陳太安因迭次被
勦死黨殲殺殆盡官兵捕勦甚急卽圖遠竄云何懷
珍密遣邏卒四出偵知陳逆潛匿娘娘廟山中因親
率練勇於初六日馳至今候選知州馬履泰帶勇由
東路進試用縣丞恩奎分帶南陽府勇由西路先占
山頂候補縣丞陶鳴遠齎奏官李殿璧直前收捕遂

生擒陳逆械送大營磔以徇按逆首陳太安與蕭况
等各糾眾萬餘分五色旗爲五大股迭與官兵接仗
圍城戕官燒搶劫殺皆其主謀又爲首逆中之渠魁
罪大惡極生民切齒及是凌遲梟示人心大快初八
日邱聯恩等進至鳳凰山與張汝成遇眾約三百餘
望見官兵旗幟卽走遁追殺數十初九日至大頂山
祁之銓率各團勇繼至與賊接戰自己至申歷四時
槍礮齊發繼以短兵斃賊數十餘墜崖死者復數十
生擒馬萬林等於是匪復竄至三寨山占據山頂十

二日邱聯恩等追至四面合圍指麾各路民團密布山麓自酉刻圍攻至三更東風大作月色如晝賊抵死下衝我兵奮擊益力噴筒火彈火箭槍礮順風併發轟斃賊數十墜崖落澗者不計其數有分股數十人由山凹奔突爲何懷珍委員裘德豫等截殺無遺是夜直至天明賊屢突圍均爲我兵擊退至十三日巳刻賊饑凍垂斃我兵乘勢躍登山頂刀斫矛刺擒殺賊百餘竭一晝夜之力悉數殲除外委謝敬及兵丁受礮石傷者十數同時裕州遂平及帶勇文武委

員先後拏獲擒首單第三孔黑子毛八等鞫稱此股
內首犯杜和尚袁第二俱被擊殺惟張汝成竄遁云
英桂以南路大股擒匪俱殄滅因於十八日督兵起
程赴援光固奉 上命駐軍汝陽已而邱聯恩於
北山拏獲擒首李囊子吳石匹等候補縣丞恩奎小
史店外委顧朝選由象河關深入叢山拏獲匪首胡
道元王成等二月初二日邱聯恩至南山復會督候
補縣丞嵇文輅署沙河店外委李廷選等四路窮搜
於白毛塚拏獲匪首萬格疑方馨子尙四老虎等又

於青泥洞拏獲著名巨匪余小毛等同時南陽知府何懷珍及泌陽桐柏唐縣遂平裕州舞陽各州縣先後拏獲擒首呂二郎呂倉晁太運陳四木匠王訓劉遂李在行劉興虎石明玉等遂平知縣汪斌才偵知大頂山石洞中有積年巨擒二三十人藏匿因卽會合營汛督帶勇役猿攀蟻附直上山頂堵圍洞口賊擲石持刀抵拒相持數時格殺悍賊七人執盛毛等十四人斬之邱聯恩等復偵知張汶成帶死黨悍賊六七十人潛匿嵯呀山最高洞中因乘夜率都司柏

英知縣汪斌才等拏至匪據洞飛石拒攻守備王喜
魁外委劉體仁奮勇入斃賊三十餘生擒張汶成及
擒首白添作宗來汪孝烏余水安嬌等並寘諸法而
以張汶成解送大營梟首同時裕州知州張應煒拏
獲擒首史老三董磚頭等署泌陽知縣姚詩雅拏獲
孫小成等何懷珍率委員於許衡山塔山山毛塚各
山拏獲擒首孫小亮及李毛王第二等遂平泌陽兩
縣拏獲匪夥張黨等署泌陽知縣王珠煒委員裘德
豫於石牌山拏獲逃匪華克己紀天斬之各以狀聞

於是北山漸就肅清南山亦無成羣嘯聚角子山擒
股遂平英桂奏上勦捕功南陽鎮總兵邱聯恩請寬
免失守所屬處分 賞還頂翎雲南臨元鎮總兵

慶德交部議敘候補道周煦徵加按察使銜已革署
陝西延綏鎮總兵陝甘督標中軍副將龍澤厚開復
革職處分 賞還頂戴署陝西西安城守協藍翎

副將閻丕敏開復前在山東臨清營降級留任處分
賞換花翎署南陽知府何懷珍俟補缺後以道

員用候補縣丞陶鳴遠免補縣丞以知縣用 賞

戴藍翎齋奏官李殿璧以把總留營拔補僉得

旨允行先是匪竄西路英桂商於山西巡撫恆福得
精兵四百名駐陝州之紅渠平型關都司王琨瑋帶
兵四百駐盧氏至是悉遣還陝西商雒防兵亦奏罷
之檄各州縣嚴捕蕭况期必獲以聞

豫軍紀略卷四

土匪六

七年三月皖捻張樂行大股竄擾方家集圍占淮河衝要糾合南岸另股捻首鄧耀林等爲羽翼汝甯光州伏賊並受僞旗紛紛響應三月汝陽正陽新蔡交界之郭店張岡一路土匪嘯聚汝甯知府祁之銓會同固始縣知縣蒯賀蓀暨汝正新諸縣壯勇合剿斃匪數十擒匪首吳沅鞠言張樂行竄固境卽遣黨糾合趙國梁轉結各路土匪起事股衆甚多云五月正

陽匪首張大安等糾衆數百復句結趙國梁及趙收
趙聳子等在宋家店諸處焚掠知州劉鶴勳會同汝
甯府委員陳宗閔馳勦擒趙收趙聳子劉大安劉包
餘衆四散初五日追至梁家灣汝陽縣知縣唐咸仰
會同委員吳坤昭把總胡鳳鳴先後斃匪二百餘擒
趙仁和紀背張娃等祁之銓及光州知州鄭元善偵
知擒首馬瑞雲盧景運句結另股擒首王添明郭谷
子等於岳城包信諸處滋擾訂期以初十日祁之銓
由汝南埠至岳城鄭元善由長陵至包信會合夾擊

既至馬瑞雲等列隊迎拒我軍奮擊斫殺郭谷子及
餘匪二十餘候補典史陳永清擒馬瑞雲盧景運房
安房上綸委員陳宗閔把總胡鳳鳴復追殺三十餘
擒李大意李小意袁興溺死者甚衆候補知府蒯賀
蓀署固始縣知縣張曜偵知積年渠捻馬顯武率黨
百餘由張樂行股內竄匿固始劉家集因會同候補
知縣廖慶謀密往擒捕匪竄清河集兵勇追獲馬顯
武及馬沅等格殺數十閏五月十七日巨捻王添明
糾另股捻首汪撈託等踞包信集祁之銓鄭元善馳

至斃匪八十餘匪竄新蔡縣境入居民李鳳朝家無
老幼皆殺之兵至賊憑屋以拒兵勇升屋擊傷王添
明執之斃其黨百餘生擒汪撈託等復於包信夏莊
岳城摎獲龔玉瑞等六月偵知房明揚股百餘踞息
縣彭家店急率兵勇往捕二十日至王勿橋與賊遇
勇目李正聲斬悍匪十餘因圍攻遂獲房明揚及周
大倉等其黨王來成在汝新界秦橋屯踞兵往獲之
殲其衆通前後所獲並梟首傳徇英桂以聞時歸德
境文侯馬牧濟陽馬頭寺等集餘匪爲委員候補知

縣馮景等招撫投誠者甚多八年三月匪張傳忠疾先已就撫之傅繼圖魏樹德陰與劉大老淵等約爲兩股一擾馬牧一攻虞城夏邑事洩馮景急以兵往勦獲傅繼周王思賢皆斬之進攻濟陽賊巢捻首劉長安率衆迎拒會商邱知縣施幹督鄉團踵至合擊斃祁五韓連喜魏樹德劉長安孟磨等生擒傅度等火其巢斃夥匪三百餘署巡撫瑛棨以聞於是東南路匪蹤稍斂八年七月湖北棗陽縣境錢家岡有匪三百餘肆擾所在文武擊散之已復聚二十一日黎

明千總楊世澤率兵剿捕斃匪數十以賊衆軍覆死
焉匪因竄楚豫交界之石柱山桐柏知縣張延齡偵
知賊目爲王三義盧汶成李三箇子旋由石柱山竄
豫境張博士店之南山坡屯聚因會合唐縣及固
縣營守備平氏營把總禦諸平氏南陽知府金梁狀
白請兵署巡撫瑛檄候補知縣溫逢春以南陽勇
往復咨令南陽總兵邱聯恩派叅將成景帶兵數百
名馳赴唐柏會同知府金梁勦辦事聞 上命出
境迎擊不得以鄰爲壑於是桐柏泌陽等縣先後狀

言七月二十三日匪竄唐縣之安棚栗園桐柏知縣張延齡會合唐縣及固縣營守備平氏營把總馳往擊剿匪衆登山抗拒山路險峻樹木叢雜兵至不得騁乃添集附近民團匪見我軍盛越山遁兵勇奮追斫殺甚衆生擒楊萬欽等二十八日匪至白馬寺泌陽縣知縣王珠煒轟斃二十餘有騎馬賊目及悍黨數十死拒不少卻記名外委張照魁奮呼突入斬騎馬賊目復手刃數賊始敗退我兵追殺十五里斃賊三百餘擒高祿等餘訊稱此股仗頭繫紅巾爲號總

擒首盧汶成已斃於白馬寺獨李三義及夥黨數十
跳脫云九年四月皖擒竄北舞渡邱聯恩戰歿裕州
泌陽土匪乘機復起裕州屬之小史店有韓八千碎
嘯聚金梁往捕匪竄羊册迤南獲李安娃韓大全等
復竄大寨山裏脅益衆十一日至唐縣雙峰寺爲知
縣截殺擒孫禿子匪因越山奔湖北棗陽境棗陽吏
兵截擊因竄隨州屬之黃山寺金梁會唐桐棗隨兵
勇四路兜剿匪懼乃渙散餘黨入山伏匿旋出獵食
爲隨州團勇擊敗復竄豫省桐柏屬之黃山寺知縣

張延齡會營擊殺數十餘匪翻山遁爲唐縣截殺五
六十生擒劉均才匪衆略盡而股首韓八千碎羅二
花槍仍未獲六月泌陽屬之清涼寺大佛嶺及羊冊
復有匪數百搶擄勒索謀言角子山總捻首蕭況在
焉於是羊冊帶兵委員及小史店汛弁往捕獲匪數
十生擒李繼先孫敬山餘由蠟燭山竄桃花店揚河
諸處盤踞分兩股忽離忽合以誤我軍金梁率勇至
桃花店匪已竄長老院因乘夜馳擊擒郭名節等匪
竄摩天嶺擲石下擊團勇間有傷亡十二日至嵯岈

山之紅石崖金梁率守備根齡汝陽知縣王珠煒追及之斃匪七十餘斬首十餘級擒擒首劉第二等蕭况率敗匪奪路逃竄兵勇追獲柳化染並前所獲寘諸法維時另股擒首同第二率黨百餘滋擾檀木溝遂平確山泌陽各山皆有另股小擒出沒金梁乃率勇回駐縣旗店七月蕭况同第二羅二花槍各以其殘敗往來泌舞確遂諸山泌陽汎弁於老寨山遇賊擊斃十餘七月十一日遂平知縣劉鴻勛於摩天嶺轟斃悍匪十餘蕭况等仍踞險死拒會舞陽兵勇至

合力攻勦蕭况身受數槍率衆逃逸擒韓化龍等南陽府勇復摎獲殷發旺薛麻五等太尉廟小史店鄉團復拏獲徐小毛謝鎖華禮等於是唐泌諸境漸就肅清十月十七日候補知府署正陽知縣廖慶謀會合羅山知縣任愷汝陽知縣沈鳳儀上蔡知縣金寶符獲蕭况於汝陽上蔡交界之任店及其黨薛書刪斬殺數十是役也廖慶謀論功最械蕭况送省城磔於市傳首以徇奏上廖慶謀 賞俟補知府後以道員用任愷沈鳳儀金寶符交部從優議敘英桂引

疾請解任弗許請陞見許之旋授山西巡撫調山西
巡撫恆福撫河南不數月擢恆福直隸總督授瑛棨
爲巡撫十年瑛棨緣公事鐫級改陝西按察使擢陝
西布政使慶廉河南巡撫宛南伏莽時復蠢動五月
竄匪禹法成李喜元陳第四等匪百餘由舞陽竄入
泌陽塔灣莊架人勒贖兵勇往捕旋逃出象河關遂
平之上渠保復有張占鰲等匪二百餘在張堂溝周
莊諸處派飯架人內有著名捻首高撈李合陳麻子
李專等旋踞三寨山頂春水汛弁率隊入山搜捕兵

勇受傷知府金梁選府城練勇馳勦巡撫慶廉檄舞
泌確遂各縣合力堵拏前新蔡知縣周述康都司洪
丹書率羅山練勇三百協勦二十日金梁進至泌陽
羊册鎮偵知匪首一爲李四礮匠一爲關雷方在桃
花店派飯滋擾檄羊册練長候選縣丞呂瓊集民團
隨官軍至桃花店匪已遁侯寨山適泌陽知縣陳村
馨率勇踵至因會合進擊匪衆抗拒轟斃數十乃四
竄二十七日進至尖頭山裕州舞陽文武各率兵勇
來會知禹法成一股已爲舞陽兵圍截擊潰散僅餘

匪黨二十餘人李四礮匠股內於是復窮追至大塘
口獲曹七兒曹紅丙匪衆避兵而行或恃險爲蔽軍
至嵯岬山大雨道滑不能接仗六月初八日匪竄樂
山溝潛伏金梁督隊至山下兵勇奮力攻擊礮斃執
旗賊目餘匪數十相持兩炊許殺傷略相當忽一賊
目往來山頂持矛脅鄉民投石如雨署沙河汛外委
王琦率衆仰攻受石傷甚劇裹創力戰死之匪衆乘
勢下壓我軍屹立不少動分隊出賊旁擊斃賊數十
生擒萬汝魁等比暮賊見我軍隊益整復遁匿裏溝

樂山溝爲確山縣境去城二十許里知縣吳坤昭兵不至金梁狀聞慶廉劾吳坤昭摘頂而爲王琦請卹典議如制六月十二日春水汛外委郭殿成於泌陽天頂山設伏擒擒首張占鼇及其黨馬第五自是賊惟黑夜疾馳忽分忽合忽前忽卻以牽我兵勢十九日委員周述康洪丹書感賊於白毛塚山南坡之南溝時賊衆不滿三百皆屢抗官軍凶悍剽疾猝與兵遇殊死鬪我軍嚴陣待張兩翼包之壯勇數十持利斧直突斫殺悍賊十數賊氣奪兩翼兵繞賊後腹背

夾擊賊四散潰逸是役也鏖戰兩時殲殪甚衆生擒
擒首吳二雙刀夥黨十餘斬首數十級餘衆遁桐柏
交界之龍窩爲鄧莊鋪練長李春平等截殺略盡獲
李四礮匠及其黨張聾子等惟高撈一名免脫慶廉
以此股匪迅就撲滅請錄在事官紳功 許之時
距事起未兩月也十一年五月唐泌餘孽劉象功等
踞唐縣張灣樹旗糾搶知縣高天寵擊敗之斃賊二
十餘擒頭目楊恍奪大礮二餘匪東南竄唐桐交界
之石柱山復有楊五湯匪股數百嘯聚高天寵會合

桐柏知縣恩奎率兩邑鄉團進剿至井樓團衆爲賊
馬衝散桐柏武生梁鳳儀死之高天寵揮勇奮擊轟
斃騎馬賊日生擒龔平匪始退竄時汝甯陳逆方熾
不遑兼顧檄地方團練隨時勦禦而已匪亦旋散

--	--	--	--	--	--	--	--	--	--

土匪七

咸豐七年七月直隸土匪起巡撫英桂以順廣所屬
邢臺內邱沙河臨城贊皇獲鹿等縣均與河南交界
山路紛歧賊易滋蔓檄飭武安等營縣合力堵剿二
十九日亥刻敗匪四五百由磁州闖入武安縣境之
淑村知縣聯魁會同署把總徐紹先率兵勇往捕匪
遁招賢清化諸處北竄西馬頂村武生郭慶祥之父
郭庭蘭率衆堵禦匪衆拒傷郭庭蘭乘勢入村搶掠
適營縣兵役追至格鬪斃匪二十餘生擒王慶先郭

成功匪卽西奔十八盤山竄入山西遼州邊境接獲
餘匪宋占奎韓黑子董安汰王二子楊三札古子王
興倉鞠稱與直隸邯鄲縣人劉庫張老利等結夥會
拒敵官兵云因並斬之八月初六日匪竄遼州之羊
角村其地界連涉縣署知縣管貽蔭先在磁州武安
交界防堵聞警馳至木井村猝與匪遇格殺數賊擒
獲張寬齊二煥子齊增耀郝汰然餘匪越山遁河北
道張維翰署彰德府知府李希彬及武安涉縣各以
狀白英桂檄委試用知府德林馳赴彰德會同知府

羅景恬率屬勸捐募勇設防而令河北道張維翰署
河北鎮總兵伊里綱阿駐境督辦於是地方文武委
員先後拏獲賈之道閭振清王二紅趙三標子宋七
張合等斬以徇十一月初五日復有東省土匪二百
餘由開州闌入滑縣境之劉草坡村渡河竄湯陰縣
境之五陵集由邙城江窩等村及濬縣之裴莊竄入
西山各縣兵勇躡追初八日至林縣之東姚集爲鄉
團截擊乘夜翻山竄往城東村適知縣會營率兵追
勦斃匪十餘匪衆折回南竄湯陰知縣任桂督勇截

殺斃其悍目二遂於初十日竄入淇縣之高村橋旋折向東竄濬縣之廟口諸處署滑縣知縣張仙保會合都司陳楚書出境迎剿至馬蘭斃其騎馬賊目一步匪十餘追及老安鎮濬縣知縣李德坊兵至會合前進直抵開州東明交界之司馬集匪衆正欲覓水渡河我軍乘其半濟轟斃溺死者不可勝計餘匪向開州東明分竄於是外匪遂絕八年二月湯陰縣聯莊會案內逸犯許大賓和尚與土匪郭魁元等糾脅饑民在湯陰縣南鄉夏口等處殺差滋事署知縣顧

守圻會營往勦匪衆逃竄至湯陰濬淇三縣交界之
黑山署河北鎮總兵伊里綱阿檄彰德營叅將穆特
布馳赴黑山後冷泉等村迎勦匪衆逃散僅餘十數
賊越山遁我兵追及降城村擒獲張幗明等斬之時
復有林縣逃匪原思虎勾結山東饑民二百餘人在
冷泉百羅村山後嘯聚滋擾淇濬兩縣會同衛輝營
叅將承聯擊散之河內知縣師長怡弋獲匪黨董玉
合等堂寘諸法本境亂萌亦息方直隸土匪之竄豫
也內黃縣拏獲首犯張汰和械送省城鞫稱籍隸直

隸大名縣與趙三標子魏起順薛四頭程明中薛三
麻子王二紅等起意結捻稔知山西富饒欲同往搶
掠魏起順邀賈之道王二紅魏五等張汰和邀閭振
清等薛四頭程明中亦各糾八九十人趙三標子爲
杆子頭邀史懷亮朱七等十餘人因人少併入張汰
和股內約以七年七月二十六日至大名縣薛村空
廟會齊合成大捻共推張汰和魏起順薛四頭程明
中爲捻首同夥三百七八十人卽日起手沿途殺傷
鄉勇訛搶爲武安縣官兵擊敗逃往十八盤山闖入

山西黃澤關沿途掠獲銀錢衣物牲畜無數拒殺至磁州胡家莊復爲大名道官兵擊敗逃至武安縣漳河灘爲安陽內黃等縣兵役拏獲云獄具斬於市八年五月十五日巡撫英桂因病乞假布政使瑛棨攝巡撫事以爰書驛聞九月二十九日奏請獎敘在事文武捐資募勇勞績彰德府知府羅景恬交部議敘試用知府德林 賞戴花翎署安陽縣事孟縣知縣葉世槐臨漳縣知縣孫厚均署武安縣知縣聯魁均 賞戴藍翎內黃縣知縣萬鎮之開缺以直隸

州用彰德府學訓導黃德杰加六品銜安陽縣學訓
導新選直隸東鹿縣知縣吳履泰加知州銜臨漳縣
學教諭譚光燮以知縣選用前臨漳縣學訓導王頴
川以教職歸大挑班儘先選用軍功守備劉鳳岐以
都司升用先換頂戴疏入 上許之十年九月巡

撫慶廉廉知滑縣及直隸東明開州長垣等境有土
匪傳帖惑衆事密檄知府何懷珍往捕匪竄長垣汲
縣知縣尚國均獲焦多誦等鞫稱于克純爲首起意
搶掠傳帖聚衆實與曹州府匪大水牛等密結云慶

廉復檄臬司邊浴禮率兵二千往勦事聞 上以

三省交界命直隸總督恆福山東巡撫文煜飭屬會
勦於是邊浴禮以八月二十六日抵衛輝與河北道
張維翰先後弋獲徐二旺等滑縣知縣徐振瀛獲于
克純獄具並寘諸法餘衆瓦解亂乃已其後山東臨
清土匪以十一年四月擾及內黃之楚旺傷亡兵勇
數十東河候補通判鄭履成附貢生宋承平戰歿後
皆議卹如制同時曹縣土捻肆起團練失利自大朝
集以東二十餘圍皆為賊脅騎賊四五千步賊數萬

邊馬闌入考城旋亦出境濮范土捻數千由開州躡入滑縣境王珠集及亂桿中召各村知縣徐振瀛敗之於白道口練總楊知芳復敗之於閭王廟匪退踞開州保安集築寨自固徐振瀛集練總楊知芳劉柱國武殿元聶鵬飛等各以練勇越境會勦四月二十六日馳抵開州沙古堆遇賊擊斃二十餘破沙古堆土城斃賊首羅玉方餘衆逃竄二十七日約會東明高圍團勇追至八公橋復斃百餘賊回竄保安寨楊知芳等乘勝躡追攻入寨門斃其匪首及匪黨數十

生擒賊目董和尚趙均祥等斬之潰匪潛竄渡河復
爲我勇追及礮斃百餘落水死者無算於是 諭

賞徐振瀛花翎楊知芳等登擢有差 上軫念河

防特命直隸大順廣道聯捷假四品卿督辦防河事
宜副以在籍內閣侍讀學士段晴川得奏事防河兵
勇統歸節制於是聯捷率師駐懷慶是年秋東省濮
州范縣有匪聚擾馬步八九千以九月二十六七等
日由直隸開州清豐分股擾至豫省內黃縣境東莊
黃辛集諸處蔓延數百里勢甚張二十七日直犯內

黃縣城署知縣戴鴻經率勇登陴礮斃紅衣馬賊賊復蛇行攻西南兩門偏城根戴鴻經以大石擊斃之餘賊退向東南時西關外尚有賊騎二三百復募敢死士縋城分三路出擊左右鈔入賊陣斬首十數級生擒畢得高餘退竄東莊二十八日滑縣知縣徐振瀛督團出境馳抵開內交界之井店鎮賊竄王位村距井店三里許徐振瀛督兵迎擊斬斃馬賊甚多二十九日賊大股回攻內黃縣城焚關廨攻南門尤急賊占上風施火箭槍礮守兵吳希文勇目賈元化中

礮死文生張文燭等七人受槍傷戴鴻經親督游兵二百力守南城自辰至申四時之久城上兵役屹不動槍礮磚石齊下斃匪百餘匪氣索是夜數來攻皆擊退十月初一日馬隊竄運河東岸署彰德知府孫鳴珂叅將穆特布督兵嚴守西岸賊不得渡乃遁回院子村井店諸處初二日滑縣民團接付不利初三日馬步賊繞至滑境什村河嘴前隊擾及滑縣之沙地屯村初四日攻濬縣城關知縣鈕達璋率民團出城截斃斃馬賊六步賊十餘匪繞攻東門復爲守

兵擊殺數十乃遁竄焚掠道口街分股擾汲縣之新鎮初五日邊馬駛及上樂村距汲城三十里延津境之班棗魏邱皆有賊知縣徐保興督練馳禦匪折回汲境其大股仍退至道口新鎮盤踞巡撫嚴樹森檄河北鎮總兵牛浩然率所部由滑濬一路堵擊令都司楊長春守備劉興旺率楚勇千餘人都司盧得勝率馬勇二百人馳由衛輝一路協勦疏言防河之師不能禦賊耗饟擾民請裁撤歸併一事權節靡費緣濮范匪徒潛渡也初六七等日匪踞道口新鎮時出

窺掠淇縣所屬之衛集三里橋初八日邊騎犯衛輝
府初九日薄城下署知府厲文煒汲縣知縣尚國均
集民丁三千募勇八百登城守禦尚國均弋獲賊謀
宋聚妮羅茹谷王麥妮孫老五訊言頭目李二令偵
衛郡虛實將結土匪掠懷慶皆斬之十一日賊隊大
至先於護城隄外游駛厲文煒等選精壯千人預伏
關外延壽宮左右十二日賊騎蜂擁至比及關伏卒
突起槍礮環擊賊大亂兵勇乘勝追殺十數里賊回
竄濬縣之鉅橋鈕達璋禦之殺馬步賊百餘十三日

至延津境之班村牛市屯徐保與率練總韓中榜等
禦之殺馬步賊數十徐振瀛以馬村團勇數千自新
鎮適至復擊殺馬步賊數百賊乃大創且聞官軍至
倉皇思遁因於十四五等日由開州之交界井店出
境回竄長垣圖歸濮范老集嚴樹森毛昶熙以河北
完善漕運攸關議令北鎮官兵一千屯滑濬交界彈
壓扼防近顧漕次楚勇一千駐北岸陳橋策應牛浩
然一軍復撥省防楚勇千名移駐南岸與北岸軍夾
河而壘兼顧省防而壯聲援並以團練本助兵力之

不足而奸民則藉練爲名斂財肥已恃勢抗官糾聚
既衆要挾多端緩之則養癰急之則鋌險李占標聚
衆圍城之案可爲前鑒請悉罷河北三府團練奏入
詔並從之十一月復有東省另股賊匪焦克昌
等糾黨數千竄開州之柳下屯小集諸處焚搶初九
日擾及滑境牛浩然徐振瀛率標兵團勇馳往迎勦
巖樹森以漕糧催兌緊要飛檄游擊李世玉等各率
所部會同牛浩然一軍竭力堵勦復添派千總趙洪
先帶襄勝前營步勇五百以游擊盧得勝馬勇百六

十人輔之於十三日北渡馳赴衛郡會合各軍勦擊旋復令副將楊飛熊率所部三營楚勇千五百人渡河策應時賊分三股一竄向道口一竄善堂一竄水擔街以初十日擾及濬縣之紙坊街十一二等日由濬境白市屯子街竄湯陰之五陵集宜溝驛徑犯縣城知縣郭景偁擊卻之十七日至淇縣十八日至汲縣楊長春等四營已抵衛郡冒雪進征距城二十里之下馬村遇賊千餘我軍進擊兵甫交匪卽佯遁欲誘我遠追分襲我後因收隊嚴爲之備十九日賊果

分股由黃土岡下馬村兩路來犯楊長春分四營兵
勇半守營半出敵行數里前隊馬賊麇至甫壓退忽
東北礮聲偵知下馬村股匪繞攻我營回軍就之腹
背夾擊賊不能支向西敗竄乘勝追殺斬馘數十二
十日黃土岡之賊復由趙莊偏郡城至北關我軍設
兩翼進李世玉趙洪先各率一營伏南北兩路盧得
勝率馬隊由中迎擊楊長春步勇繼之厲文煒尚國
均親督勇團扼橋口賊衆列陣迎拒我軍馬隊迭前
衝突賊少卻步勇繼進賊殊死鬪並分路鈔我軍我

兩翼伏兵遮截之軍士皆下馬袒膊短兵相接鏖鬪
時許賊始潰自相踐踏旗幟衣物棄盈野兵團躡追
至八里屯後賊馳至前賊復回鬪李世玉策馬督隊
以火器相持兩炊之久乘賊少懈揮兵縱擊大呼陷
陣當者辟易斬首四百餘級生擒二十餘追殺二十
餘里救出難民千餘比昏暮收隊偵賊向新鄉乃派
哨官劉正升等乘夜霧追及於新鄉縣境賊後隊數
百方肆擄劉正升等潛施火箭噴筒賊驚遁其前隊
於二十一日攻延津縣城知縣徐保與督率練總王

占魁等擊敗之斃其馬步三百餘餘黨竄陽武原武等境其西一股於二十日擾輝縣邊界民團失利遂於二十一日攻縣城知縣瑞徵率衆敗之二十二日復敗之於雲門追至新鄉槐村營擒斬悍目張山及夥匪數十匪由新鄉合竄原武嚴樹森因疏言直東間賊蹤徧野不下數十股已成蒙亳故智此歸彼出防不勝防請 敕下直東統兵大臣認真殲除掃蕩無震畿疆以鄰爲壑兼繪圖貼說以進蓋其時東省長槍會匪方往來曹考焚掠甯陵凶燄孔熾兩次

子重... 卷一
關入河北者爲焦克昌劉四二股既爲官軍所敗一
竄輝境一由延津擾獲嘉陽武原武所至攻城皆爲
地方文武擊退旋合竄新鄉復有另股馬步賊五六
千自道口牛市屯來會聯莊會案內漏網之士匪李
占標亦自獲嘉糾黨勾結各股沿途裹脅焚掠楊飛
熊督各營進剿以十月二十七日馳至新鄉偵賊在
大陽隄一路屯踞因於二十九日寅刻親率驍壯營
馬隊及襄勝前後中左四營步勇乘黎明大霧急馳
進擊煙霧中隱約見賊分三股來犯我軍亦分三路

迎之游擊盧得勝以馬隊居中外委趙洪先以前營步隊居左守備石得勝以後營步隊居右楊飛熊自率親兵督戰復令中營營官守備甄樹德左營營官都司劉興旺各率所部伏隄後爲應援兵刃旣接我軍馬隊衝突中路馬賊先卻步賊隨退楊飛熊以親兵乘之大呼陷陣賊大亂左右兩股同時驚潰我軍馬步乘勝縱擊遂大破之賊屍相枕藉追至大隄東北近各匪盤踞之所因整嚴部伍時霧氣漸消瞭見前途旗幟蔽空馬賊如螳楊飛熊飛調襄勝右營游

擊楊長春剛銳新前營叅將李世玉兩營助勦知會
新鄉縣知縣丁世選在籍翰林院編修衛榮光派團
扼守城南孟家莊策應各隊賊騎二千直前猛攻我
軍靜以待之逾時步賊益濇至楊飛熊以賊衆十倍
於我精銳悉聚中路乃潛出奇兵鈔其兩旁賊譁潰
我軍追壓三里至小龍泉遇賊掠輜重車十餘兩楊
飛熊傳令奪財物者斬因發火箭焚其車大半方奮
追忽東北復有大股數千與正東敗匪合反旗來鬪
我軍佯北誘賊復至大陽隄中左兩營伏兵突起前

隊悍賊中槍粉倒後賊匍匐進我軍以刀矛格鬪戰
愈酣突見黃衣紅衣數賊指揮賊隊一字排列以馬
賊扼兩端縱橫馳騁意將包我全軍適襄勝右營及
剛銳前兩營馳至兵氣益振李世玉楊長春奮矛大
呼直入賊陣刺殺黃衣賊目生擒紅衣馬賊李喬海
姜有桂吳登兒李二右營哨長都司陳大勝深陷重
圍手斫數賊受傷殞賊亦披靡退敗我軍追殺十五
里至張灣其地溝深冰滑賊墮溝死者無算是役也
斃賊四千餘擒蓄髮老賊三百餘奪贏馬二千餘旗

械四千餘訊獲賊供俱曹州人大頭目焦克昌副頭目侯老五領馬步賊萬餘其由滑縣續竄之股爲姚明禮領賊五千餘李占標新集賊亦數千將分股一竄懷郡劫掠一護輜重回巢至是屢被挫衄不能復振云嚴樹森慮賊之西也因令蘇謙馬隊由滎澤口渡河爲備而令楊飛熊扼衛郡杜旁逸賊知我軍兩路進逼日夜東馳其後股在原武者爲知縣孔慶弑擊殺百餘旋竄至陽武之黑羊山爲寨民擊殺二百餘初一日薄延津縣城爲知縣徐保興擊退追及於

荆隆工復敗之初三日封印知縣駱文光會同在籍
刑部主事邊其恆等率鄉團敗之於董家隄婁隄莊
殺斃二百餘斬黃衣紅衣賊目救出難民無算初四
五等日敗匪由封印邊境回竄又爲總兵牛浩然滑
縣練總于士修等截擊斬首百餘級生擒十餘器械
旗幟委棄塞道餘衆遁回東省豫境遂無賊報至嚴
樹森以楊長春等三營留駐衛輝令楊飛熊四營及
蘇謙馬隊仍回省城奏上諸將功副將楊飛熊加總
兵銜叅將李世玉給敢勇巴圖魯名號楊長春免補

游擊以叅將用並給侃勇巴圖魯名號盧得勝免補
游擊以叅將用劉興旺免補都司以游擊用甄樹德
石得勝免補守備以都司用趙洪先免補千總以守
備用都司陳大勝照叅將陣亡議卹並於死事地方
及原籍建立專祠以把總朱長明外委劉全勝余清
太汪學政沈文明畢高升傅得銀附祀皆同時戰歿
者並 賜卹有差

土匪八

咸豐十年夏陳州府屬之沈邱汝甯府屬之新蔡土匪句結皖捻以秦宣袁曜春袁安愚張蘭張鳳林余萬祥等爲首股或一二百或三四百四出焚劫而以阜陽之黃花嶺李家橋迎仙店爲巢穴官兵往捕輒恃兩省交界此拏彼竄凶狡踰他賊巡撫慶廉檄沈項汝新及安徽阜陽等縣剋期會剿又檄調南汝光道鄭元善所部練勇馳往協助於是各路兵勇齊集瓦店偵知瓦店東南十二里之迎仙店爲捻首秦宣

賊巢聚衆數百陰爲誘致官兵計於各要路高粱地
中伏槍礮如櫛比五月十三夜突出悍賊四五百由
東南北三路襲我營我軍分隊迎擊卻其東南兩路
其北路賊抵死不退以大礮轟擊立斃三四十始東
遁十四日黎明衆議破賊之計密遣間諜入賊中盡
得其所設伏處使爲嚮導規越前進直薄迎仙店賊
憊解衣寢我兵至猝索槍械不可得裸而跳追殺數
里屍積道路火其巢翌日跡之附近各村無一賊盡
已越境矣兵乃還時袁曜春率黨數百人袁家寨殺

寨長袁廷拔袁紹等遂與袁安愚張蘭等踞其寨張
鳳林本在袁安愚股至是由長城竄正陽界之楊家
橋尋仇燒殺團練楊永錦等因自爲一捻檄所在緝
拏於是正陽知縣鄭修業獲張鳳林黨張其林吳雙
成格斃黃學元等署汝陽知縣廖慶謀新蔡知縣韓
承宣獲秦宣黨唐云龍段三尙旺秦新秦禿秦麻子
燬韋家集布家橋賊壘數所殺斃袁曜春股夥數十
沈邱知縣秦篤新會合陳州委員於張莊擒張魁林
莊戲又獲秦宣之母連氏妻王氏及其幼子張蘭爲

秦宣等六擒首之一候選訓導韓大瀛用阜陽降賊
周好修等誘擒之奏上 賞沈邱練總李雲龍李
璞韓文興藍翎錄韓大瀛功待獎其後正陽縣知縣
鄭修業新蔡縣知縣韓承宣及已革羅山典史任浩
復獲余小柏余勉之及其黨史驢子孫咬孫映采鄒
振甲李富李牛楊成士呂懷德熊小有熊麥來余旺
等於韓家店於曹樓確山縣知縣吳昭坤獲高撈爲
李四礮匠股內要犯凶黠冠諸賊及其黨王牛薛鼈
塊趙二曾子李樹容姬春楊新育曾瞎子等於大西

山沈邱縣知縣顧恩培獲楊鳳奇及其弟楊鳳儀磔傷擒首秦宣於李莊匪勢稍殺初各省辦團 詔

加順天府丞毛昶熙都察院左副都御史銜回籍辦理團練是年九月 上幸木蘭巡撫慶廉將率師

北援因以河南剿匪事宜 命毛昶熙督辦未幾

慶廉坐與藩司賈臻互訐奏吏議鑄級去官授湖北布政使嚴樹森河南巡撫而以河道總督黃贊湯暫行兼攝十一年嚴樹森既至汴時粵逆由廬桐竄霍山及商城毘連之毛坪古皮沖諸處復由麻城徑逼

黃州勢將犯豫境皖匪姜太林衆二三萬由襄城竄擾邲汝魯山回掠西平光固大河以南州邑蹂躪幾徧孫葵心衆萬餘自廬州六安躡入固始分股竄擾豫省城守設防分勦應敵諸軍應援不暇一時宿將如邱聯恩承惠王居廣後起敢戰之士如王榮烈田玉梅等俱相繼戰歿賊至惟總兵成景一軍尾之而西侯補道張曜調守省城游擊王天保赴援汝甯而毛昶熙方慮成景兵力不足檄王天保赴宛而以余萬明代之於是汝甯賊陳大喜張鳳林王殿書史狗

娃等乘間並起與秦宣等響應張鳳林率衆千餘募名孫葵心黨藉藉其聲援覬覦汝郡知府祁之銓會同汝甯營叅將柏英敗之於濠頭河官莊等處先後擊斃百餘賊竄上蔡爲練勇截殺復竄商水署知縣閔春熙率勇於廟霧臺斃匪數十匪夜攻縣城復擊退之餘賊至東北八里灣屯踞王天保旣至汝甯偵知匪踞萬家圩因會合祁之銓兩路進擊匪衆出圩抗敵格殺數十匪乃入圩固守同時復有杜秉德者一名杜長榮皖境三河尖匪首李鴻禹聚衆千餘推

杜秉德爲謀主出入汝正新息妖言惑衆乘孫逆竄
擾後句結各股謀不軌二月汝甯府通判張桐正陽
縣知縣鄭修業偵知匪竄白土店劉家莊飛檄練總
胡登第劉延煦等率練勇三千進剿千總海進魁把
總王連三奮勇先入與賊相持不決劉延煦之子劉
然鴻甥曹福大呼陷陣中槍并歿兵勇憤擊斃匪百
數復潛遣壯勇繞出賊後夾攻始大敗之擒匪目李
合德等斬於陣劉延煦深入賊巢手執捻首李鴻禹
杜秉德以出李鴻禹傷重旋死繫杜秉德及其父杜

有同於獄究治奏上 上嘉勦捕迅速進張桐知

州鄭修業同知海進魁守備王連三千總練總舉人
胡登第知縣選用劉延煦鹽提舉銜並皆戴藍翎又
息縣土匪趙國良糾衆滋擾岳城諸處署光州知州
張席珍屢敗之於臨河包信等處先後斃匪四五百
生擒劉二老開簡全德丁禿子等皆寘諸法又苗沛
霖黨潘四李六等焚掠固始東北鄉王宗雙圩朱梟
集張家老圩田家老圩復回攻安徽霍邱團練楊天
林寨圩固始縣知縣請兵防禦於是嚴樹森奏舉梟

司鄭元善歷任汝光十餘年德政在民間里謳思不
輟汝光紳民皆其舊部擬令馳赴汝甯信陽一路察
探楚省逆蹤扼守三關兼督勦汝郡土匪信陽汝甯
光州商城固始五營及防勦各起兵勇均歸調遣南
汝光道趙書升佐之 上從其請而陳大喜張鳳

林王殿書等已號稱數萬初踞范寨王天保韓承宣
勦之兵勇傷亡甚多遂益肆三月初六日夜率衆圍
攻汝甯府東關寨堡初七日五鼓分股直攻郡城北
門祁之銓會同侯補知府廖慶謀通判張桐汝陽縣

知縣吳元浩以槍礮火箭火彈禦之賊亦施放火箭火罐雲梯數十具燈傳而上城上火器雜巨斧挺擊斃賊數十斧墜執旗賊目一撓鉤生致賊十一皆斬之賊乃退兵勇出城追殺得其雲梯攻具匪見北面備嚴乃合大股力攻東關寨堡益增雲梯百餘具梟渡外濠奮力猛攻叅將柏英知府廖慶謀率兵勇潛伏雉堞間伺其將近內濠猝然大礮轟之賊堵立排匝礮過穿其中如甬道然隨聚隨轟之自遲明至辰刻卒不得逼寨垣其越重濠者復磚石擊之匪衆相

顧皆進愕有引去者俄東北兩門告警廖慶謀等於
堡內窺賊皆遙立呼詈知其已懈急選壯丁百餘帶
火箭噴筒啟堡門突出奮擊賊隊大亂會余萬明勇
亦至乘勢追壓斫殺千計生擒著名捻首史狗娃李
萬興得雲梯百餘具礮械旗幟無算餘匪由十八里
廟竄逸復麇聚於范寨陳寨諸巢是時新蔡西北界
連汝境數十里間民寨並爲賊迫蓄長髮供芻糧汝
尤賊勢始大張四月嚴樹森復檄侯補道張曜馳往
汝甯會勦我軍旣連復長審王岡諸圩匪衆遁回汝

東平輿初二日夜攻陷霍莊寨初三日張曜會合庶吉士吳元炳督隊馳抵金鄉鋪鄭元善亦派兵由汝西前進殺賊數十屯姚溝初四日張曜兩路進擊比及寨濠匪出死拒我軍數盪決殺斃百餘生擒十一匪乃入寨固守初五日復進攻寨牆槍礮磚石如雨兵不能近因燬其寨外礮臺謀言賊約平輿大股應援並分黨四出擾新蔡上蔡及陳郡以牽我軍云時項城有徐四萬等糾衆萬餘圍攻新興民寨沈邱有阜匪周慙等踞沈邱寨爲知縣顧恩培力勦克復汝

郡另股亦多蠡起新蔡有李向均等連破西北數民
寨確山有段心元等盤踞藍岡派飯訛搶皆與陳逆
互爲聲應謀者或言霍莊賊捆載槍械計圖他竄者
或言往逆東路援賊者初八日晚張曜選壯勇四百
疾馳扼東路賊果出馬步數千東向遇伏旋遁入寨
初九日夜狂風大作張曜派營總黑龍江協領蘇謙
侯補都司劉自順率馬步隊將往劫寨適捻日莊有
凡等領黃旗悍賊五百餘潛出霍寨欲赴角子山句
結以劉象功楊五湯等方豎旗唐泌也張曜偵知令

蘇謙等躡進初十日至王橋詢知馬賊數十步賊五百餘向確遂一路駛竄上蔡知縣金寶符署汝陽知縣張紹英派勇適至因遂合追至確遂交界知竄匪已爲署遂平知縣陳成志截斃數十於十一日由劉閣逼入馬牙山胡廟諸處蘇謙等分兩路鈔擊及之馬牙山匪衆列隊抗拒蘇謙躍馬入陣槍斃騎馬賊數人外委羅宗魁繼之大呼決盪殺賊甚多身被十數創戰愈酣匪衆披靡我軍乘勝兜圍勦殺略盡僅餘步賊十餘上山逃匿爲民團撻殺無一免者上蔡

團總劉毓棠等獲擒日李培成曹里夥黨方淋龔娃
及被脅入夥之李凡等七十餘分別斬繫訊知莊有
凡等各頭目均陣斃此股遂滅嚴樹森毛昶熙請加
蘇謙副都統銜劉自順以游擊用外委羅宗魁賞藍
翎 上從之於是嚴樹森奏出省親督勦辦以二
十三日抵陳州因言路濠亟宜挑挖連年寇至萬馬
紛駛平原苦無阻扼擬於大小路之兩旁悉挖濠溝
路則斜正紛歧濠亦縱橫交錯要路扼以槍礮旁路
或臨時挖斷或輔以梅花坑之類限賊馳驟利我邀

擊莫善於此周家口爲水陸通衢前數次賊掠輜重
均由沙河返皖擬於周家口設立礮船十二隻調湖
北熟諳水戰之營官一員哨官二三員酌帶水勇百
名來豫教練游駛以備水路堵剿我軍騎兵太少擬
增驍果馬勇一營先招敢戰回勇充之仍陸續徵募
以備衝擊均得 旨允行十三日張曜等復於霍
莊誘賊出寨分路並進蔡溝鄉團爲頭敵匪由東西
兩門出馬步二三千人迎拒鄉團怯退張曜親率大
隊由西路別將率礮勇由東路督擊斃賊數百賊仍

退守十四日匪由寨東門出馬步數千向東疾走寨內偃旗縱火示空寨狀張曜馳據高阜見賊隊行列甚整疑之旋見寨西門又出馬步千餘撲王西岡民寨因縱馬隊向西北鈔襲賊恐斷歸路急引還東路賊亦旋退入寨詢知難民寨內果掘坑設伏欲誘我軍深入其狡黠如此計已破因於十六日出馬步六七千分三股以兩股犯金鄉姚灣一股趨中路爲左右策應張曜令蘇謙劉自順督馬隊衝入賊陣蘇謙劉自順骹臂受傷裹創力戰先敗其中路金鄉姚灣

各步隊繼至迎擊復敗左右兩路殺賊二百餘追殺至寨濠十七日陳大喜之弟陳汝結阜匪千餘出平輿竄踞汝甯城東高平寺寨與霍莊相犄角鄭元善調撥馬隊添募壯勇令參將柏英通判張桐督帶往剿匪由寨西門出馬步千餘迎拒柏英奮勇督隊排牆而進匪不能敵向東狂奔我軍轟開寨門寨內尙有悍匪數百張桐首衝入寨被斫傷面臂落馬各隊奮呼直前匪衆驚潰四路搽殺生擒宋玉貴等十餘盡得所遺槍械騾馬高平寺寨遂克復同時項城新

興集徐四萬一股爲知縣恒倫密約寨內紳士夾擊擒斬百餘遁回阜境復將焚掠汝郡鄭樓之廟灣匪勦斃二百餘其周愍一股亦爲顧恩培擊退沈西遂無賊毫西捻逆之犯鹿邑者爲叅將春林都司守基會同知縣孫嘉臻以二十二日亥刻乘風雨襲賊營大破之追殺十餘里又有另股紅白旗賊竄爲縣勇迎擊東遁於是陳逆外援垂盡而新正等處零股尙乘機思蠢王倫等滋擾岳城李瞻等紛擾楊家店楊心一燒搶長陵陳郡毘連汝阜

荒坡楊埠葛嶺廟岔姜寨瓦店大馬張銅陽城亦均有嘯聚或二三千或千餘數百所在蠕動巖樹森檄都司李永祿率所部馬勇駐項城往來峭擊羈縻牽制不使與陳賊合陳賊因霍寨高深益負隅自固我軍培築營壘添造礮臺環攻進偪或深夜譟擊以驚之或佯敗設伏以誘之雖屢戰屢勝卒不能得手匪亦連出馬步撓我師二十四日馬步賊二千餘出寨西門分掠人和寨張曜親率隊擊卻之斃賊百數生擒史應翔等二十五日復出又擊卻之二十六日馬

賊二百餘步賊約二千來衝我軍新營張曜選川楚
勇爲前敵佯敗誘賊賊蜂擁壓追我軍大隊橫截馬
隊疾鈔其後擊斃馬步賊數十餘復入寨二十九日
西門潛出紅旗隊四百餘馬數十匹向西北疾趨將
竄黃埠掠食張曜調川楚羅山勇隊預伏霍寨西門
自率馬隊馳擊匪已竄渡小沙河距黃埠二里許燒
搶兵至衝殺匪殊死拒戰兩時之久後始敗退伏勇
奮起截殺斃賊三百餘得馬十一匹寨內援賊麇至
乃各收隊五月初三日賊復由西寨門出馬步二千

餘直衝姚灣營張曜偕庶吉士吳元炳親督各隊迎
勦飛調參將保英率余萬明王泰來周登高徐烈松
劉清源等以金鄉步隊夾擊蘇謙以馬隊鈔襲其後
匪乃大敗殺斃二百餘生擒方滅等擒首王殿書脇
肋中槍負創回竄陳大喜黨崔步雲者乘間逸出將
密結他股應援匿張樓姚灣練總生員沈潛獲送大
營斬之旬日間兵勇力戰受傷數十所殺賊以千計
奪馬匹槍械無數圍攻愈力而賊擁寨自若也嚴樹
森憂之嚴飭將士剋期攻拔於是鄭元善張曜密謀

以武生王冠軍假接濟油鹽投入寨使爲間大兵攻寨見號火爲內應先是初五日蘇謙伏馬隊寨西樹林中以羅山勇隊逼隊挑戰枕戈卧地示不整匪果出黃旗賊六百餘自東門五色旗馬步賊二千餘自西門我軍佯北誘之比及金鄉鋪張曜率馬隊繞後鈔襲斬紅衣賊目二馬賊三吳元炳等併力夾擊斃賊二百餘生擒陳元太等餘衆入寨初七日鄭元善派汝甯府縣練勇由東路進上蔡西平練勇由北路進張曜會同吳元炳派令參將保英率都司李忠奎

知縣陳夢蓮單體晉等隊伏寨左叅將吉昌率都司周登高知縣王珠煒吳繩曾等隊伏寨右知縣汪鼎和崔廷鏞鄭繼同分調銀灣張寨馮寨三路圍練往來策應張曜親率蘇謙王泰來周明崑劉自順姬成功劉清源尼俊等攻其堅軍士架呂公車挈雲梯搦牌之屬長驅以進越重濠見寨中火四起知王冠軍等已得當因揮令將士併力齊擊匪衆驚亂吉昌王泰來首登寨勇衆燈附而上呼聲震天地寨內應之賊首夥三千餘冒死奪寨西門出復折向東北潰竄

伏軍練勇齊出截殺寨內外賊屍枕藉張曜等入寨
議留吳元炳及通判姚國仁按殺餘匪安撫難民張
曜督馬步乘夜躡追比明至轆轤灣匪衆回拒委防
禦巴彥克喜把總尼俊躍馬斬紅衣數賊始東向狂
奔直趨平輿老巢追逐不及乃徹兵還定霍莊是役
也斬殺二千餘生擒王五等三十二人獲六百斤大
駃一山東州吏日裘長全戰死于總張欽海被執不
屈殺之焚其骸奏上 詔加張曜布政使銜交軍
機處記名遇缺請 旨簡放叅將吉昌副將銜都

司王泰來游擊用防禦巴彥克喜佐領用把總尼俊
守備用巴彥克喜尼俊並皆換花翎加武生王冠軍
守備銜以干總歸標補用翰林院庶吉士吳元炳四
品頂戴餘存記卹裘長全張欽海如制論者或謂豫
省堡寨之立倣嘉慶初年堅壁清野成法所賴以安
全者利甚溥然一或不守則資寇兵齎盜糧害亦因
之得失之故難言哉

土匪九

平輿者漢之平輿川今隸汝陽縣陳大喜平輿人始以無賴充勇日或言爲事所激遂稱亂故以平輿爲老巢其自霍莊遁歸益深溝高壘運磚石築圍牆以自固分股盤踞王寨曹寨狀若連珠相爲犄角嘯聚死黨數千徧脅民寨數十煽動附近土匪糾約秦宣等股四出焚掠佔據圩寨爲抗拒官兵計嚴樹森檄鄭元善張曜等連營環徧進攻復添派游擊劉鳴岐管帶衛勇五百會同都司李永祿馬勇馳赴沈頂爲

之策應兼杜紛竄鄭元善等既至汝甯屯韓莊諸處
五月十九日偵知溱頭河一路有匪張曜馳往擊殺
數十人旋即竄遁二十三日東路大股數千犯韓莊
營都司周登高擊敗之追至曹寨殺賊百餘二十六
日張曜督都司李忠奎等進取平輿行至高平寺迤
東猝遇馬步賊千餘我軍分兩翼禦擊斃紅衣馬賊
二餘賊驚潰追殺至平輿二里許高粱地中伏賊突
出拚我軍步勇適至夾擊匪敗入寨我軍薄牆下守
牆槍礮如雨兵勇受傷者多乃收隊還沿途截獲載

運甄料車百餘兩察附近村莊徧插賊旗人皆蓄髮
良莠無別鄭元善張耀等議以爲不先破王曹兩寨
不能進偏老巢不先絕外援不能進克兩寨於是分
兵四出搜剿散捻以阻應援六月初一日派李忠奎
周登高分由張埠韓莊兩路直趨王寨匪衆出馬步
二千餘迎拒我軍力戰斃馬賊十餘步賊六十餘匪
乃敗退初二日陳逆自率悍黨復犯韓莊營都司周
登高等擊卻之追殺至王寨濠外斃匪百餘自是賊
愈堅守不出務旬結煽動分我兵力擒首任一勤等

圍攻正陽縣城火東南北三關民舍叅將保英及委營總蘇謙馬隊知縣陳夢蓮步隊會合往勦先於八里橋遇賊獲勝乘勢解城圍正陽知縣鄭修業率團下城夾擊斃賊百數十餘向東北紛竄保英復會同試用知府彭鈺等躡追斃馬賊數百黃衣賊目一匪遂遁入劉莊我軍併力圍攻以噴筒火箭注射焚燒覆壓斃賊以千計突出數百悉斬擒之其不及入莊之賊向北奔竄我軍馬隊追斬殆盡獲僞印一黃旗四十面生擒王小贏等百餘訊言任一勤已死於軍

云其確山牛仙笙股爲知縣陳憲元剿殺百餘生擒
張恕等牛仙笙越山竄遁追及斬之全股撲滅其息
縣李和雲股爲汝甯通判張桐剿殺先於王家店戰
一時之久匪敗入寨我軍以火器進攻焚寨內草屋
賊全數殲殄其沈項一帶散股爲游擊劉鳴岐都司
李永祿及項城知縣恆倫剿殺迭獲勝仗黃廟集之
戰陣斬匪首范達謫張巴黃坡之戰斃賊目劉套兒
等夥匪三百餘解曹審江莊南李寨三所樓諸寨之
圍復先後殺斃二百數十擒著名捻首李狗李拴等

各以狀聞惟新蔡之時純一李向鈞等股擁眾四五
千方圍攻縣城鄭元善等飛檄叅將吉昌游擊余萬
明率隊往援沈邱縣雒莊有艾大羣等匪沿村派糧
恣意焚掠姜寨有趙獅子等匪竄過泉河圍攻城垣
皆陳大喜秦宣所煽結至是復噉諸皖捻及苗練並
起於是苗黨潘四等出霍邱闖入息縣詐稱五六萬
潛結趙獅子秦宣股匪駛擾陳屬邊境皖捻雷彥蘇
立楞眼等股圍攻鹿邑趙浩然李加英等股竄擾夏
邑洪樓諸處山東長槍會匪應之淮甯奸民楊立等

復起意句結姜太林股謀襲郡城爲知縣李澍委員
候補知縣鄒金生瑞徵姚國慶等覺獲並捕王金聲
葛占魁樂一道馮雲章等賊數十皆寘之法劉狗等
股率衆萬餘竄擾睢甯金樓邪教爲之響應閭閻塗
炭羽檄紛馳歸陳汝光幾於徧地皆賊豫境爲之糜
爛府丞毛昶熙提一旅之師備防歸德勢難兼顧因
檄張曜移平輿之師援剿鹿夏而陳大喜遂以間復
逞矣先是鄭元善將乘機進攻王寨適新蔡被圍旣
檄吉昌往援復檄李忠奎等繼進軍行至廟廠卽有

匪股迎拒爲李忠奎擊遁生擒邱老虎等至龍口集復遇大股數千戰三時斃賊百十餘擒賊數十奪牛馬槍械無算焚其巢時擒首時純一等圍攻縣城已歷三晝夜知縣韓承宣登陴固守縋城擊殺多賊奪其攻具城圍遂解東面復有另股陳太常等分踞化莊集李忠奎擊走之時純一李向鈞遁踞管家寨李忠奎會合韓承宣三面攻擊匪眾出拒槍斃百餘賊退入寨我軍越濠牆上矢石紛下受傷十餘人匪亦不敢復出蓋新蔡匪股最與平輿近故先扼之始進

攻王寨鄭元善挑帶奮勇各擊雲梯分路進旣越濠
偏附牆下士卒冒矢石仰攻守賊亦殊死抵拒相持
時許大韓寨曹寨之賊悉數來援王寨踞匪復啟關
出鬪我軍腹背受敵守備張文成馬隊後至斃賊百
餘始徹隊還是日微張文成前軍幾殆自是屢攻不
下七月苗天慶王金奎潘四等紛擾沈項爲我軍擊
敗死拒高蘭寨十一日張耀偵知陳大喜抽調各股
匪將隨苗黨合竄因與庶吉士吳元炳謀令叅將保
英等選勇隊鄉團潛伏要路是夜五更時大股匪數

千果由小王寨出竄我軍突起邀擊衝賊爲兩一南竄王岡一回奔小王寨我軍沿路拚殺追及小王寨濠外寨匪出援各勇隊奮力鏖戰賊敗潰遂燬小王寨餘匪竄至四陳寨我軍躡追入寨復斃賊無算同時老韓張七兩寨亦爲鄉團襲破生擒王駱等餘匪東遁十四日吳元炳保英進攻曹寨先燬其寨外礮臺牆上執石密下我勇裹創復進適知縣洪用勛率南李寨團練繼至四面環擊守牆匪衆被創墜落者屍骸枕籍軍功黃聘三率衆先登短兵格殺甚衆其

潰圍出者復爲周登高等截殺遂克曹寨生擒陳振
等奪三百斤大礮二旗械二百餘是役兩戰皆捷連
復五寨復以苗黨糾合陳大喜捻股內之黃梅含時
中旭張鳳林魏修等徑竄息縣之包信集諸處圖回
竄三河尖舊路項城境尙有散股勾結阜匪盤踞民
寨因派李徵松劉鳴岐李永祿馬策勛及剛銳營官
吳鳳笙馬步瀛等分徇郭橋張七莊諸寨皆攻拔敗
走之巡撫嚴樹森團練大臣毛昶熙奏白諸戰狀申
言練兵籌餉戰備攻守之策其詳具載皖匪部疏入

奉 旨覽奏俱悉嚴樹森等因得釐定一切豫省
軍制饒章自是一變此陳逆踞巢煽結豫中最棘手
之時事也苗逆大股苗天慶王金奎旣橫掠豫境會
亭營叅將吉昌等戰死因復句脅確山土匪懼明儼
等與陳大喜股合南竄確山信陽交界之明港驛驛
丞趙貞死之張曜親率余萬明隊追及正陽賊沿途
脅附衆已逾萬復分股擾確境爲署知縣陳憲元擊
徧入山斬首八十三級擒陶沅興等其大股以二十
三日圍徧正陽張曜派叅將保英尹嘉賓疾馳赴援

而自督大隊繼進前軍與賊遇正鏖戰間代理知縣張桐由西門帶勇突出夾擊斃賊數十殲執旗賊日二匪潰南竄城圍乃解翌日苗黨及陳大喜捻股續至保英督隊迎戰游擊劉自順率馬隊鈔其後斃賊數百生擒劉良駒等追殺二十餘里我軍陣亡什長十總王培外委姜沅二員匪各回竄時大喜捻股自我軍連復曹寨等五圩賊勢漸孤惟范徐兩寨與平輿死結相爲掎角苗黨循淮回皖而皖股劉狗宋喜元王懷義蘇立楞眼等傾巢盡出五旗俱動粵逆復

自楚境闖入信陽姜太林大股西竄沈邱東省曹鄆
長槍會匪及濮范土匪並起滋擾新蔡土捻楊方衡
袁安愚等句結髮逆及各散捻圍攻縣城大河南北
騷然震動巖樹森毛昶熙督率鄭元善張曜等通籌
全局分兵四出剿援攻守於是鄭元善專任平輿張
曜兼顧各路八月官軍方連復洪樓等七寨捻首趙
浩然遁回皖巢永夏肅清兵威少振將乘勝攻平輿
九月鄭元善檄游擊王泰來率勇夜襲賊營斬首百
餘有分股賊王裕幟者率眾數千竄踞曹寨附近之

安徐兩莊阻我進路因復令都司周登高會同王泰
來各選川楚勇分路進剿擒斃數十火安徐兩莊我
軍乘勢進匪衆突出馬步千餘壓我新營周登高擊
卻之追殺數里斃賊百餘火郭樓三皇廟賊卡進屯
郭樓將於洪河西北分營扼布爲合圍計皖逆徐四
萬等爲官兵擊敗糾衆復至平輿圖援陳逆出竄十
月二十一日張曜等督率馬步進攻平輿距寨西四
里聞賊營號礮各村賊黨紛紛四出張曜揮兵縱擊
且戰且進沿途殲斃馬步賊二百餘生擒王小妮子

等賊始卻我軍進薄賊圩屢越濠均爲礮石所阻前
敵各隊遂移屯郭樓其地去平輿八里爲出入要道
度賊必以全力爭預伏一軍於附近之大劉店潛爲
策應陳逆糾集各捻五六千分東西兩路齊出直趨
郭樓張曜乃派都司劉自順叅將尹嘉賓等由西路
兜勦都司周明崑千總賈蕙山等由東路包裹巴彥
克喜以馬隊鈔賊後自率親軍當其前鋒兩路賊至
我軍奮力抵禦自辰至未相持四時馬隊鈔至賊後
馳驟衝突號起伏出劉自順巴彥克喜陣斬紅衣賊

目二賊衆驚潰兵勇四面截殺伏屍數里陳逆奔至
寨濠鳧水得脫南鎮馬兵徐添福馬勇趙德才越濠
擬生致之猝中礮殞餘匪向徐寨奔竄其不及入寨
者悉爲斬擒斃馬步賊千數百奪獲馬匹旗械甚多
擒蓄髮老捻賈柱等五十四訊言陳逆親弟陳汶於
月前領賊千餘往助正陽捻匪張鳳林並赴羅山打
糧鄭元善因密派隊往截陳汶並瞰張鳳林虛實張
鳳林者素與陳逆合其黨先與吳大妮子等竄擾息
縣之柳樹集諸處爲知縣李鴻藻擊殺甚多夥目霍

光玉岳得洋等股復在息境土扶橋諸處嘯聚十月十四日分股圍攻范寨李鴻藻率勇赴援會集民團夾擊斃賊百數十餘匪解圍南竄二十五日偵知匪眾將攻城督團勇邀賊於城西南李家店鴻藻策馬大呼陷陣手刃數賊團勇亦奮力衝殺戰兩時許賊至益眾勇勢不敵鴻藻陷重圍被劊力戰陣亡賊割其首去家丁趙壽徐魁同死之團勇傷亡甚多事聞詔以同知陣亡例從優議卹並於殉難地方建立專祠嚴樹森因言陳逆負固平輿時圖出竄其黨

徧布汝正新息之交息縣匪徒自頃益熾擬於汝防
諸軍抽撥馬步千餘派得力營官管帶會同接署息
縣知縣馮德毅相機勦辦並催副將周鳳山迅統湘
軍來豫會合張曜先將汝正新息土匪節節掃除再
圖肅清南圍復以濮范匪徒恣擾河北劾督辦河防
四品卿聯捷請裁撤防河兵勇以節靡費議上奉

旨查察其後卒如所請未幾被湖北巡撫之

命時府丞毛昶熙升授府尹旋晉內閣學士鄭元善
升授布政使及嚴樹森調任湖北乃授鄭元善爲巡

撫擢張曜爲布政使仍委以軍事而令巡撫委員署理藩司印務於是張曜遂專任汝正新息勦務駐汝宵十二月十四五等日平輿逆黨糾合各股衝前敵營爲兵勇擊退二十二日邏獲逃民訊言大喜傳令各路擒首及被脅村莊並糾約張鳳林等股同時裝旗出竄欲乘鄉民度歲抵隙飽掠又獲賊謀亦供言陳逆知官兵無多分派賊黨期於二十七日先衝郭樓韓嶺漆頭河諸營牽制我軍乘間進攻城關已製造雲梯及僞號褂欲冒兵勇入城爲內應張曜因令

各營戒備步隊應機出擊馬隊扼要設伏檄汝甯府
縣以團勇附郭偵邏二十七日清晨果有賊馬陸續
出我軍邀截擒斬數十二十八日二更郡東十八里
廟數處火起賊衆分路駛突復爲我軍擊退二十九
日夜馬步賊數千潛襲郭樓營我兵槍礮環擊應聲
而倒伏路馬隊前後夾擊斃賊百餘黎明賊遁回巢
謀言匪衆將以元旦乘我不備徑犯郡城因傳令兵
民各爲守備庶吉士吳元炳督隊以除夕進攻平輿
游擊周明崑爲後應先發以制之是夕四更我軍行

至平輿迤西突遇賊衆銜枚疾馳吳元炳揮兵擊之
賊後隊益至游擊王泰來持戈躍馬奮呼入陣元炳
督馬隊繼之所向披靡斬黃衣賊目一賊乃潰敗追
殺十餘里斬首數百級燬張莊柳莊賊卡至元日辰
刻始收隊獲賊言李旗屯旗頭賈朝玉最凶悍是日
爲諸賊率戮於軍故相率敗北云時張鳳林蕭汝信
等曠聚陡溝築寨自固與另股戴應華句結四出焚
掠北至汝確南至信羅匪蹤充斥霍廣玉岳得洋等
竄踞土扶橋裹脅日衆奸民揭竿相應附近民寨刀

不能敵亦多領旗附賊陡溝賊竄信陽團勇接仗失利因進圍州城分踞明港驛文報梗塞州城無援地方官請兵勦辦嚴樹森檄游擊穆正春部領剛銳八營步勇四千四百人吉林黑龍江馬隊並驍果驍健兩營馬勇四百騎取道遂平確山疏通驛路進援信陽當汝正羅息諸賊俾張曜專力平輿張曜亦虞息賊之撓已也令游擊李忠奎知縣單體晉率兵遏之於是大局差定此咸豐十一年自秋徂冬汝正新息間辦賊事也

豫軍紀略卷五

土匪十

同治元年正月陳大喜踞平輿糾合新項阜息捻匪
史步廣李建宋玉徐四萬等股分踞郭臺尹莊陳莊
劉樓大趙莊築壘爲平輿掎角復爲李旗屯挖溝設
卡邀我後路庶吉士吳元炳方以戰功 特旨授

檢討仍留軍營用是戰益奮與張曜謀派游擊王泰
來知縣余兆達率所部爲前敵都司周登高從九品
桂鳳清率所部爲後應參將尹嘉賓游擊劉自順都

司周明崑佐領巴彥克喜率馬隊爲兩翼以初八日
五鼓攻郭臺破之尹莊陳莊劉樓之匪悉衆來援張
曜揮兩翼馬隊迎擊陣斬李建宋玉賊衆驚潰遂破
尹莊陳莊劉樓賊壘平輿老巢突出馬步賊數千李
旗屯匪從後邀截賊勢甚盛張曜與吳元炳分隊迎
擊斬紅衣騎馬悍賊數十生擒宋應山賊始卻我軍
乘勝追殺遂奪李旗屯是日破賊寨五斬擒凡二千
餘大喜懼益結新項阜陽掄股及張鳳林正息明港
匪衆三四萬圍攻我營阻遏饒道窺伺城關以撓我

軍自與其黨百餘股各踞一寨互爲聲援自汝郡距城二十里之孔海而東達沈項新蔡距城三十餘里之黃灣南至正確信羅賊圩林立巡撫鄭元善以張曜兵單檄副將楊飛熊率省防剛銳五營楚勇吉林黑龍江馬隊及驍果驍健兩營馬勇馳往佐之比至張曜復連捷二十三日戰於城北東岳廟斬首千餘級二十九日攻毀楊樓賊巢方部分取平輿會另捻楊方衡袁安愚等煽髮逆圍攻新蔡甚急張曜赴援以衆寡不敵仍徹回鄭元善檄其仍扼前敵牽制賊

勢令楊飛熊率所部由汝甯馳駐項城相機進援自
率襄勝五營勇丁並親軍馬勇三千人取道陳項進
勦於是兵又分而賊復恣張曜等詢知諸民寨附賊
者半脅從者亦半因爲解散之計其拒賊之寨分兵
救衛堅其志爲賊要援之寨務力攻之期必拔而後
止正陽銅鐘店民寨號巨鎮偏於賊賊分股踞附近
之魯店築寨挑濠以困之張曜令叅將尹嘉賓酌帶
馬步復調集馬鄉傳寨諸處練勇三千餘約以三月
十九日黎明薄魯店寨下賊見我軍突至以半守寨

以半迎拒尹嘉賓親督所部衝突礮中乘騎易馬復
戰賊潰遁我軍追殺數里乘勝回攻賊寨填濠樹梯
蟻附上斬擒首李存道任玉琴向和尙張胡闊王鐵
錘遂奪魯店寨時確境申河店寨亦爲知縣陳夢蓮
守備唐漢平克復汝項適中地有蕘寨者因貧民內
應爲賊襲陷各民團驚懼欲潰射橋魏寨秦莊諸寨
相距僅一二里受倂尤甚陳大喜黨之踞范寨者與
董寨賊相援應張曜率馬步進扼射橋令吳元炳督
前敵各營向范寨以分賊勢四月二十五日吳元炳

會同叅將保英出隊誘戰范寨賊出拒平輿者巢亦
出馬賊應援高捷營守備許得勝死之二十七日賊
衆萬餘攻雍樂民寨我軍倚寨排礮轟斃數十乃退
謀言陳大喜糾王殿書陳石頭史狗娃等股乘麥熟
將大舉掠糧張曜狀聞鄭元善旣解新蔡圍因以五
月初二日親率馬步進駐汝甯因與張曜等議以董
寨北趨西平上蔡可斷我饜道必先取董寨而後直
擣平輿乃無患因令派赴確山之昌勝營楚勇千五
百人輔以驍捷等營馬勇並陝甘官兵四百赴射橋

由張曜督率進剿營總蘇謙叅將尹嘉賓亦並赴前敵其時沈頂賊劉興馬丙等攻蔣莊尹嘉賓燬其土圩四正息賊張鳳林黨由吳寨攻王家店銅鐘店圖刈大麥復爲知縣方鏞擊敗大喜始無出意初十日賊騎突擾申店我軍密伏馬步伺之賊至齊出奮擊斬執旗及領隊賊目十數餘衆驚潰營總蘇謙乘勢追勦生擒李小保等奪馬百餘十一日張曜督游擊李殿元率衆薄董寨兵勇越濠躍牆而登賊奪關狂奔我軍追殺十餘里斃賊百餘遂克之張曜本駐韓

嶺至是復還屯連營至郭樓以東近偏二王樓寨二
王樓距平輿四里爲平輿門戶孔海寨者亦平輿之
奧援十六日張曜率隊自孔海東南至馬灣高臺火
寨外麥垛日以兵進攻二王樓二十二日徐寨出騎
迎敵游擊劉自順擊敗之二十四日陳大喜出馬步
數千攻郭樓大營張曜督所部擊卻之斬殺甚衆擒
王進發等二十六日大喜復糾死黨出戰我軍分路
迎擊擒斬千計佐領巴彥克喜矛傷七創猶力戰餘
賊披靡遁伏不出尹嘉賓分兵徇正陽進攻閭灣之

賊破其外圩守備胡士元戰歿兩旬間軍威大振張
曜等滾營前進築壘二王樓之衝斷賊出入賊以死
爭六月初一日四路來攻我軍奮擊斃其執旗悍目
始少卻初二日復糾左右各寨擾我新壘我軍屹不
動張曜潛調親軍及驍捷營馬隊鈔擊退之初四日
五鼓各寨賊眾復湧出各營嚴陣以觀其變傳令候
中軍號礮同時奮擊賊見官軍整暇不敢偏相持稍
懈我軍號發各營譟呼突擊游擊劉自順營總雙全
各率馬隊縱橫決盪賊眾潰追至濠礮斃守堞賊十

餘賊益膽落數日不敢出我軍遂於初九日寅刻悉
銳進攻以昌勝中左等營及豫勝右營爲右路雙全
馬隊並驍果驍健等營騎兵策應以昌勝後右等營
及豫勝前營爲左路先鋒營馬隊爲策應張曜親率
豫勝中左等營並親軍馬隊居中策應部分已定先
以武成永固大礮向二王樓轟擊連發數礮聲如霆
震屋瓦皆飛武成永固者 仁廟時南懷仁監造
攻堅神器也兵勇乘勢涉水越濠疊肩而上知縣湯
聘珍游擊浦本祥王泰來各持短兵督隊猛進守賊

憑壘死拒率皆精悍礮石雨下湯聘珍左肩中槍子甚劇浦本祥王泰來爲磚石傷已仆各裹創起戰如故自寅至午守賊不稍卻張曜環濠躍馬大呼曰今日不破賊不退士皆踴躍湯聘珍浦本祥王泰來分領各隊賈勇先登己革知縣沈宜昭挺矛直前賊傷左肋負創殺退守賊張曜揮軍三面疾進卽以是日午刻攻拔二王樓寨斬逆首陳玉川王次山郭步儀餘悉屠之方大兵之入寨也賈寨徐寨郭莊賊咸來救分兵禦之張曜策郭莊踞匪不多可一鼓下傳令

攻郭莊兵勇越牆入並焚郭莊是夜復遣精壯至平
輿附近火賊卡察虛實獲謀訊言賈寨賊以二王樓
之破殊恐求救於大喜云張曜與諸將議賈寨當我
營正南近在肘腋宜乘其驚懼未定克之免牽制因
於初十日卯刻進攻以三營扼東路備陳逆以兩營
逼孔海以四營抵賈寨守賊開礮抵拒我軍隔濠以
炸礮轟然草屋眾譁潰兵勇奮入格殺無遺其奪門
逸出者復爲馬隊追殺餘眾竄入史步廣巢兩日間
拔賊巢三所斬擒三千餘起獲千斤大礮三牲畜旗

械不可勝算我軍受傷哨官八員兵勇四百餘名車
亡兵勇十八名平輿老巢之圍遂合此汝軍絕賊近
援之第一轉機也官軍旣克平輿附近諸寨賊愈孤
立因遠結外援將乘間出竄昌勝營官副將余際昌
新募昌勝五營由槐店奉檄移汝會剿余際昌楊飛
熊皆楚將之材武者旣至汝軍勢益振八月初一日
賊至西平迤西之羅廟爲官軍擊敗因竄泌境由牛
躡吳集沙河店諸處回趨確山復爲確山兵勇斬馘
甚衆二十九日陳大喜結張鳳林等股匪七八千援

老巢是日亥刻偵知賊千餘抵寨南十五里之兩路口俟大股豫勝昌勝兩營各出四成步隊輔以尹嘉賓劉自順靳玉書賈蕙山各營馬隊五鼓拔營進賊急迎拒張曜余際昌親督馬步縱擊賊殊死戰不稍卻已令馬隊鈔兩翼步隊擣中堅以劈山礮連環轟擊前隊悍賊應聲倒馬隊乘之賊始亂潰我軍揜殺屍相枕藉餘匪奪路奔入兩路口迤東之唐店寨追及寨垣踴而登寨民倒戈殺賊賊踰垣遁者皆入史步廣寨援賊之後至者分踞高臺夕陽店安東諸處

閏八月初三日犯正陽之銅鐘寨爲都司田映唐哨
官把總楊繼才擊殺數十賊四散奔竄於是外援絕
勢益孤初七日大喜率死黨五六千由十八廟北竄
謀言欲趨上蔡截饒道其守賊乘我分軍遠追卽率
家口輜重突圍而出云張曜乃屬余際昌追勦而自
守前營令各寨預爲備余際昌追至汝北河巨橋遇
賊揮軍縱擊賊遂折而東走初八日馬隊追及楊寨
斬殺數百初九日薄項城西關我軍衝至相持未決
叅領巴彥克喜見賊中有紅衣乘馬指揮者手發一

槍斃之馬步乘勢包鈔餘眾潰遁由楊埠竄回南路
各巢時官軍已克平輿惟老巢未下老巢賊果以初
八初九兩日黎明連犯前敵各營爲張曜擊退賊遂
不復出我軍併力益攻陳逆乃陰結陡溝明港各股
匪擾遂確噉項城捻匪劉興劉紹碌等踞寨攻城誘
皖捻姜太林擾汝郡分我兵力我軍四出扼剿而圍
老巢不少懈陳逆刺知我軍前敵各營恃郡城米接
濟叅將尹嘉賓率所部駐高平寺通運道遂密邀正
息新項及張鳳林皖捻張耀林等馬步賊數萬麇聚

高平寺附近之郭樓聯營二十四築壘挖濠橫亘十餘里謀阻運道覆我全軍尹嘉賓一營遂爲所困九月十六日張曜余際昌等選馬步各隊伏南北兩路另以小隊挑賊陽北以誘之匪衆出追伏兵突出夾擊斃賊四五百燬賊壘二是夕張鳳林大股來合併乘夜增壘阻後路步賊幾兩萬馬賊千餘表延南北西三面包我營復於南北兩頭對挖長濠將以死扼困我軍糧饗不通已數日張曜余際昌激勵士卒於十七八等日晝夜出奇襲擊擒斬甚多而賊不爲動

十九日張曜余際昌等親率各隊直向郭樓要道疾馳先於夜間密飭叅將尹嘉賓鞏玉林游擊周登高帶領馬步由高平寺進兵南北會合復分兵嚴困老巢援賊見我軍至卽出大股抗拒勢張甚我軍嚴陣待相持刻許伺賊少懈突前奮壓槍破火箭齊發賊前隊紛倒叅將徐連陞浦本祥知縣湯聘珍汪鼎和游擊王泰來劉自順協領巴彥克喜首陷陣刀斫矛刺斃悍賊數十賊乃大亂尹嘉賓等率眾大呼由後路衝入截賊爲二張曜余際昌分路追勦賊猶殊死

抗巴彥克喜手斬黃衣馬賊二夥賊數人火器猝傷
胸墜馬守備盧東成馳救賊矛攢刺同死之我軍憤
戰益力匪勢不支盡棄營壘併向東南賊寨竄匿馬
隊追殺二十餘里西北兩路及賈河南岸諸賊壘皆
拔燬之守賊悉殲焉是日老巢踞賊數結隊將突圍
爲守兵截殺亦甚衆是役也斃賊三千餘平壘二十
四時劉興劉紹祿等踞項城之曹寨亦爲知縣陳桂
馨守備王進忠前沈項縣丞巖湘所破斬劉興之姪
劉青山陳逆外援之賊旣皆敗而汝軍益振矣事聞

賞叅將徐連陞副將銜冠勇巴圖魯浦本祥副
將用游擊劉自順効勇巴圖魯鞏玉林副將銜王泰
來叅將用振勇巴圖魯都司靳玉書游擊用湖北知
縣湯聘珍同知直隸州用誠勇巴圖魯己革叅將尹
嘉賓復官協領圖爾塔齊巴圖魯巴彥克喜照副都
統從優議卹建立專祠守備盧東成一併附祀論者
言汝甯自陳逆倡亂諸寨應之幾於徧地皆賊無可
措手當事者如理亂絲如撲燎原撥亂而反之正嗚
呼難矣時巡撫鄭元善請另簡藩司 上改張曜

官以總兵候補
爲賊援斷絕
而寨中掘鼠
固多懷疑者
老黃莊賊目
效旋生擒馬
至其寨收撫
以機宜使入
搃賊寨寨首

反皆會如喉之於是軍抵楊楹以內應破其寨殺
無算陳會如遁竄霍灣我軍急追霍灣門不及閉擒
陳會如尹娃並擒霍灣賊霍印等斬以徇因乘勝攻
高潭寨亦內應破之翌日進攻馬灣馬灣牆高濠深
賊首馬行遠爲大喜謀主僞軍師馬克中在焉我軍
由東路進飭汝甯府知府劉成忠率練伏汝河西兵
勇至填濠越牆匪衆驚亂突出西門竄逸追斬馬行
遠擒馬克中餘衆竄河西爲劉成忠截殺殆盡時盧
岡賊寨來援見馬灣破卽回竄我軍躡之遂破盧岡

獲擒首盧大幾賈強驢訊明與僞軍師馬克中並斬
首傳示於是軍威益振卽日傳灣寨胡老莊寨黃灣
寨余樓寨關莊寨潘營寨熊灣寨馮灣寨閻灣寨劉
寨萬和寨居民或殺賊來獻或縛送逆首匍匐泣訴
願爲良民張曜余際昌等周歷撫諭飭令薙髮酌留
器械以資防守咸興維新寨民感德畏威歡呼雷動
惟李樓傅家兩寨堅抗不服兵至皆屠之斬擒首丁
童許琳等計三日間攻拔逆寨七收撫民寨十二斬
馘三千餘奪獲器械不可勝數反正居民萬二千餘

戶於是在籍主事葉蔭昉余本初等呈請勸撫各寨
張曜各資以兵因收撫張杏尹寨張渡口寨攻克黃
寨寒凍寨李灣楊寨南傅寨孫灣熊灣馮老灣徐廟
尹灣盧岡寨收復楊莊姚寨諸處斬黃寨匪目張萬
福周著子姚莊賊目胡啟告等擒首張鳳林率黨旋
復襲破楊莊姚寨留賊踞守並句結王倫袁安愚等
股三千餘賊攻撲寒凍爲余本初擊退是時正陽間
河店練長魏訓亦率眾投誠余本初遂率所部由閭
河店相機而進旬日間復收撫魏家東寨永固寨張

寨熊寨陳寨賀寨油房店張樓甘樓余樓雷堰張五
店並陳士正陽悅山喻魁王崑山余名山吳起元等
十餘寨一律薙髮東南百里通行無阻余本初遂留
寒凍安撫新集之衆官兵所至已拊張鳳林賊巢之
背氣象爲之一變時鄭元善檄副將楊長春率所部
進屯平輿集聚偪老巢爲張曜等應援張曜余際昌
等偵知老巢剝賊悉從大喜出守賊無多恃進北之
徐寨爲屏蔽徐寨三面重濠垣壘堅固陳逆之弟陳
雙喜及捻首魯邦彥王學禮等屯聚詭譎凶悍賊中

所最著計非先克徐寨則老巢不能猝拔因密遣間使爲內應以十月十二日率馬步進攻寨西北隅火光起揮軍越牆而進寨民徐豐年等由內應之守賊驚亂短兵巷戰擒陳雙喜魯邦彥王學禮等餘殲除略盡因復以計破范寨擒擒首霍添碌蔣之成僞軍師王應林等皆斬之復薄馮寨擒首馮殿選開寨出降於是小王史樓大劉小劉四寨亦赴軍乞降張曜等授以機宜使同擊賊因以十一月初三日夜進攻陳逆老巢是夕風雪甫定濠冰凝結遲明張曜余

際昌等分督各隊數路齊進兵勇沿冰越濠直薄寨
下俄寨內火發賊亂我軍乘勢躍登斫殺大隊繼之
大喜弟陳汶詭譎驍悍大喜事多取決爲眾惡冠率
其死黨短兵巷戰我兵奮擊生執之並獲僞軍師僞
先鋒陳添爵等及大喜妻賈氏妾尹氏陳汶妻李氏
皆斬之餘夥接殺截剿無噍類起獲僞印二黃色龍
帽龍衣數事時初四日辰刻也復分兵徇四寨斬惡
逆郵槐得馮三碌楊成楊得正餘悉繳械薙髮與之
更始正陽蓮花寺諸處民寨亦聞風歸順先是毛昶

熙檄汝甯知府劉成忠馳往正陽勸諭各寨令總兵
趙鴻舉副將陳祿興帶馬隊五百輔之劉成忠派守
備王文行爲鄉導廉知顏家寨壁壘甫成無反正意
因引軍疾馳及寨匪以大車塞門迎拒王文行大呼
直入手刃數賊兵勇繼之匪衆踰垣遁陳祿興斬賊
首顏文模遂乘勝攻克楊家圍葉家圍孫家樓彭家
圍方家圍楊莊水圍六寨餘圩皆次第規復此汝軍
斷賊外援收撫各寨攻克老巢汝屬漸就肅清數月
間時事也奏上得 旨余際昌以總兵記名叅將

保英以副將用游擊周登高黃貴誠以叅將用都司
李廷彪以游擊用守備賈蕙山喻國鴻慶祿以都司
用千總靳玉明胡道元賈文田石三元連雄陳萬鑑
劉占鼇楊春祥王春遂把總羅輔臣陳朗山宋徵文
均以守備用佐領文凌以叅將留豫游擊李忠奎開
復原官通判連翔以知州用知縣姚國慶以直隸州
用鄒鉞仍留河南還花翎崔廷鏞換花翎縣丞劉興
齡以知縣用貢生張之渠以縣丞用汝甯官紳劉成
忠等亦獎擢有差陳寨旣克大喜遠竄民寨百餘皆

反正而賊之黨援猶未盡滅 上命團練勦匪大

臣禮部侍郎毛昶熙移師汝甯與巡撫鄭元善會勦

於是昶熙元善皆駐軍汝甯先是豫省需兵鄭元善

奏派前湖北宜昌鎮總兵李續燾募湘勇三千分爲

威振六營來豫助勦以六月十二日抵信陽時楚師

方越境協勦歐陽正鏞一軍已攻克上馬石賊巢進

勦刑集周鳳山一軍連克數寨被脅民圩望風歸順

已由閭家井拔營西向兩軍距明港驛東西數十里

尙未會合鄭元善因檄李續燾統新集之軍由中路

進期以聯絡楚師疏通驛道南汝光道趙書升導以
鄉兵偵知五紀屯新店龍井胡楮店各寨賊相約阻
我進兵之路七月初二日李續燾親督中軍右營取
新店趙書升派防勇屯洋河爲之聲援所部鄧貴倫
偪賊寨而陣賊出三路迎拒相持數時續燾軍由五
紀屯至阜陽店遇賊卽擊所向披靡直抵淮岸以岸
北長臺關賊麇聚不卽渡因由阜陽店折回鈔出新
店寨後與鄧貴倫軍會夾擊勝之斬馘甚多明日戰
復大勝五紀屯新店賊遂不敢復出龍井胡楮店賊

尤悍且衆時出紛擾續燾會同署南汝光道蒯賀蓀
派兵據守要隘戰屢捷斬首復數百級八月二十八
日續燾聲言攻龍井派前左兩營鼓行而進自率中
軍勁旅及中右後三營兵勇銜枚疾走間道徑取胡
楮店數道環攻礮裂寨牆數丈方銳進北門突出賊
四五千鈔我後續燾急旋軍迎壓伏親軍於叢薄間
誘賊入伏礮舉伏發衝擊決盪斬擒千計餘西向奔
竄胡楮店首事胡永貴縛匪黨蕭文禮等十餘匍匐
來獻瀝陳被脅狀察之信遂撫其衆令立功自贖三

十日黎明胡永貴率投誠壯勇二千餘人薙髮至營聽令續燾已派隊進攻龍井因令胡永貴爲前敵蒯賀蓀派兵繼之比日出抵龍井寨濠轟斃執旗賊日賊死拒磚石如雨續燾令徹隊陷賊出巢賊果出躡我後都司陳清海撥馬陷陣手刃數賊續燾揮軍奮擊生擒紅衣騎賊兵勇乘勝擒殺斬首及落濠死者不可勝計餘衆奔竄入寨訊知紅衣賊爲寨首吳彥章之弟吳紹志素凶狡卽陣前斬之胡永貴降衆各以首級槍械獻因令回寨自守胡楮旣受撫龍井勢

孤益結外援將以死拒陡溝蕭曹各寨恃龍井爲門
戶分黨入助賊勢日衆閏八月初九日辰刻賊於東
面排隊出約數萬已刻抵洋河續燾慮兵力不敵亟
令鄧貴倫率後右兩營斷賊歸路而自率中軍親兵
暨前營副將李白裘馬隊都司馬策勳各以所部從
西南路邀截復飛調曾廣星等自新店渡港扼北路
旣俱集號發鄧貴倫率所部大呼突陣前營親兵及
馬隊應之三路夾擊鏖戰二時擒斬三千餘賊退入
寨益堅閉不復出續燾因以其間分路設伏邀截援

賊焚毀近寨房屋擒僞官李時雲寘之法會湖北候
補道歐陽正鏞因隨州應山相繼告警徹軍旋楚邢
集踞匪亦分眾赴援龍井我軍恐腹背受敵圖攻龍
井益急二十四日派前後兩營伏寨北左右兩營伏
寨西中營伏寨東自率中軍親兵及驍果營馬隊伏
寨南策應方嚮明西北南三門啟各出十數賊後營
副將董新元揜至寨門將突入爲所覺出賊沿濠大
呼曰閉門閉門牆上槍礮遽發內賊整隊出我軍奮
起擊之斃賊三四百賊復入於是益圍攻斷其樵汲

九月初二日有杜九鳳者詣營泣言願與守南門之雷得雲獻門爲內應續燾察其意誠許之初三夜聞寨內人聲鼎沸知有變急飭鄧貴倫李先致李白裘賀星明董新元並武生李南軒等各帶隊伏北門左右都司馬策勳等以馬隊距北門三四里潛伏縣丞易方李續侃帶隊攻西南兩門而令前左二營分哨東門自率親兵往來策應三更時寨內西南隅草屋爲噴筒火箭所然風烈火猛聲愈譁如格鬪者然有頃大股賊隊開北門突出伏兵以槍礮截擊賊衆驚

潰白相踐踏鄧貴倫賀星明等率馬步窮追至淮岸
殺斃三四千落水死者不計其數餘賊星散寨內被
脅良民殺賊自效縛逆首吳彥章斬陡溝蕭曹頭目
黃正文蕭文義杜魁首級以獻我軍入寨搜殺逆黨
千餘遂克龍井泉吳彥章以徇翌日進攻蕭王寨寨
日許自新請執陡溝賊贖罪續燾許之爲退軍初五
日陡溝賊怒許自新攻其寨續燾救之殺賊千餘擒
三十餘皆斬首初六日許自新遂以陡溝悍逆何登
桂趙琴聲劉開運首級來獻因收撫其衆胡永貴來

言蕭曹店民將執閻景州自效爲所覺遁陡溝陡溝
熊次三殺之亦欲以首來獻續燾咸推誠納之於是
蕭曹店縛閻景州父兄叔姪閻鳳先等詣營就撫且
言陡溝逆首蕭文信有加兵脅制意續燾以十一日
挑六成馬步潛入蕭曹店安撫降衆爲之備已而陡
溝賊衆數千果至見官軍旗幟急返遁官軍追之殺
賊數百餘奔回陡溝於是續燾復攻勦長臺關蘇家
樓皆連勝淮南岸肅清淮北岸之淮河鎮三官廟楊
家寨諸處亦相率薙髮投誠明港賊首陳玉林苛虐

寨民爲其黨所圖誘至藍店殺之並殺從賊三十餘
及其家族陰有投誠意候補縣丞吳秉桓嘗權明港
驛丞民素德之偵知其變密以告南汝光道蒯賀蓀
因令吳秉桓偕六品軍功馬萬選信陽紳士楊運往
察虛實會確山知縣王觀瀾告以境內藍店熊莊李
從店楊店四寨與明港驛路相距不遠熊藍二寨尤
近大道欲疏通驛路必先克此數寨因令與千總王
得萬外委王鎮方集團往剿且相機收撫於是藍店
文童楊輝斗率郭克林張玉華擒斬賊首張正德張

正富張正道來降熊莊首事熊培遠李從店首事李
松蔚亦相率反正郭克林楊輝斗復入邢集殺賊首
胡大發夫婦並胡文斗胡義生胡敬時等以自贖吳
秉桓因與楊運胡永貴等謀作書與明港驛民反覆
開譬數千言有李聯階者復書言陳逆已除尙有老
毛莫制必得馬萬選其人來事可濟云云秉桓因白
請馬萬選資之行守備許萬邦率勇繼之比抵明港
陡蕭各賊皆在老毛閉門上牆守馬萬選已先得入
乃開門逆萬邦進胡永貴楊運等率各寨隊亦俱進

陡蕭賊率老毛以遁李聯階籍罪不可追者二十二
人誅之續燾軍至明港已定於是李軍副將李白裘
迭敗邢集賊之圍攻寶峰寨者殺賊數百遂駐明港
副將董新元攻熊王寨破之斬其目戴通和及悍黨
數百復擊退王唐寨援賊追殺十餘里驛路遂通附
近各寨均無梗阻維時陳大喜竄陷蕭王寨死灰將
復然巡撫鄭元善因公鐫級 上命吏部侍郎張
之萬署巡撫事甫受替尙未至軍此李續燾蒯賀蓀
勦撫各寨疏通驛路與汝軍捷高臺克陳寨相先後

之時事也

土匪十一

陳逆之復踞蕭王寨也西有邢集東有陡溝爲之翼
衛項城正息各逆爲之應援勢將復熾毛昶熙張之
萬議令李續燾督所部進圍邢集余際昌一軍由正
陽直搗陡溝同時並進復派劉鴻增陳朗山勇隊七
百進屯明港歸李續燾調度分撥將領馳徇各路項
城擒首李金棠徐四萬擾新興集南廟空諸處爲恭
將尹嘉賓所敗擒斬李金棠新蔡土匪吳心田楊春
成龐四一等拒抗官兵知縣唐咸仰會同尹嘉賓攻

喜拒勦爲副將保英忝將周登高擊敗斬擒尤衆余
際昌兵至正陽屯王家大塘附近劉夾道魯臺二寨
出乞降方部分取老巢偵知東北小王寨首雷清和
率黨盤踞將阻我兵路際昌因令守備楊長林游擊
李大成率隊先進叅將徐連陞游擊鞏玉林副將浦
本祥三營繼之副將李殿元直隸州湯聘珍策應親
督圍攻適總兵趙鴻舉馬隊踵至肉薄數時把總王
萬倉死之徐連陞浦本祥李大成裹創復戰卒拔小
王寨斬首二千餘級復會合張曜趙鴻舉率陳祿興

等攻克藍青店寨斬其魁李小成吳毛程炤劉元賀
夢王路殺守堞悍黨二百餘於是陳逆計窮張曜復
用王次山陳玉川爲鄉導誘擒陳逆母朱氏於郭溜
寨大喜度勢不可爲乃自焚寨由陡溝渡淮西走復
爲藍店民團截殺因竄繞邢集以北會楚捻林振山
者遁藏邢集因與大喜合竄湖北隨州之倒石橋以
十一月二十九日攻破隨境插鼓臺寨十二月初一
日焚掠小麻店初二日駛擾守順寨裏脅日衆漸復
披猖南汝光道蒞賀蓀信陽知州孫嘉臻以狀聞張

之萬飛檄張曜選撥馬隊探蹤追擊而自拔隊由許州赴汝會合毛昶熙相機勦辦大喜旣破擂鼓臺寨盤踞草店諸處脅掠初七日爲楚省總兵沈俊德所襲擒馘甚多棄寨遁復回竄豫省桐柏縣東之固鎮吳城諸處衆尚三四千張曜率馬隊追至平昌關距固鎮六十里山路陡險人煙絕少軍士裹糧進大喜恃險與其黨築壘挖濠負嵎抗拒余際昌撥剛銳昌勝各一營馳往助勦李續燾亦派道員葛承霖率威振三營及馬策勦馬隊由邢集進合二十七日移屯

王家岡二十八日鼓行入山山徑叢雜馬隊不能馳
騁遂率步勇登山頂俯瞰山麓一河隔岸賊旗麻立
鱗集蟻渡我軍槍礮下垂不能得力因發矢投石斃
數賊不少卻張曜指揮各軍分左右中三路齊壓伏
一軍於山側以爲策應部勒既定直衝賊陣礮石交
發互有死傷張曜復調各營全隊親督角戰呼聲震
山谷斬首數十級賊乃退遁兵勇乘勝追躡過河賊
黨傾巢接應鈔襲我後敗匪亦各回鬪我軍三面受
敵賈勇直前人自爲戰短兵相接浴血裹創愈戰愈

奮賊不能敵始四散回竄我軍追之直至菊花嶺遂駐軍二十九日張曜令各軍乘夜追搗賊巢三更後銜枚疾趨直抵固鎮負土填濠攀曳而入賊衆驚起殊死迎拒副將周見思叅將左敬軒都司瞿盛南守備左長清深入戰歿悍賊數百乘亂由西南潰圍而逸比明搜捕餘賊始知陳大喜已與死黨竄赴西南童子坂諸處我軍追至熱河口不及始旋軍是夕斃賊二百數十奏入死事者從優議卹張之萬復奏言地方官弁於賊入境旣無狀報復不以兵團接應得

旨南陽知府金梁革職留任桐柏知縣邱仲坦
固縣營守備張錫升皆革職陳大喜既遁湖北隨州
境爲楚師截擊復由豫省確山屬之石滾河溝竹店
竄至新店爲豫勝前營營官王泰來擊退冀入陡溝
合併復爲駐防陡溝之昌勝營擊敗因折而東趨張
之萬策其必投土扶橋因飛飭駐防銅鐘店之守備
田映唐嚴陣以待已而賊果至田映唐率所部擊之
斃二百餘擒二十餘大喜被追落水幾就執遂遁入
土扶橋霍廣玉寨張曜等亦尋至時二年正月初七

日也越日部署合圍由正陽逼進而大喜已乘間襲破息境之王李二寨以初九日至岳家坡初十日至王谷橋總兵趙鴻舉蹙之於新息交界之包辛集十二日張曜追及於賈寨皆有斬獲大喜遂由宋家岡遁入新蔡之袁安愚寨安愚本大喜老黨薙髮投誠衆知其必叛歸陳逆張曜急調馬步星夜合圍余際昌率五營助之尹嘉賓一隊策應復挖長濠爲久困計馬隊甫至賊已出寨因縱擊斃其執旗賊目二衆立敗退入袁寨濠內我軍馬勇下馬搶濠賊垂就獲

忽寨牆槍礮如雨門遽啟出悍賊數千與陳逆衆合直衝馬隊我軍自未至西縱橫決盪殺賊數百生擒李小友陳觀得楊心和等斬之更餘步隊始到遂令與馬隊列陣三更後大喜率悍賊四五百突陣東竄忝將崔廷桂把總王彥邦中矛傷馬勇有死者袁寨猶開礮助賊張曜令步隊屯袁寨扼禦自與余際昌將輕騎逐之至練村大喜等梟水渡溺死者甚多我軍追殺紅衣賊十數比至河岸欲渡北岸陳家空捨首陳大常率衆數百以槍礮抵拒我軍因由上水渡

河馳抵華莊陳逆已遁入華莊迤南吳老莊寨距陳
大常寨七里其地有賊寨五相比附未可遽攻乃共
謀徵調合圍之策而太和一路皖捻大至全豫震搖
兵力不能專注大喜遂又以其間得脫矣汝甯之亂
大喜與張鳳林各樹一幟流毒三府一州之地袤延
幾及千里沈項新蔡汝陽之賊奉大喜白旗爲號令
確遂桐泌信羅商固之賊奉張鳳林黃旗爲號令大
喜旣失其穴豕奔兔逸幾瀕於殆而卒莫能檻獲張
鳳林復百計牽制分我兵力使不得盡銳成功方大

喜回竄陡溝張逆陽與之違實陰爲之助陡溝逆衆
於元年冬嘗乞降且縛藍青店賊首夏廷渠以獻當
事者未之許鳳林復詭詣營泣訴請執大喜自贖毛
昶熙張之萬陽納之令張曜等收撫挈往固縣鎮勦
賊張鳳林已微窺其意日與張曜等行止必相距五
六里十餘里啟候至帳下必擁小隊迨張曜等深入
長臺關復假餼糧不給請回寨措資斧張曜密白毛
昶熙張之萬使陰圖之於是毛昶熙等飭余際昌以
所部屯茅家臺與張逆老巢環逼西至明港皆我軍

營壘揆其將至必損滅黨羽貌爲恭順待其過明港
執之諸軍嚴陣綦布其徒必不敢逞計定因執之及
其黨並確山擒首張幅林分別凌遲梟首以徇時二
年正月初三日也復飭趙鴻舉陳祿興以譚家寨監
生李玉山等爲嚮導攻克正陽之李寨主事余本初
攻克尹灣寨斬殺數百平其巢皆鳳林死黨負固不
服者於是張逆殲而陳逆愈窮此元年冬二年春汝
郡漸平之軍事也奏上擒張逆功得 旨叅將黃
貴誠以副將用都司南宮寶以游擊用練總守備宋

培基以都司用餘存記大喜之竄吳老莊也我軍駐
華莊以扼之時豫省捻股勦撫略盡大喜計窮因結
皖捻爲外援皖捻分兩股其與大喜合者則陳大常
袁安愚秦宣孫四牙張鳳昌洪馬瞎等其劉狗孫臭
一股則由鹿邑菜塚駛竄爲科爾沁親王僧格林沁
所部追勦於是亳汝捻蹤遂合息縣范家橋股首王
暴牙爲知縣劉鴻昌勦擒其子王大平王小平及其
黨趙均何本立等誘破其寨王暴牙亦竄入大喜股
二年正月初八日皖捻秦宣陳啟等竄犯華莊新蔡

縣知縣及叅將尹嘉賓邀擊敗之陳大喜恃皖捻踞吳老莊侯家寨諸處勢復恣巡撫張之萬以大喜遁竄劾張曜褫職留營李續燾摘頂是時陳逆踞杜清源寨余際昌軍屯吳老莊南張曜復調阜陽民國輔以李忠奎一營屯油店橋十八日張曜率尹嘉賓與陳逆戰於吳老莊北斃賊甚多追至秦宜寨方部署攻寨北路皖股大至油店橋一營已隔斷因飛咨余際昌軍會合堵剿時毫捻甚眾其西竄各股已至商水縣之朱圩沈邱槐店亦有賊蹤毛昶熙張之萬分

三
接扼勦日不暇給陳逆率其醜類麇集迭攻我營毛
昶熙以張曜余際昌兩軍間隔復派游擊邵春仁左
成元各率所部馳往接應十八日張曜率尹嘉賓以
民團爲嚮導夜馳至侯寨破賊壘三所斃悍賊二百
餘擒擒首獨角虎周馬及髮捻二十餘皆斬之有竄
至油店橋者爲李忠奎截殺數十十九日張曜等與
賊戰復勝余際昌偵知毫捻已由油店橋竄過華莊
乃整隊進勦適陳大喜陳大常率衆來犯卽揮隊擊
之俄毫捻馬隊數千馳至包鈔我軍接戰數刻賊聚

益衆包圍十數重際昌策馬督陣往來盪決馬賊少
卻步賊復進昌勝前營爲賊截數段候補知州陳學
仁力戰死之叅將徐連升奮鬪得出兵勇悉爲賊困
際昌復挺矛大呼陷陣手殺十餘賊拔衆出圍暫駐
茅家岡賊復環攻數時始退張曜慮余際昌營後路
隔絕因以二十日夜親率數百騎由頓家岡往來沖
突以會邵春仁左成元亦至賊疑大兵雲集且諜知
後來大股毫捻已於鹿邑爲僧格林沁馬隊所敗乃
以二十二日焚巢西遁圖攻新蔡縣城又爲邵春仁

渡河擊敗殺傷甚多生擒李勝等賊遂折而西北竄
李莊橋廟灣一帶滋擾李莊橋與平輿切近四面皆
賊寨正北荒坡各寨尤負固舊有豫勝三營扼守爲
張曜所部張曜恐賊衆復陷平輿疾馳出賊前至馮
莊與三營聯絡扼賊進路二十五日賊陷汝陽屬之
史樓二十七日豫勝中營合民團襲破之二十八日
陳大喜率黨千餘竄入汝陽屬之棗王寨將入荒坡
爲負嶠計張曜偵賊夜運輜重赴荒坡密檄游擊南
宮寶汝陽練長劉長倫等率兵練乘其出進攻之二

十九日五鼓抵寨下大呼奮登賊衆驚潰越牆遁遂
毀棗王寨賊度荒坡不可復踞乃以二月朔攻新蔡
屬之宋培基寨游擊周明崑擊退之初二日率衆南
竄周明崑追斬賊百餘徐四萬等股之未隨大喜竄
者皆留匿荒坡寨張曜以初五六日由張灣渡河逼
之賊依寨出拒初七日傾巢出戰爲我軍擊殺數十
張曜各營遂留攻荒坡先是毛昶熙張之萬策正陽
東南賊寨尚多張鳳林伏誅後其黨仍踞張岡汝陽
所屬汝南埠諸處新撫各寨亦易搖動陳大喜旣不

克踞荒坡勢必南犯因檄汝甯知府劉成忠駐正息
交界之雷堰鎮撫降寨以王文行勇隊隸之復檄主
事余本初集團扼汝陽屬之寒凍爲之聲援檄總兵
趙鴻舉副將陳祿興游擊邵春仁都司左成元率所
部分屯正陽屬之劉夾道阮店茅家店油坊店諸處
遏賊南趨而令余際昌軍出賊西探蹤迎擊至是陳
大喜等果南竄至河岸爲趙鴻舉王文行擊殺數十
岳城土扶橋擒首鮑金朝徐文田霍廣玉王暴牙等
迎之由岳城渡河趨楊莊逼近雷堰汝南埠民寨徙

避一空賊衆遂襲破雷堰西北之馮余二寨並占踞
汝南埠空寨劉成忠派軍功喻魁率勇數百乘夜潛
往由圮牆擁入匪衆驚潰及晨王文行喻魁整隊出
遇賊於馮家寨外王文行下馬解衣大呼奮擊斬髮
捻數十馮寨賊亦遂出逃正陽捻首戴應華蕭文信
李存道等率黨乘隙突入張岡裝旗圖竄遠近爲之
震動魯店亦有賊黨潛回將踞寨以應張岡絕官軍
進路李存道者本正陽教匪踞劉夾道寨其母李陳
氏尤兇狡游擊南宮寶捕獲送大營斬之存道隻身

道至是復違謀聞毛昶熙急調陳祿興由阮店移營
魯店令趙鴻舉等爲之策應初二日寅刻祿興兵入
寨搽殺數匪賊馬已至寨外見我軍先入乃遁去初
四日李存道出竄祿興隊鈔擊之生擒悍匪李和尙
訊言陳大喜方與亳捻謀集張岡進攻魯店云初五
日賊果犯魯店趙鴻舉率邵春仁等往援與陳祿興
夾擊殺賊百餘圍乃解是日賊竄王家岡逼近寒凍
余本初隊方出哨候選知縣李嘉謨及弟嘉端遇賊
邀殺七十餘生擒林振山賊黨潘士魁等適余際昌

軍由寒凍渡河初六日與賊遇於張岡北戰亦勝之於是毛昶熙張之萬議以張曜所部併力規取荒坡余際昌趙鴻舉陳祿興等聯營扼守斷賊句結兼以鎮壓各寨以守爲勦而陳大喜已於初八日率亳掄由正陽屬銅鐘店一路避兵南走張中戴應華林振山等股馬步二千餘留張岡復分踞旁近楊寨王文寨戴家寨相犄角爲牽制我軍之計昶熙等因復檄陳祿興一軍規取張岡趙鴻舉蔣東才邵春仁左成元等分勦旁寨而令余際昌追賊初九日軍至銅鐘

店知賊已入土扶橋霍寨因進圍之賊夜棄寨遁初
十日至息縣賊已於龐家灣渡河而南知縣劉鴻昌
都司田映唐卽半渡擊之其前股竄中和店淮南民
團堵擊復折回與後股合竄羅山竹竿店知縣賀錫
福截擊斬首三十餘級擒賊十三賊遂由河口集范
寨蔣寨諸處遁入光山縣境十一日際昌等軍勦之
賊遂竄白雀園回旋楚界張岡賊以十三日率馬步
數千出竄陳祿興蔣東才擊之遁入楊寨十六日進
攻楊寨方墳濠奮進張岡賊衆來援陳祿興王文行

迎擊援賊趙鴻舉等攻楊寨賊勢殊猛我軍奮擊殺
六百餘陳祿興等策楊寨夜必無備令馬隊截東路
防竄逸率步隊以四更與王文行祝林清朱安瀾等
越濠進王文行大呼先登安瀾等繼之呼聲震地賊
不及拒鬪開東門遁復爲蔣東才江學詩穆清遠等
馬隊截殺略盡殲紅黃衣賊目數十楊寨旣克張岡
之勢孤矣時張曜攻荒坡荒坡爲項南巨患與曹審
馬寨呂寨路門莊高蘭店各賊句結蔓延初七日曹
審馬寨股衆圍竄項城爲叅將張士元都司馬策勛

截回因進攻之初九日我軍攜大車門板柴草等具
填濠銳進槍斃守牆悍賊十數馬寨賊出援馬策勛
擊卻之張曜因其間逼攻荒坡附近胡寨擒首時
純一從賊南竄張曜計破其寨斬純一兄精一知縣
唐咸仰亦以其時攻克王莊斬擒首王庚分軍拒高
蘭馬寨援賊而荒坡勢益蹙謀知寨中良民有反正
意乃密令練長劉傳綸往開諭約爲內應十二日午
後風大作張曜令各營多備火器二更後兵勇逼濠
火寨牆草屋煙燄四起賊衆大亂寨民乘勢啟門張

曜親督游擊周明崑姬成功叅將周登高知州汪鼎和率隊擁進我軍大呼縱擊殲斃無算陣斬逆首王中四餘賊越牆逸復爲副將保英等截殺殆盡擒王文成等六十餘賊置之法獲七百斤大礮四大小槍礮百餘是日張士元馬策勛等攻曹寨亦令軍士縱火圍東西北三面虛南面縱之出預伏兵於隘截殺略盡殘賊遁入馬寨張曜等因進攻馬姜高蘭二寨十七日官軍至寨下寨民老幼開門環泣具言被脅狀納之寨首閆丁爬陰結馬姜寨賊陶海樓陶學禮

董金梁高得時曹小兒等詭降將復爲變立擒斬之
十八日馬姜寨路閭莊皆以次乞降斬路閭莊擒首
吳玉江魏元林王盡臣嚴連中董驢等馬姜寨首吳
萃亭爲商店寨奸人勾結率衆遁去旋爲張曜所部
及陳州知府劉拱宸在籍郎中袁保慶等以地雷轟
塌寨牆執吳萃亭李如松並積惡徐四萬王九現等
汝東項南各境一律肅清此二年春張余分勦各戰
事也

土匪十二

二月毫捻由白雀園東竄商城循六安諸境冀句結
粵逆余際昌軍追之屢戰皆捷然所部止數千傷亡
疾疫賊衆逾萬毛昶熙張之萬檄副將孫之友泰將
教天印率所部馳往會勦未至半日而際昌已亡於
方寨時四月初九也戰狀詳皖匪部於是汝毫諸捻
復會合分踞正陽屬之方家寨萬安店及附近之黃
寨大小張寨與張岡聯絡聲勢賊馬四出蔓及寒凍
北距汝甯府城僅六十餘里正息民寨告急請兵者

日至張之萬等議以張岡之圍不可徹乃飭總兵趙鴻舉叅將敖天印等固守派王文行自帶奮勇七百人先援賊攻諸寨而合孫之友馬步往來游徼斷張岡外援四月十一日髮逆數千攻正陽屬之吳家寨練首吳錫庚力拒之勢甚殆十二日王文行軍至奮擊賊不能當竄入萬安店十三日文行遂攻萬安店賊出列陣抗拒文行繞賊後大呼陷陣敗之左骹中槍傷裏劊力戰不少卻十四日黎明追至熊寨北二里許練總陳鳳雲率鄉團佐之賊自相踐踏死者枕

藉哨長王允能手刃悍賊四文行奮馳入陣復兩被
矛傷戰自若張之萬奏其驍勇由守備擢游擊賞猛
勇巴圖魯名號賊遂竄張岡忠心廟諸處爲孫之友
擊退復敗之於殷家圩張岡踞賊乘外援麇集出悍
黨千餘屯寨外爲趙鴻舉所扼適孫之友余本初各
帶隊至會合勦殺以千計千總汪印千斬紅衣賊目
馬尚際等李承先斬黃衣賊目何小妮等餘衆奔入
寨十五日謀言內賊將延外賊檢討吳元炳總兵趙
鴻舉識其詐以爲內賊欲攻營爲是語誑我全軍出

以乘我間因部令李承先劉宏亮馬隊於正南李玉德汪印千馬隊於正北孫之友馬隊於正東陳祿興以步隊趨西北邵春仁左成元以步隊趨正南爲策應東南步隊防內賊出撲敖天印統之蔣東才扼其正西王文行扼其正東嚴陣以待是日午刻接賊六七千蜂至寨內搖旗聲應我軍奮擊卻其援賊寨賊復出數百攻我後路皆擊退之明日復如是又擊退之追至周水灣皖捻旣不得併入張岡又不得逞志於外寨其技乃窮遂向東北旁竄將潛渡汝河由新

蔡遁回皖境汝擒之散佈河南埠諸處者尚充斥時
豫中將領足當一面者李績燾方圍攻邢集未下余
際昌戰死惟張曜一人毛昶熙等因與議合孫之友
王文行兩隊歸張曜調度以厚兵力曜言新蔡屬之
宋丕基寨爲賊北竄沈項必由之路宜扼守於是張
曜馳抵宋寨賊已全股由汝南埠來犯叅將保英擊
退之賊遂由李莊橋渡河列北岸是夜復爲我軍所
襲賊東北竄追二十餘里其分踞汝南埠寨之賊又
爲孫之友王文行千總喻魁高自秀等所蹙礮斃及

溺水者千計其竄新蔡者又爲知縣唐咸仰泰將尹
嘉賓設伏斬首三四百級擒捻首徐卯等正法餘悉
東竄孫之友尹嘉賓及代理知縣蔣彙之連戰復敗
之遂遁回皖境大喜從之去豫軍由是得專力張岡
矣小彭寨者張鳳林黨寨首彭玉升旣死其弟彭小
案踞之當大喜結皖匪南竄小案應之附近降寨幾
爲搖動正陽知縣方鏞守備王文行密結寨民爲內
應攻破之並破其西南十里之小楊寨執玉升甥李
名山人心乃定李續燾之攻邢集斬殺甚多確山知

縣王觀瀾因寨民鄭啟明等有反正意白於南汝光
道蒯賀蓀賀蓀單騎入邢集諭以禍福寨民感泣乞
降遂收撫之斬其怙惡方恆秀趙二信尤萬友方恆
清吳作霖等衆遂繳械誓不復反事皆在皖捻未遁
前故張岡賊益欲與皖捻合及皖捻旣遁汝捻之散
布方家寨及黃寨大小張寨者復爲知縣裘寶芳把
總袁連三率吳寨首文生吳錫庚熊寨首武進士熊
際泰等以次攻克斬張得讓張萬明李辭奈胡麥子
張鳳亭涂占富張振國張大安張亮王傳科等裘寶

芳槍斃賊魁張振全斬其首實與我軍圍之數重毛昶熙親臨前
張岡內外援既俱絕我軍圍之數重毛昶熙親臨前
敵張之萬復添檄道銜候補知府尹耕雲赴張岡與
張曜吳元炳等會籌進取因縱間使捻首張鳳舞殺
悍賊戴應華等賊心渙散惟霍廣玉糾合蕭文信王
暴牙等誓以死守六月十六日我軍掘穿南面引溝
洩南濠積水明日復掘北面未至濠丈許守賊礮石
如雨兵勇多傷亡張曜因列仗蔽溝頭於陣後隧以
進十八日通水口北濠積水洩盡復於南牆濠外築

木城建礮臺晝夜轟擊寨賊死者甚衆謀言霍廣玉將率黨突圍出張曜吳元炳尹耕雲等謀以圍師嚴密霍逆出必不得逞聲言突圍實陰圖竄逸二十日晚伏兵近賊濠潛易長濠口號邏伺之一二更後霍逆果易裝出爲縣丞單體晉營官宋徵文執獲因部分進攻適寨賊黃心敏數十人來營乞降具得寨中虛實急令副將陳祿興選所部精銳攻西門副將敖天印率所部攻東門張曜親率中營親軍及豫前營從南路進邵春仁左成元蔣東才王文行各營銜尾繼

進策應各路堵扼東西寨門以永綏曜南各營截其北面布置初定時已四鼓毛昶熙於礮臺上申嚴號令吳元炳尹耕雲分路督隊而前張曜策馬先馳手刃退縮者數人兵勇奮進直徧寨根以噴筒火箭焚寨中房屋煙燄障天人聲鼎沸我軍乘勢擁登砍賊爭入賊衆知必死率黨巷戰我軍冒火縱擊愈接愈厲衢巷賊屍枕藉比明斃悍賊千餘斬著名首惡蕭文信擒著名首惡王暴牙羅宗邦夥匪彭雲章等及張鳳林家屬共千六百七十餘名口餘黨殲戮無遺

其逸出塞外復爲伏兵截殺無一免者摎獲張總愚
僞印一旗械資糧無算脅從老幼婦女二千餘赦弗
殺盡焚其屋舍火三日始熄寨牆平毀霍廣王王暴
牙羅宗邦解汝營審之信駢戮梟首以徇奏入得

旨嘉獎知府尹耕雲徐恆曾以道員留豫記名遇
道員缺出請簡放皆賞戴花翎 上以逾格特恩

傳諭勉勵張曜賞還提督銜副將陳祿興李殿元游
擊邵春仁靳玉書蔣東才都司連美宋徵文王占鰲
左成元羅中魁守備殷華廷楊新發驍騎校木克金

布縣丞單體晉等及在事弁兵紳練咸擢賞有差張
岡平昶熙復還宋防之萬奏暫行回省移駐許州居
中調度分撥各隊扼守要隘與地方官弁撈捕餘孽
此汝郡大股擒寨肅清之時事也張岡旣克陳大喜
入皖出沒無定汝南逆寨投誠者相繼而梗化者猶
時反覆光息伏莽尤多九月息縣土匪方寨首逆張
振之弟張正謂張正行等乘大兵西勦毫擒潛結夥
黨數百以初七日三更襲破正陽屬之楊莊寨駐防
息縣總兵李殿元會合正陽知縣朱淦息縣知縣蔣

彙之攻破之擒張新張大書等餘向東北奪路竄守
備劉秦成把總陳大德陣亡十月皖擒程二老坎由
楚境回竄息匪吳添鳳路李寨句名皖黨圖抗官軍
李殿元蔣彙之率兵勇襲破之於是汝光餘孽復蠢
然思動張正謂竄遁談家圍程匪股夥敗散者皆歸
之士匪曹魁亦乘機糾眾起巡撫張之萬令汝甯知
府劉成忠親赴寒凍雷堰駐紮聯絡寨團相機撫剿
叅將王文行都司連美等隊駐汝南埠鎮扼二十日
曹魁股匪襲破雷堰南十餘里之杜家樓文行等進

軍勦之曹魁率眾馳突文行被創戰益力賊遁入王寨復棄之走二十六日我軍與戰復勝匪因四出句結與其黨王占魁徐心田何小關王廷幹鮑進朝等半皆毫捻散歸者狼狽肆虐而均以談家圍爲窟穴十一月初三日賊逼息境馮寨縱火爲永綏營游擊甄樹德王鴻鈞等擊敗是晚復攻小劉寨甄樹德等分兵夾擊斬擒甚衆把總何明亮戰歿初四日匪復乘夜襲破汝南埠西二十里之王寨適王文行巡路至截殺打糧馬賊四十餘騎是日程二老坎黨李允

劉二貓等由太和界首集循沙河西竄近槐店爲副將徐連陞擊敗擒悍黨張玉成等陳大喜亦率苗黨三千餘與之合劉成忠令王文行連美及練總南宮寶宋培基分路擊之遂以十二日偕劉李股同入談圍與土匪張勾曹魁王廷幹合夥十三日夜陳逆率賊騎四百竄入正陽之小王寨並由談圍運糧米爲人踞計談圍賊張勾等亦連日攻陷正陽之袁家寨楊家店諸處毛昶熙自歸德起程復至汝甯督勦十五日汝甯知府劉成忠令都司王玉佩連美等攻王

寨正陽知縣白渠把總袁連三馬鄉練總安體道等
攻袁寨銜枚疾馳填壕奮進王寨袁寨同時並克餘
衆西南竄分撲銅鐘陡溝諸寨王文行等追至寨民
開寨夾擊斃賊無數餘衆擾及信陽州境之蕭王洋
河龍井諸寨南汝光道蒯賀蓀飭州勇四出應援苗
黨高二牛本潁州悍賊因苗逆伏誅西陽集石弓山
賊巢燬率衆亡命出合正息土匪七八千訶知州勇
外出伺隙圍州城蒯賀蓀及副將巴揚阿率知縣宮
國勳及紳士李兆端鄭錫恩禦之數令守備張希榮

率練勇宮兆驥杜中選張金斗等縋城擊殺並以夜
霧劫賊營設伏擊之斬殺數百擒王志全等城圍乃
解賊遁以二十五六等日至游河馮河駱駝店盤踞
劑賀孫巴揚阿等復引兵追之適副將黃貴誠率隊
合擊至吳家店復有另股馬賊迎拒都司潘輔山隊
殺賊馬步二百餘賊乃由楚豫界之尖山竄遁劑賀
孫以狀聞李殿元等軍攻談圍久不克知府劉成忠
與叅將王文行都司連美王玉佩賈文田鄭永泰等
計自汝南埠移營正陽之白土店七里灣連美哨經

周梵寨寨眾出阻擊殺數十余瞎子者息之巨捻聞官軍至以重利啗文行乞撫文行卻其賄許爲道地翌日率隊出不意攻之既入寨賊猶死鬪殲殺甚眾兵勇亦多受傷者二十六日余寨克軍威爲之一振復以南路之賊黃梅寒鮑景朝一股亦最强旋降旋叛劉成忠等設計誘之十二月初二日黃梅寒鮑景朝從四百餘人詣文行所各與其死黨數十入營受撫文行留梅寒送景朝於守備楊繼才營安置是夕文行密約游擊連雄都司連美王玉佩鄭永泰賈文

田各軍以次日鳴礮爲號齊出截殺劉成忠調練策
應初三日辰刻文行伏勇營側自入邀黃梅寒同飯
坐定礮發文行抽刀斫梅寒仆伏勇齊進執之營弁
喻魁王起山朱靠山田玉芝各擧兵刃出截賊黨殺
傷三十餘營外悍賊百餘聞聲內開我軍開門逆戰
連斃十餘乃敗退楊繼才營間礮聲亦舉事鮑景朝
警覺率悍黨奪門欲出繼才親率小隊堵截斫傷鮑
景朝仆地其黨出火彈燃帳房我軍且救且鬪殺賊
二十餘餘奪門與外賊合遁連雄連美王玉佩賈文

田隊及劉成忠勇分路截殺悍黨二百餘殊死戰有
身受數傷不退者其凶獷如此鄭永泰亦身被數傷
裹創前鬪所率馬隊沿途斬擒直至距鮑寨二里殲
殺淨盡賊首黃梅寒鮑景朝及悍目傅大嘴皆檻送
郡城斬梟以徇鮑寨餘孽負隅抗守毛昶熙親督翰
林院侍講吳元炳汝甯知府劉成忠率隊進屯初八
日匪衆夜劫楊繼才營鄭永泰王玉佩喻魁各率馬
步往援賊見官兵大至乃驚退各軍躡擊斬賊數十
十五日吳元炳親率泰將邵春仁王文行游擊蔣

才及連雄連美鄭永泰王玉佩等分布鮑寨四面防
衝突移游擊李大成一營屯寨東北守備楊繼才一
營屯寨正北方築壘忽寨南突來賊黨數百寨賊出
應犯我新壘我軍列隊迎擊殺斃甚多始退入寨我
軍乘勢急追寨牆槍礮如雨傷斃都司巴振德戰馬
勇曰李景堂中礮左腹洞穿未得入是日風雪甚大
我軍僅屯兩營餘隊暫徹雪霽後蔣東才邵春仁等
復移營進逼吳元炳以我軍尚未紮齊恐賊乘夜出
撲密令蔣東才帶勇伏營外備不虞又令李大成等

率奮勇數十於夜間至濠邊施火器以擾之二十三
日四更謀報閩河南岸來匪無數潛入鮑寨我軍嚴
備竟夕二十四日黎明寨匪突出馬步八九百乘霧
直攻蔣東才營勢甚剽獷東才率勇迎勦賊合力包
圍外委蔣尚鈞魁梧多力素以勇健稱赤身徒跣大
呼陷陣往來冰雪中手刃十餘賊當者披靡刀爲之
折易刀復戰把總王九如繼之殺賊亦十餘正酣鬪
間邵春仁李大成楊繼才於大霧中間槍礮聲知我
軍與賊戰各以勇隊分路策應鈔賊後衝賊爲二賊

退不及殊死鬪適王文行帶隊踵至見賊陣內有逆
首王廷幹卽會合副將范文英策騎衝賊陣欲生致
之王廷幹倉皇迎戰身受數創回馬奔竄餘眾驚潰
奪門進寨我軍交乘之賊自相踐踏死者甚眾於是
賊守益固連日復大霧我軍以壁壘新成未出戰二
十六日晚邵春仁隊聞寨中人聲甚囂似將出擾因
會蔣東才嚴陣待派哨官守備劉華生把總蔡明山
外委蔣尚鈞選銳勇伏寨外伺賊離巢急起襲寨復
知會各營出隊接應部分既定賊開寨門擁出犯邵

春仁營我軍陣營外以槍礮迎擊賊知有備急退劉
華生蔡明山已於夜霧中襲入寨門殺退守賊蔣尚
鈞率勇隊由寨牆蟻附登火彈噴筒一時併發王文
行李大成連美鄭永泰楊繼才等隊均至呼聲震地
遂克鮑寨敗匪見寨內火起歸路斷相率西竄寨賊
亦由西踰垣而遁爲我軍截殺大半於是汝南距匪
惟餘談園王廷幹寨及白土店朱鶴寺岳城尚有伏
莽祖熙飭各營乘勝掃蕩奏入升賞各將士有差息
捻鄔大年乘李殿元移軍赴汝糾衆攻陷民寨勢漸

張張之萬時在汝州行營飭光州知州任重光調團
往勦重光乃親率馬步練勇三百餘名烏龍集團勇
四百名進屯光息交界之劉家寨飛調各鄉團勇既
皆集重光輕騎先至大年寨外審度形勢濠水深濶
惟東南地勢窪下水可洩因令鄉團掘濠堤練勇列
陣以護寨牆礮石雨下我勇受傷十二人烏龍烏槍
手登樹擊斃數賊自己至西洩水三尺蒙板填濠進
賊死拒未得入是晚有逸出者爲團勇截殺越日重
光部令烏龍集練總段軾濂率團攻其西軍功盧其

恕率團攻其東自率州勇攻其南獨缺北面誘賊出先令守備張俊率練勇伏叢樹中亭午三面並進奮力攻擊賊衆懼有數十賊由北出竄張俊截殺數賊生擒徐鳳有訊知寨中糧盡重光嚴斷接濟越二日復攻先伏勇寨西敗堵間令把總陳裕德率數百人挑賊賊牆開大礮傷勇三人裕德陽退誘之賊遽開門出逐至寨西伏起裕德回軍復戰斬首十餘級賊退入寨重光合軍功李仲倫諭賊黨趙國良使爲內應會大風雪國良取寨中火藥盡溼之密招外兵於

是段軾濂羅鳳魁張俊盧其恕孫成德等各率團勇
進攻東西南三面仍缺北面合魏鳳魁孟毓藻帶勇
設伏匪衆倉猝登牆風雪愈大火藥不然我軍乘勢
仰攻登牆擁入短兵巷戰斃賊二百餘斬鄔大年割
其首生擒悍賊二十餘餘黨挖殺淨盡燔其巢亦十
二月間事也三年正月汝軍進攻談圍談圍舊爲徐
心田徐文田所居毫匪過擾羣賊入踞心田避居寨
外文田曾充副將范文英營勇文英諭令效力贖罪
使復入爲內應初四日知府劉成忠侍講吳元炳副

將范文英部撥精銳分起前進文田啟門文英策馬
先馳各隊踵赴呼聲四震賊衆驚起格鬪奪門欲出
相持猝不可解叅將王文行從寨後踰垣入前後夾
擊賊乃大潰悍黨張正辛張鳳汝曹罡等約二百並
殲焉遂克談圍成忠元炳等議乘勝攻王廷幹寨審
附近之王占魁王寶柱王烈五王美玉各寨及邵寨
鄧寨賀寨等爲之援必翦除諸寨而後廷幹可圖乃
趣令守備王漢章率精壯數十詭言自談圍竄逸乘
王占魁他出入其寨副將范文英叅將邵春仁游擊

呂振河領馬隊銜枚疾趨夜抵寨漢章發火內應賊
眾不知所措踰垣遁我軍遂入分隊搽勦是日王占
魁寨亦克初五日叅將王文行都司王玉佩守備楊
繼才喻魁文生茅際幸從九錢汝鑑等復克王寶柱
寨初六日復克邵寨初十日復克邵寨斬著名賊日
尹國富尹國有鄧會士等餘賊亦鮮得脫王美玉寨
賀寨因震懾乞降成忠等審其被脅許之人斬怙惡
數賊撫定其眾方我軍之克王寶柱寨也首逆王立
柱遁匿成忠等密投計息縣練總王勤學誘之降挈

小隊四十人入營予以號衣令陰圖王烈五贖罪復
諭王烈五使陰圖立柱且言及期以官兵往助破鄧
寨日我軍分隊預伏王烈五寨側王立柱率小隊衣
號衣入王烈五寨約降王勤學以寨民二百從之烈
五見號衣意爲官兵遽集黨起搏立柱奮敵勤學位
之殺烈五殲其黨我兵聞鬪突入與勤學會復執立
柱斬之於是諸附離廷幹之寨皆克廷幹大懼詣營
乞撫成忠等以廷幹罪雖不赦然老捨爲各寨所觀
望因羈縻使爲導雜髮効力自贖時黃梅寒寨屢攻

未克因令王廷幹從范文英王文行連美楊繼才喻
魁王漢章等往攻十五日克之斃賊二百餘餘奔入
黃家岡朱振聲寨十九日范文英破黃家岡寨王文
行破朱振聲寨邵春仁呂振河蔣東才李大成巴振
德王玉佩周興國等破趙長久寨因並李瞎子寨破
之殺李瞎子及其子姪遂攻入余斂寨其時范文英
王文行連美鄭永泰等復攻破陳樓司灣兩寨生擒
逆首陳小運王豬娃餘黨殲殺畧盡范文英王玉佩
攻小趙寨克之復進克蕭寨擒擒首蕭勉蕭渲蕭申

蕭起皆正法王文行破余寨時擒首盛德秀鄭繼祖
詐言投誠文行訶察其僞陽與之至盛寨門呼盛德
秀出計事我軍乘隙揜入殺德秀及其子三人諸盛
死黨十餘平其寨牆文行率十餘騎急馳過鄭樓詭
稱腹疾誑賊冀入寨門甫啟文行驟入刺殺鄭繼祖
梟其首賊黨爭以長矛拒寨門復閉寨內良民喜鄭
逆誅爭開寨門文行始得出我軍隨入盡殲其黨鄭
樓亦克毛昶熙移營進駐息縣以息縣東北二十餘
里徐來聘寨賊與徐能小時兩賊寨相句結時出擾

因令副將范文英督各隊往攻經徐能寨賊開槍礮
撓我軍我軍怒因先進攻立拔之斃老捻百餘奔竄
者爲馬勇追殺淨盡遂迫小時寨寨賊以徐能寨破
不敢拒守竄入徐來聘寨我軍乘勝進攻來聘寨范
文英徐連陞邵春仁王文行蔣東才李大成呂振河
等馬步各營分路圍攻寨濠水深因伐樹枝雜穠稽
填塞以進賊悍甚比將登輒爲刺傷兵勇負創甚衆
李大成蔣東才及同知馬駿皆中槍自辰至酉數登
數墜是夜三鼓范文英等帶隊復進圍其二面而設

伏於南路賊以我軍晝受傷不虞夜至斫殺數十人
大呼躍而登賊黨驚潰抄殺截斃不可勝計擒著名
逆首陳海馬吳添喜傅炳西周臭回曹旺書鄭泳鄧
氣包等並正法寨毀二十九日事也先是二十四日
光州洪河口劉一里亡寨前忽有船泊州判閔賅曾
慮句引外匪令紳士段軾濂李景韓率勇往覘之劉
逆出隊格鬪李景韓刺劉逆弟劉殿山馬下割其首
奪馬以歸從九任宗昉洪永錫各勇繼進匪衆涉河
爭竄劉一里亡遁去寨亦平光州知州任重光狀聞

昶熙並奏之按自鮑寨至徐來聘寨數月間連下不止數十壘如拉枯摧朽諸將或以力敵或以智取解衣酣鬪梯攻肉薄或身被數刃裹創復進驍敢稱一時賁獲之勇信有之哉此二年九月至三年正月汝光軍事也

土匪十三

同治三年三月汝甯帶兵翰林院侍講吳元炳以母
喪回籍解營務初三日范文英王文行率古息里練
總余廷幹胡莊里練總劉浩然攻聞家寨克之斃老
捻四十餘生擒捻首朱應死孫麻子孫小戲董平黃
鑼鍋正法會大雨十三日霽文英等復進攻小陳寨
都司王漢章傳守巽先登斫殺守牆賊數十衆驚潰
竄入陳固寨因乘勝搗陳固亦克之擒殺略盡俱平
其寨垣十八日攻小鄭寨逆衆聞兵至棄寨遁我軍

追殺百餘擒賊十五小鄭亦克趙寨者擒首趙國良
所踞陰結死黨爲逋逃藪圖緩我兵詭遣趙之清乞
撫文英等察其奸陽許之令以二十二日率精銳來
營助攻別寨之清諾而去二十一夜文英密伏兵寨
外二十二日辰刻之清率悍黨百餘來踐諾我兵伺
其離寨遠遽起擊之殺之清殲其黨是日我軍於寨
外築三營明日復築七營挑濠塹以困之同時信陽
州龍井寨首杜珍投誠復畔知縣宮國勳因周大山
周照爲內應設計奪門入殺杜珍及其黨張安張同

正陽周寨積匪周夢麟等時出劫掠寨長周玉鼎禁
之殺玉鼎家糾蕭曹寨及確山之楊寨匪將裝旗起
事知縣白渠遣把總袁連三在籍都司袁丕基確山
練總馬萬選等破其寨殺周夢麟等擒周萬營周器
周成功周平一王省等正法餘夥有竄入趙國良寨
者國良恃其濠壘深固復倚簡世然寨爲翼援益負
隅死拒范文英令都司王漢章誘執世然寨藏匪張
鳳林之姪張句及惡黨張喜斬之光州州判閔駭會
令練長洪維新率烏龍集勇進攻世然寨世然族簡

克勤懼乞降因先收克勤寨殺簡麻佳陳禿手等於
是附近之簡家樓王家莊趙家寨林家莊賊巢皆克
並擒獲著名巨獐王旱獐等寘之法趙國良寨外援
既絕食將盡我軍圍之益力世然因僞降以緩死自
請營惣被脅狀毛昶熙納之二十五日令南汝光道
蒯賀孫率同知馬駿都司王連三及親軍壯勇籍世
然往清寨至寨使世然指諸不逞者三十一人皆駢
誅籍資糧收軍械安撫良民既訖事乃牽世然出面
縛斬於市梟以徇國良聞益懼數遣其黨出攻皆爲

趙鴻舉等擊退二十六日初更後東西門忽大開匪
衆全數衝出游擊蔣東才都司雷瑞廷王玉佩守備
楊繼才分路截殺百餘人賊大駭繞寨北奔越降勇
王廷幹徐雙禧營守備王鳳鳴力禦之身面被數創
眩而顛賊遂乘隙遁趙鴻舉飭邵春仁以兩營人收
寨自督范文英王文行馬步躡擊趙國良率敗賊竄
岳城是夕入王姓水圩踞之趙鴻舉追至令都司巴
振德雷瑞廷王玉佩攻東南叅將王文行守備楊繼
才攻西北游擊呂振河都司鄭永泰以騎兵誘賊出

游擊蔣東才以步隊截歸路賊果出千總蔣尙鈞橫衝之趙國良擁衆殊死鬪蔣東才巴振德被數創不少邵士氣益奮格殺悍賊二百餘生擒國良之姪趙安等國良引敗匪遁徐心田寨復遁劉時安寨二十八日五鼓我軍抵劉寨誠寨首劉時安毋爲所脅國良窘將出以死抗王文行躍馬入寨刺國良洞胸死餘黨殲殺無遺於是息北之堅巢悍逆誅鉅略盡矣聲王廷幹徐雙喜堵勦不力罪並其黨皆誅之而令趙鴻舉王文行等會息縣知縣蔣稟之往討徐心田

及心田兄文田以納趙逆故毛昶熙張之萬上戰事
賞蔣東才叅將用巴振德王玉佩游擊用楊繼才王
鳳鳴都司用于總王枝發守備用二十九日王鴻舉
等既至徐文田徐心田寨分兵伏要路乘夜進攻適
匪衆出逸伏兵起擊殺百餘餘遁入王得官王海山
兩寨復襲陷張寨小王寨爲犄角勢鴻舉等入兩徐
寨平毀牆濠旋進攻王得官寨毛昶熙別令南汝光
道蒯賀蓀等進攻張寨四月初一日張寨黨衆出拒
副將徐連陞游擊陳安邦都司雷瑞廷奮起擊之斬

頭目張永旺賊乃潰遁我軍追至濠密遣間入寨諭
良民使內應二更時寨內火起匪衆奪門逃我軍乘
勢斬百餘遂克張寨時悍黨多聚小王寨中趙鴻舉
自以兵牽制王得官寨令徐連陞王文行呂振河各
率隊進圍小王寨步兵連營騎兵往來策應挑長濠
爲久困計賊懼以十六夜冒死出撲我軍先有備徐
連陞率巴振德周興國由東南兩路禦之王文行率
楊繼才喻魁王玉佩由西北兩路禦之呂振河率穆
精遠李玉得禹元順等游截於濠外匪衆左右馳突

輒爲我兵擊殺急欲回巢而寨門已爲蔣東才奪據
因回竄李大成傳守巽戢宗英鄭永泰馬步分路截
擊殲殺悉盡小王寨克官軍乘勝進攻王得官王海
山二寨王得官寨跨河立分東西兩堡與王海山寨
相距不遠我軍攻得官寨海山寨輒出賊應援十八
日王文行王玉佩等挑賊出戰先入得官東寨黨衆
悉歸西寨閉門堅拒我軍日以炸礮轟燒寨屋潛伏
兵麥地伺其變二十日初更賊傾巢出竄伏兵截擊
各營繼之乘勢入寨縱火海山寨見火光出救呂振

河以兵邀阻戰良久殲殺大半餘匪欲退回寨而寨
上已徧立官軍旗幟矣是日斃二百餘賊搜斬追殺
無數時汝南強賊惟餘新蔡時玉洗一寨爲最堅我
軍進攻之月餘知縣章慶保執殺其兄時玉衡游擊
南宮寶擒其悍黨王套趙小辯玉洗震懾南汝光道
勦賀蓀誘之出降繫送毛昶熙大營五月初四日入
寨安撫獲黨惡四十六人斬之平其寨垣昶熙以玉
洗同黨尙有梁家灣寨張家大圩隸阜陽與新蔡犬
牙交錯皆積年巨捻不及時撲滅餘孽復然重煩兵

力因於十三日令蒯賀蓀趙鴻舉率都司穆清遠傅
守巽新蔡知縣章慶保等以馬隊往逼張家大圩因
寨內良民張萬祥內應克之格殺悍賊數十逆首張
五禿子率死黨出逸爲練長黨錫齡所獲並擒王榮
張得意張小妮張保立張獅張小墩張梁張利害張
臭糞等梁家灣寨首梁淦義聞官軍至詭言乞降游
擊南宮寶責令交出悍黨梁心誠朱漢雲梁雙銀梁
馬喜戴景梁小奴等同赴新蔡隨營效力贖罪翌日
解送至大營與張圩賊皆斬首王文行等急馳赴其

寨接殺餘匪兩寨俱克復先是我軍攻克徐心田劉
一里亡等寨二徐及劉逆遁亡至是叅將王文行息
縣知縣蔣彙之光州州判閔賅會廉知徐心田匿息
縣梁莊劉一里亡亦名劉周城匿商城期思集因令
把總程長保縣丞胡簡密往弋獲徐心田及其黨徐
在田徐步步高馬東香萬庚山李定徐小蓮黃城柱黃
學一黃落等練長洪逢源獲劉周城及其黨齊麻子
等併送大營正法心田弟文田自道光二十七八年
間結衆倡亂屢句粵皖各逆圍攻新息罪尤不赦趙

鴻舉蒯賀蓀廉知文田與著捻主占魁同竄汝河東
阜陽縣境因派前正陽知縣王承楓會同都司馬正
心息縣知縣蔣彙之率練總姜磐逸彭長庚等分路
躡捕王承楓等追至小孤莊賊首夥數十以槍礮死
拒勇隊排垣入立斃二十餘擒文田王占魁及余逢
因周小路劉開送大營分別凌遲斬梟同時息捻廖
金漳見息境捻寨次第掃平因自焚寨率衆夜遁爲
都司馬正心練勇截獲並其黨數十又新蔡東鄉巨
捻陳太常一名陳崇常焚掠多年受髮逆僞封燕王

知縣章慶保派紳士劉先慎陳端木等破其寨並黨
惡鍾老虎鍾三木匠及其家屬俱執獲搜得金龍紅
毡風帽一偽印一光山紳士任鳳詰同縣役詰獲王
庭幹弟王庭蘭及著名捻首熊添福均送大營處死
新蔡知縣章慶保復先後弋獲逆黨杜鼇城徐花狼
程慶印劉得陳二麻張保淦韓奮子米步五黃套徐
鼠等擊殺時名書擒其黨李元中時文書曹本立時
文甲吳青山等攻克馬長秧寨擒長秧及其夥戚來
臣張小落張淦淙李大闖王李義先杜大礮楊抓鉤

等汝甯知府劉成忠捕獲馮利害張大林並其弟張
三林四林五林馬大添周見國楊向秋等總兵趙鴻
舉派勇捕獲錢萬清之黨王狗饒于瞎子徐故敖等
息縣知縣蔣彙之獲匪首錢萬清於朱家樓並夥匪
錢順里獲丁萬斗於固始之游家店並夥匪丁萬堂
丁狗又獲巨捻李鳳潮陳道寬李位繫等正陽知縣
白策獲趙獅子趙松林等皆正法梟示汝光漸次肅
清張之萬由南陽移營赴汝甯兼防粵逆毛昶熙亦
自息縣回駐汝甯與張之萬會商善後事宜之萬倡

議練兵代勇調南鎮標兵五百名令候補知府湯聘
珍管帶會同汝甯知府劉成忠訓練備防復以豫省
捻亂多由地方官撫綏未能周洽因講求吏治慎擇
人才爲正本清源之議改虞城夏邑沈邱項城泌陽
桐柏正陽新蔡確山光山十縣爲赤緊遇有缺出比
邊缺例擇用才能勝任者補署不拘常格汝光所屬
汝正新息各縣自陳大喜等倡亂官兵進剿頻年田
畝荒蕪村墟寥落因議招徠流亡勸課耕種分給牛
犁籽種檄候補知府師長怡王珠炳總理其事復於

各縣施粥賑濟民賴以活者甚衆十月毛昶熙移營
回歸德張之萬亦南向剿擒匪飭地方官撫恤窮黎
搜捕餘孽四年三月光州州判吳世銓獲息擒李鳳
高王麻子於霍邱朱家荒坡圩獲李鳳先於阜陽劉
家店息縣知縣蔣策之獲巨擒鄭樹中襄城知縣羅
僞獲鹿邑縣人郭廣濂爲擒首李合僞軍師素以符
水惑人汝南埠通判王延煒獲張鳳林之姪張沅皆
正法於是漏網各逆亦以次就誅毛昶熙張之萬奏
汝光肅清上在事文武戰功請獎時科爾沁親王僧

格林沁戰歿於曹州 上方震悼責皖楚豫督師

諸臣救援不力交部議處用御史言停汝光保案俟
皖捻全股肅清再行具奏 上從之其後七年豫

軍平張總愚八年巡撫李鶴年始援成案奏之四月
團練大臣兼辦勦匪吏部左侍郎毛昶熙奉 命

入都巡撫張之萬亦旋改河東河道總督擢湖北布
政使吳昌壽爲河南巡撫此汝光土匪殄滅自三年
三月至四年四月時事也大喜自二年二月距襄陽
之黃龍塢瑜山將由樊城老河口回竄救白土岡賊

寨爲官兵所阻三年二三月間與張總愚同竄南陽
擾鄧州鎮平內鄉至桐柏合粵逆竄棗隨粵逆滅遂
人總愚股後不知所死或言死曹縣爲官兵所殺至
於汝光諸逆寨屠戮慘矣其先或迫於賊脅其後習
而化之然所誅滅捻寨居多始終抗拒者什二三反
正者皆免順逆之機有足爲世深戒者故特詳著之

土匪十四

同治元年四月直東水套匪首就擒餘匪屯踞濮州
荷澤一路 欽差大臣勝保赴援潁州奏以正白

旗漢軍副都統遮克敦布督勦水套餘賊豫省仍戒
嚴十二月山東冠縣教匪張錫珠滋事竄入直隸冀
州甯晉諸境旋渡衛河衝冀鹽匪景德馬賊麇起應
之竄臨清州之桑園村清河縣之董家廟威縣之于
集村南宮縣之梅花鎮冀州棗強東鹿均有賊并踞
南宮縣城一晝夜而去勢張甚河朔動搖臨漳內黃

土匪崔興支文炳等乘勢竊發張之萬檄副將楊長春李士玉督兵往勦士玉病以游擊李文全代領其衆比至崔興等股已爲地方官弁率團擊散摝捕餘黨數十置之法因令駐防東匪於是楊長春駐安陽之豐樂鎮李文全分屯三臺聯絡守禦十二月十八日匪由肥鄉竄成安復竄邯鄲東距臨漳數十里李文全出隊迎勦楊長春繼之二十日遇賊於臨漳縣境之羊羔村斬擒數賊二十二日馬賊千餘蜂至楊長春擊之斬首數級生擒悍賊二奪旗械多件匪竄

西南二十四日賊復至三臺渡漳河安陽知縣金寶符會營往勦焚橋賊梟水撲岸爲民團擊殺甚多擒執旗賊目一賊謀一賊懼乃北越成安縣境楊長春復回屯豐樂鎮二年正月內黃縣知縣印錫齡廉知賊首崔興潛藏滑濬交界之劉莊沙嘴村謝三家卽會同楊長春王玉佩等往捕獲之械送道府勘問得實梟首示衆 上以謝三窩藏聚衆首犯何以不卽置重典爲問且勒緝支文炳支文炳窮感欲投張錫珠藏山東觀城縣之夏溝二月初四日內黃縣知

縣印錫齡會同楊長春往執之以歸訊明亦正法土
擒遂除而東匪益肆初三四日竄擾館陶冠縣馬步
約數萬館陶獲賊諜訊言賊中乏糧欲竄豫境就食
豫省因益嚴備十一日大股賊馳抵龍王廟下五里
渡河而西約三萬賊騎駛抵黃金隄距大名府城十
餘里距豫境臨漳不及百里勢甚張地方官以狀聞
請添兵堵剿之萬因令楊長春李士玉率所部擇要
堵禦復檄游擊徐連陞李大成分帶昌勝剛銳步勇
各一營輔以游擊馬策勳驍果營馬勇馳往協剿歸

河北道周煦徵調度十九二十等日東匪由北路竄
近臨漳楊長春率所部由豐樂鎮東下二十日黎明
抵距臨漳二十里之張里集火光四起邊馬數十騎
迎犯我隊楊長春揮隊禦之斫倒騎馬數賊賊卻走
我兵追至七八里外遙見塵土蔽天賊大股悉南駛
諜報賊馬百餘繞臨漳之南張村邊馬已至三臺楊
長春折回堵勦是日晚賊馬二百餘由臨漳屬之曹
村孫陶各口偪河岸欲潛渡安陽縣知縣金寶符忝
將穆特布督率兵練乘其半濟薄而擊之斃馬賊十

餘始退去三鼓後復有步賊數百潛行鳧水亦爲防
勇擊退楊長春之與賊戰於張里集也李士玉亦出
隊與賊戰於羊羔村敗之明日賊攻城關爲兵團擊
退斬首數十級匪竄張村集迤東以漳河北岸橋毀
南岸鄉團力扼不能渡折竄東北二十一日李士玉
追至縣東柏鶴集羊羔村截殺後股賊數十乃遠遁
成安縣界我軍逐北二十餘里賊游弋於成安肥鄉
等境夜輒遙見火光二十五日復竄臨漳二十六日
賊騎數百薄縣城餘踞西北近城各村焚掠李士玉

出隊雕勦賊退夜復蛇行近城下將爬牆知縣曹敬
率兵民禦之賊於隄外竟夜馳擾二十七日李士玉
率所部出城奮擊斬馘四十餘乃向西北敗竄我軍
追之出境三月二十六日成安境之柏寺營接壤臨
漳有南樂縣閭王廟人秦姓冒團練肆擾李士玉會
同叅將徐連陞通判吳若烺等率隊馳抵成安境之
金山劉家甘落等村勦殺略盡距臨漳二十餘里之
鄧家莊復有直隸清豐縣土匪數百嘯聚焚掠士玉
等以二十八日督隊往勦匪衆拒敵我軍擊斃百餘

生擒其魁馬調元薛蘭亭及夥黨三十餘餘向東狂
駛於是近豫土捻悉除東匪愈遠嚴漸解六月李士
玉奉調守永城楊長春旋授河北鎮總兵官九月宋
景詩餘黨楊澱一朱登峯劉厚德程敬書岳金聲等
爲直東官軍勦急竄開州聶固村進窺滑濬楊長春
自豐樂鎮率隊迎勦初三日丑刻匪竄滑境知縣孔
繼中率團禦之八里營斃賊數十擒杜欒等賊遂竄
入濬境偃縣城知縣杜傑魁礮斃二十餘人復會營
汎出擊斬首三十餘級生擒王松山黃堅衛輝營守

備萬鵬程亦擊殺悍賊二十餘擒邵成姚廷芳沿途
寨圍遇賊卽擊匪衆向西北疾走是日楊長春隊至
張官屯遇馬賊四百餘騎擊敗之初四日賊分兩股
一竄安陽縣東白倍集一竄安陽東北楊家新莊長
春派彰德叅將穆特布馳赴白倍集而自以所部至
楊家新莊見賊騎數百北駛我軍列長陣鈔擊賊返
拒槍礮對發時許長春率馬弁十餘大呼突陣手槍
擊斃悍目守備王仕旺楊長生等繼之斬首數十餘
級匪潰竄白倍之賊亦爲穆特布擊敗兩股會合由

孫陶河岸竄往臨漳南駱村長春躡至村外賊殊死拒知縣曹敬率團踵至因夾擊斃賊目胡太喜楊五馬三及騎馬執旗賊餘衆竄逸我軍追至徐村賊乘夜竄肥鄉李林鋪初六日長春追至李林鋪賊竄邯鄲之蘇漕爲僧格林沁馬隊截殺四百餘殘敗四散長春復追至沙屯斬首十餘級申刻追至雷家堡復擒賊二是夕我軍屯肥之王安堡初七日敗賊已過廣平相距益遠僧軍馬隊由臨洺關緊躡長春乃由邯鄲成安各境沿路哨巡徹回臨漳

土匪十五

南陽土匪自角子山勦平後餘孽猶有存者同治元年十月十一日擒首李合周二紅生等四五百人屯泌遂舞交界之白石崖舞陽縣知縣王元緒會同把總錢獻璋督練往勦擒王合等餘賊沿山竄遁山路延亘四十餘里王元緒錢獻璋議分路堵勦十四日錢獻璋由東路先進步行登山擊斃執旗賊目忽中飛石仆地外委楊樹勳勇目劉金山趨救同時戰歿練勇奮擊獲斬夥匪六級元緒以狀白且請兵時汝

軍方攻陳大喜老巢楚師合圍邢集陡溝巡撫張之
萬因檄駐宛副將劉車龍率所部會勦賊由舞境竄
泌陽之象河關入嗟呀山盤踞二十三日團勇乘賊
不備以夜入山挖捕斃賊數十擒擒首許振奇侯姓
等李合乘隙出竄爲勇丁追獲梟其首脅從解散三
年髮逆皖捻交訏於南陽土匪乘機蠢動唐縣著名
捻首楊五湯及凶黨石蒿歐麻子段成金段三夜貓
任小集等嘯聚抗捕張之萬駐軍宛南檄叅將崔廷
桂會地方官入山挖捕先後獲楊五湯石蒿等及其

夥黨唐維漢鄭復泰陳泳詳陳泳慷陳四鄭黑臉張
汶到周金柱鄭聾子王建泳張長法陳汶學段青春
段禧方張明情周恒彩陶光斗等復於泌陽之畢店
大河屯澗嶺店諸處弋獲積匪郝到進賈鳳儀丁老
大單金升徐魁等置之法崔廷桂始以余際昌陣亡
救援不及奪職至是復其官六年十月襄城縣土匪
程岱因與宋莫坤涉訟起釁程岱子得寬糾衆二百
餘人以二十八日夜假尋仇攻縣城南關縱火焚居
民屋舍知縣羅儁會營往捕獲匪黨王昇平李東萬

孫保成等程得寬率衆南竄許州知州葉世槐狀聞
巡撫李鶴年檄總兵崔廷桂率防河歸德鎮標兵千
名馳往會同南陽鎮總兵趙鴻舉南陽知府劉拱宸
勦捕是股以程岱程得寬馬明如楊百萬劉中五人
爲首各領夥匪百餘人數十人不等將東竄泌陽角
子山諸處旬結起事崔廷桂等馳至一戰於襄城之
常村再戰於寶豐之沙河皆捷殺賊甚多十月初七
日匪踞龍山憑險抗拒飛石不擊官兵鼓勇仰攻殺
斃數十擒賊十餘復乘夜襲登山頂以步隊分路進

勒馬隊扼要隘一晝夜間全股殲殄略盡餘匪二三十人翻山遁逸於是游擊郭廣泰葉縣知縣溫德懋寶豐知縣秦家駒密縣知縣張遇升登封知縣周起俊等先後弋獲張拴程建之任用奇楊百萬畢四沅畢五沅程建德何義黃汝俊翟平安馬明如程得寬王喜太趙萬鄰李占元劉中程岱韓振魁等分別磔斬以徇事聞上以奏功之捷賞擢崔廷桂等有差黜襄城營都司杜芸以千總降補削襄城縣知縣羅儁職泌陽土匪聞風潛煽七年四月匪首張十一

李振基花得春聚衆數百人以二十五日由泌境竄入裕州山中知州沈祥年會營汛督紳士袁書田及羊册民團馳往堵剿先於賈寨沿山扼守要隘匪懼二十六日薄暮率黨出山衝突我兵斃匪六十餘復遁入山將翻山竄泌境沈祥年預令民團由小路鈔截二十七日戰於酒店復斬數十匪遂入角子山盤踞糾結日衆附近各州縣均以狀聞巡撫李鶴年檄總兵崔廷桂前往會剿崔廷桂派弁崔渝經易裝密探盡得賊狀並藏匿所在因分兵由襄葉臨郟兩路

星夜馳進復號召各局神團王萬松徐紹三郭秀郭文光葉永吉等合力堵禦閏四月十七日至泌陽之沙河店殲斃藏匪百餘生擒張泰春冷麥高喜等察知大股麇聚不遠因選馬步隊由澗嶺店偵賊所向二十三日至夏老莊遇匪衆百餘我軍進擊斃匪八九十擒夥賊九匪竄道觀曹場寶莊諸處我軍沿路撈殺至常營賊數百自廟擁出崔廷桂以洋槍隊連環擊斃數十人四散紛竄馬隊追躡各屬團練分路截殺不可勝計是股遂殲盡獲賊張十一訊稱李振

基被追自戕花得春懼捕已颺逸去崔廷桂趙鴻舉
分摅餘黨五月初八日唐縣把總張鳳錫獲花得春
於湖北隨州之安居店並悍黨劉四械送回豫崔廷
桂等復獲巨匪江明修齊廣成薛元烈等唐縣知縣
錢德昌獲李七赤扒脚等各數十人皆置諸法七月
皖捻蕩平河防凱徹李鶴年因檄崔廷桂以所部歸
德鎮兵移屯南汝等境督率地方文武隨時摅緝凡
著名刀捻及爲害閭閻不法棍徒先後捕戮不下數
百人角子山一路素稱捻藪至是肅清崔廷桂論功

擢提督餘升賞有階八年宜陽刀匪張野貓陰結匪類擾害居民巡撫李鶴年檄河陝汝道廣隆河南府知府陳肇鏞捕治未獲九年二月張野貓及其弟張花貓踞黑山頂紅澗溝至泰山廟糾衆搶掠地方文武查拏嵩縣營守備李占松遇伏受傷把總周金科外委王朝玉被害李鶴年方閱伍至河南府急檄記名提督崔廷桂河北鎮總兵楊長春叅將玉壽各率所部馳往會勤劾廣隆陳肇鏞摘頂宜陽知縣恒倫革職留任三月匪踞宜陽岳山雲蓋寺憑高恃險嘯

聚日多山徑叢雜隘口紛歧李鶴年恐其突出蔓延
因令楊長春督副將裴政叅將金齡玉壽率兵千名
分扼各要隘廣隆陳肇鏞各帶勇團於岳山下凹裏
寨諸處設伏其界連嵩縣之官亭八里臺永甯之紅
葉村伊宜之寨子街均飭各縣率團駐守親軍入山
捕擊匪衆聞風南竄爲嵩縣團勇擊退擒匪黨張英
王流逆衆復撲三道濠爲兵團截殺十餘人擒匪目
張獻書張文成李馬均正法勢漸窮感自拔來歸者
日數十人野貓詭欲乞降廣隆等令知縣恆倫守備

劉鳳岐魯山汛把總張應鶴入匪巢諭散脅衆遂挈
張野貓張花貓及徒黨四百餘人以三月二十七日
詣行營讞定斬野貓花貓於市散其衆歸農事已奏
開復廣隆陳肇鏞恆倫處分 賞劉鳳岐張應鶴
花翎

豫軍紀略卷六

皖匪一

豫省東南接壤江皖蒙亳潁壽民俗故強悍往往聚衆剽劫多至千餘人少亦數百人各推賊中桀黠者爲之首自號爲捻不相統壹吏斯土者多以搏擊爲治否則不可制雖在承平已患之矣咸豐三年粵匪陷安慶踞金陵分黨破鳳陽歸德進圍大梁於是皖豫之交匪蹤遽起捻首李士林劉疙瘩劉元吉任二皮等聚黨橫行而張樂行起於蒙城雒河集尤凶悍

狡黠爲羣賊冠是歲六月潁州賊赴周口購糧窺豫境任二皮結江南匪擾息縣劉元吉先由鹿邑趨沈項界連之槐店復與劉疋瘡竄沈邱之劉莊店知縣馮諫擊賊受傷賊以巨礮雲梯攻縣城總兵經文岱遣叅將慶瑞等赴援賊敗退復遣叅將達凌阿繼進項城縣知縣沈棠以練勇來會行抵沈邱柏樹林賊驟至合兵擊殺四十餘人俘擒首劉元吉趙肖賈大小等並寘之法賊黨南竄踞阜陽之瓦店方家集巡撫陸應穀檄副將錫普常阿會陳州府知府朱師濂

堵剿九月 上禡陸應穀職擢山東按察使英桂
爲河南巡撫以粵逆方據武漢窺荆襄諭英桂防南
陽十一月劉疔瘡乘間擾項城之新橋婁堤店時陝
甘總督舒興阿軍次陳州遣委協領柯克僧額等與
朱師濂會剿賊逸追至銅陽城及馬大莊俘賊七十
餘進至新興集擊斬擒首孫大爛馬淑明等焚韓老
家捻巢餘衆潰散時固始擒首李士林任二皮李鳳
岐等糾黨二千餘焚掠朱皋集英桂駐信陽檄叅將
希拉布都司楊鼎金等往剿任二皮伏誅李士林仍

恃衆抗拒寢不可制道光間周天爵知宿州用法頗嚴峻素爲皖匪所憚軍事起天爵督師駐宿州賊震讐不敢動至是天爵歿 廷議遣副都御史袁甲

三督勦起前兩廣總督徐廣縉於家與署按察使牛鑑會勦歸陳土匪於是皖豫之交軍事日亟其與本境土匪分合不一或有雜見於土匪者要其大股則悉詳於是編云咸豐四年潁州捻首李士林勢日熾袁甲三移營宿州距潁四百餘里潁郡西南與豫省接壤袁甲三奏請河南巡撫派員捕勦 上命英

桂飭牛鑑徐廣縉越境討之英桂奏言徐廣縉練團歸德光固偪楚烽臣駐汝寧策應均未能遽離已飛檄署臬司牛鑑卸篆後酌帶陳州兵勇督皖豫各州縣擒捕牛鑑尋以辦理情形奏聞得旨以賞給

五品頂戴之員不應自行奏事嗣後仍由撫臣代奏牛鑑以陳屬防兵僅千餘所部銳勇亦祇千人不敷調遣請將護送陝甘總督關防過陳官兵二百名截留二月十一日袁甲三奏言鳳穎土匪冒粵逆竄入穎上蒙城請敕牛鑑徐廣縉會剿時賊已由西

北竄亳州陷永城初九初十等日圍夏邑甚急徐廣
縉督歸德府知府王之斌往援斃賊數百生擒二十
餘道甫通而夏邑已於十一日失守署知縣徐本立
與同城文武及親屬幕友均死之王之斌至夏邑賊
委城竄碭山於馬牧集獲賊戴連升鞫稱正月間賊
由六合分股至潁上蒙城將自歸德渡河因歸德駐
兵從永夏折回碭山北竄援直隸被困賊蓋至是始
知竄入豫境折赴碭山者乃粵逆之冒土匪也先是
粵逆自靜海獨流突圍竄聚河間豫省北路戒嚴東

西兩路逼近皖楚賊氛英桂奏請江南等處官兵馳
赴皖楚會剿又因南路較急仍駐汝甯扼守未幾肝
胃病發請 簡派大員幫辦旋以東路有警回省
調度至是 上命僧格林沁勝保遴員帶兵來豫
調陝西提督桂明帶兵一千五百名徑赴歸德未幾
諭令馳往直隸出賊前進剿三月袁甲三駐軍
臨淮奏言皖省霍邱一路土匪披猖請飭牛鑑進駐
潁州 上命刻日馳往英桂出省赴援歸德信陽
兩路英桂以陳州勦捕緊要請牛鑑暫緩赴潁四月

安徽霍邱縣捻首李兆受竄入商城之王家院牆署
副將春明並備弁兵勇均遇害鄭敦謹遣牛鑑帶兵
勇二千餘名往勦劾署商城知縣郎仲連先禡其職
仍責自效陣亡被害諸員及傷亡兵勇嗣經查明請
將署陝西定邊協副將春明交部從優議卹建立專
祠同時死事之代理陝西秦州營守備郭建極署陝
西會甯營千總馬萬圖河南陝州營千總屈凌霄署
陝西靜甯協營把總何映桂署河南魯山汛把總胡
錦標署陝西靜甯協營經制外委馬梯雲署陝西靜

遠協營經制外委卞向春署河南商城汛經制外委
劉殿榮勇目武生羅必得附祀得 旨允行

朝廷以霍邱與正陽關毘連爲皖豫扼要地時提督
秦定三帶兵駐正陽 諭英桂等會合夾擊毋相

推諉始英桂請假以布政使鄭敦謹兼攝至是假滿
回任奏言擒匪踞卜家店後署光州知州趙登峻兵
往剿分兩翼進攻斃賊數十生擒擒目周魁陳玉順
陳金旺冷舍曹春仔葛瑞清杜應科黎大柳鴨子姚
正元陳永堂李澤登李澤成等寔諸法餘衆逃潰首

匪李兆受竄商城匿皖豫交界之青峰嶺先是

朝廷命牛鑑專辦陳州勦捕事務牛鑑激勵士卒每戰必克三月間勦辦沈項大股生擒擒首燬其巢民藉以安四月初八日自槐店拔營越二日至長官店督同潁州府知府陸希湜新蔡縣知縣馬筮乾署沈邱縣縣丞黃以清並附近聯莊團勇於十一日抵華集未列營賊黨六七千由南路來犯牛鑑整隊迎勦追殺六七里生擒賊三十餘陣斬百數十大雨連日官兵營於華集距阜陽之方集三十餘里偵知方集

附近村莊多李士林黨又艾亭會龍高堰等集皆有
匪嘯聚各一二千遂遣陸希湜至會龍集由東路進
馬筮乾至艾亭集由西路進牛鑑將移營由中路進
與將士謀曰賊知我軍分路進使潛師宵加於我我
師必殆乃分軍爲二以一軍守營一軍出伏誠曰賊
初至守兵力戰再至則伏兵齊出擊之部署甫定日
已暮賊數千來劫營力戰卻之乘夜再來再卻之四
更以後悉衆來犯伏兵四起與營中兵合擊之斃騎
賊二斬擒百數十乃大敗遁去奪獲旗幟礮械甚多

十七八等日進攻方集行至李老莊李士林糾衆萬餘來拒見官軍勢盛始漸逸槍礮終夜有聲十九日進薄方集之二里橋橋折不得進且戰且成橋擁而入賊奔逸棄礮械旗幟馬匹爭渡落水死者甚夥官軍焚其巢詢之居民稱李士林在華集與官軍八戰皆敗十六日回集驗其衆折二千餘人聞官軍攻益急乃大懼率其黨劉疙瘡等傾巢出復敗於李老莊夜散五六千勢窮感渡河遁英桂以捷聞

加半

鑑按察使銜隨勦之紳士宋玉瑾等以次論功獎敘

有差牛鑑病請假英桂遣留豫差委江西候補知府
陳鼎雯往陳州協同彈壓前留護送陝甘總督關防
兵丁二百名仍遣赴江南歸琦善調用霍邱捻首李
兆受敗走後復糾股闖入商城固始等縣境光山土
匪結捻應之英桂遣候補知府景昌游擊全喜帶兵
勇六百赴光督各州縣圍捕李兆受句結江南匪黨
十餘股衆二千餘於六月十七日圍攻商城在籍紳
士周祖頤率其子副貢生周文灝督民團隨代理知
縣劉宗岱固守兩日夜勢危急周祖頤督團首陳長

湖羅必興等礮斃擒匪三四百斫死爬城賊數十槍斃擒首馬四馬五時順天府尹楊霈在光山防堵派兵往援賊始退復嘯聚東南鄉周祖頤父子偕署守備李輔清督兵勇追至距城四十里之順河集李兆受糾匪數千迎敵圍首陳長湖羅必興營兵馬正明等陣斃賊百餘會固始縣知縣蒯賀蓀都司何春元六品軍功張曜等各帶隊踵至周文灝以大礮斃匪數人然其火藥賊衆多有轟死者遂立潰亂官軍乘勢渡河併力追擊斃匪千餘生擒擒首四夥匪十七

奪獲器械旗幟無數夜抵葉家集燬賊巢英桂以捷
間得 旨出力之員弁紳勇擇尤酌保以昭激勸
李士林之敗於方集也復糾捻蠢動固始縣知縣蒯
賀蓀購之急士林竄匿息縣烏龍集知縣陳棠捕之
不力牛鑑廉得息縣丁役朱明儀張俊杰劉萬有王
二梁四與李士林通導之他逸復於烏龍集賊巢獲
錢糧冊籍有朱明儀得財狀蒯賀蓀亦以爲言英桂
飭候補知府景昌帶勇赴息查拏朱明儀等訊究咨
會牛鑑飭潁州府知府陸希湜會同汝光文武合力

兜擊陳棠懼賊不可制自固陳折回給景昌以李士林爲兼署湖廣總督楊霈示諭招安景昌卽許士林投誠令由羅山縣取道九里關赴楚英桂以未得楊霈咨會景昌擅釋放陳棠縱役庇匪情節顯然遽奏劾陳棠褫職逮問責交丁役候質景昌及汝甯府廖牲均摘頂戴李士林糾衆四五千於九月十三日行次羅山沿途滋擾十六日至青山店廖牲飭各路兵勇追擊十七十八兩日共擊斃生擒三百餘把總任春茂歿於陣李士林至楚楊霈令帶勇數千隨孝感

縣知縣李殿華攻漢陽且以文來告英桂奏言李士林爲著名擒首猖獗凶殘人人切齒且詭詐百出其悔罪投誠未敢遽信萬一不聽約束爲害閭閻或陽爲助勦陰則勾結粵逆回竄不特豫省再遭荼毒於楚北軍情亦大有關係請飭楊需相機勦除弭後患十月皖省軍情日迫永亳一路力難兼顧袁甲三奏請豫省官兵會剿時永民怨亳民日甚每以搜拏匪首蘇添福爲名互相殺掠上謂此等凶悍之徒擾害良善豈得以民人自相報仇置之不問周

天爵招撫之張樂行以保守雒河集爲名實則狼子野心難保其不暗結土匪命英桂諭令帶兵文武相機勦捕其從賊紳民袁甲三欲稍寬查辦似爲解散起見此等無恥喪心之徒不使畏威豈能懷德正未可博寬大之名而受養奸之患是時蒙臺擒匪已竄回皖境永商被害居民積恨蘇添福張樂行等圍集萬餘人俟官兵到後殺賊洩忿先是英桂在信陽行營抽派官兵一千名壯勇八百名往歸德令候補道張維翰助徐廣縉防勦與皖省約期進兵謀定後戰

嗣以徐廣縉疾作宋郡防勦事宜張維翰接辦先後在濟陽集地方拏獲捻首王三凶等在郭灘樓拏獲捻首武生郭儂諸等又獲捻首盧新文孟繼峰侯妮陳小生劉長法余得合等附近捻蹤爲之稍戢英桂前令南陽鎮邱聯恩移駐固始策應六安預防皖匪竄越並嚴勦光屬捻匪清內患邱聯恩拏獲捻匪首夥六百餘十二月十六日督同蒯賀蒸將巨捻丁心田擒獲皆帶勇赴楚之降賊爲楊霈所遣回者另獲要犯李鳳岐及阜陽捻首數名俱寘諸法

皖匪二

咸豐五年三月蒙亳捻匪張樂行蘇添福糾眾出沒
時皖南軍事急未能兼顧英桂駐軍信陽防堵粵逆
皖豫之交惟張維翰帶兵扼守維翰與潁州府知府
陸希澁亳州知州繡綸候補知府張家駒參將全喜
等帶兵赴亳擊賊泥臺店獲勝賊勢稍挫而未受大
創四出如故商邱縣武生李景端赴訴於都察院歷
言蘇添福肆虐永夏祝塏屢率鄉團破賊於裴橋耿
皇寺包河等處賊中流言來爲報仇徐廣縉爲其所

給致將祝壇撤回賊遂大肆淫掠擾及豫疆居民橫
被荼毒諸情狀事聞 上以徐廣縉如果畏葸退

避命英桂嚴叅治罪英桂未及覆奏而張樂行蘇添
福於是秋猖獗益甚陸希湜兵敗廟集賊三路犯渾
河張維翰與達凌阿督隊進剿達凌阿力戰於泥臺
店中槍陣歿張維翰突出重圍八月二十九日賊破
馬牧集犯歸德時聯莊會匪方內鬪英桂親赴河北
勦辦維翰報至乃遣防守陳州之湖南長寶道王建
泰游擊巴哈布按察使余炳燾叅將成齡先後往援

江南河道總督楊以增安徽巡撫福濟亦派兵扼勦張樂行等知大軍至遂糾眾南竄福濟與提督和春疏陳三省勦匪必遣大員帶兵河南南學使張之萬亦以爲言上乃命湖南提督武隆額由山東赴亳州其富明阿所派侍衛容照楊以增所派徐州鎮總兵與慶和春所派游擊武全英桂所派張維翰等悉聽武隆額節制時張樂行大股圍攻亳州分黨掠蒙城鹿邑而以雉河爲巢穴以蘇添福王貫三龔得等爲羽翼余炳燾謀於諸將謂救亳州不如直搗雉河

使賊反顧其巢則毫圍自解僉曰善於是令祝塏防鹿柘令瑚圖凌額任愷駐鄴城令馮景等扼永宿交界之黃口集十月二十五日炳燾自率兵勇由永城進至麻種集馳書宿州約容照馬隊與徐州兵勇協勦炳燾號召永城鄉團一時裹糧效前驅者萬人軍聲大振二十八日師抵雒河張樂行斷橋梁憑河爲險率死黨三千開礮拒敵炳燾以游兵更番迭戰多出旗幟金鼓亂賊耳目密遣人自下游搶成浮橋兵勇爭先渡河擲火罐火箭焚賊壘煙塵漲天將士踴

躍奮擊殺溺無算張樂行乘間遁官兵發其祖墓賊之圍亳州者聞風解散時炳燾祝塏瑚圖浚額等三路之師皆赴亳賊知麻種集成兵單弱又永城空虛復由亳州沿河迤南連夜折向東北徐州兵勇禦之於麻種集失利賊由馬村橋竄永城十一月初三日集城下張樂行攻東門王貫三攻南門龔得攻西門蘇添福攻北門甚急余炳燾督諸軍由鄴城至丈八集倍道馳至賊三路來犯官軍亦三路應之順風施槍礮中賊旗旗仆賊陣亂官軍益奮追殺十餘里斃

賊七百餘獲大礮四十餘圍立解初六日武隆額乃抵永城次日遣成齡會祝壇所帶鄉團擊賊於麻種集賊列隊以拒鄉團戰不利勇隊舉槍礮轟斃賊四百餘賊殊死戰成齡單騎陷陣鏖戰二時賊來益衆騎賊由西南出我軍後成齡麾七卒戰益力小腹連中賊槍幾不免滿洲營佐領候補游擊巴哈布下馬解衣然礮轟賊復上馬入賊隊手刃多賊被七槍墜馬殞把總王百年外委尙魁元死之陣亡兵勇一百八十餘人英桂以聞因言賊衆不下三萬武隆額兵

勇僅五千容照興慶之兵既未前和春前派壽春鎮
總兵鄭魁士亦久未至請 敕催並爲巴哈布等

請卹如制先是 諭令總兵史榮椿所帶直隸官

兵撤回歸伍至是暫留協勦命托明阿酌調吉林馬
隊赴援諭英桂督崇安邱聯恩等出省迎勦十月初
九日張樂行自泥臺店竄會亭驛犯夏邑大營史榮
椿等截擊於渾河集胡橋左右次日午後賊來益衆
官軍槍礮齊發斃賊無算賊欲退忽分股趨西北官
軍慮其往歸德鈔前遏之賊乃旁趨夏邑十二日武

隆額督夏邑縣知縣郭鳳恩帶兵出禦官兵方接仗於東賊由西殺傷守門團勇竄入縣城旋棄走十四日徑犯歸德焚東西北三關官民奮擊斃賊多名十五日賊馬步自東來者絡繹不絕環城隄皆徧槍礮歷兩晝夜不稍息十六日武隆額密遣兵勇縋城殺賊守陴者謹諫以助賊驚擾潰散武隆額奏報解圍

上責其毫無布置

命英桂馳赴歸德督辦

三省勦匪事宜以前福建按察使徐宗幹副之是時張樂行蘇添福等經柘城等縣鄉團追擊遂載所掠

財物遁回雉河英桂謂賊方飽掠回巢欲厚集兵力
直擣其穴徵兵江皖俱以各守疆宇遷延不進乃師
徒未集而賊已傾巢復出矣是年八月霍邱固始之
交捻匪李兆受薛小等聚眾首亂築圍於寨集蓮花
諸山九月初八日自牛皮疇竄至霍境攢板冲爲練
勇鄂立功所敗留豫縣丞張曜越境剿斃賊百餘李
兆受遁回麻埠王庭蘭與張曜聯師進逼擒斬其黨
宋之貴於廟灣而攻李兆受於麻埠追殺至流波疇
陣斬擒首李兆慶等百數十焚燬山寨李兆受薛小

遁入英山以乞降給安徽道員何桂珍收爲勇日至
是復踞英山戕道員何桂珍擁衆以叛投入粵匪英
山知縣蘇秀槐把總高長慶均遇害六霍商固一帶
皆爲震動云咸豐六年正月英桂督辦三省勦匪事

上旣以武隆額容照所部並江南安徽各營悉
歸調度英桂旣遣邱聯恩與都司保英各以其兵自
信陽馳赴歸德至是復請添兵助勦於是 朝廷

益命武全管帶潁州兵徐曉峯管帶中正勇由亳州
進攻朱連泰管帶兗州徐州兵自永城折回會擣賊

穴鄭魁士已督軍抵豫託明阿所遣侍衛伊興額協
領德昌帶吉林馬隊五百名取道滁州入豫令英桂
催提會於穎亳其塔思哈一軍由和春飛催赴亳悉
歸英桂調遣責英桂馳往交界扼紮撥兵會勦英桂
遂督叅將承聯開歸陳許道徐繼鏞候補道周士鏜
候補知縣廖慶謀等分率兵勇先後馳抵歸德時商
邱夏邑虞城永城上下數百里焚掠一空皖豫界上
無行迹井泉堙塞蒙亳徧地皆賊自豫至江皖驛路
梗阻各路到防隊僅三千武隆額所部大半傷亡潰

散直隸大名兵尤不得力江皖防兵糧餉久缺其餘
徵調兵未至所在土匪蜂起英桂議以先勦內地匪
徒疏通運道而永城鹿邑兩縣被匪攻擾皖省宿州
亦同時被圍英桂分兵永城其宿州潁郡一路責令
鄭魁士塔思哈就近援勦於是張樂行及夏白任乾
等圍宿州日急容照登陴守禦叅將塔思哈等出城
殺賊擒首匪孫開貞傅振邦帶兵往援十七十八等
日在夾溝驛符離先後殺賊五百餘奪馬二十五賊
自符離敗回會城內官軍突出前後追逐卽向西南

竄遁宿州城圍解而東西南村莊尙爲夏白任乾等盤踞蕭縣西南有藍旗賊五六千自永城宿州分路來犯大股屯濉口窺徐州其時瓦子口兩面受敵戍兵九百名馬裕椿率之退爲蕭縣城守徐州鎮道遣叅將高培往援兵勇僅五千云賊之撲鹿邑也知縣宋劭經率會首馬成龍等擊之老鴉店斃賊數百馬成龍爭先出復殪賊百餘中賊槍墜而殞其子馬雲青痛父歿隨宋劭經力戰於姬家橋斃賊百八十有奇獲馬十餘刀械百餘匪衆向泲河逃竄新鄉縣知

縣祝壇集商邱柘城鹿邑太康亳州五屬團勇數千
擣賊巢謀知黃旗捻首周崇實有眾數千屯寺兒集
祝壇派團首孔廣貴軍功寶鉦等分兩路進二十四
日在陳店斃賊二百餘生擒捻匪郭狼郭振山陳添
齊寘諸法移營亳州之鄭店賊復糾眾四五萬分五
股於二十八日撲樊家鄧陽棗子等集祝壇禦之於
棗子集相持三時之久賊縱火囂叫鄉團奔潰英桂
遣叅將成齡游擊瑚圖凌額援永城以候補道周煦
徵張維翰爲之策應成齡等師至會亭聞首匪王貫

三領衆數千於十七日駛入夏邑知縣郭鳳恩失利成齡恐請濟師而後進遇賊於太邱集戰不利張維翰抵樊家集距永三十餘里賊衆蔽野力不能支亦退於是邱聯恩自鹿邑馳抵石榴堦站周煦徵踵至合營夜見火光起滅知賊越會亭由西南繞至穀熟集距宋郡四十餘里邱聯恩徹夜戒備黎明賊馬步五六千分三路以中路衝大營南北兩路鈇我後邱聯恩單騎迎擊周煦徵督後隊由東面兜勦日向午官軍連開大礮刀矛相接賊抵死不退官軍戰益力

賊始向西南敗卻邱聯恩急追之殲賊千餘生擒三十餘而永城之圍未解鄭魁士塔思哈之軍方攻宿境賊巢興慶等方牽於蕭縣之賊均未能抽調通計三省兵勇不過萬人又各自顧藩籬不相呼應孤軍受困於是英桂奏請江南安徽添撥精兵各守要隘自請督軍力遏西北進逼東路復請伊興額帶騎兵馳援永城爲合兵直擣雉河之計並留西安協副將樂善於軍 上以英桂總司三省會勦必須聲息相通不得株守一隅屢諭令出境英桂乃令邱聯恩

崇安等併力前進二月初九日至蔡道口東大股鑿
至綿亘三十餘里我軍列陣以拒賊從左右鈔越衆
寡不敵遂大衄賊乘勝逼郡城存城兵勇僅五百邱
聯恩收集敗殘卒伍亦僅千餘人心震動英桂以敗
狀聞夏邑縣知縣郭鳳恩城陷被執賊脅之降罵不
絕口拷掠不少屈賊支解之請優卹建祠並請調北
路精兵另簡大員代其任自以調度無方請嚴議

上諭和春福濟飭鄭魁士等由宿州馳援歸德諭
漕運總督邵燦飭傅振邦由徐州進勦諭直隸總督

桂良酌調精兵二三千名交英桂調遣令英桂飛提
徐宿兩路兵仍督邱聯恩等出奇制勝英桂復滙陳
厯次辦理掣肘及兵勇無多力難進剿情形其略曰
張樂行等踞雒河老巢夥黨蔓延潁宿數百里漸及
徐宋有司初視爲土匪糾聚不以實聞致益鴟張皖
之英霍以北江之蕭碭豫之永夏商邱幾於民賊不
分臣兩年來以防堵楚皖逆氛不及親往查辦前撫
臣陸應穀奏派徐廣縉駐歸德防剿前學臣張之萬
奏保祝塏總司歸德團練徐廣縉與祝塏各持意見

勦辦不力臣徹回祝塏專辦陳州團練徐廣縉旋引
疾復派張維翰往勦以乘勝窮追失利賊燄愈熾嗣
派余炳燾會諸軍進解永城之圍及武隆額到宋與
余炳燾又不能和衷商榷各自分兵愈形單弱武隆
額敗退歸德賊遂圍城臣奉

命督勦馳抵宋郡

永宿同時被圍三省無從呼應而張樂行蘇添福王
貫三龔得韓狼子李越等樹立五色旗幟每股二萬
餘全壓宋境邱聯恩力不能禦匪眾逼郡城見城內
有備遂分兩股退去一竄劉家口復東趨碭永一竄

潁亳等處臣以有限兵力防且不敷勢難進取迭據盤獲賊間有張樂行與粵匪勾結情狀臣與徐宗幹急籌補救非三省疆臣各清各界不能遏其竄越非有統兵大員駐亳州適中之地不能絕其滋蔓如有勦無防賊必傾巢四出有防無勦賊必堅壁負嵎奏入 上謂封疆大吏畀以督勦重任應統籌大局催兵進勦不得希圖卸責前諭直隸山西陝西派兵馳往歸德此兵續到即可分撥英桂居中調度總當令帶兵各員由北而南方操勝算連鎮帶兵得力人

員已飭部揀發赴豫前據僧格林沁奏稱西凌阿善帶馬隊史榮椿善帶步隊應卽察看委任又所劾邱聯恩崇安失利情形得旨均褫職留任崇安並

摘去翎頂責後效賊回竄皖境分踞潁亳而歸德附近復有股匪牽制英桂以皖省緊要止鄭魁士等來豫卽由宿州探蹤迎擊令邱聯恩勦歸郡股匪由近及遠其進援永城之軍由鄴陽胡橋穀熟集出隊礮山新募之勇鈔出賊前擣之二月十一日薛家湖火燒店鄉團糾集五六千裹糧助官軍署永城縣知縣

劉鴻昌守備張邦瑞率兵圍出城內外夾攻斃賊五百有餘騎馬賊首五十餘擒劉五等城圍立解英桂重賞鄉團並請將出力官紳團練分別給獎又以歸德之警備振邦稱防守本境鄭魁士以進勦懷遠俱未赴援請 飭和春福濟邵燦按實以聞邱聯恩史榮椿等摺勦歸郡土匪日有擒斬道路漸通進駐穀熟集擒首龔得王貫三等合黨二萬由杜集來犯邱聯恩列東西兩哨在穀熟集東南接戰連環槍礮投以火箭火彈賊殊不動史榮椿督刀矛隊伍自中

路躍而入邱聯恩揮騎卒自左右襲其後賊始奪路
狂奔馬步各隊緊躡追殺斃賊千餘生擒張占魁等
賊四十三奪獲礮械無算馳三十餘里賊四散而逸
其另股之在江皖者鄭魁立於二月十七日戰於懷
遠之茅塘集獲大勝斃匪三千餘生擒張禿子等三
十四賊伊興額在雙溝集蘆溝集孫町於二月十九
二十四等日與李大喜接仗先後斬殺三千餘生擒
賊百餘追及於蒙城縣境至是鄭魁士馳抵河溜集
與另股擒匪褚澱耿萬金孟小頭目四十餘起接仗

親督叅將塔思哈等軍三面夾攻前後鈔襲匪衆自相踐踏敗走西南追至鈕家橋渡河逃竄多落水以死斬五百四十餘級馘耳記七百餘生擒擒首褚澱等四十一賊寘諸法伊興額於二月二十八日在宿州之孫町與黃鳳夏白任乾等接仗以馬隊連環鳥槍斃騎賊六十餘賊見官軍深入四面兜拒官軍亦分路衝擊戰久之賊衆披靡斃賊二千餘生擒賊一百三十七傳振邦營於瓦子岡時張樂行以永城薛家湖團練助勦銜之切遣其黨李益元等五千餘人

焚掠薛家湖會合保安山賊俞得和等於二月二十五日直犯瓦子岡傅振邦奮力擊之斃賊三百餘追殺百餘里殲殪百餘自是蒙宿懷遠匪蹤漸斂

上命鄭魁士將蒙宿餘匪悉殲卽進屯亳境豫軍由北路進攻爲會擣雉河之計宋郡紳民竇世銓等四十五人以擒匪焚掠情形赴京呈訴並單開逆匪姓名住址及被掠各村集繪圖以進其詞曰咸豐三年粵逆滋擾歸德以來豫皖之界土匪蜂起其時各自爲股僅搶劫未敢攻城去秋張樂行蘇添福龔得王

貫三侯實爲等分五色旗僭稱王號僞刊璽文設僞
軍師司馬先鋒名目八月十七日張維翰失利於泥
臺店集達凌阿陣亡賊至會亭槍礮器械悉爲所有
遂東掠夏邑虞城至碭山之鼎新集屯紮數日二十
九日西攻歸德之馬牧集六品軍功任蘭舫率義勇
五千拒戰孤軍無援翌日賊陷馬牧任蘭舫兄弟親
丁死者十二人家屬及集中義勇男婦老幼死者三
千餘商賈寄居者又千餘賊破馬牧後近逼郡垣九
月初八日悉衆南旋所掠婦女輜重車兩馬匹絡繹

二百餘里英桂派余炳燾進剿互有勝負十一月初六日武隆額到永城初九日與賊接仗巴哈布陣亡武隆額旋退夏邑賊至會亭武隆額退至虞城賊踵至夏邑武隆額遂回歸德十四日賊至郡燒四關民房近城四十里焚劫一空十七日西擾柘城復東回雒河集旬日間夏虞永商柘五縣十燬八九無業游民爲賊招誘亦思蠢動今年大隊圍永城分隊至鹿夏夏邑縣知縣被戕自毫東十九里溝至蒙城渦河兩岸百五六十里東西百八九十里所在皆賊由皖

及豫東西三百餘里南北二百餘里皆無人煙賊過之區糧食農具聚而焚燬輪姦婦女卽老婦亦不能免童稚捆入碓磨舂爲齋粉刻下賊衆約在十萬以上安徽勢難兼顧英桂所帶兵勇僅當賊十分之二三賊巢均在皖境擄掠已盈卽擁衆運回瓜分旣盡仍復散出非大兵四面圍剿恐難擒逆首而絕根株所開逆匪姓名附錄於左

張樂行

偽號大漢明命王公議盟主

樊香立

偽左營總

目賈開泰

領千餘人高振寶

住壽州龔得

卽龔瞻子住江南亳州白旗總

鄒煥爵 左營總目 徐化德 住雒河東 饑狼 住曹氏集 侯世

偉 偽號平西王住雒河集 趙萬金 前哨總目 陳架海 名又

梁雒河 北侯老營子紅旗總目 姚常春王宏先 二人為左司馬 段開

憲韓萬倉 二人為右司馬 宗雨 住雒河南 閔錫純 武舉亳東 孫

廣德 住臨 蔡老映 住劉店集 張學淵 康生亳境人 王老僕 住雒河

王大 王莊 邵永河 山東單縣人 鄧葆善 監生亳州人 馬波 白龍王廟

西王 老家 郭東林郭長太 住劉集 姚存義 住雒河集 王

家春 住石拱山 葛昌 住曹高集 侯貫一葛海 住曹高集 馬守家 住寺

集徐二科子 泥臺集總目 李廷彥 住亳州領二千餘人 燕增 即燕魁

余小山周崇寅即周照住大寺集丁奉林大新集劉莊住劉

廟夏鳳臨田興侯興久住龍廟西李小徹李重法李廣

友三人住李家集劉六劉三住劉奶廟王成孫有道鄧省仁

馬大山俱住雒河集秦永太朱天保秦照皆住雒河田

秀升魏倫韓萬金魏來孫拱住白龍王廟東孫老家田廣義

張牛楊和尚住觀音堂馬新王塊郭四大王皆住大袁

鐸住袁集東南袁樓秦小妮號胡樹大王燕體仁住燕牌坊任連登

賈永良張太和張太初耿萬金鄧作賓尹甲田廣

升楊立法楊治住五馬集侯豹住大閻明住閻家集李文掌

李如梅

任雅河集

周紅緒

紅旗中
大頭

周廣漢侯龍標劉廣

漢趙藍英張文雅譚懷春侯純標侯恒劉學張標

劉二宏侯學開張香張法張進忠宗老廣侯應求

譚直林趙二天爺秦宏道王祥秦小二鄭玉堦彭

布元趙奉祥鄧道侯麥鄧狗侯長袁奉山

以上各
逆俱毫

州人

以上係江南逆匪頭目

王貫三

為先鋒黑旗總目領一萬餘
人住夏邑西三官集王樓

陳玉山

營盤
集人

傅繼周

住濟陽縣

彭心正

住司道口

魏黑

住魏路口

張廣張興

張機

坊莊 張羣羊 住牛 劉運昌 號烏嘴大王 住劉堤園 徐得林 洛集

人 李老總河 住道忠 寺李樓 宋喜元 住牛王 壩集 王思忠 洛集 東王

人 楊 張安 牛王 壩人 李琨玉 牛王 壩人 周廣禮 為王賈 三大將 劉步雲

王胖 住王樓 張二紅 任八千歲 住王樓 侯黃樂 住侯廟 領同姓

二百餘人 宋喜柱 宋馬 係宋喜元之弟 張黑 張富 鄧小禿 程學

顏劉正王魁 住牛王壩集 侯妮 朱魁元 張餘賓 住張公集領問

集 李東川 號八大王 住李花園 李黑狗 住李樓 李琨山 李松李

二麥 三人住 李樓 張小保 張短辮子 住大張閣 張百順 住張公店

孫八 住胡橋 孫樓 喬天福 住喬集 宣立志 張世太 樊六 濟陽

集人張綸宿秦倉劉樓袁朱四袁牌坊人劉鄧住劉奶廟袁

三升住袁牌坊

以上係河南夏邑縣境內逆匪頭目

張傳忠張澤廣張三與王貫三同先鋒住張三座樓領張姓三百餘人曹

明義劉店集人黃珍界溝集黃旗總目焦香黃塚集焦樓總目王志義

杜集人曹松先曹松堂城東曹樓人魏書得大魏莊人閆小干

歲閆集人魏文山大魏莊人劉冷沙岡店集人丁獻考丁樓人丁

三元丁樓人梁金箱杜集人屈中元小侯集人許連海許心

孔大侯集人李中昌湯樓人趙龍標豐樓人張利界溝人耿

皮箱張三座樓人

解海解登解樓人

許龍山許虎山陽樓人

陳鳳居杜集人

何朝臣大侯集人

許亮海大侯集人

徐華山孫閣

東南徐韓黑

田春田大莊人

楊安楊樓人

劉景路馬頭

寺人徐心郎江樓人

以上係商邱縣境內逆匪頭目

蘇添福偽號順天王住蘇家寨

李月偽將軍住永城東南

馮麥住永城南七山

子趙浩然住買頭集趙莊

張景芳住胡莊

陳豹住回春集

孟繼元

住回春集蘇添祐蘇添正以上二人原單未載住址

以上係永城境內頭目

劉常安

與劉運昌同夥

丁振邦

陳店人

張孚張連仲

陳店人

杜

保安常發李二鐵匠劉二太牙

銀河寺人

以上係虞城境內頭目

都察院據以奏聞時有疏請設勇營並呈章程四條者先後並發查辦英桂正督邱聯恩史榮椿移駐營廓集規取雉河而懷遠捻氛復熾鄭魁士先於老西門列營七座賊以數萬人逼濠邊中正勇當其衝立潰散次犯壽春營時撫標兵已先潰僅存壽春頭起兵二百餘名叅將福珮都司柏雲章冉廣興守備朱

介福同時陣亡賊由雒河沿攻壽春二三起營傅振
邦率親兵數十名匹馬先衝賊隊手刃數人賊圍之
數重刀矛攢集身被二十餘創墜馬後隊至力救乃
免 朝廷以鄭魁士待援急諭英桂馳赴皖豫交
界直擣老巢分賊勢歸德防勦事宜交前副都御史
袁甲三籌辦時袁甲三已奉 命隨同進勦云

皖匪三

穀熟集之捷邱聯恩進次營廓龔得王貫三等在五馬溝糾眾三萬餘分道來襲另以賊趨鹿邑圍攻東南兩門英桂謂邱聯恩史榮椿曰賊意奪我營壘其分擾鹿邑者詐也龔王二逆敗則鹿邑圍將不戰自解賊素畏騎卒乃悉出存營騎兵併西安馬隊爲一千七百騎合力進剿三月二十九日賊屯界溝集邱聯恩史榮椿整隊往賊列陣相拒風逆不得施火器持之有頃知縣宮國勳縣丞張學醇率西哨衝賊陣

格縹額以馬隊出賊後邱聯恩督
兜圍史榮椿督叅將成齡等直搗
棄兵械奪路向東南敗竄追擊三
生擒賊首張拴等數十戮於軍奪
數是日崇安營於北十字河賊來
衝擊樂善珠隆阿張廷璽各軍追
六七百擒擒首張裕隆等數十竄
位三百有奇大車二百兩有奇騾
鹿邑圍立解事聞 上嘉其功

善張廷璽等官格綳額等各晉階有差賊合股踞毫
境之五馬溝四月初八日邱聯恩督西凌阿馬隊及
各營將弁分三路進西抵閭集賊來益衆而悍格綳
額領馬隊由中路蹴之崇安與樂善德楞額自西鈔
襲邱聯恩史榮椿以西安馬隊乘之於東鏖戰良久
斃賊以千計擒賊目于孝文等三十餘賊寘諸法獲
槍礮二百有奇大車百兩有奇牲畜軍械無算偽印
二先是永城賊踞大回集三月二十一日傅振邦伊
興額等擣之擒斃賊二千獲賊目孟繼沅牲畜車兩

軍器以千百計燬其巢未幾張樂行自蒙城北來其
藍旗隊及灘口二十五日傳振邦伊興額等由瓦口
行營馳至灘口迤北丁家樓賊眾二萬來拒官軍擊
之殪賊二千賊棄輜重誘追師傳振邦焚之虜將士
逾灘水而南斃其眾吉林委叅領開奇哩死於陣兵
勇傷亡者十餘人 朝廷至是屢降 嚴旨責

豫軍進擣賊巢英桂統籌地勢賊情謂雉河周圍三
四百里皆賊黨屯踞須漸次疏通免爲所襲歸德地
居扼要宜暫駐控制各路永城當南北衝應責袁甲

三堵截江皖與豫省聯爲一氣乃可大舉具疏以聞
四月初十日夜賊衆五六萬至界溝火光四起邱聯
恩等申嚴戒備天甫曙賊大至邱聯恩與史榮椿崇
安竝出擊賊正相持忽分股出官軍後毀我壘士卒
驚擾斬亂行者以徇乃定賊復併力攻崇安崇安以
馬隊張兩翼衝壓賊殊不動樂善德楞額墨爾賡阿
承惠等率馬隊由西鈔擊賊始卻其東北有五色旗
又將鈔我後崇安督軍壓追樂善德楞額等衝入賊
陣格綳額由北路夾攻賊遂潰追三十餘里斃賊千

餘擒李福厚等寘諸法獲大小槍礮六百三十二旗
幟三百四十二他物稱是是役也樂善以奮勇轉敗
爲勝 加總兵銜千總南宮寶委營總富倫保以
戰不力褫職令自效十八日邱聯恩史榮椿復敗賊
於小奈集德楞額圖克唐阿兩路追殺斃賊七百餘
生擒周老虎等於是龔得又分遣賊眾踞穎上十八
里鋪窺穎郡另股擒首祝國安焚掠穎上縣之韓擺
渡將犯縣城穎州府知府陸希湜穎上縣知縣程鈺
先後斃賊二千餘始收退永城夏邑鹿邑各縣境俱

有賊牽我師候補知府鄭廷錦駐鹿邑防剿四月二十五日督亳州廩生李承謨以二千人擊賊油湖集轉戰至三叉口獲勝又敗之賈家集江信溜集殺賊五六百進駐十字河扼鹿邑門戶夏邑縣知縣陳桂林以鄉團陳萬金敗賊於李家窪孟樓等處賊竄永城永城知縣劉鴻昌守備張邦瑞擊走之四月二十八日袁甲三以舊部皖勇與邱聯恩崇安等會師進剿謀於衆曰亳州北郭外久爲捻逆淵藪亳人閉門守逾半載矣必出彼不意先破之然後可長驅入也

遂密約朱連泰爲接應以騎兵出了家花園以南沿
途擊斬盧廟小奈集之賊申刻抵亳州城下賊堅守
各巷隘洞牆壁以放槍礮而設伏四圍官軍擁而前
擊散其伏乘勝逼賊巢火箭噴筒槍礮連環不絕朱
連泰與亳州知州博銘以兵出城循渦水南夾攻之
賊勢不支潰向東南騎兵追殺二十餘里先後斃賊
千餘擒盛畦等七十餘按獲匿賊六十餘斬之奪槍
礮二百二十五重二百斤至九百斤大礮十五其他
軍器無算救被擄婦女三百餘人朱連泰移營五馬

溝賊糾死黨踞翟村寺五月初五日賊由東路犯朱連泰營戰卻之初六日袁甲三率其子翰林院編修袁保恆親督兵勇與邱聯恩崇安等分路進攻至翟村遙西見賊五色旗幟橫十餘里又偵知翟村西南及田家溝各有伏賊官兵分隊截之邱聯恩崇安各率馬步東西竝進鏖戰兩時之久適西南伏賊爲官軍擊散賊始駭馬隊乘勢壓殺大軍繼之賊乃狂奔火其巢田家溝伏賊驚起與戰敗之賊分路奔官軍追殺三十餘里斬殪焚溺四千餘陣斬擒首僞平西

侯李士成高九鄧作仁等三十餘生擒賊廣德等百餘寘諸法於是賊由蒙城增兵來援屯於白龍王廟跨渦水而壘與雉河爲犄角之勢初八日袁甲三諸軍自翟村寺拔營次日至白龍王廟西張樂行韓狼子等領黃藍兩旗列隊抵禦龔得玉貫三等領黑白二旗沿河南岸爲策應預伏悍賊千餘於浮橋將以掩襲我軍我軍先以三千人由集西夾岸與戰斃多賊賊稍卻官軍奪據橋口伏賊不敢出大隊由集北進攻管帶滑縣練勇陳衛林單騎先出中礮殞邱聯

恩崇安等軍戰益力袁甲三揮西凌阿馬隊沿河而東鈔其後賊腹背受敵乃潰散斃水者多溺死追殺二十餘里殺賊五千餘奪獲四百斤以上至四千餘斤大礮十九擡槍擡礮七百餘旗幟六百餘搜獲木刻分營統領僞印九銅鑄管兵萬戶府僞印一繪龍黃輿一他物不可勝計英桂以捷聞請將陳衛林照守備議卹請 飭和春傅振邦等派兵扼賊東南迅圖蕞事雉河集之賊知大軍乘銳深入乃跨渦河爲營西北高壘深溝東南築長圍橋口設大礮多方

戒備拒官軍英桂飭諸軍乘其喘息未定攻之十五日袁甲三等進至燕家小樓賊從東南來犯列陣十餘里官軍以騎兵張兩翼步隊居中排牆而進鏖戰逾時賊始潰走追二十餘里擊殺淹斃者六千餘生擒五十餘袁甲三乘夜進至趙旗屯設二浮橋以濟師崇安樂善德楞額等由河北馬家橋東太清宮進邱聯恩史榮椿格綳額出趙旗屯渡河沿黃家莊進爲崇安等策應朱連泰由白龍王廟渡河而南扼守老金樓顧後路十七日向午諸軍齊抵雉河賊於兩

岸迎拒北路官軍先令騎兵鈔賊後步隊奮擊槍礮
雨發賊退回壘官軍乘勢入賊棄壘奔南岸自相踐
踏斃於橋船下者屍相屬也南岸官軍與巢內外之
賊戰益酣巢外之賊先潰馬隊復由黃家莊鈔裏步
隊擁至巢下巢內賊旗亦亂官軍以車礮轟其土城
火箭焚其幕舍踰溝入賊黨旣奔竄猶於集西巷口
縱火絕追路我師繞越搽殺追三十餘里陣斬及焚
溺死者二千餘擒田士得等百餘分別正法賊中譌
言擒首蘇添福中礮殞李越及韓狼子之子韓廣張

樂行之姪張海姚長春李文明等六十餘賊俱斃於陣僞軍師劉鼇中箭赴水死張樂行亦中礮傷其黨掖以乘馬得脫云餘衆向東南紛竄雒河賊巢以平奏入 土嘉之復察哈爾都統西凌阿官袁甲三以三品京堂候補維時宿州一路傳振邦偕徐州道王夢齡等攻燬柳集賊巢石弓山以北賊勢稍斂進軍臨郝集杜賊竄宿州而珠克登郝光甲等赴亳之師尙駐龍亢不進龍亢距雒河旣遠中間蒙城一路故無重兵於是張樂行率敗賊三百餘至蒙城之郭

家集沿途裹脅句結李二謨等竄潁郡之江口新集旋渡沙河犯潁上之廟臺集垂岡集時褚家湖至蒙城數十里捻匪號稱三十八股數逾萬人張樂行併爲死黨勢復張傅振邦郝光甲自東路馳至潁上英桂進駐亳州令袁甲三赴潁督勦副將樂善叅將成齡佐領松志與袁保恒等兵俱集潁上賊欲趨正陽關爲侍衛多慧擊退折而西袁甲三飭諸將繞出賊前樂善等分道躡賊於黃岡寺南照集擊之獲勝適三河尖被圍乞援急袁保恒偕諸將馳往三河尖已

於是日辰巳間爲賊攻破時六月十六日也三河尖者距固始九十里水陸衝要商賈輻輳賊擄其人衆勢復大熾袁甲三督戰急於是伊興額袁保恆郝光甲傅振邦張學醇徐曉峯馬步各隊分東西兩哨與賊接戰斃賊數百有另股賊來包我東哨南面賊層疊圍裹我馬步合力擊退而東路賊忽向北截我歸路士卒奮勇卻之互有殺傷時已薄暮遂駐師曹家集英桂慮賊犯光固將自亳赴陳州就近調度而先檄邱聯恩由雒河至固始與王庭蘭等扼戴家廟節

節進勦飭候補直隸州鄭元善署光州蒯賀蓀候補
知縣廖慶謀張曜等率勇圍堵禦賊聞官軍至遂以
舟駛正陽關多慧塔忠哈等跨河爲營伐大樹繫鐵
貓沈水底以阻賊船二十八日賊至汪家集船不得
進與南照集所泊賊舟俱西駛登岸樂善於潁州六
十里鋪遇賊接戰斬獲甚多時將秋成禾黍芄芄伏
賊突起圍裹我師士默特佐領奇密特多爾濟驍騎
梭音登額力戰死之賊遂於曹家集李家集等處屯
聚袁甲二等由潁郡水陸並進抵馬家飯棚沿河賊

二三千將奪我舟官軍隔河以槍礮擊之多死傷紛
紛梟渡對岸官軍槍斃其衆數十礮斃紅衣騎賊四
勢稍卻夜半復欲潛渡袁保恒伏兵厓下擗以槍立
斃及落河死者百餘賊乃宵遁官軍陣亡二人受傷
四人七月初二日賊由潁郡東南來犯袁甲三督諸
軍四面迎敵各隊俱有斬獲惟東面步隊傷亡數十
人當戰酣時賊在下游縛筏偷渡袁甲三預以兵守
沙河故不得渡初七日賊窺潁州府城其來自東面
者見兵卽走而另股由城南西向計乘虛襲我官軍

備之擊斃三十餘賊生擒擒首張惠等斬之初八日賊來益衆官軍擊諸城東北斃賊五六百守陴士卒復轟斃賊百數十官軍轉戰而進賊抵死回拒通永協左營都司朱淮源玉田營都司祿泰山永協蒲河營浪窩口千總楊德傷重殞斂兵入城賊焚北關袁甲三遣三百人潛出西門擊其後賊前軍方力戰後隊忽自亂官軍乘勢追殺先後斃賊以千計初九日復來攻城上舉大礮擊之有賊目執紅旗指揮轟斃之騎數十擁之去餘賊折回十八里鋪四十里鋪盤

踞侍衛伊興額率騎兵援穎遇賊獲勝賊來愈衆伊興額且戰且退兵卒傷亡數十人營總勒布佐領訥勒布領催珠勒剛阿豐林披甲占祿依順德壽俱戰歿賊乘沙河水淺悉渡北岸板橋展溝及西陽集分竄英桂以雉河爲賊老巢飭西凌阿崇安嚴防扼守益之以關保伊興額兼顧臨渙賊自蒙城分三路爭雉河西凌阿等以衆寡不敵退營寺集待援雉河復失其時興慶營於臨渙七月二十二日賊乘夜劫營興慶迎勦宿州才字和以練卒助之二十三日黎明

興慶戰於大柳樹戰垂勝東南另有賊鈔後路練卒
驚懼與明山所帶吉林餘丁同退走遂失利棄臨渙
披甲武凌雲多隆武戰歿興慶回屯蕭縣瓦子口袁
甲三與邱聯恩史榮椿等馳至亳州格縹額帶馬隊
出勦行至渦河口擊賊勝之賊游駛於雉河東北聚
散無常英桂以戰事方亟江皖諸軍不用命遇有征
調輒遷延遂奏劾郝光甲達思哈明山褫職留營以
松志隨袁甲三每遇戰守藉詞退避並劾之自是帶
兵將弁有不遵調者 上命袁甲三會同英桂隨

時叅奏並嚴諭福濟飭諸軍毋仍前玩泄取重咎時
袁甲三等旣勦東南兼防西北分兵兩路進二十七
日袁保恆自江信溜集整隊行至清水河遇賊與戰
賊突出西北村圍左哨勢危甚袁保恆直前衝擊朱
連泰等繼進槍礮無虛發斃賊千餘獲槍礮二百餘
輜械無算甫收隊龔逆等領白旗五六千自南馳至
將橋口練卒衝散據之袁保恆趨趙王河北岸都司
金泰趨東岸甫成列黑白藍三旗賊衆於集東渡河
欲誘我迎勦鈔截我後適邱聯恩以所部馬步鼓譟

而前賊驚愕四散大隊乘之斃賊二千餘生擒張狗等六十餘真諸法是日兩戰皆捷賊料我軍罷之二十八日悉衆來攻各軍已先備槍礮競發轟斃賊七八百賊乃卻伏賊出溝中向後兜裹兵勇回戰互有殺傷候選通判倉景涵戰歿八月初五日賊分股由渦河北岸圍崇安營以衆寡不敵失利初八日賊復乘間來犯袁甲三以大營均在西南密遣練首倪元灝伏兵北路賊果直趨西北倪元灝施放連環槍礮轟斃執令旗馬賊數人餘匪三百餘格綳額德楞額

等復斃匪三百餘賊向西南遁是日有綠旗賊首薛少系驍悍亦斃於陣云賊分股漸趨西北袁甲三以西路兵單遣格綳額德楞額等馬隊趨鹿邑王鳳祥等以步隊繼之格綳額等行至十八里鋪迤西遇賊與戰馬隊突過重圍以步隊不繼進折回賊夜半潛至卻之十一日辰刻復以騎賊來營總關保擊斃賊三十餘賊見馬隊西向渦河北岸賊全集南岸營於大清宮等處時王鳳祥整隊進期與格綳額馬隊合十二日格綳額等遇賊於鹿邑東南三路出戰預遣

數十騎在西南馳驟賊與官軍戰方酣見西南塵起疑有伏自驚潰官軍追殺連破其五營殲斃二千餘落河溺死者無算其敗竄之匪與王鳳祥步隊相遇斬刈過半賊退守雒河英桂與袁甲三合謀遣邱聯恩關保等循渦水南岸進崇安德楞額格綳額等先清北岸股匪仍與邱聯恩爲援時南岸賊悉避兵北岸邱聯恩亦渡河而北二十五日崇安遇張樂行於耿皇寺格綳額德楞額以馬隊卻之二十七日偵知翼得踞趙旗屯與張樂行爲犄角崇安邱聯恩分路

擣之邱聯恩將薄趙旗屯龔得不逆戰悉衆南渡邱
聯恩臨河而軍爲崇安後應崇安旣與張樂行戰於
劉奶奶廟乘勝追殺至潘家樓次晨將趨龍山得邱
聯恩馳報知龔得已由趙旗屯渡河乘虛襲我後乃
折回與邱聯恩會合甫至龔得之衆已悉渡徹浮橋
沿南岸列隊官軍以槍礮卻之九月初一日賊復以
浮橋渡河紛撲渦北勢甚剽疾官軍傷亡百餘人大
隊動崇安馳至格縑額德楞額等率馬隊自左兜圍
叅將賽沙布王鳳祥都司冷慶率步隊自右鈔裏崇

安樂善等力戰於中逾食頃賊不能敵渡河遁追殺
二十里斃賊千餘生擒二十餘鞠稱王貫三於前月
十二日之戰已落河渰斃云賊退至馬村橋迤南扼
橋口阻進兵路初五日邱聯恩崇安等商派德楞額
樂善與都司承惠等於吳家河丁家集密置二浮橋
渡河設伏令格綳額關保等由吳家河以南銜枚疾
進另以大隊直取橋口賊死拒兩路伏騎並起賊奔
潰官軍追殺三十餘里斃賊千餘張樂行仍遁龍山
旋麴聚於雉河白廟集會合龔得宮吉寺之賊將由

寺集十九里溝渡河北向袁甲三督副將朱連泰泰將張會川等沿河堵剿賊乘夜攻營卻之十四日崇安等南渡次姬家橋賊來衆萬餘格綳額德楞額分馬隊官兵爲南北哨鈔賊兩翼崇安以各營步隊戰於中官兵不利賊伏騎起壓我中路步隊動死傷枕藉終賴兩哨馬隊力賊始退十五日賊由王皮溜集而西英桂慮賊犯周口且西路兵力單乃檄崇安趨鹿邑出賊前十六日遇賊於羅家橋斃賊三百餘賊不敢進盤踞戴集左右窺陳郡郡城內外戒備嚴密

賊不得逞又聞袁甲三崇安兩路官兵將至慮腹背受敵遂由太康柘城分竄道出鹿邑魏家橋袁甲三令張會川擊諸姚莊斃賊數百生擒田極兒等賊遂南歸分屯宮吉寺張斌營崇安以淖落賊後乃至亳州合袁甲三之師先是英桂以賊西竄謀乘虛擣東路花溝集三丈口賊巢旣遣史榮椿由瓦子口進兵專顧北路更檄郝光甲等攻賊後計甫定而鐵佛寺之賊李月已先期撲瓦子口八月二十七八等日史榮椿與賊力戰其永夏虞城一路復有捻首李建泰

滋擾墨爾賡阿將馬隊往李建泰已由豐碭趨攻徐
郡是以史榮椿郝光甲諸軍爲賊牽制未能與邱聯
恩崇安聯絡一氣云十月初六日英桂自陳州進次
鹿邑適察哈爾馬隊到營英桂遂抵亳州選千人以
穆騰阿托津阿爲之將偕格綳額德楞額崇安鄭廷
錦等馬步兵團於十九日由雙溝東發殲伏賊於姬
家橋二十日由江信溜集分三路進至三丈口顏懷
忠鄉團與賊遇甫接戰兩路兵勇齊集殺賊七八百
生擒百餘踏平賊壘二十一日諜知龔得以數萬衆

駛至太和將西掠周口穆騰阿等令鄭廷錦顏懷忠率鄉團回駐雙溝防宮吉寺老巢賊西竄自督馬步渡河南追二十二日至舊縣集賊大至馬隊卻之乃益前衝擊近村突出伏賊數千復擊退之賊回鬪叅將賽沙布王鳳祥各以所部迎戰鄉團自西譟而前酣戰逾時賊來益衆官軍佯退賊直前追逐崇安督羅仲保張學醇等兵勇鈔賊後穆騰阿托津阿格紉額德楞額指揮馬隊左右盪決截賊數段兵團氣益厲追至茨河西岸殲斃二千落河死者無數賊向東

北狂奔鄭廷錦截殺數百賊慮官軍乘勝進聚黨踞
立德寺花溝集宮吉寺爲死守計招張樂行李廷彥
由渦北渡河回援英桂檄穆騰阿崇安自南擣其巢
檄朱連泰趨東北與墨爾賡阿會勦援賊時墨爾賡
阿方偕徐宗幹摻捕虞夏匪黨殲殺千餘擒斬捻首
王雙林王成張二紅磚李福廷彭雷等等賊二十五
日將由會亭集馳往永城適張樂行自蕭碭掠食取
道夏邑濟陽集狂奔而南墨爾賡阿逐之截其後隊
數百人賊之大股盡逾渦水南竄二十五日墨爾賡

阿抵五馬溝與朱連泰會遂以百五十騎馳赴穆騰
阿南路軍營二十八日官軍至三丈口迤東張樂行
以馬步逆戰關保等張騎兵爲兩翼張會川以綏靖
勇陣於中珠隆阿以通永兵陣於左龔耀倫以徐州
兵陣於右朱連泰往來策應距賊二里許關保衝入
賊中槍斃無算賊殊死鬪朱連泰以步卒環攻之馬
隊往來沖突察哈爾一軍尤驍捷敢戰賊遇槍槍斃
遇箭箭斃紛紛委地至不能自辨其黨追及楊家小
莊復殪三百餘擒李柱等九人所棄火藥糧食車填

於道官軍悉焚之其穆騰阿崇安一軍接捕茨河伏
匿二十七日由高公廟渡河二十八日營於店子集
墨爾賡阿以兵會次晨知賊將來犯疾馳至立德寺
迎戰穆騰阿揮馬隊縱橫決盪賊立潰遂毀其巢追
逐間突遇黑旗花旗紅邊白旗賊萬餘三面叢集鋒
甚銳崇安朱連泰各以兵馳至爭前環擊槍箭刀矛
無虛發殪賊三千積屍橫野兵勇亦間有傷亡所獲
槍礮旗幟以千計奏入 上以兩次獲勝並未殲
厥渠魁仍 諭迅速進兵務擒首逆十一月三十

日崇安朱連泰進攻花溝集宮吉寺賊巢斃紅衣賊
目數名匪黨千餘平其壘察哈爾驍騎梭拉什旺丹
把總馬騰蛟以首先衝賊歿於陣十二月初一日張
樂行龔得收集殘敗糾合藍旗匪黨萬餘仍踞雉河
沿村設伏以禦大軍穆騰阿等次第斬除伏莽直逼
雉河賊於橋上及沿溝排列大礮而以精銳沿河拒
守官軍進察哈爾佐領綽克圖達賴骹受矛傷負創
衝陣崇安朱連泰督馬步齊進賊不能支由雉河東
遁斬殺首夥二千雉河賊巢復平初二日追至西洋

集偵知張逆由高樓集龔逆由西洋集渡河向曹市
集去初三日官軍至曹氏集賊已先竄臨渙截其後
隊五百追及於會河橋復斃其衆三百天昏黑暫屯
橋北三更時賊分四路劫營官軍禦以火器賊多死
傷殊不退日將午賊圍益急士卒力戰已兩晝夜人
馬饑疲殺傷過當於是墨爾賡阿張會川裹創復戰
馬隊咸憤怒槍箭所至洞胸穿脅斃紅衣賊目十餘
營總關保擊龔得落馬匪黨爭護以逃官軍乘之賊
始大退穆騰阿等以人馬無從得食慮賊斷歸路乃

徹回雉河賊連來犯亦未得逞遂踞廟集浚壕築壘
爲負嵎計十九日夜突出悍賊數千攻營槍礮如雨
官軍卻之直隸游擊德祿河南駐防滿洲營佐領松
志歿於陣兵勇多死者穆騰阿黑夜追賊墜馬傷臂
二十二日賊以死黨繞越西行圍截後路朱連泰要
擊之殪賊二百生擒賊目董麻狐等斬之賊踞廟集
堅匿不出崇安格綳額乃計誘其出巢十二月初二
日佯令大兵徹退伏於西令守備羅仲保挑戰賊輕
我兵追殺二十餘里大兵競出圍斃殪賊四五百賊

且戰且退廟集之匪復出援應崇安格綳額分路拚
殺戰至初三日黎明賊始潰散我軍入廟集毀其巢
賊向尹家溝趙旗屯竄逸初七日尹家溝賊以官兵
進攻退守王家圍其趙旗屯賊經副將伊里綳阿營
總富勒德恩布忝領法克吉布攻之未下當賊之竄
渦河也福濟請自赴臨淮勦賊旣而以巢湖之役不
果 上復命秦定三鄭魁士又不果至是福濟乃
派吉順金光筋各帶兵勇五百赴北路福濟劾關保
赴調遲延英桂亦劾郝光甲株守懷遠斯時也不獨

皖境亢旱赤地千里士卒無從得食卽將領之忽東
忽西亦稟承無自矣英桂前在陳州旣獲褫職留任
之譴旋復屢奉 嚴旨督責而雉河一再攻克均
因江皖諸將失師期致賊挫而復熾論者謂初次尤
爲失機蓋所關匪細故矣

豫軍紀略卷七

皖匪四

咸豐七年正月 上以匪蹤四出英桂調度無方
與屢次敗退之察哈爾都統西凌阿並交部議河北
鎮總兵崇安屢次挫敗惟怯無能交部嚴議西凌阿
崇安均來京候議西凌阿所部馬隊交穆騰阿管帶
勝保以副都統銜幫辦勦匪事宜代崇安爲河北鎮
總兵官卽統其軍是時徐宗幹補授浙江按察使已
自歸德赴新任英桂駐軍亳州偵知張樂行糾衆數

萬期以正月犯歸德及陳州之周口蓄髮結粵逆爲
援嗾其黨韓狼子由臨淮正陽關導之入豫英桂咨
照皖省嚴戒備督諸將分路進攻請益調馬隊助剿
始賊敗於尹家溝趙旗屯後十二月二十一日龔得
之弟龔義率悍黨數千自王家圍突出討鈔大軍後
托津阿富勒德恩布朱連泰崇安等將馬步隊追擊
至亳州洪家廟山永協副將珠隆阿首先躍入賊陣
斃中礮傷負創力戰擒斬龔義於陣乘勝疾追斃賊
二千餘其著名捻首雷燕李復亮楊興旺魯珍龐敬

等俱斃於陣我軍外委高振標戰歿珠隆阿回營以
傷殞後俱議卹如制時方歲闌英桂度賊將擄至乃
飭托津阿等整隊進勦除夕遇於王家店殺賊二百
餘生擒擒首黃得等二十餘賊斬之賊敗退元日黎
明屯聚王家店迤東官軍至散而走斬首三百餘生
擒擒首白豹等斬以徇初六日諸軍進攻趙旗屯賊
出巢拒戰斃賊三百餘賊棄巢潰走諸軍擁入生擒
李振山等二十餘賊揆殺夥匪百餘敗賊梟渡澗河
遁踞尹家溝次日朱連泰等渡河薄尹家溝十八日

黎明托津阿等馬步並進賊伏土圍施槍礮官軍連
開大礮賊應聲仆官軍乘勢奪賊圍斬殺以千計括
其巢獲財物軍器甚多搜擒捻首張鳳等三十餘賊
鞠稱張樂行先期南竄龔得於破圍後逸先是亳州
之南爲捻匪西竄要道英柱會商袁甲三派知縣張
學醇委員鍾德建扼高家寨賊以千餘人突至爲張
學醇等擊敗故未越而西惟亳州南至潁郡數百里
所在皆賊羽翼鄧家圍孫村店諸處各有逆黨築圍
死守牽制我軍沙河北岸復屯聚大股拒南追之師

英桂以鄧家圍爲肘腋患飭朱連泰督隊進攻二十七日師薄鄧家圍圍高丈餘鑿礮眼三層賊於圍內施大礮我軍於圍外擲火彈傷斃賊甚衆千總萬壽慶把總楊起山外委魯占魁中礮殞士卒多死者阻不得進張樂行龔得竄潁州南照曹家等集英桂以其地當水陸要衝與三河尖周家口均接壤乃令西凌阿以馬隊二千赴潁截堵又以皖撫福濟奏粵匪與捻通令侍衛穆騰阿帶察哈爾馬隊五百赴皖助勦穆騰阿行至潁州六十里鋪夜爲賊所乘圍之數

重穆騰阿奮戰得脫札米彥札普所部百餘騎悉潰
穆騰阿折入潁城適西凌阿援潁至遂以其軍交穆
騰阿接統而還 旨回京穆騰阿馬隊交托津阿

將之赴皖以道梗未得前袁甲三初以徐州告急將
赴援既知賊竄龍山奏明中止二月初六日勝保與
英桂袁甲三會於亳州以張龔二逆肆擾阜陽潁上
分踞霍邱三河尖其地與固始息縣相連據形勢要
害勝保乃統山東河北兵馳往督勦英桂援應後路
留袁甲三駐亳督朱連泰攻鄧家圍姚家圍踞匪兼

顧歸德門戶自是亳州軍事由袁甲三徑奏初九日
勝保赴潁英桂以十三日繼發時賊由三河尖狼橋
溝初六日署固始知縣張曜會各營迎擊賊稍卻追
至淮河官軍奮勇截殺另股賊橫出鄉團右鄉團驚
潰王庭蘭所遣把總程長湖死於陣賊進攻固始縣
城初九日焚東關勢甚急光州知州鄭元善等馳援
固始與王庭蘭張曜嬰城守賊駸駸西犯時勝保所
部馬步僅三千餘人英桂所部兵勇千人馬隊纔百
餘於是檄鄭元善等募勇禦賊檄邱聯恩赴援英桂

由太和向沈邱布置防軍扼周家口要道號召槐店諸處鄉團飭汝甯府文武馳扼新息飭沈邱知縣秦篤新候補知縣丁世選馳扼阜陽縣之沈邱集堵賊西竄並飛函與勝保聯絡聲勢勝保派穆騰阿以馬隊六百渡淮副將樂善步隊繼之遂自潁州移營三塔集時三河尖左右賊巢林立南路聲息不通勝保留兵守三塔集親督軍繞道西南進十六日師抵驛口橋諜稱賊分踞方家集遏援兵勝保率穆騰阿樂善進逼方家集賊隊縱橫列河岸穆騰阿擊敗之渡

淮奔烏龍集先後斃賊百餘生擒捻首錢萬榮等二十餘賊十九日官軍縛筏渡淮奪烏龍集賊敗退次日糾三河尖中心岡賊黨犯方家集大營勝保指麾將士迎戰賊騎佯退誘敵官軍追及李家集深林敗堵間突出二百餘騎步賊六七千勝保戒步隊勿動令馬隊出盪陣賊抵死相持接戰兩時步隊槍礮漸進馬隊左右馳騁斷賊騎爲三步賊稍卻士卒乘勢譟殺所向無前賊駭愕狂奔斃賊千數百割賊首二百餘圍攻固始之賊漸由東南抽調西北自期思集

至城關數十里賊衆布滿復以大股屯楊家集周家埠口勢甚盛其地皆稻埂狹隘值天雨沮洳難行時英桂已抵新蔡懼勝保孤軍深入檄汝甯營叅將成景帶兵五百羅山縣知縣廖慶謀帶練勇一千取道光息赴固始自新蔡會勝保於艾亭二十三日勝保進次期思集斃匪數百二十六日穆騰阿樂善馳赴楊家集賊馬步分起來犯官軍三路接戰殪賊二百餘追至龍港集伏賊驟起尤剽悍騎兵方對陣步隊疾趨直前槍礮環擊殲賊殆盡生擒捻首四十餘其

另股之在吳家樓者舉旗助勢官軍猛擊之焚其壘
勝保復飛調光州勇二千並成景所部剋期齊集二
十七日五鼓乘大霧進兵黎明抵周家埠口賊迸散
卽督馬隊追殺渡河直達固始西關附城賊自焚其
壘火光中見賊東奔不成隊伍旗幟器械牛馬縱橫
委於地城圍立解勝保入城留成景廖慶謀駐守二
十九日督隊至蔣家集賊糾三河尖老捻悉銳來拒
橫亘六七里勝保察知賊五股約七八千我軍僅千
餘非出奇無以制勝賊置陣長首尾必不相救乃遣

親軍馬隊百餘繞賊後賊猝不及防自驚亂斃賊千數百生擒四十餘奪大礮十二刀矛槍械千餘旗幟數百焚燒及奪回賊船五十餘踏賊壘五我軍旬日間獲五捷疏入請將出力員弁紳民擇尤保獎復查明歷次勦賊死事之河南滿洲營佐領松志直隸候補游擊德祿察哈爾驍騎校拉什旺丹河北鎮標千總馬騰蛟候補府經歷陳謨候補千總陳鈞慶外委王太魁山西把總殷鶴齡徐州鎮標外委尹寶讓六品軍功任繼雄山東千總萬壽慶直隸把總楊起山

河南經制外委魯占魁等十二員請從優卹並請調
火器營員弁來營俱得 旨允行勝保之援固始
也粵逆連陷六安霍邱圍壽州甚急李兆受實爲之
導福濟疏請勝保赴援 上以固始用兵方亟遣
袁甲三赴正陽關督金光筋先解壽州之圍諭勝保
分兵以助及是金光筋已擊退壽州圍賊穎上復告
警勝保於三月朔駐軍方家集功上莊賊知西南未
可驟犯遂北擾潁州之三塔集柴家集諸處會托津
阿阻未赴皖勝保令駐守三塔集賊至復戰敗察哈

爾佐領達爾瑪滿噶拉戰歿賊大掠潁南勝保督穆騰阿沿途追勦賊回竄柳溝添築四圍集眾二萬往來趙集滋擾初八日穆騰阿帶馬隊馳至趙集三戰皆捷賊復以死黨六七千由小田市集渡河來犯勝保派徐州馬步官兵分途要擊屢戰不退穆騰阿自趙集馳至合戰卻之賊又出馬隊千人自西至官軍幾不敵勝保略陣見賊勢盛急自將親軍百餘騎繞出其前大呼陷陣士卒併力戰賊始敗走斃賊五百斬賊目一賊見官軍阻遏東北潁郡未易犯又懼我

師擣柳溝集三河尖巢穴遂分股旁趨西南之王家
壩華家集游騎達息縣將由光固通粵逆是時李兆
受已會合粵逆陷正陽關圍潁上甚急聲言破潁上
後趨潁郡犯歸陳另股薛小楊小復由霍邱擾烏龍
集自皖境之六霍暨豫之光固息商所在皆賊樹旗
張示伺隙而動廬郡嚴未解文報不通 朝旨諭
袁甲三由正陽赴六安以分廬州賊勢袁甲三因亳
州多伏莽疏請先清北路再南下勝保以柳溝賊巢
未破潁上危如累卵將悉銳赴援又慮拔營後賊必

乘虛北犯爰與英桂審度形勢以潁郡驛口橋爲南
北要衝須屯重兵以扼賊於是英桂自新蔡馳駐驛
口橋其光州邊防責令王庭蘭成景鄭元善廖慶謀
張曜等以堵爲勦勝保存營兵勇分守要隘外敢戰
之士僅及二千英桂所部數不滿千因憑陳粵捻交
乘兵力不敷分布情狀請調楚省防兵三四千來豫
並請飭史榮椿自蒙城進援潁上 朝廷謂史榮
椿已赴亳州楚軍別有征調 諭令迎提大同馬
隊二百名及直隸防兵到營相機進勦

皖匪五

賊踞柳溝聚南路悍賊四五萬抗我師謀乘隙北犯而以另股及皖中粵逆圍潁上勝保偪賊巢扼北犯路英桂駐驛口橋爲勝保後援會霪雨連旬師阻不得進三月十九日賊乘雨夜分股至土碑集掠糧駐守之察哈爾馬隊二百人不能禦英桂令黑龍江佐領蘇克金急馳往壓賊退擒張汝黃燈兒等十餘賊斃賊數十奪回所掠資糧牲畜二十五日天始霽二十六日進攻柳溝步隊分兩路進馬隊張兩翼護之

英桂堵截後路勝保自扼河口麾諸軍進巢內悍賊
林立持滿待我軍我軍開槍礮賊應聲仆我軍冒煙
火蛇行蒲伏進越重濠摩壘火彈噴筒齊發斃賊無
數而賊巢棚帳以雨溼終不然塵攻三時三河尖援
賊膚至勝保見黑雲蔽日雨勢重卽收隊援賊渡河
鈔擊勝保回馬拒戰斃賊甚夥賊始退二十八日賊
傾巢出馬隊橫亘八九里勝保令穆騰阿率馬隊樂
善保衡率步隊三面迎敵馬隊直前賊堅立不少動
時火器營甫至軍射以火箭賊衆多墮馬我軍乘其

驚擾擊之賊再進再卻積屍滿陣來益多我軍大呼
四面馳下賊隊亂自相蹴踏死者不可勝數火器營
伊昌阿全廣等暗以火箭伏坡側奔賊至悉斃之近
營村舍伏賊尙萬餘勝保密遣死士夜攜火具襲賊
營賊駭奔洞胸穿脅焚殺復無算是時柳溝賊巢食
將盡張樂行糾三河尖霍邱馬賊三千暨夥黨王懷
義等悉衆決死戰計衝大兵營壘竄西北掠糧旣不
得逞乃自三河尖分股四出一由旺流集竄光固一
由青皮淺竄息縣謀牽我師勝保密桂計分兵非策

也於是檄蒯賀孫由汝屬帶勇赴光固會同鄭元善等盡力堵禦穎上告急則檄代理知府文光叅將蔡昌言往援而進攻柳溝之師不少動蒐軍實申號令奏遣察哈爾馬隊請調黑龍江餘丁以帶隊得力加穆騰阿勇號以土碑之失摘札米彥扎普頂戴並劾直隸防兵赴調遲延分別賞罰振作士氣專軍併銳圍柳溝四月初一日三路進攻勝保親扼邵家橋樂善統兵勇首先過橋以火器斃賊甚衆賊堅壁礮傷我兵十餘我兵仍冒死直上毀圍牆數丈守賊急分

路出關三河尖援賊且二萬勝保以爲不殲此股柳溝終不可取乃於橋北占寬地嚴陣待悉縱精銳逾橋迎擊而令穆騰阿帶營總穆克登布墨爾賡阿等列馬隊於西南防騎賊鈔越賊衆蜂至其悍黨烏木逕渡與橋下伏賊並起時樂善所將精卒轉在橋南勝保乃躍馬橫戈立橋上士卒見主將親臨陣勇百倍刀矛格鬪橋口槍礮並發中賊輒仆富勒德恩布縱馬過橋樂善回兵截擊川勇與親兵合橋下伏賊四百餘盡殲之西路馬賊亦爲穆騰阿擊敗賊自是

不敢進巢徹夜列巢外備官軍越二日張樂行襲得
糾合三河尖逆衆悉銳來犯先以騎賊當官軍官軍
逐之卽退往復十數次是日逆首皆在陣前賊衆倍
往日不能以力勝迺設伏佯退以誘之賊易我軍來
追入伏中於是馬隊回轡衝壓川勇伏近村譟而起
火箭蝟集賊馬足及腹馬駭奔蹶齧賊隊大亂斃賊
四五百穆騰阿方追北林箐間有黃衣紅衣賊目二
指揮賊衆急令飛騎間道鈔擊槍斃紅衣賊其黃衣
賊中二箭逸縱兵追殺數千百賊益懼踰伏巢外是

夜伊昌阿全廣持火器率川勇四五十銜枚劫賊營
賊聞角聲人聲疑官軍入其穴昏黑中自相殘殺屍
骸枕藉遺槍械衣履塞於道張樂行龔得等勢益威
翌日復糾悍黨萬餘渡河來決死戰勝保及其半渡
而擊之賊被槍中箭屍屬於河餘賊不能渡望風靡
官軍自上游濟者已出其後衷而擊之擠諸河殺溺
無算哀號之聲達遠近是夜三更我軍傳於賊巢巢
內餘賊猶開駮抗拒初六日黎明我軍越濠登巖其
衆遂克柳溝敗賊向三河尖及化集分竄英桂令蘇

克金格洪額追至南馬寨迤南斃賊百餘生擒郭灼石長明等二十餘賊復派馬隊四百步隊一千跟追至汝陽新蔡一路三月二十九日粵匪自固霍交界之大山泉河鋪北竄王庭蘭成景等擊諸石佛店殪賊二百獲偽丞相檢點諸旗幟信陽營外委何振聲陷於陣四月朔紅衣長髮賊二三千由柳村店間道趨固始軍南關攻東南兩門夜半攻稍懈王庭蘭成景張曜等選死士四百由西北縋而下劫南關賊營城內啟關鼓譟出兩路截殺逆衆驚潰擒斬悍逆陳

忠沅僞指揮余常等賊由徐家嘴鼻水遁王庭蘭等慮賊復至請兵助剿先是光固告急勝保英桂檄卬聯恩往援又以楚北之警南陽士民固請留聯恩不聽移師至是乃檄龍澤厚自鄧州馳赴光固而龍澤厚是時猶在秦鞬匪固未來豫也勝保英桂旣克柳溝念穎上被圍久望援切又謀言張樂行等遣李金甲冒難民賃居穎州府城暗挖地道爲內應委員往驗如所言捕寘諸法於是益知賊之涎於穎上其聲言分股北犯蓋欲牽我兵力於西路得乘虛致力於

穎決計移師屯李家集圖三河尖賊巢而出銳師倍道疾趨援穎上時久雨泥深沒踝穎上賊以爲官兵必不能猝至且已分股由化集繞越西竄綴我軍穎上可旦夕下不知勝保之師轉向東南四月初十日勝保所遣營總法克吉布叅將蔡昌言紳士倪元灝勇目賈金勝前隊之師已宵加於穎次六十里鋪矣自克柳溝賊失門戶之蔽而穎郡偷掘地道之謀又敗至是復聞勝保大兵至穎上守愈嚴計益窮是夜乘大雨粵逆竄正陽關捻逆竄三河尖穎上圍立解

德克吉布等剿餘賊距潁上三四十里遇賊載所掠輜重東北行要擊之斃賊二三百勝保統大隊回駐李家集圖三河尖老巢三河尖北二十餘里有黃岡寺中心岡賊以數千人分據與三河尖犄角中隔洪河屬徧地積潦官軍揜至黃岡寺斃賊六七百馬隊賊爭渡洪河溺死無算乘勢進剿中心岡斃賊四百餘生擒長髮老捻二十餘奪獲槍礮旗幟甚夥救出被難婦女二百餘口匪巢平毀三河尖北岸賊略盡當柳溝之破其分竄化集之賊踞吳老莊分築四壘

堅匿不出英桂令蘇克金格洪額帶兵往勦勝保亦
派兵會之十六日官軍併力合攻吳老莊拔其壘賊
向東南竄逸時陰雨決旬洪河暴漲毀三河尖迤北
橋梁賊焚舟阻我軍不得進勝保乃會英桂於驛口
橋議以重兵扼西北暫緩三河尖之攻留樂善等守
李家集營盤自統所部連夜至化集十七日次高家
堰聞礮聲知賽沙布與賊戰疾趨抵功上莊見賊幟
如林橫亘東西數里英桂所遣兵相距在數十里外
賊恃衆呼譟往來衝突勝保嚴陣待自已至酉相持

五時之久賊漸懈或下馬坐卧勝保潛師襲賊後昏
暮賊不辨多少紛然退官兵乘勢追抵賊巢是時張
樂行據三河尖其黨薛小楊老小分布光息既不得
逞志於北喉西路敗匪竄踞方家集方家集跨洪河
爲水陸要隘都司戴世熙知縣丁世選戍守龔逆驟
至戴世熙等斂兵退賊遂濬溝築壘聚所掠資糧而
守焉並分屯於附近之韓家灣間遣其黨掠烏龍欄
杆趙家古陳倉等集洪河南賊徧地我軍乃於洪河
北倪新莊大橋集沿河設守令樂善等仍駐李家集

舊營以分三河尖賊勢勝保自駐高家堰相機調度
二十一日密派法克吉布以馬隊三百潛自艾亭渡
河而南二十二日戰於趙家集藍旗韓狼子列陣於
南白旗龔得列陣於北藍旗陣而不整官軍先擊之
賊潰龔得復糾合長髮悍逆自北應援我軍奮勇追
逐三十餘里殲馬賊百餘步賊千餘落水死者以千
計奪獲礮械旗幟無算二十三日勝保益令墨爾賡
阿帶隊赴烏龍集與法克吉布合連戰皆大捷斬獲
甚多自古陳倉至欄杆集數十里賊蹤略盡法克吉

布等暫屯南岸勝保將移師功上莊先令賽沙布戴世熙等築濠壘二十五日向午龔逆率悍賊萬人五股來犯賽沙布不能禦賊衆西駛勝保統親兵往與賊正相持賽沙布戴世熙之兵見天向暮繞營而退各隊爲之動賊乘勢來逼勝保急與穆騰阿合兵邀截槍斃連環擊之賊始退回巢於是劾賽沙布戴世熙暨棄方家集之丁世選俱褫職令自效賊踞方家集濬濠培壘老我師勝保知賊中資糧未乏二麥方熟乃飭居民先行刈麥商販必官給印票方准行運

出產硝磺之區禁止出境賊以匱乏相率逃日數十
百人勝保貸以不死復於陣前樹旗招徠之解散五
六千龔得乞降勝保不允五月初二日穆騰阿樂善
等東西進攻西路之師先到噴筒火彈並發逆衆鼎
沸東西出賊三千餘圍我軍穆騰阿等以馬隊衝擊
步隊如牆進賊屢卻屢前力戰良久殲殪甚多勝保
訶賊黨分踞洪河南岸衆少於北北岸防密於南攻
其一面則彼得抽併精銳以相抗會檄調邱聯恩及
副賀蓀廖慶謀等所部兵勇至初八日夜勝保令邱

聯恩等伏方家集南岸初九日夜遣穆騰阿樂善先發勝保督後隊策應適大霧迷漫銜枚疾進黎明霧斂我兵薄其巢殺賊騎數十越其濠賊併力拒輒爲火器所焚驚駭囂呼中猶死鬪我兵且戰且攻破其壁濠寬逾數丈不可越卽聯恩薄南岸賊壘賊潰亂官兵縱火焚洪河浮橋然及廬舍值南風大作火益烈賊黨徒跣呼號冒火撲北岸官軍前後夾擊轟殺焚溺者三千餘河水爲之不流勝保料賊將夜遁乃伏兵於徐家橋地里城賊果夜駛至官軍截殺敗退

回巢於是張樂行恐三河尖不能久踞先以舟三百載輜重順流歸雒河行經正陽關金光筋擊沈其舟數十官軍連日進攻終以濠寬水深未能速下十一日東北風起官兵以灰瓶毒煙乘風投賊巢賊出巢迎拒兵勇三路卻之夜遣健卒襲賊營躍矛叢刺使自相駭殺或舉千斤大礮傾其屋宇邱聯恩蒯賀蓀等復於南岸火賊多舟賊徹夜邏守不敢歸巢十四十六等日賊出馬步萬餘穆騰阿樂善張兩翼待之賊知有備不敢前十七日五鼓勝保督令樂善率格

洪額王鳳祥等統直隸河南山東步兵川楚正定各
勇三路進攻方家集鼓行而前賊奪路狂奔轟斃甚
多我兵擁入賊牆縱火燒木棚其未及逃出者尙一
二千盡殲之立將方家集平毀馬隊沿途追殺屍橫
遍野遺棄衣糧器械牲畜填塞於道賊竄王家壩與
三河尖爲掎角初賊分五色旗每旗緣以雜色爲二
十五隊蜂屯蟻聚自柳溝攻克潁上解圍各旗殲殪
過半惟白旗龔得狡悍善戰此次攻取方家集白旗
匪黨僅存十二三粵逆亦大受懲創張樂行爲之奪

氣云於是勝保移營中心岡扼賊要衝親至三河尖
規度形勢三河尖居豫皖之交水陸衝途人煙輻湊
淮汝匯流四面環繞夏水漲發渺瀰無際賊收船入
港長河數十里無片板得小舟溯洄而上之流灣曲
動嬰賊鋒其勢斷難飛渡勝保所謂黃良楷邱聯恩
南北兵勇一時未能遽集然賊勢旣窮威若稍遼緩
敵復張乃就見兵先攻王家壩翦賊羽翼穆騰阿率
馬隊分東北兩路截援賊策應步兵二十日我兵薄
其壘賊初猶施槍礮抵拒火箭射入燒房屋賊相顧

駭愕爭拔柵門竄殲斬無算詰旦張樂行等率死黨
馬步數千直衝中心岡勝保揮兵迎擊斃賊五六百
追至三河尖剷除附近賊壘二十二三四等日小曹
集童家樓劉家店柳溝口各壘次第削平斬馘千餘
其順流東駛之賊爲固始署令張曜叅將成景截殺
二百餘生擒張麻子等一百餘距三河尖東北六十
里鋪爲賊回竄雉河要道賊以死黨據守勝保輕騎
襲之賊潰走殲斃五六百賊迭挫衆心渙散逃者日
百數十賊酋互相諉咎或爭奪鬪殺勝保謂乘其內

閩可一鼓下也二十五日選善泅者數百人背壺盧藏火具潛渡南岸越西北緣土圍而登賊之守也密於夜而疎於曉故得登縱火譟而入逆衆不相顧亡命東奔立將三河尖克復賊竄南照集追軍踵至殺賊數百餘賊梟水爭渡我軍以槍礮乘之溺河中斃死者浮屍蔽流下旬日間連舉堅巢時方炎蒸赤地千里晝夜轉戰軍多病卹聯恩樂善穆騰阿患時疫英桂喀血勝保力疾督師故將士尤用命焉捷聞加樂善提督銜賞卹聯恩圖薩蘭勇號游擊格洪額加

副將銜知縣廖慶謀換戴花翎復直隸前平谷縣余
啟咸職以守固始縣功最予王庭蘭三品卿銜餘升
賞有差先後查明死事將弁陳州府屬陣亡之佐領
達爾瑪滿噶拉委叅領德隆委防禦富和驍騎校旗
勇成德薩音烏玉圖密吉克僧額阜陽縣方家集陣
亡之防禦阿克棟阿驍騎校關喜署內黃營千總司
泉許州繁城陣亡之開封營千總王聰明固始縣橋
溝集陣亡之把總程長湖固始縣石佛殿陣亡之信
陽營外委何振聲內鄉縣大平頭陣亡之把總張大

信等俱奏請議卹如制

皖匪六

賊自三河尖敗後舟載輜重東下兩岸賊夾護以行
勝保督軍由南照集北岸追剿五月二十七日抵濶
河集焚近岸船隻賊趨南岸二十九日師至潁上縣
士卒刈麥而食進次黃岡集分兵擣沙關賊壘沙關
在河北與正陽關爲犄角賊恃近巢穴糾衆出拒我
師乘其未陣擊之斃賊三四百詰旦賊自正陽關來
援帆檣如織據八里埭造浮橋跨河而軍我師先攻
八里埭步賊擁衆出巢馬賊陣林木間我軍分兩翼

鈔殺斃賊六七百餘賊爭浮橋不及擠入河漂沒大半我軍燬浮橋擊沈數大舟賊由下游遁入正陽關遂拔沙關關內餘黨多自經於樹搜獲張樂行之弟張易斬以徇鞠知張樂行冀得自三河尖敗存賊僅二萬奔正陽關留韓狼子守關張樂行等赴霍邱依李兆受薛小諸逆將乞援於粵匪勝保念霍邱在正陽潁上南若渡淮進攻則正陽賊將乘虛北犯惟先正陽而後霍邱可以疏通河道顧全潁壽又念霍邱密邇固始乃檄邱聯恩蒯賀孫廖慶謀等會同王庭

蘭張曜分扼固霍接壤防竄越時河水盛漲官軍營
北岸不得渡會署廬鳳道金光筭以礮船來助閏五
月初四日勝保令金光筭造浮橋濟我師自督軍出
北岸進剿賊見官軍即由西北浮橋擁過數千人我
軍張兩翼俟賊近鈔其旁斬執旗馬賊十餘殲步賊
百餘賊敗趨浮橋官軍追斬五六百賊急斷浮橋梟
水逸官軍槍礮尾擊之遙見南岸金光筭兵直抵關
下將登猝有伏賊鈔其後壽春鎮練勇先潰賊乘勢
壓下金光筭在礮船督戰似爲飛子所中猶屹立礮

船頭指麾士卒岸賊乘之舟人急解纜溜急舟覆金光筋歿於水北岸軍以浮橋未成不得渡勝保以狀聞得 旨照布政使陣亡例優卹光筋武功爲皖中第一其死也遐邇士民俱揮涕勝保旣失金光筋益憤怒激士卒規取正陽關顧其地西南北三面爲皖豫各河所匯大雨時行河流漲發距關十里悉巨浸無進兵路潁州府光州承造礮船不能以時集而賊船甚多乃令副將慶瑞駐賽澗鋪叅將賽沙布都司戴世熙駐左家園叅將蔡昌言帶銳勇及金光筋

舊部駐沫河口其東往壽州之路令游擊成桂都司
吉昌駐兩河口而以皖撫所遣之叅將吳秀駐正陽
關以東與護廬鳳道黃元吉力遏要衝又密遣營總
穆克登額西蒙額烏爾棍扎布升紳等將騎兵渡河
潛赴東路三十里鋪相機截擊布置定會英桂亦移
營駐潁州爲勝保策應偵知潁郡以東沙河以北板
橋集胡家集王家屯廬家廟諸處均有賊而尹滔爲
之首非翦滅此勝保不能無後顧患乃派營總蘇克
金往廬家廟剿捕斃賊二百餘生擒劉全張麻子等

賊派總管德楞額副將伊里綳阿叅將雙慶等馳往江口集斃賊數十生擒馬大枝等三十二賊焚其巢餘賊東竄我兵追過肥河斬馘無算板橋集附近居民均反正時李兆受糾合粵逆久據霍邱之葉家集以大兵方攻正陽關乃伺隙擾商固商城縣知縣戴鴻經守備李輔清與邑紳周祖頤以兵團禦諸黑樓陣斬僞正將軍朱沅興生擒僞檢點傅炳榮狀聞勝保英桂令邱聯恩王庭蘭蒯賀蓀進駐黎家集賊聞大軍且至退竄東南開順街搜獲賊目李喬年等數

十李兆受竄六霍交界之大林畝石婆店商固遂無
賊勝保益專意正陽關十六日黃元吉穆克登布率
馬步兵勇至雙橋集賊騎三路來犯官兵亦三路擊
之賊敗歸巢復密遣守備黃開榜駕所奪賊船襲賊
汪家集由任家溝駛至霍邱距城十二里賊船屯聚
如林我軍入其圍發礮沈數舟奪大礮一大船一餘
賊驚擾者終夜十七日勝保慮正陽關下游黃天澗
賊易偷越遣副都統德勒格爾營總訥恩德善等以
馬隊搜剿斃賊甚多於時官兵礮船有先成者乃令

慶瑞黃開榜率以進攻十九日黃開榜由沫河口駛近正陽關沿賊圍牆順流下駛乘風舉礮轟塌賊牆數丈守賊應聲仆遂奪舟俘敵而還二十一日慶瑞進攻黃天澗乘雨後風順利駛近北岸黃頭岡賊船迎拒我舟乘勢入賊隊槍礮環擊沈其六舟賊衆隨流漂沒步賊緣岸來救復礮斃四五百乃整隊回沫口停泊二十四日新河口有賊舟數十自霍邱揚帆而來黃開榜以礮擊之落水賊無數敗賊趨南岸抵暮黃開榜復與敖天印乘賊不備突前揜襲賊船槩

櫓未具傷斃二三百沈溺無算奪舟五次日復接戰賊爭開槍礮我軍避撫牌後注藥焚火待時炎暑賊礮頻發熱甚不能用我軍槍礮齊發斃賊三四百賊大潰僅以四舟遁先是勝保統大兵壁垂岡集扼正霍北犯路至是礮船益多乃於二十九日親督各軍進攻正陽關由冰河口繞湖入關內賊蹲屋脊瞭官軍近關水次列舟迎拒官軍擊以槍礮屋上賊多顛突有舩艦百餘排擡槍分路飛擗至我軍佯退俟其近出礮划四面圍之焚燬過半斃賊三百餘謀言逆

首以糧盡多傷亡謀由懷遠蒙城逸又慮我舟師阻
截乃散處東岡黃岡頭棚帳鱗次一望無際勝保慮
其東竄乃派樂善等至沫河口督同防剿六月初一
日賊衆三四千水陸並進樂善先於要隘置千斤大
礮令水師佯退誘敵賊船近大礮轟發擊沈賊船三
餘船四散追擊大敗之我軍收隊將炊賊營忽出無
數小舟擁巨艦飛檣趨北岸奪大礮把總黃鳴鐸駕
小舟十餘乘風便附賊船以手槍擊舟左賊舟右賊
悉趨於左短兵接斃悍賊八九十餘賊墮水攀舷舵

擁舟南竄未抵岸舟覆皆溺死時黃元吉於雙橋集
豐店鋪迎河集諸處遇賊殲斃二百餘擒雉河老捻
邵甲陳讓等斬於軍追至黃練堡先是英桂飭德楞
額等接捕沙河兩岸匪黨斬獲甚多被脅愚民悉雉
髮歸正初六七等日進次展溝關曠宋家園郭家橋
諸處初十日渡澗而北剿劉家集之賊賊乃黑旗擒
首李越之黨李越既爲伊興額所誅其黨劉老淵等
竄至劉家集游駛遇我兵向西北狂奔我兵追殺百
餘生擒擒首王獻林等跟躡至胡家澗殲殪甚多十

一日德楞額復帶馬隊追至亳境楚店集韓家園迭有斬擒於是北路賊日蹙勝保以正陽關左湖右河賊負險死守未易攻若漸平關外各巢則賊勢孤立又以大軍現屯沫河口八里塚商賈居民漸復業由臨淮達潁州帆檣不絕設下游再遭蹂躪則收拾愈難於是咨商皖撫派叅將尹廷善扼守臨淮嚴飭護廬鳳道黃元吉等堵截各要隘並齊集霍邱東路鄉團助剿令副將慶瑞督黃開榜黃鳴鐸等由水路進攻密遣兵勇由黃天澗渡河繞出賊前二十二日賊

以二千人攻東路鄉團經官軍鈔擊敗退次夜復來
拚襲傷團練二十餘人賊乘勢東趨我軍四起圍擊
截追至河邊適柳林內伏礮船槍礮齊發斃賊二百
餘二十五日賊衆千餘由南岸晷水至山東練勇伏
不動賊徑前伏起短兵接殲賊無算二十六日勝保
以蔣家廟賊巢未破親赴黃天澗擣賊巢賊出戰我
軍排立不動俟其槍熱藥罄譟而前槍斃數百人賊
敗入巢我軍擲火器賊不能支潰圍竄柴家岡士卒
追及再破之遂平蔣家廟柴家岡新集黃岡頭各賊

巢其賊舟在黃天澗者樂善飭參將蔡昌言由沫河口分帶礮船更番迭進沈其舟數十追及關前復截奪其舟擒斃其衆東路水陸賊營殲除略盡矣餘匪南竄枸杞園劉帝城諸處亦有遁回正陽關者先後俘擒首張麻太王慶邦韓來發李恆張七等十餘礮傷任乾魏老頭等皆悍賊也二十八日勝保渡淮至南岸令穆騰阿馬隊會黃元吉等進剿七月初一日穆騰阿由蔣家廟進攻板橋集賊初不設備官兵驟至立潰亂南奔官軍毀其巢逐北至枸杞園賊竄入

巢與守賊悉衆出拒穆騰阿飭營總法克吉布楚勒岡阿等分兩翼撲壓賊屢前屢卻相持逾時始敗退我軍跟蹤入其巢斬首三百餘賊潰圍竄劉帝城劉帝城有賊營六座捻首韓狼子劉餓狼魏蘭等均竄伏於是初三日勝保預派穆騰阿帶馬隊樂善帶步隊慶瑞帶水勇分道進攻自乘礮船赴南岸督戰賊首見大軍攻之急分三股出拒馬賊勢尤悍我軍奮力阻截賊來愈衆穆騰阿樂善分馬步爲三路中路佯退而兩翼不前賊果追中路行二三里賊將止士

卒再卻走賊再追我兩翼出賊後亦漸前營總墨爾
賡阿法克吉布楚勒岡阿等分帶馬隊自東南欽襲
槍斃騎賊三四十全股敗逸自相蹂踐我軍馬隊縱
橫馳驟步隊鼓譟而前三路賊眾死傷載道會黃元
吉吳秀所帶壽州兵勇亦至由東夾擊賊愈披靡逆
首亡命窮奔遺棄礮械旗幟衣物填委於路追至劉
帝城北賊人馬淹沒於正陽關南湖中者約五百餘
餘匪搶船逃至關前復經慶瑞鈔越邀擊悉數殲斃
其自陸路逃赴正陽之賊行至二道橋口亦經礮船

兵勇堵遏斬擒殆盡正陽關賊將傾巢接應我軍截
諸關口破傷數十人是役也吉林馬隊最奮勇升用
協領富隆阿首先追賊中破殞議卹如制營總墨爾
賡阿請賞勇號把總黃鳴鐸加都司銜賞藍翎張得
魁以千總補用捻首韓狼子等屢敗勢益孤而霍邱
捻首張樂行龔得薛小等至是將率衆赴關應援勝
保謂龔得與之合則賊勢復張宜乘其離霍邱未到
正陽出不意邀擊之則事半功倍適老捻張金桂願
投誠效命乃令潛赴霍邱解散脅從遣勇日陳萬金

等赴汪家集會同已革霍邱汛把總朱天祥號召民團選精壯千數百人齊集划船礮船百數十隻繞赴城西湖間道疾進初十日行抵湖南岸值大股賊水陸麇至陳萬金中道橫截之前起賊船以風利下趨不能轉鬪遂旁竄後起賊船開礮抗拒我軍蔽以檣牌三面兜圍槍礮齊施逆衆應聲落水我軍躍登賊舟刃殺多賊焚其槳櫓餘船折竄霍邱岸賊逃散陳萬金朱天祥率全隊追至霍邱西門賊自縱火焚舟聞入城適投誠之張金桂出城接應大呼曰賊敗賊

敗賊惶急不知所爲陳萬金督隊疾馳城不及閉我軍擁而入賊巷戰死者數百遁東南追斬不可數計遂克復霍邱縣城其前起賊舟乘風下駛新河口敖天印帶礮船迎擊自朝至晡相持不下適張得魁馳往策應勇目梁玉亦以步隊至敖天印在重圍中見援兵踵至奮勇夾擊斃賊三百餘奪舟三十餘奪獲礮械無算奏入陳萬金擢守備朱天祥復職餘彙獎其上年進解毫圍及剿洗白龍王廟賊巢出力諸員至是上其功自徐宗幹伊里綱阿等以次進階其先

後在方家集陣亡之驍騎校武勒西蘇前鋒校圖們
吉爾噶勒山東東昌營額外委孫金科暨三河尖
遇害之阜陽舉人朱鳳鳴弟朱鳳岡子朱祛患等及
轉戰長淮從征文武以積勞病故之副將保衡鹽提
舉何謹端同知葉慶暄知縣徐中衡直隸州州判劉
玉芳從九品侯椿等均分別陳請議卹如制當皖匪
之竄三河尖也大兵追賊南下汝光土匪竊發倚角
子山爲巢蔓延禹密一帶官軍力單事權不一於是
英桂自請前往督辦暫以三省剿匪事宜屬之勝保

令袁甲三赴潁州爲後路聲援蓋自是正陽關勦務
悉由勝保專章入告矣勝保分兵克復霍邱後逆首
龔得受劊竄六安張樂行韓狼子跽伏正陽關勢日
蹙而迎河集股匪與六安粵匪竊據劉帝城故壘爲
關內援應勝保密派樂善率水師自下游攻之殲斬
殆盡二十四日東北風暴作大雨如注六安山中蛟
起淮沙兩河驟漲營牆外樹椿築壩以禦水溢塞沫
河口增築兩岸營壘阻賊乘漲潰圍下駛賊勢愈窮
食將盡刳驢馬雜野菜食之其投誠之張金桂潛於

關內宣言投首免誅於是逃者日衆蒙亳老捻接踵
至慶瑞黃開榜黃鳴鐸等各帶礮划分路攻擊奪賊
舟糧械不可勝計生擒捻首張尿子張存性魏成劉
茂皆張樂行魏蘭劉文敬等弟姪悉寘諸法是時關
城三面堵禦嚴密惟南至六安一路接濟未絕於是
派黃開榜黃鳴鐸等赴米家臺一帶潛師截剿八月
初一日賊舟數十自迎河集乘夜上駛官軍殺賊奪
舟獲糧二千餘石守備郭光祺率壽州團練剿賊於
王家廟雙門鋪署壽州任春和帶領兵勇民團截賊

於陳家店酒流橋均有斬獲外援絕糧道不通勝保
令邱聯恩樂善帶水陸各隊撲東面濠牆擁入東關
賊槍礮雨發街衢木石填塞樂善至街口槍斃賊目
二以脖項傷不能進勝保憤甚益督將士力攻忽謀
報李兆受率眾五六千由六安至枸杞園劉帝城聲
言與正陽賊會合竄懷遠鳳陽諸處勝保急遣湖北
勇目劉尚義千總何天保張玉榮常振清等帶勇隨
邱聯恩追剿令馬隊渡河鈔擊劉尚義裹創戰甚力
賊敗退次日乃大至張玉榮堅壁守賊三犯不得入

適水軍自沫河口馳至開礮轟擊賊始大潰其時關
內賊已乘間由北關橋突出一二千爲我兵礮船分
鈔擊敗擒斬過半援賊竄屯劉帝城枸杞園勝保乃
至沫河口指揮設伏有老捨牛元章者最悉賊營情
勢勝保釋不誅用爲嚮導集諸將弁授以機宜二十
五日子刻各營分道進直薄東北關守賊開礮死拒
我東路伏兵襲取東關擲噴筒火箭賊倉猝不能救
我北面諸軍旋亦會合轉鬪環攻無不一當百鏖戰
兩時積屍成阜賊躁而奔我軍追至南關河岸尚鱗

二百餘舟賊皇遽登舟向六安淝河竄叅將格洪額帶礮船轟擊衆帆齊落我軍三面合圍賊之不及投河者揆斬無遺十餘里河水盡赤老捻魏藍耿萬金張茂馬鳳林傅老虎陸耀宗俱斃焉生擒楊大鵬高兆安等二百餘人賊之死黨俘斬殆盡捷聞 賞勝保頭品頂戴其首先入壘之副將慶瑞加總兵銜叅將格洪額以副將用都司黃開榜以游擊用黃鳴鐸加游擊銜換花翎其餘晉秩有差陣亡之都司馬翰忠縣丞李光裕議卹如制先是英桂以禹密告警

將北行 上既命袁甲三移駐潁州屬勝保患病
乞假卽令袁甲三暫統諸軍袁甲三以攻韓圩方急
未能卽至八月初九日英桂去潁州時值鳳臺生員
苗沛霖假團練爲名糾衆萬餘聲言於展溝謝家橋
築圍意叵測勝保慮後路單兵力不能兼顧因設法
羈縻請飭袁甲三剋日南來相機控制英桂亦以爲
請八月二十七日袁甲三抵正陽關城先二日克復
勝保亦陳請 陸見迎摺北上 朝廷責令折
回九月十七日勝保旋正陽關與袁甲三會商兵事

時安徽布政使李孟羣復請調邱聯恩赴六安助剿勝保以宛郡寇猶熾邱聯恩習宛南情勢飭回豫助剿另派叅將賚沙布都司玉輝帶勇千餘扼霍邱之河口集爲李孟羣聲援其韓圩餘黨劉老淵等擾及甯陵商虞各境歸德府知府孫鳴珂商邱縣知縣水安瀾等卻之會朱連泰史榮椿亦自亳州會合夾攻賊由五馬溝紛竄渦淝兩河餘黨聚散不時蒙亳一帶道路尚梗勝保移駐潁州居中策應奏言俟北路肅清再爲進剿六安之計得旨報可九月二十

七日李孟羣挫於獨山退軍麻埠於是六安賊竄至
洪家集顧家店李廟商固情形又急十月初七日勝
保由潁州進屯三河尖遣穆騰阿法克吉布等隨樂
善前往堵賊竄入淝南之路勝保尋回潁州督史榮
椿法克吉布平劉家樓賊圩令苗沛霖圍攻鄆圩賊
壘清北路龔張兩逆窺勝保移軍乘隙將復竄雒河
繞由洪家集河口集葉家集分趨固始十一月二十
八日勝保馳抵三河尖賊復回遁六安時粵逆大股
由潛霍北犯李孟羣失利黃開榜等力不能禦賊遂

犯固始六安捻逆亦陸續西竄勝保以軍情驟變請
添調馬隊助剿兼請英桂赴援英桂先剿辦宛南土
匪漸次殄滅已奉 旨復職諭令回駐正陽英桂
以殲除未盡疏請暫緩至是復從勝保所請 飭
駐陳汝並令德楞額格綳額領馬隊由新息馳赴勝
保軍營蓋是歲自正陽關克復後皖豫之交遂乏戰
事可紀逾年乃有固始解圍之役

豫軍紀略卷八

皖匪七

張樂行龔得自正陽關敗竄六安求援粵逆粵逆僞
國宗韋志俊方爲楚師挫於蘄黃遂糾合張樂行由
安慶走潛霍咸豐八年正月圍固始勝保駐軍三河
尖遏賊北竄催英桂赴援英桂令德楞額等勒兵待
疏請湖廣總督檄營總舒保移師來豫尋以皖境阜
陽教匪侵沈項英桂赴汝郡籌堵勦飭光州知州鄭
元善帶勇援固始李孟羣派參將張得勝亦以師至

賊由徐家嘴渡河踞固始城東之南岡分股四掠偷
挖地道三品卿銜王庭蘭署知縣張曜登陴嚴守破
地道三所城外大股麇集黃開榜張得勝等不能禦
徹屯東北勝保馳抵戴家店敗賊於馬家埠鄭元善
進抵大橋棚約會勦正月初四日夜城東奎星樓地
雷發城塌數丈黃旗賊擁而上張曜身蔽缺口揮衆
搶堵刀矛磚石雨下斃執旗賊目暨紅衣長髮數十
他守者亦擊斃多賊奪雲梯十餘具逾兩時賊始退
十四日勝保擊賊於西關斃賊七八百十八日賊復

以地雷轟塌東南城牆十餘丈張曜率弁勇短兵接
戰賊抵死不退勝保乘虛攻賊巢賊回顧守者乃得
築缺處城復完二十二日勝保募死士田玉梅等齎
火藥軍械入城二十五日擊賊獲勝賊匿土壘不出
二月初二日勝保誘賊離巢以大礮火箭連環轟擊
斃賊甚多適英桂所遣馬步隊亦至分路鈔擊殪賊
六七百賊以固境無所掠食分擾商固交界之郭陸
灘樟柏嶺商城戒嚴 上以固始被圍久責英桂
赴援並嚴防商城一路會勝保五戰皆捷李孟羣親

抵宋集龍澤厚亦至軍會戰斬殪千百計初九日城東南隅復爲地雷轟塌以堵之力賊不得入勝保逼賊而陣以大礮攻其北面二十日賊分掠光州之馬岡龍澤厚聞丕敏汪長清等與鄭元善分路扼殺斃賊六百餘生擒二十餘時湖北舒保軍已至商城復因故調回楚英桂疏請暫留豫境調遣二十三日勝保誓於衆曰固始被圍已兩月上煩 聖慮近給事中毛昶熙復以爲言今日不解圍必於諸將取之遂親率馬步合李孟羣龍澤厚諸軍大戰賊敗退焚

近郊賊壘直抵城濠王庭蘭張曜亦遣隊縋城夾擊
大軍乘勝剿殺斃賊無數踏燬南岡諸賊壘斬僞翰
天侯袁得厚及檢點等各僞官城圍立解逆首韋志
俊敗竄六安其分竄樟柏嶺之賊商城縣知縣戴鴻
經會同舒保擊走之勝保進攻六安約英桂駐軍潁
亳屬潁州捻匪尹老藏西竄太和練勇戰敗賊循白
馬驛迤西掠鹿邑知縣林大木率練勇堵剿賊日肆
焚掠覬擾淮甯三月初三日英桂馳抵項城初五日
移師陳郡趣後隊由新蔡項城疾進賊知有備未敢

深入遂於鹿邑之張胖店紅山店毛磚橋口築四圩
爲負隅計又亳捻蘇夢月劉太老淵等糾衆三千餘
由閭集竄入商邱之馬頭寺冀與鹿邑賊合委員馮
景帶勇迎擊商邱兵勇鄉團繼進賊大潰追奔三十
餘里斃賊三百餘英桂檄總兵朱連泰知府張學醇
知縣周廣德各以所部會蘇克金勦賊於鹿邑並檄
署羅山知縣廖慶謀以練勇助之賊知官兵大至十
一日竄回亳州朱連泰等督率兵勇並鄉團馬青雲
等會合追擊沿途斃賊數百踏平張胖店諸賊圩餘

[REDACTED]

王馬田崇等十餘時擒首劉添幅任乾韓狼子劉老淵劉大喜等糾衆數萬分掠徐宿蒙亳懷宿之交縱橫四五百里築圩負固蔓延永夏商鹿擒首趙浩然復掠永城爲之應 朝廷以徐宿告警屢諭英桂

派得力將弁赴援英桂尋以朱連泰援徐不果行時擒首劉狗劉尿等竄回亳境之刁山築三圩與藍旗逆首任乾張釐子等合出沒無定白旗擒首王大傾王三全等欲踞蒙城小王市集各股俱往來亳境之彪裏鋪花溝集雉河諸處相勾結徐宿敗賊已駭入

太和一竄元牆集一竄李興集聲言赴陳州之周家
口水寨英桂檄蘇克金馳往鹿邑堵剿令朱連泰確
探亳境賊會各營剿辦賊聞大軍至改竄東南潁州
知府才字和擊斃甚夥賊匪復竄柘店集歸德捻首
張懷中與先已投誠之傅繼周魏樹德謀約劉大老
淵分道舉事委員馮景廉知其狀擒傅繼周寘之法
會同商邱知縣施幹勦平濟陽集樂樓賊巢魏樹德
等戮焉初英桂患喀血至是病增劇疏兩陳得請四
月初三日旋省請飭署撫瑛檄駐省調度瑛檄亦自

請暫緩出省於是擒首劉狗陳萬幅由礪山竄及永
夏交界之望家堂十五日竄夏邑之韓道口八吉村
鄉團不能禦賊由太平莊掠桑垆集委員馮景擊退
旋回東南龍山石弓山諸處刈掠二麥入亳境丁垆
寺焚近城村莊二十六日夜半賊襲朱連泰營我軍
奮力卻之黎明復大至我軍以大礮斃賊賊始退二
十九日蘇克金督馬步兵勇至亳賊退屯十九里溝
五月初一日蘇克金朱連泰四鼓出隊循渦河兩岸
齊進將至十九里溝獲賊諜知賊在丁垆集蘇克金

馳往令叅領勝德富里布等直前衝殺二十餘里賊
勢披靡奔至渦河汉口其地三面皆水我軍步隊就
鈔之溺死過半渡北岸者四百餘朱連泰追斬殆盡
先是勝保克六安張樂行龔得等敗竄懷遠分陷臨
淮欲回竄雉河瑛檄請以德楞額朱連泰兩軍分駐
鹿毫得 旨報可五月陷楚黃安麻城之粵逆侵
光商邱聯恩廖慶謀等擊敗之竄六安事詳粵匪部
亳州擒匪尋竄永城至薛家湖副都統伊興額擊之
南走而劉狗餘黨由亳州寺兒集竄朱家店朱連泰

乘夜擄殺殆盡毫之東北擒首宋喜元周廣禮裝旗
出竄六月初十日委員馮景帶勇馳至黃營遇賊擊
斃擒首趙暖等三十餘十五日宋喜元循胡橋犯商
邱縣境十六日馮景擊之濟陽集追殺二十餘里斃
長髮擒賊七十餘十七日賊竄夏邑之何家橋清涼
山山西叅將巴克唐阿等追及斃馬賊三十餘十八
日賊踞嚴家樓拒我兵我軍奮勇進攻賊敗走東南
二十五日黑旗擒首李廷彥竄毫東之金家莊朱連
泰承惠屢卻之七月十二日擊賊於五馬溝追至新

集生擒擒首宋成並夥賊吳迎宋秉二十六日丁堦
寺有賊屯聚朱連泰會同蘇克金馳往揜擊賊渡河
敗走是時張樂行龔得仍踞懷遠廬州復陷於賊

朝廷授鑲黃旗蒙古都統勝保爲 欽差大臣

督辦安徽軍務 命袁甲三督辦三省勦匪事宜

袁甲三方駐軍宿州勝保赴清流關受李兆受之降
徵兵於豫豫皖之交擒首李廷彥宋喜沅孫懷新高
九等豕突狼奔蹂躪無虛日張樂行等圖回竄雉河
瑛榮所部存營馬隊不滿三百步卒僅三千且乏員

統帶於是奏調陝西延榆綏鎮總兵楊昌泗來豫並請釋崇安自戍所赴營差遣俱得 旨允行八月

初一日擒匪黑白兩旗竄永城之東興集叅將巴克唐阿知府常文遴等與永城知縣劉鴻昌合擊卻之賊竄宿州石弓山擒首孫葵心大掠蕭碭陷豐縣圍單邑分擾虞城之石老家署虞城知縣李瀛卻之十二日折回劉家集復連卻之十四日賊竄曹縣豫境蘭考睢商同時震動蘇克金自鹿毫馳勦扼賊北犯賊逼考城爲兵圍所逼十八日犯甯陵縣城攻北門

爲練勇擊退復急攻東南兩門適鄉團二千餘人馳至知縣龍德照與之內外夾擊斃賊千餘賊始循商邱勒馬集遁入皖其同日竄虞城賊萬餘李瀛扼諸王家集賊東竄商邱馬牧濟陽等集馮景擊諸曹家橋擒斬甚多二十日蘇克金要賊於營廓集獲勝是日朱連泰承惠亦與孫葵心劉狗李廷彥楊興泰等戰於孫老家賊敗走薄暮追至小奈集附近村莊突出馬步賊數千鈔我軍協領德隆阿奮勇衝突朱連泰承惠左右並進斃賊數十二十一日五鼓復勦賊

於盧家廟承惠德隆阿分南北出戰朱連泰策應後
路鬪逾時士氣益奮承惠長驅陷陣北路賊敗向南
趨承惠見南路賊方困德隆阿乃自北面大呼奮擊
內外夾攻殺傷過當德隆阿已被十餘創力竭戰歿
其永宿交界股匪築圩於陳小莊巴克唐阿常文遴
劉鴻昌往勦擒斬逆首崔狗徐老癩子及夥匪二十
餘平其圩九月初六日蘇克金承惠兵至十九里溝
遇賊騎三百擊之散十八日進勦丁垵集竄賊擊斃
百餘二十一日賊屯寺兒集朱連泰承惠等分道往

賊數百出拒敗輒退匿馬隊追入集賊死拒逾時殲
斃百餘我步隊繼至槍礮環集賊中槍輒仆餘賊東
竄追斬首數百生擒李萬倉陳錢等鞫稱賊大股在
沙土集官軍進距集數里有步賊六七百與潰竄馬
賊三四百伏集後突出鈔襲我軍擊斬過半二十三
日偵賊將乘夜劫營乃留步卒嚴戒備選精騎疾馳
迎勦至釣魚臺賊大至殪其前鋒賊錯愕回奔進擊
又大勝之賊退數十里復夜至盧廟小奈集窺伺西
路蘇克金朱連泰承惠等於五馬溝泥臺店丁垵寺

諸處擊勦日有斬擒而賊之來者日益衆蓋自勝保
由定遠規復盱泗楚師亦自舒桐進駐廬州東南逼
賊漸緊而潁壽門戶洞開懷鳳間寇燄愈熾於是賊
分三股鋌走而西一爲劉狗孫葵心李大喜等取道
蕭碭豐沛將掠曹單濟甯以達虞永一爲張樂行龔
得分竄正陽關壽州水陸並進欲循潁州直趨陳郡
之周家口其一則屯踞亳境牽制官軍淮沙兩河岸
賊股首尾聯絡勢成燎原十月初八日官軍勦賊於
邢家岡甘州營外委王傳福以首先衝賊歿於陣初

十十一等日李樓于莊諸處均有斬獲訶知賊大股
將至記名道趙書升等自鹿邑以馬步八百馳援亳
州十五日朱連泰承惠禦賊於石家營十六日賊乘
夜自沙土集繞盧廟營廓以偪宋郡蘇克金承惠帶
馬隊由宋集鈔出賊前冷慶史亭雲羅仲保巴揚阿
各帶步隊由營廓夾擊馬隊至鄧六莊賊以馬步二
萬餘與蘇克金相持步隊至合力奮擊衝賊爲兩一
敗向東南衆約千餘承惠冷慶等併力殲之一西奔
衆約萬餘蘇克金揮隊追殺至十字河是日斃賊千

數百訊知賊將西趨蘇克金夜自高口拔隊馳至柘
城之西塔寺超前截擊十九日與賊戰賊來愈衆退
屯高口二十日候補同知馮景會亭驛縣丞余宗沅
候選從九品施汝讓率練勇戰於田集後路爲賊所
鈔勇潰馮景余宗沅施汝讓死之二十四日犯郡城
歸德知府孫鳴珂商邱知縣施幹以大礮卻之折竄
柘城張家口委員祿旺戰歿二十五日竄太康知縣
延豫禦諸清香集二十七日竄周家口通判王可思
督勇堵剿以築圩未就賊大隊擁入殺王可思於署

焚其屍舉家殉焉賊犯周口北岸爬子街官軍與鄉
團逐之袁甲三聞陳警令傳振邦袁保恆以馬隊馳
援十一月初一日至鹿邑與趙書升議由青泥淺李
興集卷甲疾趨截賊歸路於是游擊巴揚阿羅仲保
以步隊與蘇克金承惠會師於李興集初三日賊衆
萬餘在李興集東南之磚橋渡河袁保恆號召鄉團
助聲勢令馬步隊進至橋口賊輜重前行以悍賊斷
後我軍一麾過橋三路衝壓賊抵死不少卻我馬步
各隊槍箭刀矛縱橫攢刺賊棄重狂奔傳振邦禁軍

士毋取財物督馬隊疾追適趙書升所派滿營馬隊亦至擒殺四十餘里自茨河至淝河屍橫於道邱聯恩亦以是日由槐店追賊至高王廟要擊獲勝各路擒斬賊千數百巡撫恆福以捷聞時英桂病痊入覲移撫山西以恆福代之奏入總兵傅振邦以提督遇缺題奏編修袁保恆 賞伊勒圖巴圖魯勇號恆福以莅任伊始疏請暫駐省城以歸陳防勦事宜責邱聯恩請裁山西大同鎮防兵一千五百名移置歸德鎮標奏卹馮景施汝讓余宗沅王可思榮連祿旺

申六典張載揚左明文馮扶清等俱如制劾趙書升
庫克吉泰富陞馬春華春海獎趙鵬飛文光政令一
新矣賊自李興集敗後捻首劉天祥糾衆數千由豐
沛竄山東城武曹單恆福檄張曜巴揚阿赴考城防
剿益以伊里細阿之師檄蘇克金承惠赴考城堵擊
賊知西路有備分股東竄一趨金鄉嘉祥一循黃河
故道薄虞城十一月十六日虞城知縣李瀛敗賊於
李興集其別股攻縣城回軍卻之賊回竄寓賢集謀
以十八日攻縣城蘇克金承惠廉得賊情是日丑刻

帶隊迎擊斬首二百餘賊奪路趨夏邑蘇克金派隊
截之于桃樞集賊且戰且走及大陽集復回拒守備
王永慶統練勇暨虞城鄉團適至三面攻之斃賊八
百餘敗賊由碭竄回皖是役也蘇克金功最前以李
興集之戰不親行被劾至是奏復其官時朱連泰勦
賊於十九里溝賊乘虛襲營朱連泰擊走之又於馬
老莊寺兒集五馬溝諸處擊賊屢勝十二月初五日
復勦賊於十九里溝亳州練勇會合力戰追斬無算
叅將巴揚阿駐永城擊賊小旺集賊將犯縣城叅將

巴克唐阿與知府常文遴知縣劉鴻昌督軍截剿方
朝霧蔽野賊不虞官軍至驚愕奔潰擒張光得等擒
首趙浩然不知前股敗復自李家口圍永城亦爲官
兵擊退賊游駛鹿邑商邱渡沙河北岸焚掠散旗土
匪狡焉思逞矣張樂行龔得仍踞懷遠糾孫葵心掠
江口集三河尖聲言犯光固恆福令邱聯恩派兵扼
槐店衛沈項檄知府張曜赴光州與鄭元善會剿請
增調吉林黑龍江馬隊三路大舉三路大舉者袁甲
三通籌全局請飭東豫合兵入皖搗賊圩 朝廷

論恆福集精兵令邱聯恩將之以前論崇恩亦如之
均會於永亳豫軍由亳而東東軍由永而南傅振邦
由宿州而西南議未果行而賊已於來春分道四出
矣咸豐九年正月恆福既以軍事責成邱聯恩復親
赴鹿邑與商防剿機宜朱連泰亦自亳來會恆福閱
視諸營還始建堅壁清野議諭歸陳南汝光各屬築
堡禦賊分遣候補知府傅壽彤蒯賀蓀張曜何懷珍
候補直隸州駱光裕勸諭興修以候補道周煦徵董
其成時穎霍寇氛日熾捻首趙浩然掠永城陳家集

叅將巴克唐阿自趙家窰追擊至澮河殲溺甚衆毫
境余集丁垵之賊朱連泰屢次進勦殺傷略相當二
十一日邱聯恩馳至亳州令直隸州張鍾翰勇隊會
同吉林騎兵由渦河南岸進擊牽賊勢翌日邱聯恩
朱連泰親督馬步大兵由渦河北岸進距余集三里
許賊列陣迎距我軍先以馬隊衝圍步兵繼進槍礮
斃賊甚多追至泥臺店與援賊遇邱聯恩揮左右馬
步各隊南北夾擊殲悍賊二三百追及李家橋復斬
首百餘級張鍾翰渦南之兵亦敗賊於十九里溝賊

東逸邱聯恩追賊墜馬傷左脛暫回鹿邑其沙河北
岸賊渡河焚掠知府張曜叅將程金陞等禦諸黃岡
寺調朱家圩民團與官兵夾擊走之擒首孫葵心豎
旗於太和王市集賊二三萬聲言分股出陳郡至周
口會齊掠禹州邱聯恩令都司柏英率所部並鹿邑
分撥兵勇禦諸沈邱二月初十日賊由盧廟竄商邱
之烏橋集游擊奎英都司伊克唐阿擊賊毛垵堆賊
且戰且走十一日分三股一踞商甯交界之觀音堂
一西赴睢州一由溝香集犯甯陵縣城夜攻城急知

縣龍德照戰敗於東關身受重傷入城巷戰城陷龍
德照死之十二日歸德知府孫鳴珂候補知府傅壽
彤叅將金齡等帶兵馳至賊出城迎拒官兵連發劈
山大礮斃賊甚多棄城走追至華豐堡練總武舉史
演龍率練勇出擊無不一當百史演龍斫倒賊旗官
軍先後夾攻斬首三百餘級賊東南奔其掠睢州賊
十三日入余家屯知州王聯陞帶勇斃賊四十餘勇
目何鈞以深入歿於陣十四日孫葵心劉添幅大股
自會亭驛西竄十六日犯歸德焚東西關孫鳴珂等

登陴守禦發千斤大礮轟斃紅衣賊目賊少卻開城
出擊賊退屯水池鋪十七日圍睢州王聯陞與伊里
綳阿俱失利王聯陞調集南路鄉團翌日再戰賊圍
之數重夷傷略盡困不得出賊陷州城吏目王庭蘭
戰死於獄前州判史存禮被執死之其姪史博良史
博學團勇楊可智楊青嶺均及於難史存禮與王庭
蘭被害尤酷後俱議卹有加賊踞睢州分股掠杞縣
邱聯恩督師赴援遇賊於張公堡揮兵擊之斃二百
餘擒潘狗等十九日抵睢州城賊見之輒走邱聯恩

與蘇克金飛騎蹴踏王聯陞乘勢出重圍復州城邱
聯恩追至太康界上斃賊七八百擒王林等賊以是
日午刻竄至太康之楊廟知縣延豫堵截賊竄沙窩
呂潭通許扶溝西華臨潁諸邑均有賊馬游駛初恆
福以甯陵之陷劾邱聯恩進勦遲延奪其職於是邱
聯恩戴罪勦賊戰愈奮二十一日偵知賊攻西華次
日馳至戰於西夏亭賊紅黑兩旗來犯衆各萬人我
軍兩路迎擊決盪一時之久殺賊千餘西華城圍解
賊分股竄郟城之五溝營及舞陽之北舞渡邱聯恩

以五溝營之賊屬忝將穆特布而親督兵勇三千向舞陽窮追二十五日至北舞渡聯恩分馬步爲三哨以擊賊賊衆數倍我軍顧不肯前但縱騎賊四面圍已又鈔我後官軍戰良久殺賊過當士卒死傷如積聯恩瞋目一呼所向輒披靡稍稍拔出重圍又遇伏日薄暮風霾四合聯恩身被重創賊來益衆乃與山西叅將福瑞均遇害部將亡者二十餘員敗軍退至許州人心震動時恆福升直隸總督未去汴乃與巡撫瑛棨計以游擊承惠護南陽鎮篆領其軍以副管

雙全代蘇克金領馬隊合詞奏聞請復邱聯恩總兵
官照提督陣亡例從優議卹山西太原營叅將福瑞
並議卹如制聯恩故將家子束髮卽在行間戰必先
在豫勦匪有年羣賊憚之如虎馭兵嚴而有律士民
愛戴倚若長城一旦發憤戰歿論者惜之後瑛棨復
爲奏請祠祀酬衆望也先是徐州鎮總兵傅振邦督
辦三省軍務副都統伊興額副之偵知賊入豫疆令
伊興額自宿州赴援行次許州奉 命統帶河南
官兵督辦防勦二十四日抵商水賊自北舞渡回竄

伊興額擊之出境狀稱殺賊五千窮追三晝夜由沈
項直抵太和殲除步賊殆盡 朝廷旣錄其功尋

爲勝保劾其欺飾革去頭品頂戴改派黑龍江副都
統關保接辦防勦事三月初一日賊由西華回犯陳
郡知府安奎與候補道周煦徵叅將穆特布淮甯知
縣李澍督兵勇守禦大礮轟斃賊數百適襄城都司
柏英馳至合擊賊敗走追至戴集外委朱殿甲陣亡
賊循鹿邑回亳其北擾杞縣賊竄考城署河北鎮總
兵伊里紉阿等暨地方文武鄉團沿途扼擊賊不敢

戰由歸德東竄既回巢仍豎旗圖西犯三月十四日
馬步賊數百游駛亳城外朱連泰卻之四月初六日
竄商邱之營廓集石榴壩站歸德府文武會同在防
將士馳往蔡道口夜襲韓信店賊營賊衆驚潰東南
逸擒首李廷彥築圩孫老莊逼商鹿承惠與朱連泰
計乘其未就而攻之初九日合兵疾進賊大驚潰接
殺老擒七八十初十日賊分五色旗由永城掠夏邑
之胡橋劉隄圈諸處另股由雒河北竄碭山之黃家
口承惠雙全兵至賊已分途遁時當麥熟匪衆四出

打糧擒首劉狗盤踞大寺集欲乘夜渡石家營圖攻
兩河口民寨五月初四日承惠夜薄石家營賊已破
兩河口民寨據河爲險深溝高壘承惠併力圍攻守
備宋慶首先梟水渡河兵勇從之守備苗玉榮躍登
寨牆承惠伊興額驅將士從之畢登殺斃守牆悍賊
其越牆逃者復爲騎卒擒斬寨圩平燬餘匪竄楊橋
爲都司楊春林擊斃擒首劉狗負傷遁歸捷聞擢叅
將承惠爲副將守備宋慶爲游擊守備苗玉榮加勇
號其餘員弁升賞有差時伊興額已稱病去關保抵

鹿邑六月初二日朱連泰承惠擊賊於王老家丁堦寺追至渦河南岸山東濟東道黃良楷擊賊於永城徐家樓初十日賊在亳州湯王墓諸處沿河焚掠是夜朱連泰乘賊上岸奪其船悉以所獲犒軍士二十二日賊窺東省運糧將至黑旗捻衆由永城東南向北竄冀阻劫黃良楷擊諸旱道口官兵前後鈔圍賊驚竄追至洪家岡永城營守備宋大有伏兵截殺餘衆南奔會謀言捻匪糾粵逆陷定遠皖撫移駐壽州廬郡定遠間粵捻諸逆合勢東路梗塞張樂行冀得

密遣其黨千餘薙髮冒作鄉勇販散布潁州諸處
爲內應南路擒首孫葵心尹滔各股裝旗欲西竄瑛
棨以粵捻交乘兵單賊衆與東撫崇安河督黃贊湯
合詞奏言逆捻屢經摧敗死灰復然咸豐六年間英
桂袁甲三自歸德轉戰至亳州迤東破雉河老巢張
龔兩逆僅以數百人逃復糾東南大股捲土重來七
年英桂勝保擊賊至潁郡迤南連復霍邱正陽關賊
以數千人困踞六安未幾粵逆圍攻固始官軍往援
賊乘虛回竄又肆鴟張近日捻粵合而爲一賊勢十

倍曩日師老財匱年復一年若不預籌蕩平之策其
患何堪設想科爾沁親王僧格林沁勦除粵逆久著
聲威現在天津海防馬隊萬餘悉稱勁旅一俟天津
徹防移師南下則功成可操左券 上謂津防未

可議徹傅振邦關保所部足資攻擊不得希冀增兵
致稽時日七月十一日夜賊頭隊千餘人突至亳州
南關樹雲梯攻城朱連泰先已會同知州博銘布置
城守勇目羅鳳岐擊退爬城賊奪其攻具天明朱連
泰整隊出城令守備苗玉榮都司胡永忠前後壓擊

賊敗退自在圍我軍追至河賊亡命鳧水適北岸賊
爲承惠戰敗追至河邊遂與朱連泰南北夾擊斃匪
無算十四日夜賊復糾衆來犯承惠揮兵迎截賊由
淺水渡河竄承惠鈔出賊前王鳳祥自洪河口馳至
會戰遂大敗之二十二日關保進屯亳州規畫進剿
偵知渦北有宋劉張三姓賊圩而宋家圩爲巨捻宋
喜元宋宗元巢穴實爲諸圩首附近之泥臺店于集
宋集五馬溝居民遷徙各莊皆爲賊踞二十六日派
王鳳祥承惠先攻宋圩分遣馬隊扼守渦河牽制泥

臺店各莊踞匪二十七日我軍火宋圩斃匪百餘餘
衆棄圩竄其劉張二圩賊聞風散泥臺店各莊亦焚
燬二十八日賊至田家溝渦河南岸亦有馬賊西駛
關保合王鳳祥承惠與朱連泰合擊田家溝之賊令
游擊伊興阿叅將桂春截渦河南岸之賊擒斬相埒
黃良楷駐永城賊掠李家林諸處良楷會同文武兵
團擊賊於鄆陽柘樹雙橋諸集平毀胡家屯賊巢八
月初四日劉狗因關保駐軍亳州自趙家屯聚藍黑
旗賊四五千問道北趨分擾鹿邑及永城邊境百善

站諸處又與孫葵心捻股由宿西永東分途北犯關保乃留朱連泰守亳州而自回鹿邑檄承惠帶領烏勒喜春等馬隊赴永會勦承惠等至永城賊已散而丁香鋪之賊劉小方裝旗欲西竄距亳州二十餘里關保乃令承惠由永城西南馬頭寺界溝赴丁香鋪迎勦以營總常陞爲之策應十三日敗諸界溝又追至丁香鋪二里許覆其衆賊踰橋逸承惠與常陞合追而丁香鋪伏賊出應敗賊與俱東我軍因清水縱橫徑路叢雜未敢深入八月二十一九月初二等日

黃良楷屢敗賊於甘茶廟閭家橋車家集諸處其自
商邱迤南至亳州捻蹤出沒關保號召鄉團由棗子
集隨剿隨進王鳳祥擊散馬老家之賊旋會朱連泰
夾攻丁堦寺關保繼至揮兵拏殺斃賊三四百以渦
南匪蹤略盡關保請加總兵朱連泰頭品頂戴總兵
王鳳祥勇號委叅領伊興阿以協領升用疏入報可
是時皖北藍黑白各旗逆捻在保安山裝旗由礪山
太平集分掠虞夏初八日虞城知縣李瀛千總徐汝
紳擊退護城隄外賊夏邑之賊由駱集韓道口至西

北之牛王垵諸處焚掠初九日逼縣城知縣陳上達
縋勇士會關外民團繞賊後衝殺城上然大礮擡槍
賊潰向東南初十日黃良楷博崇武等敗賊於李家
窪十五日承惠等又敗諸盧家廟追至小奈集賊雖
屢敗猶不下二三萬十七日夜在商邱之黃塚營廓
等集四出焚掠分股由韓信店犯商邱由邱集繞越
柘城西竄關保令承惠赴歸德與慶文會剿十九日
至杜集毀賊營數處追至營廓遇賊大股承惠立馬
指揮三路拚殺斃賊甚衆我軍亦有傷亡承惠請濟

師關保令王鳳祥以步隊二千援之二十二日賊至柘城勒馬集直犯睢境二十四日承惠兵至甯陵知賊偃州城連夜援睢州二十五日至東關賊於城外列十三隊馬賊四千步賊萬餘承惠首先衝擊追賊里餘近村伏賊齊起又有馬賊鈔我後衆寡不敵遂大敗二十七八兩日賊犯杞縣知縣王蓮塘與陝西叅將岳汝忠禦之賊退屯榆廂鋪龍臺岡分掠蘭儀煙堦集蘭儀故無城知縣高長齡扼河口外委范奉標訓導李鍾山戰歿省垣戒嚴瑛棨令前河北鎮崇

安出省勦賊又慮賊長驅而東請募勇徵兵並暫留
黑龍江西丹馬隊之赴楚者二十九日崇安躡賊賊
由曲興集退竄南路及考城縣境三十日載所掠輜
重行至白茅集舊縣集練總蔡文茂約曹縣團練截
回輜重牲畜甚夥餘賊東奔十月初五日傅振邦派
副將博崇武叅將高玉振等至宋郡會慶文敗賊於
王橋追至業廟河其南竄賊圍攻尉氏通許縣城折
入洧川長葛禹州諸境十月初二日掠許州玉皇廟
各屬城守嚴賊遂由襄城竄北舞渡其時踵而至者

爲姜太林侯四維李大喜等衆二三萬由太和沈邱
湖沙河而上及淮甯欲於周口偷渡署周口通判嚴
圻商水知縣汪斌才集團截殺河水漲賊無船不能
渡由賈魯河西堵河東向西北逸先是關保自鹿邑
追賊屢阻雨不得進及行抵陳留奏劾歸德鎮總兵
慶文進勦遷延褫職留任 上謂關保尾追落後
任賊飽掠屢下 詔督責十月初八日關保抵許
州繁城鎮偵知姜太林沿郟城洪河西竄令王鳳祥
承惠等堵勦初十日戰於洪河北岸十一日各擒擁

至臨潁北關關保與崇安親督戰適瑛榮所遣知府李徵松亦至我軍分路圍鈔陣擒孫葵心姪孫套斬以徇時賊後隊屯徐莊鋪承惠拚其不整殺斃無數關保夜選健馬四百騎士銜枚疾走大軍策應近土橋集賊營鼓譟直前賊倉皇潰自相蹂踐死者甚衆詰旦賊來援我軍三路擊之追至軒莊斬賊七八百賊分竄鄆陵扶溝太康各鄉鎮關保疾驅杜其北犯十五日戰王隆集太康知縣祝塏助勦賊遇伏敗狂奔回皖孫葵心一股已悉出境其姜太林侯四維等

股阻隔沙河欲乘虛竄鹿邑關保念糧饟重地立回
軍二十二日次洪山廟與賊遇王鳳祥等斃賊甚衆
追至韓家凹二十三日賊二萬餘衝我軍鏖戰至日
中賊出輕騎三四千左右鈔我委叅將春亮守備傅
致盈陷陣死我軍血戰良久賊始退方鏖戰際賊分
股窺城知縣孫嘉臻力禦之博崇武高玉振等亦自
陳郡躡追二十四日敗諸棗子集賊兩路回巢歸德
鎮總兵慶文以功復職關保瑛稟請將殺賊立功及
團練出力員弁擇尤給獎並查明先後死事諸人若

在杞縣陣亡之嵩縣營守備呂長春已革考城營守
備梁樹業陝西留壩營千總張全得在甯陵陣亡之
署陝西甯羌營把總雲騎尉馮永吉在襄城縣大營
莊陣亡之儘先把總源潭汎外委張殿英汝甯營外
委王昇在山東金鄉縣遇害之前延津縣典史蕭葆
仁在舞陽縣北舞渡陣亡之撫標右營守備本祥左
營把總劉其東河北鎮標左營千總張景周開封營
把總周承清衛輝營把總朱玉魁南陽鎮標右營外
委丁建成署陝西固原提標鹽茶營都司史倫錦署

固原提標左營守備白思舉署中營千總馬得喜署
利橋營千總尹榮署隆德營把總張克勤署永安堡
營經制外委楊登雲署紅德營外委徐俊智署甘肅
甯夏鎮標洪廣營游擊王萬年甯夏鎮標平羅營千
總高永富甯夏鎮標後營把總徐枝前營經制外委
馬成得興武營經制外委王悅甘肅提標左營經制
外委王兆熊直隸河屯協千總劉漢章在亳州界溝
陣亡之山西湯方口汛把總王躍龍河南撫標把總
黃殿甲河北鎮右營把總程志旺南陽鎮外委王之

黃旗

漢甘肅

陣亡之

黃旗佐

布黑龍

旗驍騎

京正黃

賽綳阿

阿鑲白

校富勤

西鐵爐川營守備王喜魁南陽鎮標外委任萬章山
東沂州營經制外委王守信河北鎮衛輝營外委張
合在臨潁縣陣亡之山東撫標右營經制外委潘清
在太康縣王隆集陣亡之山東兗州鎮右營經制外
委王文標在鹿邑縣韓家窪陣亡之察哈爾鑲紅旗
叅領阿玉爾札那盛京正黃旗防禦王自楊吉林鑲
藍旗驍騎校魁順河南撫標守備馬鳳超署陝西陝
安鎮標中營把總成鵬程山西大同鎮左營外委趙
維垣南陽鎮標千總南召汛把總劉愔等俱疏請議

卹如制是歲粵逆屢犯六安窺光固前光州牧鄭元善已簡授陝西漢中府升湖南長寶道恆福瑛瑩以其素得民奏請暫留光州與張曜辦團練及是楚師攻皖北粵逆陳玉成悉銳赴援光固緊要鄭元善張曜乞師援勦瑛瑩關保奏調馬隊不得請

諭李

續宜繞由光固進兵截其竄豫之路由是楚師克復懷遠規取臨淮捻匪東竄無路仍合股由宿永而西十一日捻首李加英劉添祥分竄蕭碭銅山並攻陷濉溪口大營十二月初三日犯夏邑知縣陳上達禦

之分股掠虞城知縣李瀛扼之初五日回攻夏邑陳
上達疊戰卻之賊遁胡橋夏邑圍遂解先是瑛檄以
歸陳接壤蒙臺爲捻匪西竄所必經築堡團練須擇
在籍大員主持首以袁甲三爲請旣袁甲三署漕督
乃以前順天府尹宗元醇代其事至是秋捻匪屢犯
豫疆蹂躪日甚乃謂關保臨陣勇敢而臨機決策實
非所長於是創畫地分防聯兵合剿之議請分皖豫
徐宿爲三路選威望大員畀以將帥之任於勝保袁
甲三傅振邦三人中派一人來豫而以關保爲之副

是以逾歲有

特簡勝保來豫督辦之舉而宗元

醇病歿旋

授宗人府丞毛昶熙爲團練大臣云

皖匪八

咸豐十年正月

上以勝保日久無功奪

欽

差大臣仍令來豫督師以副都統關保爲之副毫東
捻首王懷義劉天福孫葵心等分道圖竄虞夏一由
單縣迤北渡河一直趨豫西初八九日賊騎逼虞城
知縣李瀛禦之礮斃馬步賊二百餘城圍解賊掠夏
邑之仁風李亢等集知縣陳上達選壯丁千二百持
所獲賊旗雜賊中上達開礮擊之賊陣亂我軍內外
衝擊斃賊四百餘十二日騎賊夜火鹿邑南關關保

擊退之追至薛家廟十七日騎賊由馬鋪竄柘城李家寨練首韓文炳郭大乾禦諸張龐莊大乾馳入賊隊殺悍賊三十餘適關保所派總兵承惠副將王鳳祥追至賊狂奔乘虛將犯省垣時巡撫瑛棨因事左遷慶廉受代甫抵任聞報布置城守三月十七日勝保由皖赴汴至距城二十五里之白酒店遇賊騎磨副參領成祿將百騎卻之其已至八里窪者參將黃得魁守備李殿甲合兵逐之進至陳留會承惠大隊縱橫夾擊賊奔蘭儀由考城折而西旁趨禹密聲言

將犯河洛掠關中三十日黃得魁追賊於禹境之白沙敗諸菱角寨賊走小郭日暮風起咫尺不見人方具食千總任治國拚入殺斃千餘乘勝追至許州北關再戰黃得魁身受矛傷裹創戰益力遂大勝之賊乃折而東閏三月初六日承惠等遮賊於柘城東北乘大霧鈔擊斃賊四五百分股攻縣城承惠緊躡敗之復西北聚於順河集初七日承惠整隊向賊賊列馬步七仗抗我師承惠令步隊分三哨馬隊張兩翼以應之短兵相接自朝至晡殲斃悍逆千數百賊來

愈盛不下數萬衝我軍中路馬賊從兩旁鈔襲承惠
與都司伊齋斯歡俱被重傷兵勇亦死傷相繼適柘
城縣知縣周廣德帶隊接應練總韓士明由賊之西
北來助戰賊恐斷歸路遂由胡襄城毛堦堆回竄城
壕店諸處我援師游擊王岷崢都司李永祿要擊敗
之十四日賊後隊由太康朱口集回竄關保令川北
鎮總兵王鳳祥率兵禦於馬埠我軍列爲三隊中書
張志誠游擊李忠華都司王仕林以東楚勇先出戰
旣勝各隊繼之衝壓十餘里援賊大至五色旗蔽地

來我軍奮益前賊來益衆四面圍我軍王鳳祥與荆子關副將王慶長都司王仕林俱戰死賊長驅而東狀聞王鳳祥等均優卹如制四月勝保至宋郡派兵分屯高辛集宋集包公廟十字河各要隘調歸德各屬團丁協助官軍築營守禦復會關保於鹿邑遣諸軍攻克李河溜暨黃莊賊圩五月勝保奉 旨以三品京堂回京命慶廉督辦河南防剿六月初九日慶廉自汴赴宋時龍山起蛟平地水深丈餘賊巢均淹沒苗沛霖又連破賊圩賊勢益蹙窺永城空虛屢

至近郊掠食十二日游擊王居廣遇賊於鄆陽集獲
勝追至礪山是日駐守宋集之都司王天保規取盧
廟集賊寨擊退擒首劉狗等密遣商邱民團入盧廟
集爲內應馳師夜襲取之十三日叅將明慧都司陳
廣譽守備宋大有等悉抵永城馬頭寺劉狗聞大兵
踵至奔東北至甘雨集爲練總苗文彬扼截轉戰及
劉家河越潘路口追躡三十里賊竄蕭縣之李家石
林李大屯諸處是時盧廟迤東之劉營三里灣黃灣
復有擒首宋喜元李懷珍等伐樹爲營圖西向十七

日守備莊義升外委莊義慶擊營廓集練總李福祿
高玉等往勦至賈樓賊分隊來拒兵練爭先逆戰追
擊至李河溜迤東二十三日王居廣同王天保王允
升三路薄賊巢王天保由東路王居廣由西路立將
劉營三里灣樹營焚燬黃灣賊營見兩處火起王允
升兵亦至遂奔竄官兵仍回屯宋集盧廟慶廉以諸
軍雖屢勝究未能掃穴擒渠於是統籌全局備言豫
省馬步兵勇合計不過萬數千人均非訓練之師歸
陳練丁守望則有餘迎敵則不足臣與關保兩營吉

林黑龍江官兵能進仗者不過三百餘名不足以資
衝擊而龔得孫葵心王懷義姜太林劉狗各擒不下
數十萬宿亳蒙懷廬壽沿豫邊境所在皆賊我軍分
路扼防此勦彼竄請飭袁甲三傅振邦移兵規取賊
巢並以苗沛霖自破程暴民賊圩聲勢甚壯請飭移
屯蕭永邊境與駐守商永各軍互援應扼西北以勦
東南庶可制賊死命奏入 上從其請慶廉又以
大舉進勦必先清肘腋廬廟東之黃園有捻首李大
廷李庫屯聚阻我師行七月初六日慶廉親至高辛

集令王居廣等規復黃園師進騎賊突出我軍馬隊
直前斃賊數十追至濠邊濠水寬深賊據以爲守王
天保見圩西賊少率勇練鳧渡越濠手斬悍逆數人
而人都司王允中從九品王汝舟繼之斬首三百餘
級賊潰而東平其壘慶廉以捷聞請賞王天保花翎
王允中游擊先用餘優敘得 旨允行是時蒙亳
大水田廬浸沒盜糧乏絕捻首雷彥劉狗等窺豫境
秋稼將登傾巢出掠七月初五日分撲薛廟大營關
保令營總依興阿叅將馬春華游擊羅仲保往援甫

行十餘里賊已擁至三路包鈔我軍馬隊以衆寡不敵退步隊力戰有頃賊來愈衆繞犯鹿邑東關我軍回顧城防營總依興阿馬蹶死焉游擊羅仲保在五里廟接戰身被四十餘創與千總羅青雲候選從九品哈明璧俱戰歿兵弁死傷相繼賊亦創甚且慮援軍至退據萬集劉集趙村民寨初八日承惠督馬步隊進勦賊率衆迎拒而潛自他道襲我軍承惠稔賊詭計令步隊分路迎擊勢漸卻適趙連標馬春華等來策應賊乃潰追至魏橋是日有另股賊自李河溜

犯宋集營爲何天保所卻宋喜元犯棗子集亦爲練
總王益德所敗狀聞依興阿照副都統羅仲保照副
將羅青雲哈明璧各照官階均予優卹其後股援賊
續至圍攻邱集民圩並製雲梯圖鹿邑游騎及柘太
於是承惠等分兵三路令叅將馬春華記名道趙連
標帶兵勇千餘由趙村迤南進作疑兵知府張曜王
榮烈帶馬隊游擊苗玉榮千總馬天祥帶步隊爲前
敵承惠同候補知州陳學仁帶各起勇隊爲接應關
保督後路由北面進攻初十日黎明師傅萬集寨賊

出馬步數千迎拒張曜督隊衝擊賊登寨牆守承惠
王榮烈陳學仁親督各軍冒矢石奮呼躍而登賊奪
路狂奔官兵縱橫拚殺屍橫遍野時馬春華趙連標
方進攻趙村賊猝不及防亦奔逸其屯踞劉集並圍
攻邱集之賊聞萬集趙村先後攻克紛然潰竄渦
河兩岸越日犯柘城邊境及太康之柳河踞張莊圍
攻安平民寨承惠張曜王榮烈等會叅將百順等軍
鼓行而前賊在渦河北岸焚掠阻橋口拒我軍張曜
策馬指揮隔河施槍礮疾呼衝擊爭橋口斃賊數百

賊循河西奔我軍追至李元寨解其圍十三日五鼓張曜同蘇謙帶馬隊由李元寨迎勦分步隊於丁口橋爲三伏黎明王榮烈率劉鳴岐馮得勝由中路進承惠率百順苗玉榮陳學仁由左右進賊奔渦河南岸占橋口張曜王榮烈直前衝壓伏兵起賊腹背受敵東南潰官兵過河追近安平寨賊大股正圍攻見我兵乃轉鬪我軍屢勝勇氣方銳斃賊七八百餘衆負創遁寨圍解追殺十餘里所占張莊同時克復賊於是折而東斜後來捻股圍鹿邑縣城圖洩忿十四

日承惠追兵至與關保所派之叅將馬春華等合兵
堵擊王榮烈躍馬爭先各路兵勇譟而從之軍聲雷
動承惠揮兵左右盪決追殺二十餘里賊屍枕藉翌
日軍亭城論功加承惠提督銜趙連標鹽運使銜百
順苗玉榮副將銜王榮烈勇號記名簡放知府擢張
曜以道員用蘇謙以叅領先用附劾游擊王居廣前
在宋集堵剿不力革職留營令自效先是傳振邦攻
蒙西賊圩連破小澗西陽十餘處賊窮欲他竄會渦
淝盛漲賊廬被淹遂剝衆十餘萬掠食滄南龔民圩

屢犯官軍及承惠等追賊出境賊被創暫歸尋復傾巢四出二十四日劉狗雷彥宋喜元蘇立楞眼張朝皆楊興太等由界溝黃塚分路出游騎徧野火光亘數十里承惠令敖天印夜襲賊營賊竄田集順河集諸處二十五日承惠王榮烈田玉梅等自包公廟由渦河兩岸躡賊所向至田集以西擊敗賊騎張曜亦帶兵至且戰且進追至烏橋集斃賊數百賊東奔我軍暫止高辛集後起賊衆忽自東南來陸續渡河承惠領馬步衝擊賊勢稍卻突有另股悍捻鈔我軍馬

隊佐領奇克唐阿以衆寡不敵先退承惠步隊亦退
張曜見事急躍馬入賊陣大呼馳突賊衆披靡始敗
走西南賊之前股已由閭集李口趨宋郡河北鎮總
兵崇安知州陳學仁帶勇馳勦賊由馬牧集趨虞城
知縣溫逢春襲之於胡家橋賊分撲狼橋口宋集大
營爲游擊陳祿興烏圖理擊退其大股由柘太界將
西竄於是慶廉分軍爲三令張曜田玉梅帶領馬天
祥等步勇益以蘇謙馬隊爲頭起王榮烈帶領南陽
羅山及李祿興等勇隊爲一起承惠率領六十七款

天印等兵勇爲三起均於二十六七日繞出賊前
截擊二十八日賊循胡襄城大仵集犯柘城知縣謝
國輔帶團禦之越日圍太康老塚寨知縣任愷出援
適官兵至承惠張曜田玉梅等揮令各隊直前任愷
指揮鄉團從後鈔擊賊大潰敗寨圍立解八月初一
日賊由鄧城窺陳郡見守禦固遂薄周口初三日我
軍出其前扼之賊氣沮由李家堡走商水上蔡犯汝
陽知縣廖慶謀與承惠張曜擊賊於廟灣賊敗走辛
店馬鄉初四日攻汝陽之官莊毀寨牆將闌入練丁

并力死拒承惠等援至圍立解其分竄上蔡射橋賀
店之賊折回蔡溝爲上蔡知縣金寶符斬殪無算賊
奔汝陽之北水屯是時賊衆不下三四萬而承惠諸
軍僅入千慶廉檄游擊孫之友赴援又爲亳東捻首
雷彥李庫所殺不果行而承惠之軍益孤且奔命已
逾月矣先是高辛集之戰慶廉以官兵堵勦不力劾
佐領奇克唐阿等奪承惠提督銜以示貶承惠已愧
憤誓滅賊以雪恥至是慶廉復嚴檄承惠等鈔賊前
賊燄甚熾承惠乃與蘇謙張躍王榮烈田玉梅馬春

華王居廣百順苗玉榮等馬步各隊三路迎勦初六日抵汝陽城南三十五里之野豬岡賊屢爲官軍所扼亦恚甚思血戰是日逆衆蔽地來望無際我軍連壓不動賊噤聲死鬪自日中至暮我軍輒不利復有悍逆自大石橋襲我後路馬步包鈔截我軍爲二承惠困重圍身被數槍猶奮呼衝殺手刃執旗賊目數人軍潰力竭遂與王榮烈田玉梅王居廣百順苗玉榮死之委防禦和陞額叅領德色勒布委營總賽吉爾胡府經歷閻漢璞縣丞熊錫彤都司何天保守備

海進忠楊遇文領催喀勒春布委防禦伊蘭從九品
周其偉把總辛占元俱歿於陣承惠固將材王榮烈
田玉梅皆勇敢善戰爲賊所畏憚其死也也全軍爲之
奪氣田玉梅者湖南人機警有膽略嘗以布衣從江
南向榮軍習賊言語號令間入江甯城約內應請於
向榮潛師襲城謀泄內應者爲賊磔死玉梅乘賊亂
僞爲捕逐奸細者竟脫去嗚呼亦可謂智勇矣而以
是役死惜哉至是慶廉請還承惠提督銜照提督陣
亡例從優議卹其王榮烈田玉梅等均各以其官優

卹並請於汝甯及官莊建祠以祀祔祀死事各員俱
如制賊由正陽分竄羅息張曜與鄭元善分路扼剿
賊趨光州鄭元善張曜馬春華追至固始斬馘七八
百賊由霍邱張家集回巢 朝廷方命順天府丞

毛昶熙爲團練大臣頒給章程來豫先是慶廉與勝
保會辦團練抽調歸陳練丁助防要隘以輔兵力之
不逮並劾地方官舉行不力者及毛昶熙於七月抵
宋郡以抽丁不便於民奏徹民勇而用鄉團由是歸
陳抽丁之事遂寢是時海上事亟京師戒嚴 上

以八月初八日舉行秋獮駐蹕熱河召慶廉勤王命
毛昶熙接辦勦匪事旋命慶廉進派副將黃得魁帶
勇赴京師歸勝保調遣慶廉奏以其子候選道恩麟
統師先發至正定取進止慶廉親督後軍赴彰德會
款局成京師解嚴捻匪方擾濟甯勢將蔓及豫疆諭
慶廉領援兵回豫自九月以來捻匪張樂行糾合粵
逆踞正陽關圍壽州攻鳳陽勢益熾亳捨大股竄清
淮未遂折而北掠山東郡縣鄆城鄉圍遮擊於歸家
莊丁官屯賊渡河而西掠豫邊慶廉遣記名道趙書

升統兵扼蘭考蘭儀監生栗麟書王璽考城游擊蔡若珍團總蔡文茂越境追殺賊由商邱丁道口回巢時毫捻股衆此出彼歸往來紛擾劉狗劉尿等聲言往西路打糧另有紅黑兩旗由毫境張五集雙埠口竄小廠劉寨十月初五日在鹿邑東南游弋關保方以病假居宋郡乃令趙連標馬春華會合毛昶熙所派勇練整隊迎擊賊以萬人掠汲水集與我軍相持復繞道而西初六日賊攻鹿邑東南民寨趙連標馬春華以大礮擊走之二十日焚掠營廓東南村舍守

備莊義升擊走之二十一日賊至安家溜往來游駛
旋糾河東股賊犯狼橋口大營守備李玉龍千總陳
文來兩路擊走之十一月初三日紅黑二旗捻首孫
從翟步漢丁海等竄永城程家樓焚掠知縣陳灝以
鄉團擊走之時亳宋一帶匪蹤出沒靡常其由他道
出者則有劉天祥趙浩然竄宿北魏希元趙克元由
臨渙北竄羅麻子等由劉奶奶廟竄西北孫葵心姜
玉太侯樹維田獻張敏行由板橋集竄入鳳陽屬境
蘇立楞眼劉大老淵劉二老淵李加英等由閻家橋

胡家莊竄確山之東山套其南路捻衆復逾金鄉犯濟甯奔城武掠鉅野之獨山江皖東豫之交烽煙滿日矣是時 欽差大臣科爾沁博多拉噶臺親王

僧格林沁統帶馬隊勦賊山東於曹單一帶殺賊數千鄰省民無不望之若歲所在捐備芻茭豆麥以待王師而巡撫慶廉方與布政使賈臻互相訐奏俱解任去湖北布政使嚴樹森於是拜巡撫河南之命云

豫軍紀略卷九

皖匪九

咸豐十一年春正月亳捻姜大林糾合董朝選王懷
義等眾三萬竄豫境苗沛霖令其黨築寨三河尖並
於往流集諸處抽釐誘附練總楊林川等十三寨勒
派糧石而孫葵心一股萬人自廬州六安回竄由固
始石佛店西竄光州是時豫省汝甯有陳大喜等土
匪歸德有金樓等處教匪又有山東長槍會匪及粵
逆四眼狗等縱橫蹂躪來去無常團練大臣毛昶熙

方駐歸德檄幫辦軍務臬司鄭元善赴陳州防勦巡撫嚴樹森則以臬司事繁請飭鄭元善回省另疏調江蘇候補知府張汝梅辦河陝團練請賞李雲麟五六品京職來豫帶勇上方以羣盜如毛勦辦棘手諭各路統兵大臣曰皖省捻匪滋事以來疊經官軍勦辦斬馘甚多而此勦彼竄蔓延東豫愈聚愈衆本應悉數殲除以彰撻伐惟念此中良莠不齊其被匪裹脅並非甘心從賊者正復不少若概行勦辦恐人數衆多久煩兵力且捻爲粵逆前導抗

拒官兵身罹鋒鏑而粵逆則坐享其利其愚亦屬可憫著袁甲三穆騰阿鄭魁士毛昶熙嚴樹森於皖豫境內剗切曉諭解散脅從有能悔罪輸誠自拔來歸者概予免戮其中如有才具可用者並酌予錄用如李世忠屢立戰功亦可渥膺懋賞倘始終抗拒執迷不悟惟有嚴行勦洗亦不能任其猖獗云時捻氛正惡姜太林等大股由歸德疾趨朱仙鎮犯省城因戒備嚴乃奔尉氏之韓家集署知縣方美樅擊卻之賊由洧川犯中牟據七里岡嚴樹森檄總兵成景將本

部扼其西竄調駐防槐店之游擊西爾納赴援省城
咨商毛昶熙調候補道張曜來省助勦檄河南營參
將文志扼守老獃坡令張汝梅會同河南府知府樊
琨號召汜禹密新鞏偃登嵩等州縣團練協助官兵
守虎牢關各隘候補道朱燮元集登封練勇萬二千
守岳瑤口洛陽縣知縣任桂帶勇防興隆鎮西路各
州縣督本邑勇練擇要扼守賊偵知有備乃折向南
趨二月初一日攻長葛縣城知縣金緘三擊走之由
洧川竄許州初二日署知州葉世槐擊走之擒賊張

黑等賊奔西南臨潁縣知縣查以謙敗賊於大石橋
初三日由潁橋犯襄城爲兵練擊敗竄踞葉縣之新
店初四日攻城知縣秦茂林迭敗之擒賊黨馬拴葛
夢周等賊奔裕州署知州孟宣泗禦諸魏家岡賊焚
賒旗店掠源潭圍唐縣分擾瓦店初十日陷唐縣城
十二日回攻南陽府城晝夜不息城上連發大礮轟
斃二百餘賊向西南退十四日圍鄧州知州黃縉昌
率各鄉團練禦之賊分二股一竄光化之老河口一
竄襄陽之黑龍集嚴樹森命張曜援勦南陽接統成

景兵賊爲楚軍所扼回竄孟家樓朱林橋適成景令
營總蘇謙都司李忠奎守備范文英將馬步隊邀賊
鄧州二十四日敗諸刁河店賊由鎮平趨南陽二十
七日成景會同署知府傅壽彤督隊迎擊斃執旗賊
數十追至潦河店又斃賊數十三月初二三四等日
我軍連與賊戰把總江成奎武生楊甲三軍功金勝
文戰歿賊奔裕州攻城知州孟宣泗嚴守六晝夜絕
城出擊奪獲雲梯三十二具初十日成景等兵至內
外夾擊遂解城圍賊分兩股一由北舞渡東回皖境

一由襄鄆趨臨潁知縣查以謙會同成景卻之賊東奔鄆陵扶溝攻太康知縣任愷與成景保英等併力擊退賊向東疾竄三月二十五日乃遁歸老巢其孫葵心一股之竄光州者署知州張席珍督勇迎擊衆寡不敵退守州城正月二十三日賊攻州城張席珍等登陴嚴守乘夜霧縋城出擊殲賊百餘乘勝追殺復斃賊數百擒賊四十七賊沿淮河分竄一由息縣埠子口奔東北一由光山寨河口奔西北光山縣知縣阮鼎出勦賊賊兩股鈔我後千總朱玉生把總張

佐勳均戰歿賊西竄羅山之竹桿河羅山知縣金朝棟禦諸河口二十七日督勇追擊斃賊百餘擒張春湖等賊遂折向東北會合前股肆擾於息縣正陽候補知府廖慶謀帶勇至銅鐘店會同正陽知縣鄭修業於二月十九日夜襲斃賊百餘賊由閭河店狂竄三月初二日賊擾溱頭河官莊諸處我軍躡及斃賊數百賊向上蔡奔商水初六日署商水縣知縣閔春熙扼諸盧廟霧臺賊退據八里灣尋由周家口犯陳州府城初八日都司王永慶同守備趙光先出城邀

擊趙光先深入賊隊手刃十餘賊戰歿王永慶鑿戰
四時賊始退十一日賊由試量集犯鹿邑副將圖塔
納等卻之賊由薛廟一路出境於是毫氛稍戢而苗
沛霖復鬻鬻犯豫境自率大隊圍壽州分遣其黨黃
毛獸以借火藥爲名闖入霍邱令潘四逼勒商固民
寨領旗息縣一路按畝派糧詞訟決於練總於白雀
圍金家寨蔣家集戴家店黎家集設僞官自攻破吳
家圩後馬步大股全趨潁西號稱五六萬王金奎等
至大田市集朱品三等至小田市集苗金開等至陳

家集分三路進欲襲潁郡陰結汝捻陳大喜趙獅子秦宣等分擾陳汝邊境沈邱之白廟皮營項城之黃廟集均築賊壘嚴樹森檄叅將巴揚阿統游擊陳占鼇都司陳廣譽守備王同聲勇隊一千五百名防光固一路檄候補知府李徵松統剛銳驍果各營馬步勇並吉林黑龍江馬隊扼沈項一路其原屯沈邱之守備王永慶原屯項城之游擊劉鳴岐都司李永祿馬步各隊均歸李徵松調遣正布置間而亳州捻首雷彥蘇立楞眼等糾大股由渦河逼安溜等寨另股

由毫西掠薛廟五月二十九日圍鹿邑縣城爲駐防
都司王守基等擊退三十日攻賈灘寨約軍功宋淵
洲爲內應知縣孫嘉臻偕王守基等率衆往援兩面
夾擊賊東竄斬宋淵洲於陣六月初二日賊回攻趙
村寨孫嘉臻會春林敗之追殺二十餘里初三日孫
嘉臻密約春林王守基等於四更時潛師鈔賊賊驚
潰獨黑旗雷彥一股抵死抗拒孫嘉臻調尙橋團勇
助戰擒擒首張虎身並斃其執旗賊日追至毫境樓
城集斃賊二百餘賊遁歸巢另股擒首李庫盧和尙

等方據亳之盧廟集七月初二日偕劉狗等大股由
三丈口犯鹿邑之張斌營王皮溜觀音堂生鐵塚諸
處知縣孫嘉臻會同王守基及都司張玉敗賊於王
皮溜毛和熙檄郎中袁保慶督守備李占元等赴鹿
邑會兵截擊而擒首宋喜元蘇立楞眼方據商邱之
金樓張三座樓朱樓馬牧集文集諸處趙浩然李加
英等股紛擾夏邑陷據洪樓寨毛和熙遣叅將孫之
友會同敖天印等肉薄攻之不克於是附近之太平
集各寨皆爲誘脅宋郡軍事日棘而苗沛霖捻豫軍

疲於奔命遣苗天慶王金奎等由潁西突竄沈邱知縣顧恩培會同王永慶敗其衆於王寨賊據荆寨王永慶乘夜進攻斬賊二百餘賊奔白廟皮營我軍日雕勦之賊乃退至鮑陽城諸處當是時劉狗分黑旗白旗花旗三股由甯陵張弓集竄睢州攻踞周堂寨其地當宋郡衝賊深溝高壘抗我軍嚴樹森調李徵松馬步各隊由太康杞縣進毛昶熙飭游擊陳祿興會之六月二十三日賊分股攻陽驛鋪寨甯陵知縣王毓昌以練總張法章史演龍等鄉團會陳祿興之

兵解其圍次日分路進擊敗賊於十里鋪追至馬官集值睢州知州周廣德柘城知縣謝國輔帶團馳至遂合兵爲一攻克周堂殪賊三百餘復敗諸金相寺賊乃東趨與宋喜元等合擾金樓張三座樓句結金樓教匪邵永清攻馬牧集寨毛永熙令參將敖天印等進兵馬牧七月十三日敖天印與邵春仁擣賊中堅立破大小賊營四斬首二百餘左成元蔣學耕等轉戰而前立將東西援賊擊退乘勝克張三座樓寨十五日敖天印密約各隊繞至賊莊縱火大呼楊莊

羅莊孫審楊倒樓大郭樓小郭樓智閣樓魏莊楊合樓之賊皆聞風潰我軍乘勢追殺殲斃無數賊竄宋郡西北清涼寺諸處毛昶熙調隊截勦賊竄甯陵之瓦屋樓馬油房睢州之平岡寨西陵寺各邑團練與官軍分道扼之乃均南竄於是嚴樹森方駐陳州與毛昶熙會籌全局合辭具奏疏曰豫省歸陳汝光界連皖楚粵捻氛逼環而相伺頻年以來或蒙亳之匪西犯或曹單之匪南趨往往駛近省垣恣其窺探軍興日久饑需日絀兵力日單賊勢日衆籌防籌勦事

莫難於今日者從前豫軍之病在不能選將以練兵
存營馬步兵勇向稱二萬餘人去其濫報之虛數傷
亡之空額實存者不過十之六七去其零星雜湊之
隊老弱疲乏之卒可用者不過十之三四且統兵諸
臣專駐歸德一隅賊每出巢遂得避實乘虛狼奔肆
擾前不能遏截後不及追躡賊蹤所至任其蹂躪沿
邊一帶犬牙相錯路路可通又無一旅分駐我出賊
歸此擊彼竄門戶洞開已成熟徑臣自到涉後與臣
毛昶熙咨函往返商辦一切慎遵 皇上訓飭各

自悟悔和衷共事推誠相與釐剔積弊先就在防兵
勇點驗實數杜其浮冒刪汰冗卒抽換勁旅按楚軍
法申以紀律教以行陣所調鄂將穆正春楊飛熊先
後來豫各帶營官哨弁十餘員選募各路壯勇有分
營而排練者有成軍而甫至者計自求將治兵殫心
竭慮數閱月今始規模麤備然簡單乃謹守之本禦
敵以扼形爲先無恃其不來恃吾有以待之無恃其
不攻恃吾有所不可攻就今日賊勢與中州地勢較
歸德近接捻巢竄越靡定商邱永城夏邑邊境匪衆

蟻聚擬以步隊五千人馬隊三百騎駐宋鹿邑與亳
東緊接另派一千人守之由臣毛昶熙督率調遣以
扼正東一路陳州與潁阜相連沈項之交土匪未靖
苗練窺伺尙恐復萌擬以步隊二千人馬隊一百騎
駐陳另以游擊劉鳴岐五百人守項守備王永慶五
百人守沈派候補知府李徵松爲統帶以扼東南一
路汝甯光州苗練糾合土匪肆竄擬以步隊五千人
馬隊三百騎分駐之派記名道張曜爲統帶以顧正
南一路是爲守邊之師至於省城爲根本重地皖捻

東匪時犯睢杞蘭考逼近汴垣聞警戒嚴輒患無備
擬練足撫標剛銳十營步勇五千人輔以馬隊五百
騎派署信陽協副將穆正春將之紮營省郊並擬練
足撫標襄勝五營步勇二千五百人派前湖北儘先
副將楊飛熊將之紮營蘭考間此二軍者日日訓練
且相去僅數十里聲勢互相聯絡兩將倚爲左右手
練成一枝活兵通盤更覺靈動並可北屏河朔西捍
宛洛何處緊急由臣親督調度馳往何處策應是爲
雖勦之師統而計之馬步兵勇二萬有奇而周家口

水師一營不與焉月饟七萬兩實屬不敷而庫帑支絀萬分由臣督同司道殫精籌畫核實摺節期於兵歸實用饑不虛靡從此戰守兼資外寇難入內患自消致人而不致於人軍威可以漸振矣疏入 上報聞時毛和熙方督各軍勦金樓嚴樹森將由陳州回省部署軍事云

皖匪十

秋八月毛昶熙督陳祿興等攻克甯陵之顏集孫之友等攻克趙浩然所踞夏邑洪樓及孫楊集樊口孫五口樓澗頭太邱集洪路口等七寨永夏甯睢賊蹤稍戢毛昶熙乃令前御史尹耕雲總兵圖塔納督敖天印陳祿興等專剿金樓賊毫捻既不能肆擾宋郡劉狗王懷義宋喜元蘇立楞眼等股乃由宋北劉家口繞出甯陵大孔集又折而沿睢北乾河灘晝夜疾趨東犯杞留通許其由潁郡竄入沈項境內輾轉而

擾宛南者爲姜太林等大股八月初三日劉狗等由
陳留竄朱仙鎮初四日偪省城環列五色旗幟火光
燭天嚴樹森先於八月初一日自陳州啟行尙未抵
省於是河督黃贊湯學政景其濬藩司邊浴禮城守
尉富保等咸登陴布置防守初五日賊攻城愈急城
上連開大礮斃賊甚多游擊李殿甲將南北鎮標官
兵及馬隊出城堵剿賊衆悉向西南沿河趨黑堤遂
由東漳楊橋竄中牟鄭州滎陽聲言將西犯山陝初
八日嚴樹森至省令穆正春蒯賀蓀將兵援西路時

賊攻滎澤滎陽皆不得逞遂犯汜水知縣劉定敷出
戰失利練總生員王景璐死之初十日賊踞城北隅
高山火城內衙署由間道犯鞏縣知縣袁修翰扼虎
牢關老犍坡以禦之賊分股由汜水烏沙河犯兩河
口袁修翰分勇守虎牢自率三千人迎戰賊愈聚愈
多袁修翰中數傷退保神隄十四日賊於洛河南
岸束筏將順流入黃河北竄洛水忽漲袁修翰連開
大礮斃賊百餘木筏皆漂散賊退南岸掠黑石關河
南府知府樊琨叅將馬春華洛陽縣知縣任桂偃師

縣知縣鄧爾復登封縣知縣章慶保各帶鄉團集黑石關西岸相持一日十七日樊琨督團奮勦斬馬步賊數百賊向倉西一路闌入鞏縣城袁修翰急馳回巷戰逐賊自東門出賊回竄汜水滎陽掠鄭州十八日穆正春等軍甫至迎戰於城外賊衆萬餘合戰數次穆正春馬傷倒奪賊馬乘之大呼陷陣所向披靡千總周兆常把總王國良裹創力戰馬賊兩路包鈔我軍火藥盡乃抱隊保濠邊賊夜攻城崩賀蓀督知州唐知銑登陴奪其攻具十九二十兩日賊數來攻

皆爲穆正春擊退追斬二十餘里賊分三股劉狗率賊萬餘東竄都司李永祿敗諸中牟總兵黃得魁敗諸東漳賊由陳留杞縣睢州甯陵柘城諸處回巢王懷義等由鄭州向東南疾竄爲通許縣知縣李純錫擊敗竄扶溝之江村太康之崔橋爲太康縣知縣水安瀾督練總范支山等擊斬甚多賊衆由柘城歸巢宋喜元蘇立楞眼等由鄭州南竄爲新鄭長葛洧川尉氏等縣擊敗由朱曲賈魯河疾趨鄆陵扶溝賊走柘城又爲知縣謝國輔練勇所敗遂由鹿邑邊境竄

歸亳巢蓋二十八九等日賊股悉出豫境云其姜太
林等於八月十三日圍沈邱十五日守備王永慶擊
斃執旗賊目二斬馬步賊二百餘賊據城東之秦灣
十六日王永慶乘賊不備斫賊營賊潰奔我軍追斬
三百餘十八日竄上蔡十九日攻西平知縣姚詩雅
擊卻之後股攻磚潭寨練長張振清夜襲賊營復繞
至河口擊賊之半渡者斬賊百餘淹斃無算生擒姜
逆之姪姜魚等賊奔舞陽掠葉縣爲知縣秦茂林所
扼乃竄裕州署知州孟宣泗千總劉福和禦諸七里

關二十二日敗賊於關口擒僞先鋒一餘黨二十三
忽騎賊大至劉福和戰歿二十四日犯賒旗店寨團
守禦三日賊不得逞乃竄泌陽樹雲梯緣城而上城
中文武官紳悉力抵禦礮斃姜逆之子並賊目李順
等賊懾退九月初五日竄唐縣十一日掠新野趨樊
城復由鄧州入內鄉浙川荆子關副將伊里糊阿等
號召丹河兩岸鄉團以禦賊二十六日賊衆萬餘竄
至清風嶺山口徑曲路窄賊騎不得騁鄉團敗之殲
馬步賊四百餘追至浙河擊賊半渡斬黃衣賊目賊

敗奔由內鄉鎮平竄南召十月十一日乘大霧攻城
知縣曾照擊卻之遂入魯山之交口鎮及寶豐之大
石橋適叅將保英等督軍追至斬馘數百賊奔邾縣
鄉團接仗失利賊薄縣城署知縣王延煒乘夜出擊
斬賊數百賊欲西竄河洛聞各隘有守兵且居民多
入保野無所掠乃折而東趨由禹州許州鄆陵各邊
境疾竄二十三日攻扶溝西關知縣鄒金生截其後
隊其前隊至太康二十五日知縣水安瀾把總祁陽
年禦諸三里橋賊由柘鹿邊境疾竄歸巢巖樹森以

追勦無功叅將保英知縣汪鼎和革職留營以觀
後效請將八月以來勦賊立功之穆正春等陞賞有
差陣亡各員悉優卹如制時王懷義一股自八月二
十九日竄回毫巢後復糾捻首孫老威等於十月初
七八日由沈項之交掠西華商水至西華分股一由
鄆城犯舞陽一由上蔡掠汝陽之姚灣由遂平諸市
店竄泌陽沙河合股竄唐縣邊騎游駛裕葉之間十
一月初一日由唐縣竄新野知縣丁嘉言會同新野
營守備特合圖分路出擊初二日戰於距城十五里

之廖樓殪賊三百餘擒紅衣賊目四黃衣賊目二賊被創狂奔特合圖策馬窮追至連樓賊回拒特合圖斬執旗賊目三馬蹶仆地躍起徒步血戰復手刃悍賊數人遂遇害傷痕如鱗死後右手握利刃猶堅不可開奏 聞予郵賊犯唐泌分股犯賒旗店爲南陽縣知縣李瀛所敗乃折竄泌舞掠裕葉襄城臨潁諸縣境值風雪作不及屯聚乃由鄆城商水西華太康邊境疾趨二十二日至甯陵之夏莊爲李徵松之軍擊敗由鹿柘邊境歸巢其劉狗宋喜元等自八月

回巢後尋糾大股馬步數萬援金樓據商邱馬牧集將攻踞附近各寨與金樓成犄角之勢尹耕雲圖塔納議以賊衆我寡難恃力敵乃於附近之井泉瀦澤潛毒其流賊飲水輒病日有死亡十月十九日金樓賊目僞東門丞相候邦威富垣大等潛出乞糧於金樓西南之竟樓寨爲首事竟玉彩誘擒其黨來救爲練總王箱擊散遂斬侯邦威於軍前賊益氣沮我軍夜劫賊營乘風縱火賊驚亂死者無數追奔四十餘里悉竄歸巢捻蹤甫退而苗練之禍又亟苗沛霖自

本年春與壽州紳士孫家泰構釁掘孫姓祖墓三十餘處以苗字旗號其屍九月二十七日夜攻陷壽州戮孫家泰全家屠守城拒敵之皮黃洪吳張諸姓遷巡撫於蒙城之板橋集執壽春鎮總兵黃鳴鐸割耳焚鬚留數千人守壽州自率大隊於十月初六日赴懷遠部其衆爲十大營一耿老紹二吳正誼據泗溜集等寨三朱品三據曹家集等寨四王金魁據延陵集等寨五董志誠杜維忠據太和東北各寨六鄧林松鄧香山據淝河以南各寨七林朗據潁上縣城及

縣西南各寨八朱蘭馨九潘四據三河尖及霍邱境內各寨十卽苗家老寨佔地數百里有衆十餘萬結張樂行與汝甯正息各路土匪互相連絡其害已及中州會有人奏豫皖連界專事防守不能無瑕隙不若乘勢進兵搗其巢穴則匪蹤自不敢遠出等語於是上命嚴樹森毛昶熙會商袁甲三等密籌機宜分路進剿限今臘明正爲先發制人之舉嚴樹森毛昶熙因通籌全局請添兵增餉以資戰守上疏曰河南居天下之中爲南北關鍵四通八達無險可扼

從前防勦不

金樓踞匪附

以直東會匪

勦也汝甯有

於丙或蠶食

尤爲中原巨

結粵逆陳四

穎以爲根本

援勢難固守

警則沈項最爲喫重新息次之光固之苗黨潘四必將同時並發統計豫省兵力省防汝防宋防三營馬步僅一萬九千餘人以省防一軍爲勁旅昨因汝光告急派總兵穆正春馬步五千人馳往援剿省郊僅留楊飛熊襄勝前後中三營暨親兵共一千七百餘人旣防東匪北來又防皖捻東至設有緩急萬難兼顧現催提副將余際昌新募昌勝五營楚勇卽日來豫徑紮省郊以固根本兼籌各路策應此外汝防張曜一軍久爲平輿之賊所牽制且師力已疲應須抽

換簡練庶可得力宋防一軍進圍金樓退防毫捻尙形單薄其周鳳山招募之新鳳六營雖經屢次催提如能速至祇可備光固一路防剿自沈項至新息路路空虛分撥抽調顧此失彼深恐各匪乘隙蹈瑕使我進退失據臣等早見及此是以前欲聯楚皖豫爲一心合力共濟疊經械咨官文曾國藩李續宜彭玉麟諸臣約李續宜親統一軍由光固進紮三河尖與六霍之師兩路並進以救潁壽先後接准諸臣咨覆李續宜以楚南辰沅一帶石逆餘燼復然楚防方亟

未暇越境圖苗普國藩以廬州未復兵力難於抽撥
彭玉麟所部祇有水師亦難間道援穎是江楚皖均
未能會師合剿而苗逆乘暇旬結凶焰日張其禍瞬
及於豫而西北皆將震動若任其決裂專盼鄰師而
不早謀自強自立之術勢必貽誤中原臣等罪戾尤
大再四籌畫欲保危疆約有三端一請添派將領查
有已革湖北宜昌鎮總兵李續燾樸誠勇敢善於將
兵又記名提督陳由立身經百戰驍勇無敵二將皆
楚產其才均能將數千人前經臣等函商楚中諸臣

尚未接准函覆應請 敕下湖廣督臣官文湖南

撫臣毛鴻賓調派李續燾並請 敕下兩江督臣

曾國藩轉飭記名提督綏靖鎮總兵鮑超調派陳由
立前來豫營均令其在湖北兩處招募勁壯勇丁各
三千人卽日成軍北來以資防剿現計省防汝防宋
防三軍及分紮河朔之襄勝兩營省西路之保洛一
營步勇共一萬八千有零楚勇十居其七俟將新勇
募齊合之周鳳山余際昌二軍二千五百人將及三
萬之數則兵力較厚庶歸陳汝光各邊隘及河朔省

防均敷布置一請添調馬隊行陣之間列仗鏖戰利用步而追奔逐北利用馬前此劉天祥等竄擾東省經僧格林沁軍營馬隊緊躡匪衆日夜狂奔不敢停喘是以各寨團勇得乘其疲截殺殆盡此其明驗今豫營祇有黑龍江吉林馬隊一百二十餘名此外省防驍果驍健驍壯三營及宋防汝防兩處馬勇合計雖有一千餘名均不如馬隊之驍捷善戰練步勇易練騎兵難仰懇 天恩准撥吉林黑龍江馬隊一千名選將統帶馳赴豫營聽候調遣實於軍務有裨

一請添撥饑項從前豫省養兵不足二萬人月饑七萬兩業已時形拮据今欲添兵萬人不得不籌增萬人之饑奈豫事之急倍於往年庫款之絀甚於疇昔所有入不敷出情形早經縷悉上陳嗣復將各省協饑兩次奏請停撥今自秋冬以來屢經賊擾全省州縣被兵被災十居八九小民蕩析離居地方凋殘滿目向來進項涓滴皆枯臣嚴樹森督同藩司盡心設法而爲炊無米智力俱窮不特外省協饑無款可解卽本營兵饑積欠已經兩月設新軍齊集而饑無以

應不出一兩月饑潰立形不可不早爲之計查鄰近各省秦晉獨爲完區由豫省爲之屏蔽故也欲保秦晉宜先保豫刻下豫事如此其亟一省之力難以支持應請 敕下山西撫臣英桂陝西撫臣瑛棨每月各撥餼銀二萬兩協濟豫營庶有饑以養兵而賊可剿亦有豫以當賊而秦晉可安一俟兵將到齊先令於歸陳汝光一帶扼要駐紮星羅碁布遇賊卽擊一面督飭諸將先將本境土匪迅速掃蕩平與金樓次第克復然後酌量情形相機進取以全力會合楚

皖各軍東擣捻巢南圖苗逆掃除醜類以靖中原大局所關在此一舉臣等連日籌商非如此振作不足以固中原而挫賊勢疏入適先期已調嚴樹森爲湖北巡撫 詔官文曾國藩飭令李續燾陳由立迅赴河南交鄭元善差遣山陝兩省各月協銀二萬兩以吉林黑龍江馬隊未便分撥 諭託明阿調撥西安馬隊一千名赴豫助勦又允毛昶熙奏請調給事中李鶴年陸秉樞赴營襄理軍事

皖匪十一

今上御極之初中州軍事方亟亳捻張樂行等大小數十股縱橫皖豫之交乘汝南土寇蠶起一歲數出往來剽疾歸陳數百里平行無山河險阻郡邑殘破官軍罷於奔命苗沛霖攻陷壽州跨有長淮既輸款粵逆復向當事求反正粵逆陳玉成方據廬州廬州敗匪程保民亳州巨捻姜太林等圍攻穎州困署皖撫賈臻於穎城穎郡地接沈項陳郡戒嚴 朝廷調楚撫李續宜撫安徽調豫撫嚴樹森撫湖北而擢

鄭元善爲河南巡撫與團練大臣毛昶熙共任勦匪
命兵部左侍郎勝保以 欽差大臣督辦皖

豫軍務馳解潁州之圍並辦苗練反正事時張樂行
遣黨張耀林林其進等率大股賊由方家集竄息縣
境圍光州爲游擊李忠奎知縣單體晉擊退張樂行
竄潁上勝保令苗沛霖圍之 朝旨責擒獻張樂

行以明心跡並促勝保迅速進兵援潁 命李續

宜由三河尖一路進兵 命漕運總督袁甲三自

臨淮遣將赴援 命江南提督李世忠由懷遠以

達潁州水陸並進 命鄭元善李續宜幫辦勝保

軍務勝保遣總兵成祿率師三千先期繞由懷遠東
進總兵劉景芳由槐店滾營進鄭元善令副將楊飛
熊統剛銳五營及吉林黑龍江馬隊驍健營馬勇馳
駐槐店以扼防沈項之剛銳左營新中營暨叅將王
承慶游擊李永祿兩軍隸之會謀稱毫捻五旗並出
毛昶熙在省聞報乘夜馳回宋郡正月二十日毫捻
劉大老淵二老淵蘇添福王懷義孫繼先李加英趙
浩然楊興太蘇立楞眼李大箇蘇天祥李五孫四瞎

子龔耀等率悍賊數萬糾山東長槍會匪王廣奇等同時出竄前御史尹耕雲總兵圖塔納等圍攻金樓方亟恐竄捻與教匪勾結傳飭各營嚴兵以待賊眾由金樓西南直衝敖天印劉進貞朱金鈇等營我軍槍礮環擊賊卻走另股馬賊犯馬牧集爲圖塔納擊退賊眾復趨邵春仁營敖天印等各率所部截剿尹耕雲等復飭姚允寬尹彥欽以步軍小隊出擊自督馬步往來策應鏖戰逾時賊氣沮竄向西南二十一日黎明賊黨從東北折回復進逼邵春仁營圍營外

巡勇邵春仁驟馬出救斬其紅衣賊目各營大隊馳到將賊壓退追殺二十餘里斬首一百餘級是日擒衆前隊已由營廓集蔡道口竄過甯陵睢州科爾沁親王僧格林沁以欽差大臣駐軍單縣剿辦直東會匪聞捨股出竄卽與杭州將軍國瑞親督各起蒙古馬隊四五千晝夜兼程截擊賊掠杞縣毛昶熙阻不得進督知縣劉時修登陴守禦賊衆圍攻城關城中出勇轟擊毛昶熙於城上見後隊賊騎動偵知僧格林沁已破賊於許岡時賊馬步橫亘十餘里步

賊皆以長矛迎拒僧營署翼長蘇克金營總恆齡富和侍衛卓明阿托倫布擊敗之賊屍枕藉餘賊竄入廢寨官軍方欲圍攻忽有大股賊分三路由西來援恆齡拒北路蘇克金擊中路卓明阿哲里木盟左翼頭品臺吉諾們丕勒戰東南一路鏖戰二時衝動賊陣向前追殺復有另股賊西南突出我軍會合痛剿斬馘二千餘賊始敗北是晚狂風大作僧格林沁距杞縣東四里逼賊立營人馬追馳數百里饑苦異常毛昶熙令城中齎饑糧草料猪羊至僧格林沁營分

給諸軍將士皆歡騰又遣都司蔣學耕州判方戊昌
率輕騎越賊壘至甯陵調陳祿興馬步全隊來杞鄭
元善聞警親率叅將楊長春一軍出省駐陳留扼賊
西竄會副將余際昌新募楚勇三千至省遂檄令東
進會勦大風數日不息飛沙障天僧軍不能出隊賊
騎四出游駛二十九日風少止賊復來攻僧格林沁
預伏馬隊於濠邊觀釁而動日晡賊罷將退馬隊齊
出直衝東南史莊馬樓各賊營連踏七壘斬首千餘
級追殺十里二月初一日鄭元善合余際昌楊長春

成景巴揚阿毛昶熙令蔣學耕陳文平等會蘇克金於杞西攻陳敏屯踞賊賊出嘗官軍旋避入圩而東北田陵寨出賊萬餘截我後蘇克金等合軍與戰破其梅花陣殪賊無算追奔十餘里偵知西北趙寨焦寨東北田陵寨正北魏堂皆踞賊數萬初三日各軍會攻趙寨賊圩矢石槍礮如雨余際昌楊長春身先士卒越濠蹂進各裹劊奮勇躍登將士畢登把總任敬秋中礮殞陳文平步隊繼進合力痛殺賊屍填塞街濠斃賊四千餘蘇克金余際昌復揮各隊至焦寨

而田陵之賊復出救馬步迎擊移時巴揚阿礮中眉際裂裳束額喋血接戰斃賊無算賊始潰奔焦寨之賊亦焚圩遁余際昌督隊追之賊見其兵少回戈拒魏堂之賊忽尾其後余際昌前後受敵傷痕櫛比猶執矛馳驟攢刺如飛富和蘇克金等正追田陵賊賊恐余際昌孤軍有矢諾們丕勒托倫布楊長春率馬步馳援鏖戰四時賊遂大敗各軍合逐之陣斬賊八九千獲旗幟鎧仗無算驟馬千匹賊宵遁僧格林沁親督各軍躡擊初四日至陳留初五日至尉氏賊

踞城東派隊出擊擒斬甚多賊竄入里四黃河樊家
三處民寨負嵎固守馬隊圍攻不能克鄭元善調襄
勝昌勝兩營步勇三千人以巴揚阿領之馳赴僧營
聽調十二日僧格林沁親督攻寨破之後起援賊麇
至連戰勝之敗賊東遁十三日竄睢州白樓寨鄉團
邀之斬首數十級十四日至甯陵大黃岡練總史演
龍等集團迎擊賊竄柘城之慈聖堡知縣謝國輔率
團逼之復斃賊百餘毛昶熙朱防各軍又次第截擊
敗賊於大李莊包公廟十字河高心集曹莊賊眾向

東狂奔僧格林沁國瑞鄭元善毛昶熙聯銜告捷有
旨嘉獎復余際昌副將原官賞還花翎加偉勇
巴圖魯名號擢楊長春爲副將其餘出力將士優獎
有差僧格林沁旣督軍至歸德調單縣步隊由馬牧
集進攻金樓教匪鄭元善毛昶熙奏言僧格林沁統
領馬隊四五千未及浹旬殄除羣醜豫省官民僉稱
近年來未嘗有此大捷而勝保馳奏猶謂毫捻三四
萬人圍攻杞縣四面築立長圍僧格林沁毛昶熙均
在圍中致煩聖明塵念則傳聞之誤也於是鄭元善

毛昶熙請乘此士氣奮揚軍心鼓舞一鼓作氣直擣
蒙亳老巢縱令被勦肆竄而田在田駐兵宿州袁甲
三扼紫臨淮吳棠統師淮徐皆可會合嚴防卽勝保
穎郡解圍亦可兩路並進奏入報可議未及行而邊
事復亟矣時勝保援穎之師連日獲捷進屯王圩劉
家海茨河鋪距穎州十里與城中消息相通勝保自
率大軍駐太和縣親督調度賊旣慮我軍解穎圍而
張樂行穎上賊黨又爲苗沛霖所迫遂相率西竄圖
斷我軍後路故邢圩援賊驟增十五日襲陷對河穗

子鋪阻絕文報軍火饑糈太和將被圍勝保飛章告
急請各路援應 詔僧格林沁暫紮鹿太之間速

派得力馬隊千餘駐槐店李續宜鄭元善親督各軍
馳援總兵成祿以赴援遲延摘頂副將劉景芳以築
營未定爲賊所乘褫職勝保復劾楊飛熊屢調不遵
詔謂楊飛熊前經奉 旨與張曜會剿平輿

其不能赴槐店非有意遲延不之罪鄭元善赴援陳
州行有日矣適勝保所部降衆靖東營叅將宋景詩
見潁郡賊勢復張官軍後路隔絕遂於十七日夜率

所部馬步各隊走陳州誘誠順中前後三營馬步同
逃以赴省乞饒爲名鄭元善飭開封府知府朱光宇
至太平岡彈壓宋景詩請酌給口糧歸農其誠順營
雷鳳鳴馬榮程順書等願仍回防議未定宋景詩懼
率衆由蘭儀東北夜遁鄭元善遣巴揚阿帶勇及勝
保所派副都統明慶馬隊沿途追剿及諸東漳殲斃
百餘外委葉寶登戰歿潰勇奪民船潛渡原武縣知
縣孔慶鉞乘其半渡擊之落水死者過半仍遁回南
岸會勝保派軍功馮廷祉彭體勤諭招宋景詩鄭元

善遂屬明慶以馬嘍
會同總兵黃得魁由
路迨三月初三日
州北面城圍一戰
同時抵潁各軍會
僧格林沁有直擣
老巢並救張樂行
重潁圍解卽退駐
師成大吉等軍並

克 朝廷以張樂行縱橫皖豫苗沛霖首鼠兩端
若勝保退屯陳州恐張逆免脫苗沛霖復懷觀望仍
令乘勝進兵潁上別遣馬步助剿梟擒之竄豫境者
方梟擒之爲僧格林沁擊敗於杞也有南竄太康者
有從尉氏擊敗回竄宋郡復爲宋防將士迭擊東竄
者有糾合粵逆及新息土匪圍攻光山縣城經光州
署知州何桂芳光山知縣阮鼎擊退者有北竄新蔡
以地雷轟塌城垣爲知縣韓承宣搶護擊退者及至
陳郡復合股圍沈邱二十日知縣顧恩培率民勇登

陣轟擊凡六晝夜願恩培出奇絕擊斬賊二百餘二
十四日始由雒莊西竄二十七日犯項城值楊飛能
軍到會同在防游擊丹凌雲敗賊於八里橋賊踞羊
樓寨二十九日擾周家口及商水縣城復由西華之
郝岡逕犯上蔡縣城知縣姚銳督勇擊走之三月初
一日賊攻西平署知縣宮國勳募勇絕城槍斃賊數
十初五六日賊竄舞陽之吳城寨攻陷塚李寨及舞
葉交界之卸甲店邊騎駛及寶豐魯山初九日大股
全趨郟縣汝州駸駸西竄鄭元善始有陳州之行及

聞潁郡解圍亳捻將南窺宛郡西犯河洛遂取道尉
氏洧川駐許州適中調度令楊飛熊李徵松率剛銳
襄勝各營楚勇由陳州西華郟城暫屯襄城視賊所
向並調勝保前派防河之西安馬隊五百名輔之會
賊已於初十日由邲縣趙寨一路入汝州境知州舒
亨熙集團勇拒之賊由間道攻城雲梯四面捨登城
幾陷舒亨熙馳回擊退夜襲賊營火發賊驚潰於十
一曰北竄臨汝鎮分股一由登封諸葛村掠龍門鎮
一由宜陽白楊樹西竄河南府叅將馬春華率本標

兵借署洛陽縣知縣徐光第調鄉團二三萬守伊闕
口賊由西南間道會合宜陽一股十三日犯河南府
城火東南兩門署知府安奎督在城文武守禦槍礮
併發賊卻退十四日昧爽賊由南門圍繞西北噴筒
火箭飛集城樓悍賊首戴方桌門板猿攀蟻附上城
危甚先是郡城武試未竣武童千餘以弓箭登陴助
守雨射城下登者輒斫以短刀繼以大礮賊始潰敗
而楊飛熊率剛銳襄勝驍健驍壯等馬步及營總雙
全所統黑龍江馬隊營總圖克唐阿委叅領訥勒和

春西安馬隊同時馳至斃賊二千餘賊於是日西竄
新安城外八斗山署知縣梁敞率兵出擊賊由東北
繞我兵後梁敞及外委楊登魁均受傷墜馬賊據北
山頂夜擲火彈入城燒衙署十五日梁敞裹創督團
奮擊賊向東竄入宜陽境十九日據宜陽城外錦屏
山火四關知縣謝仁溥率團嚴守賊斫樹縛雲梯四
面圍攻二十二日城陷謝仁溥與典史齊金誥死之
事聞優卹建專祠二十三日安奎督勇往援楊飛熊
前隊亦到賊不虞官軍至倉皇潰奔我軍乘勢追擊

斬馘千餘遂復宜陽縣城賊犯韓城鎮縣丞張慶岡
率圍出勦受傷賊遂踞韓城焚縣丞署馬春華雙全
等馬步馳援雙手刃賊日賊敗走追殺十餘里斃
賊五六百賊竄永甯晝夜圍攻知縣宋劭經守三日
二十六日城陷 詔褫宋劭經職四月初一日楊
飛熊等軍由藕池鎮馳抵永甯城外賊已盤踞五六
日見官軍至出馬步四五千由東南兩門分路抗拒
楊飛熊分布訥勒和春馬隊防包欽令游擊劉興旺
都司景得勝守備趙鴻先都司蕭鳳鳴叅將范殿印

守備劉鴻增前後擊之自督親軍策應賊腹背受敵
騎兵截賊數處各軍直薄城下趙鴻先先登手刃數
賊城內賊驚潰我軍大隊從東門擁入巷戰逾時遂
復永甯縣城賊由永甯竄嵩縣知縣彭繩祖拒守賊
退竄嵩宜接壤之白楊樹楊飛熊等踵至其地四面
皆山初六日各隊進剿賊紅白二旗馬步五六千下
山衝突我軍屹立不動相持間復有藍旗萬餘從東
南沿山下以連環槍擊之賊屍枕藉山坡下復有馬
賊疾馳而出西山坳內又出步賊無數官軍酣戰自

已至未殺賊略相當賊向東濱奔于總李全興宋占
魁李朝相把總嚴大治曾守達張連榜外委方世昌
李永興尤正國閭士貴正藍旗佐領塔克什等均戰
歿得 旨優卹賊竄大辛店官軍追之值伊水陡
漲前股已束筏渡至伊陽之寨子街其後股正爭渡
雙全及叅將烏爾克蘇都司陳玉林叅將盧得勝等
蹙之擒斬數百落水斃者不少伊陽知縣謝金誥擊
賊於大虎嶺賊由白沙臨汝東竄登封署知縣章慶
保卻之初八日撲西口金店里大唐里王石里爲各

鄉練勇礮斃四五百夜撲曲高里襲團勇營各練設
伏俟之猝起迎鬪復環斂其後斃二百餘賊知有備
遂退去合竄汝州楊飛熊率各軍追之鄭元善檄駐
襄城巴揚阿一軍由郟縣迎勦汝州督團委員前汜
水縣知縣劉定敷前洛陽縣知縣任桂率勇防各隘
十二日敗賊於紙坊店署知州任愷前任知州舒亨
熙與任桂等會同楊飛熊前隊游擊劉開友守備王
秀林乘夜襲營賊驚亂狂奔十三日由五里溝薄郟
縣城圖克唐阿王珠煒由襄城至李徵松巴揚阿等

踵至戰於城西三里舖知縣陳桂芬集團勇助之戰
數時賊衆敗退方揮軍進剿忽另股捻旗自南趨至
灌譟震地鈔我軍後敗匪復回戈困鬪巴揚阿督隊
衝壓賊不退城上以大礮擊之凡七礮賊屍枕藉追
斬十餘里夜分賊全股奔竄由襄城擾臨潁兩次攻
城皆爲知縣查以謙擊走擾許州之薛橋楊飛熊巴
揚阿等跟蹤至會同知州陳肇鏞出不意揜之多所
斬擒敗賊向鄆陵西華邊境東趨其亳東續出之股
一至淮太一至睢杞聞前股已敗衄遁歸遂相率折

竄亳巢是時僧格林沁方築長圍困金樓未能分兵扼賊歸路而樂行遣出之賊自圍攻新蔡後與粵逆偽扶王偽啟王偽端王偽遵王等合股由泌陽擾宛郡入浙川荆子關進至商南踰秦嶺圍西安折而東趨回匪乘之而起遂爲陝亂所自始豫省用兵十餘年皖捻之禍未嘗及西路此後粵捻之踰潼關出嶠函張總愚往來黑峪藥川專以依山阻險爲負隅計河陝遂成熟徑實肇於此云

皖匪十二

自潁州解圍後羣捻皆趨潁上援張樂行四月十二日張樂行率馬步各賊攜家口由北門出竄過沙河遁歸雉河老巢時苗沛霖方以數萬衆困之朝廷責其有心疏縱命勝保速赴潁上親督圍攻會潁上已拔苗沛霖復誘擒粵逆四眼狗陳玉成檻送勝保營而靈璧一帶踞匪之窟項城者爲郎中袁保慶等擊敗五月以來豫防稍弛六月僧格林沁攻克金樓旋軍鹿邑休養士卒爲進擣蒙亳之舉於是各股

擒首羣思出竄牽制我師又聞粵逆僞扶王陳得才
等由關中折竄宛郡議由間道西與之合鄭元善時
駐汝甯督勦陳大喜等土匪具以狀聞 詔勝保
率帥駐河洛而以潁州一帶軍務責成李續宜勝保
甫抵洛陽又值關中回匪大熾命就近由河洛統師
入關於是豫境空虛蒙亳巨擒大舉東犯矣七月十
九日擒首姜太林孫四牙王懷義周化臨韓老萬張
小明等率黃旗藍旗紅邊白旗黃邊白旗黃邊藍旗
各股二十日至鹿邑之梅城集王皮溜二十一日至

淮甯二十二日至扶溝二十三日攻西華縣城知縣
徐炳登陴嚴守礮斃紅衣馬步賊數十賊竄郟城時
僧營營總恆齡侍衛卓明阿等精騎追及賊於是分
兩股一竄西平舞陽恆齡等躡其後而盧得勝等逐
之入楚者也一竄許州楊長春等擊之忽東忽西尋
復遁回老巢者也其竄許州者二十七日圍州城知
州陳肇鏞登陴適楊飛熊在許養傷陳肇鏞以練勇
三百人屬之縋城列陣楊飛熊振臂一呼賊衆辟易
斃賊數百由禹邲邊境西竄汝州鄭元善檄臬司洪

貞謙出省扼賊所向令叅將盧得勝於葉裕之間截其竄宛與粵逆句結之路命楊長春由汝州迎擊長春與賊遇於距城五里之郭莊八月初二日賊馬步環至我軍槍礮輪擊殪馬步賊二三百賊西駛初三日由臨汝鎮竄伊湯縣初四日圍城知縣楊維宗擊走之賊由藕池河底鎮西趨十一日至陝州之觀音堂時鄭元善入關監臨慮賊擾秦晉嚴飭河北鎮道集兵團防河谷秦晉扼守關河並留勝保後起各隊副將王佐臣叅將梁仕紳等暫緩入關卽在新滬陝

靈助勦故硤石一路駐有防軍賊遂折竄澠池之士
嶠鎮焚掠而東十三日竄新安石寺村知縣韓經畚
會梁仕紳往勦賊竄澠池之葫蘆頂十六日知縣張
應煒率練勇奮擊斬首百餘賊撲日浪村河口澠池
巡檢陳錫疇方率團防河郤之賊繞山徑入陝州十
六十七兩日攻城代理知州杜翊會王佐臣守禦河
陝汝道廣隆令游擊蔡全宗陝州營都司謝榮陞千
總夏青山等各帶勇縋城出擊城內開礮助之殲斃
甚多生擒賊目雷桃斬之十八日夜風雨大作蔡全

宗簡精騎襲之斬首百餘級賊潰遁二十一日掠靈
寶閩鄉代理靈寶知縣康曾定會同城文武守禦十
四晝夜先是五月粵逆犯靈寶守城火器缺乏曾定
籌經費購製大小礮三十餘位甫抵縣賊亦踵至城
賴以守時閩鄉殘破野無可掠且閩潼關有重兵楊
長春由東路追擊遂率大股竄盧氏山中東擾永甯
鄭元善時已出關親督襄勝玉成兩營取道中牟鄭
州滎汜鞏偃於三十日抵洛陽令楊長春李世玉等
追擊連旬阻陰雨閏八月十三日及諸永甯偵賊據

距城四十五里之長水鎮十五日楊長春等率隊進
遇賊於孫洪峪揮軍趨龍頭山居高臨下槍子雨發
賊敗走十六日我軍發長水鎮賊陣洛河南設伏山
坳而散布騎賊於孤嘴山楊長春揮軍渡河背水立
陣密令親兵誘伏賊出戰賊不動乃佯爲反兵卻走
賊齊出掩襲襄前營都司趙鴻先襄右營都司楊飛
鵬襄後營游擊石得勝剛銳新後營守備楊長林縱
橫馳擊斬其黃巾賊目賊陣大亂楊長春率親兵大
呼馳下賊潰散一路追殺救出難民千餘人擒老捻

張信禮等而把總段連才李發南張學桂外委任進
貴胡映南熊良有等均戰歿十八日敗賊於馬店突
有步賊三四千由洛河上游涉水來我軍擊其半渡
斃賊百餘追至高莊望見劉營打卦嶺山谷中旗幟
如林徑險路雜相持竟日於是楊長春徹屯范鎮請
濟師於鄭元善而前竄西平舞陽之賊於八月初二
日由葉縣保安驛竄裕州盧得勝率襄勝左營劉興
旺等擊之陷賊圍中盧得勝手刃數賊不得出劉興
旺挺矛入曠目大呼當者輒靡盧得勝乘之出圍我

軍火器齊發賊潰奔初四日賊攻博望驛恆齡卓明
阿等追擊之斃賊三千餘賊由山徑竄鎮平內鄉恆
齡等因馬隊不能入山折回東路賊往來內鄉浙川
山中依山阻險入武關擾商南縣境賊首姜太林等
直逼城下荊州將軍多隆阿適至衆未集乃出奇勝
之斃賊二千餘乃竄逸閏八月初七日回擾黑漆河
初八日竄重陽店丁河店西峽口邊騎至五里川十
二十三兩日攻內鄉縣城知縣朱琨登陴守禦礮斃
悍賊甚多十四日三更賊於西北兩門搶登守城勇

丁斫退募敢死士由東南隅縋城下呼譟斫殺夜昏
黑賊不辨多少卽時驚潰會洪貞謙遣襄勝勇隊至
內外夾攻殪賊數百生擒賊目二十餘賊竄鄧州南
古里繞至新野洪貞謙令游擊任國治等扼林水驛
令盧得勝扼葉縣防東竄十七日賊至三河寨沿唐
河東西兩岸犯林水十八日味爽任國治等馬步鈇
擊火器齊發中執旗賊目賊陣亂我師乘之斬馘甚
多姜太林乘黑羸立陣後羸中槍倒墜而逸我軍逐
之十九日至新野城外八里賊方聚食見官兵至棄

炊具狂奔分兩股一向東南一向東北任國治等力
截東北遂向正南潰逸我軍奮追各寨民團出助斬
賊千數百得羸馬軍械無數賊與前股合奔東南我
軍追至陳家擺渡殲斃無算至湖北棗陽界法山下
賊捲旗匿山谷二十日向棗陽之紫微山竄去洪貞
謙飭各軍嚴扼邊境防回遁當是時永甯賊方伏山
谷中鄭元善派叅將李世玉率玉成營步勇雲驤營
馬勇從宜陽一路探勦二十一日李世玉率把總禹
步雲等擊賊於關莊又渡河截殺賊佯敗竄而大股

潛撲河南府城鄭元善督率在城文武登陴守禦所
部僅游擊甄樹德襄中一營及吉林黑龍江三省馬
起驍健營馬勇百餘人二十五日賊馬步二三萬擁
至城上開大礮擊之賊退屯洛河南岸我軍夜選壯
勇襲賊壘賊驚竄不敢近城二十九日楊長春李世
玉等軍次第至九月初一日楊長春李世玉率馬步
各隊由城北邨山進剿至馬坡遇賊甄樹德及都司
王秀林游擊李文全李朝明守備王明田馳入賊陣
手刃悍賊甚多賊卻官軍壓之忽聞海角齊鳴賊如

潮至楊長春以衆寡不敵約其軍毋妄動步隊結爲
圓陣專以火槍外向環擊令馬勇兩面馳突大戰三
時守備周顯魁王連陞李富德都司王登舉千總王
振川外委劉朝友任長茂等同時戰歿陣亡勇丁三
百餘斃賊一千餘賊退而擾河口下固街小呂莊時
偪河干北鎮總兵牛浩然及濟源孟縣各團對河列
陣禦之賊不得渡遂攻孟津縣城知縣王雲漢擊退
賊悉竄偃鞏鞏縣知縣袁修翰敗賊於莊頭乾溝等
寨十二日賊南走楊長春等擊賊於棗園賊由白沙

一路東遁鄭元善以姜太林一股已入楚境飛檄盧得勝自宛來洛會鄒毛昶熙令陳祿興扼賊於許州賊犯登封聞援兵將至折向汝州大路東竄邾縣襄城二十二日至潁橋陳祿興由許州截擊獲勝二十三日竄臨潁之五里河掠城下二十七日楊長春盧得勝等兵至陳祿興率隊會之知縣查以謙亦選練勇緹城下賊敗走官軍追至瓦店大麥張擒老捻張五等陣斬馬步賊六七百賊竄西華二十九日圍陳州府城知府劉拱宸率屬嚴守適毛昶熙自省城令

總兵趙鴻舉帶勇馳至遂擊走之賊奔鹿邑由生鐵塚黃臺寺一路歸巢初僧格林沁之軍於夏邑也以進剿萊城東踞匪不得分軍而西檄歸陳郡縣聞捻回巢先期馳報至是賊已回巢各縣探報始達於是鄭元善劾劉拱宸及淮甯知縣李澍西華知縣徐炳均摘頂又以洪貞謙帶兵不力屢奉朝旨切責

遂劾罷洪貞謙而以副將劉車龍代領其衆是時永城一路捻圩漸次廓清而勝保願以其時奏調苗沛霖入關援剿回匪得旨嚴飭並諭鄭元善等遣

兵堵截不准一人一騎入境智者見危於無形明者
弭患於未然豈不恃有 廟堂之勝算哉十一月
鄭元善以鑄級去官 命張之萬代爲河南巡撫
時棗陽竄捻屢爲楚師堵擊遂與粵匪合股由新鄧
浙川李官橋諸處環轉遁入鄖陽西竄房竹十二月
僧格林沁進軍逼渦河而陣捻黨日感羣思棄巢出
竄而張樂行之姪張總愚因與陳大喜句結蔓延至
於來歲豫軍又罷於奔命矣

皖匪十三

自僧格林沁進軍渦岸捻黨日蹙欲結豫捻以拒我會汝捻陳大喜上年爲官軍勦敗棄巢出竄由楚境折回新蔡句結陳大常袁安愚秦宣等匪往來肆掠汝光各屬伏莽滋蔓於是張樂行令其姪張總愚偕賊黨孫四牙張鳳昌洪馬瞎等由潁州沈項一路援大喜而令劉狗孫醜出宋郡爲後應同治二年正月十二日賊頭起由苗家寨竄元牆集十五日至雞蛋劉家湖寨時大喜爲張曜余際昌等追勦遁入阜陽

界吳老莊寨十八日張曜方督叅將尹嘉賓等擊大喜於秦宜寨北面煙塵大起偵皖捻已至侯家集張曜恐華莊坐營有失遂抱隊退而以馬隊乘夜襲賊於侯寨連破賊三壘擒捻首獨角虎周馬斬首二百餘級其竄油店橋者爲游擊李忠奎擊走十九日余際昌與陳大喜各賊戰皖捻驟至際昌令昌勝各營分路迎敵以剛銳營往來策應賊圍十餘里候補知縣陳學仁戰歿際昌往來盪決振臂疾呼士皆殊死鬪始得出是時續竄之劉狗孫醜等賊於十八日至

鹿邑蘇克金舒通額等邀擊於魏橋斬首數千級賊
大敗歸巢巡撫張之萬聞際昌被圍檄左成元邵春
仁及際昌所留茅家臺兩營同往援剿賊見官軍大
集而劉狗等不能至遂與大喜合竄二十五日攻陷
汝陽之史樓二十八日入棗王寨張曜令游擊南宮
寶襲破之二月初一日攻新蔡之宋培基寨爲游擊
周明崑擊退初八日賊由正陽之銅鐘店南走際昌
追之初九日擊賊於正息接壤之土扶橋霍光玉寨
賊夜遁初十日至息縣龐家渡署知縣劉鴻昌都司

田映唐率勇練擊諸半渡斃賊數十賊竄羅山縣竹竿鋪知縣賀錫福邀之斬首數十級賊竄光山十一日際昌渡淮見賊據曹黃嶺集馬步乘夜進剿至旦及諸寨河集副將李殿元率步隊驟進賊驚棄輜重走游擊劉自順已革副將盧得勝等率馬隊追至吳楮店截賊爲兩都司連美直隸州湯聘珍守備楊長林踵至斬紅衣賊目及騎賊數十賊搶渡五里河我軍逼之副將浦本祥游擊斬玉書鞏玉林自上游濟游擊甄樹德叅將劉興旺都司趙鴻先自下游濟兩

路鈔襲賊不支向南潰奔我軍追之斬首千數百級
賊竄白雀圍議欲東竄商城循六安結粵逆張之萬
令際昌等繞前扼之十六日際昌至胡莊店遣劉自
順崔廷桂盧得勝等率本部馬勇取道光州扼商城
十七日夜際昌令各營襲賊先遣步勇攜火器間道
至賊館縱火馬隊繼進賊驚潰羸馬器械遺棄滿山
兵勇開道而行賊聞商城有兵不敢東竄遂南奔虎
頭關十九日際昌追及督軍占山頂對山發礮賊分
三路進自午至申我軍連捷賊知際昌追之急遂以

小股據沙坪牽我追師而大股前竄界嶺際昌遣連
美及把總吳安邦簡精銳夜襲賊營冒雨疾行既至
槍礮齊發響振山谷賊大亂墜崖谷死者無數悉竄
楚之麻城縣際昌督軍出境裹糧而追麻城多稻田
值久雨埂壟泥深日行二十餘里三月十一日抵麻
城偵知賊已至蘄州謀竄黃梅廣濟宿松東下結粵
逆楚軍尚未接仗張之萬以賊蹤過遠而汝郡方需
兵遂檄際昌還令留三營扼商固甫旋軍而賊復回
竄夫子河白杲二十一日至潘家塘中關驛逼近光

山際昌聞之督軍由白雀園而出光山令劉鴻增守東界嶺與在籍知府何蘭馨團勇聯絡聲勢二十七日賊由山僻入境二十八日由新店竄至潑陂河際昌檄李殿元各營分三路進而伏馬隊於磚橋集令盧得勝出沙子岡誘敵何蘭馨及光山知縣沈振鈞集團練助之自辰至申斬首百數十級賊知光息有大軍扼守遂於光山之青龍寺口光羅接壤之河口集息縣之茶棚三路搶渡騎賊分列淮南北防官軍揜襲李殿元盧得勝等會各縣練勇亦分三路邀之

斬悍賊百餘得車馬器械無算而守備王國元殞於陣四月初五日事也初七日際昌偕何蘭馨由息縣李家大竹園探勦初八日至正陽南界之李寨多所斬馘初九日黎明際昌率浦本祥楊長林連美李廷彪崔廷桂劉自順王秀林周大陞等進令李殿元等押鍋帳繼進自辰至午轉戰十五里至方寨南賊衆返拒李廷彪揮軍敵之賊稍卻俄方寨之西出賊五百餘騎步賊數千橫截我軍際昌怒馬大呼挺矛疾刺賊衆辟易而寨後又出伏賊圍十餘重我軍左右

隔絕際昌被數十劊歿於陣游擊李廷彪都司魯華
青趙嵩三守備申得三徐英杰王炳坤趙鴻春汪大
順千總連興胡登庸張得勝朱得勝王文慶蔡公興
把總何成功趙其蘭吳得元李廣田王玉珍張得福
陳鳳山黃學立魯世林嚴登高張殿文曹占春蘇文
章陳廣玉外委楊守忠頓得之頓興成張福興蕭萬
貴江之學傅盛豐周學達彭心福五品軍功李占元
余泗先等三十九人均戰死將士傷亡過半越二日
始獲際昌遺骸傷痕鱗次無完膚際昌驍勇善戰賊

當之輒靡統將中最有威望及戰死遠近惜之事聞
詔以提督例卹建專祠追贈三代諸將附祀焉
其救援不力之崔廷桂連美王秀林周大陞楊繼才
等均褫職當賊之回竄也張之萬慮際昌所部轉戰
累月奔馳數千里又衆寡懸殊恐有失命參將孫之
友敖天印率本部二營往援至則已無及距際昌之
死才半日耳賊旣戰敗官軍其勢張甚分據方家寨
萬安店大小張寨黃寨與張岡之賊聯絡蔓及寒凍
汝郡戒嚴張之萬檄張曜以豫勝六營臨勝營馬步

分守要隘令孫之友敖天印滋擊王文行等分駐張岡東西以斷援賊十一日賊攻正陽之吳家寨文行救之斬首數百級賊入萬安寨文行擊走之追至熊寨奮身力戰手刃數十賊左右骸皆中矛傷賊撲張岡忠心廟之友擊走之復敗之於殷家圩十五日賊衆六七千至張岡趙鴻舉飭各軍四面邀擊卻之追至周小灣而止賊既不得逞志於我又不得併入張岡遂由東北渡汝河欲由新蔡歸皖張之萬豫令張曜扼新蔡遂敗賊於宋培基寨又襲賊於李莊橋北

岸斬首數十級其後股之在汝南埠者于總喻魁高自秀等亦於是夜襲斬賊數十追至河邊礮擊落水者二百餘賊竄平信鋪新蔡知縣唐咸仰會同尹嘉賓設伏誘之斃三四百擒賊目徐卯等賊出潁州一路遁歸亳巢賊之出也以正月中旬其時張樂行猶未伏誅迨僧格林沁進軍亳東各圩迎刃而解擒張樂行降姜太林而直東教匪復熾僧格林沁率軍北趨苗沛霖戕官據城煽蒙亳各圩乘機竊發故此股敗賊遂挈大喜而東據雉河舊巢會蒙城臨淮被圍

日急苗燄大張

朝廷命僧格林沁督軍南下由

亳東進討亳捻聞之復出竄五月捻首蘇老夢陳福
王尿龔耀王廣張安張搭拉等糾擾永亳境由耿黃
寺三丈口立液寺寶告進犯盧廟營廓等集另股李
大箇子相盤等攻永城之丹城集石弓山銅溝集陳
家樓大肆焚掠時張之萬毛昶熙方以全力攻張岡
而程四老砍及大喜子姪等由六安州竄入固始之
黎家集馬步賊萬餘沿途刈麥劉鴻增與知縣陳贊
擊走之賊由光州林家集過河西掠南茶菴高店杜

傳店張之萬檄孫之友尹嘉賓往勦五月初五日賊
攻光山縣之慶元張寨知縣沈振鈞擊斬數十賊竄
東南大王廟官渡河十四日尹嘉賓率馬隊馳至遇
賊於新息交界之河口十六日感賊於河賊分兩股
其一與孫之友遇於息境之白土店十八日我軍進
擊斬馘數十三更之友選死士劫賊營火器並發斃
賊三百餘詰旦賊糾衆反拒之友馳馬直前手刃賊
目二復追斬數十餘衆遁入王倫空寨二十日我軍
進攻賊棄寨走入譚家圩之友以練衆夾擊賊遂出

馬店出境而尹嘉賓擊敗之賊於二十日撲廖寨官軍與寨團會擊斬首數百級賊竄新蔡邊境總兵保英與知縣唐咸仰率兵勇迎擊值嘉賓至前後夾擊賊走息縣之趙莊王家灣六月初二日賊由固城倉一路遁回皖此股擾新息時歸德正告警張之萬等以軍事方棘兵無可分檄叅將李世玉率所部由彰德移赴永城及賊由息縣出境復檄之友取道商水陳州以扼鹿柘世玉至永則前竄之賊已退六月初七日賊衆分據會亭驛左近世玉會同會亭營叅將

徐汝紳擊之斬首百餘級擒李壑林等初十日賊竄
柘城張橋集另股擾磚橋集十一日攻縣城知縣恆
志卻之賊騎駛至太康毛昶熙遣游擊呂振河呂浩
然馬隊由商水探勦而之友軍亦至遂擊走之賊折
竄鹿邑二十四日我軍至十字河南遇賊騎之友躍
馬斫倒執旗賊目賊衆辟易擒斬五百餘二十五日
追至亳西之李橋又截殺百餘賊乃竄回亳東於時
永鹿邊防日警會張岡已拔毛昶熙移軍歸德而張
總愚等因聞僧軍卽至遂傾巢出擾我腹地矣

豫軍紀略卷十

皖匪十四

毛昶熙之軍於歸德也分遣諸將進圖亳匪先克盧廟王廟吳廟口吳各拉諸賊圩令趙鴻舉邵春仁蔣東才由韓家集進兵呂振河李大成由營廓集進兵黃貴誠由權家寨進兵次第勦撫亳北楊廟等十餘寨亳南之沙土集孟家窩蔣家集丁固寺程家竹園程家北寨劉家碾楊家莊燕家莊袁家樓洪莊盧西樓西蔡莊宋牌樓小吳莊彭家埠口穆新莊韓術術

諸處張總愚不自安遂糾巨捻程二老砍等謀棄毫巢別竄會聞僧格林沁軍將至苗沛霖復嗾之犯豫別遣葛小牛一股出潁州趨沈項於是張總愚程二老砍李庫等馬步賊萬餘閒道由鹿邑一路疾走七月二十一日至太康之五里口新集獨塘二十二日至扶溝知縣鄒金生禦之賊竄鄆陵臨潁毛昶熙急遣孫之友永奎敖天印等取道鹿柘繞前截擊張之萬方在省飛檄張曜由陳州追勦益以李世玉彭心友各隊令扼西竄路二十八日張曜會合孫之友等

敗賊於鄆陵賊竄許州據大莊保全兩寨三十日張
曜令張士元周明崑等進攻擒斬悍賊程虎李小蘭
王妮子等復大莊寨而保全寨之賊聞風西遁於是
分兩路張總愚竄禹州程二老砍走襄城而苗黨葛
小牛一股亦於三十日入豫境之紙店八月初一日
至淮甯之魯臺集犯西華縣城知縣徐炳卻之張之
萬檄孫之友折由扶溝迎勦令李世玉扼於通許尉
氏之間王文行由上蔡北趨會諸軍堵擊檄南陽鎮
府擊南竄之程二老砍而以西竄之張總愚責張曜

過其入秦自督親軍出省駐許州策應各路時禹州被圍知州馬傳和晝夜嚴守賊西竄登封山中張曜追及於吳渡黃樓新店岳廟諸處擒斬甚多初九日張曜會同候補知府湯聘珍督諸軍抵嵩山之麓擊賊於沙果河窪村保英敖天印周明崑宋徵文彭心友周登高何成蛟等緣崖越塹轉戰半日斬賊目十三賊首二百餘級賊於隘口壘石斷我進兵路張總愚自據大金店初十日張曜令保英等奪箕山口顧家嶺石橋諸隘鈔大金店之後令敖天印等奪耿樓

小中廟文村口諸隘通大金店之前自督親軍居中
策應山中要隘以箕山口顧家嶺爲最宋徵文潛師
奪卡賊抵死相爭攢長矛下刺宋徵文手接賊矛騰
躍而上諸軍隨之登直逼大金店忽援賊四合張睢
急令王占鰲羅中奎等突圍入援拔出全軍宋徵文
被重創與把總王詩已戰歿敖天印進取耿樓冒矢
石肉薄仰攻賊棄險逃我軍乘勝逐北旣奪文村口
諸隘而山後驍賊猝起循澗橫衝金店之賊亦蜂擁
出圍我軍數重敖天印持矛躍馬突重圍與援軍合

賊始退干總何紹林黃仕祥盛繼隆武金太等皆戰
歿時秋雨連旬相持不得戰而賊中黑旗一股已於
初六七等日分竄偃鞏入洛陽李村諸葛村十五日
賊分數十隊冒雨渡洛河爲知府厲文煒所遏遂回
登封與大金店之賊合二十八日賊乘霧突出我軍
先已嚴備斬首數百級二十九日張曜整軍進勦出
營數里卽見賊衆蔽地至張曜令總兵保英領親兵
由中路衝壓保英馬踏賊趁勢凌我軍幾爲所乘張
曜驟馬而前手刃退縮者士乃奮會知府湯聘珍軍

至縱橫盪決所向披靡副將張士元率臨勝營馬步
繼進槍擊矛刺賊衆死傷枕藉張曜率馬步由坡後
包鈔四面蹴之殲戮殆盡是時羅輔臣郝永剛等隊
奉張之萬檄至軍張曜因地勢險阻宜導以鄉兵乃
飛調大金店附近團練授以機宜三十日申酉之交
選各營敢死士飽食嚴裝銜枚進晦夜初更野色不
辨張曜率湯聘珍張士元身先士卒壓賊壘火器齊
施賊出不意駭愕奔潰立將大金店附近賊卡踏毀
殺斃無數於時各寨團練均由山僻熟徑抵賊巢火

光礮聲震耀山谷大金店踞賊乃大怖棄巢南竄九月初二日入汝州境初三日薄魯山縣城知縣左駿章卻之初五日張曜率各軍及於魯山北寨之大營集斬首數十級初六日襲賊於撈飯店棟樹店甘露寨斬首百餘級十五日賊復攻魯山縣城左駿章以大礮卻之賊由鷓路關竄入南召前隊由鐵牛廟間道窺城郝永剛率隊至與知縣會照合擊走之十六日賊復至我軍憑城列隊槍礮齊發十七日又敗諸城下賊南竄王文行周明崑馬步各隊擊賊於城南

十五里之口字河二十日張曜督各軍擊賊於十里鋪賊幟環立王文行怒馬疾進將士爭首功皆大呼從之立斬悍黨數十賊勢披靡追至口字河迤南賊竄城南二十里之草店圍攻山南太子望寨寨築山顛汲道爲賊所斷勢危甚二十一日夜張曜密遣都司王占鰲許萬榜各率所部以團勇爲鄉導間道潛師夜進連破賊五卡以五鼓馳入太子望寨二十二日黎明張曜擊賊於七里灣馬步賊數千殊死鬪游擊王文行都司楊春祥奮臂大呼馬隊由兩翼包鈔

三軍譟而從之賊衆驚潰追斬首數百級至山南王
占鼇許萬榜亦由寨中衝出前後夾擊大破之王占
鼇中槍殞餘賊敗回草店二十三日張曜部分各軍
令南召辦團委員黃璣率民勇伏城北鹿鳴山之麓
把總陳大德領汛兵伏城西林木中曾照領練勇列
城南以大礮扼河灘會北風大作各軍順風發槍礮
山谷震動自辰至未斬馘千數追十餘里因溝狹箐
密乃收隊二十四日夜我軍冒雨進至拐角鋪南踏
破賊卡兩處草店賊列炬迎戰相持兩時卒爲我軍

所敗二十五日賊撲太子望寨許萬榜出擊王文行
雷才貴等閒道往援賊卻走是夜羅輔臣彭心友等
閒道襲賊營斬首百餘級二十九日賊分股圍孟山
黑山等寨其大股仍據險與我相持張曜與諸將計
曰賊情詭譎其以精悍死拒山口阻我進兵將分股
旁趨我不繞道出奇而坐受牽制非策也乃令郝永
剛援孟山等寨令單體晉繞由草店以西趨南路周
明崑繞由東山前進而親率各隊直逼草店賊見我
兵四出恐被阻截遂於十月初一日悉衆南走張曜

督各軍追擊初三日遇賊於鎮平柏樹廟殪其騎賊
追至柳泉鋪賊由黑龍集竄鄧州之白太山廟初四
日分撲鎮平西南之賈宋寨外委段明出擊至李坡
遇大股援賊段明戰死初五日賊犯內鄉縣城張曜
及之揮兵縱擊賊敗走初九日賊犯浙川廳城同知
馬箠乾卻之賊據北鄉之馬磴板橋蒿坪姚灣其地
西通商雒南達鄖襄張曜恐賊走秦楚遣豫中豫後
靖淮三營由北山繞赴西坪臨勝楚勝各營並郝永
剛所部倍道疾走荆子關自率嵩鎮豫右等營扼舊

縣絕其入陝之路當是時僧格林沁督軍至汴與張之萬議由鄆陵扶溝西華一路下蒙亳總愚聞僧軍鐵騎且大至懼而西走依山阻險不敢入平原一步而程二老砍一股則自八月初二日爲孫之友永奎等一敗之於靈樹寨再敗之於縣北汝河口走郟縣初三日知縣張熙瑞會同在籍總兵黃得魁擊斬賊數十賊由寶豐竄葉縣初六七八日孫之友等追及屢敗之初九日賊騎至裕州知州鄭福申集團邀之賊竄賒旗店十一日犯唐縣城署知縣金緘三緹勇

出擊截殺越濠悍賊二十餘遂由源潭竄楚之棗陽
隨州闌及鍾祥縣境楚軍梁作楫歐楊正墉等軍躡
擊之賊輾轉東走入黃州境復回竄光羅總兵李殿
元自息縣勒兵截之九月二十二日至二十七日連
敗賊於中興店七里岡賊據獨山李殿元偵知息境
土匪吳天鳳踞李寨欲結皖匪遂飭各隊乘其不備
拔之殲其衆進擊獨山之賊斬殪數百其後股由麻
城繼至李殿元邀諸潑陂河初四日賊潛由河口寨
渡淮初六日代理正陽知縣朱淦敗之於阮店初七

日賊竄汝陽東南之王岡慶寨初八日王文行一戰
敗之賊由沈項邊境疾趨歸巢其後股於初六日至
光山之草鞵店渡夫店民團擊斬賊目陳元虎等賊
犯光山縣城李殿元令叅將靳玉書渡淮迎擊擒四
十餘初九日敗賊於王家樓知縣沈振鈞合練總陳
家善馮毅劉恩詔等團勇設伏助之斬賊數百擒魯
金貴等救出難民九百餘人初十日賊渡淮北竄兵
練追蹙之正陽知縣白集復敗賊於油坊店賊由廟
灣趨沈項尹嘉賓時駐槐店邀擊於谷集徐連陞亦

率隊至先後敗之斬首數百級干總林宗魁戰歿十
五日尹嘉賓等復以馬隊斬賊八十餘乃狂竄出境
其葛小牛一股由西華逍遙集趨臨潁八月十二日
襲陷民寨數處南犯鄆城知縣楊元祐登陴嚴守賊
復折圍臨潁知縣查以謙以大礮卻之十七日孫之
友李世玉擊賊於潁西大石橋二十日賊由茨溝犯
襄城適永奎馳至揮騎兵縱擊知縣陳基亮集團助
之斬馬賊四十餘擒李長太等賊竄郟縣二十四日
復折擾葉縣二十六日孫之友李世玉追及之賊走

舞陽之北舞渡東竄郟城西平其行剽疾遂由上蔡一路歸巢當是時也豫境有賊三股官軍應接不暇大河以南幾於徧地賊氛而復有李大箇子一股馬步賊數千於八月二十二日由永夏之交突竄會亭營蓋苗沛霖嗾攻懷遠阻雨不能進故西竄也毛昶熙時在歸德急調呂振河扼蔡道口令總兵成景率標兵出擊賊疾走二十三日竄甯陵知縣方恩植截斬王得林等二十四日竄睢州二十五日至杞縣聞省城戒備甚嚴太康尉氏間均有官兵因折向東北

二十六日至蘭儀高小集由考城趨商邱之丁道口
二十七日呂振河李大成及都司傅守巽穆清遠李
玉得敗賊於劉口斬首數百級李大成夜襲賊營賊
衆向東狂竄二十九日我軍追至虞城會同知縣劉
廷章練勇敗賊於梢垌集賊盡棄輜重遁歸巢而程
二老砍雖被擊出境後股尙踞沈阜之交據沙河南
岸與蔡河西岸之劉雲景一股相犄角十月十八日
尹嘉賓會同沈項縣丞王沛霖等兵圍敗賊於河濱
斃賊三百餘十九日賊於方家灘偷渡兵圍蹙之又

斃賊數百擒五十餘二十四日賊復由槐店東水淺處偷涉兵團四面橫截溺死甚衆奪獲楚省號衣及資械等擒于張等程二老砍遣其弟程大寬姪程友正因投誠練總程新正赴毛昶熙營納款昶熙命赴僧營僧格林沁受而羈縻之於是豫軍全力始專注於張總愚矣

皖匪十五

張總愚既竄浙川遂據板橋川窺武關而川匪藍二
順由漢中興安竄商州駸駸東犯張之萬檄張曜嚴
備飭道員葛承霖以新募湘勇四營由唐鄧馳往浙
川助剿張曜抵舊縣後分布各營令李世玉屯蒲塘
敖天印屯卧龍岡郝永剛屯攬子嶺周登高屯東塢
保英單體晉屯花園張士元羅輔臣屯兩河口荆子
關副將裴政屯娘娘洞以剿爲防日有斬獲賊伏板
橋川山中專困民寨寨皆築山顛水道迂遠賊以數

百人斷汲道卽一寨坐困一日間分擾數十寨其大股則扼板橋要路與官軍相持於是各寨紛紛請兵十月十五六等日張士元羅輔臣率隊往援阻山險不得進郝永剛絕崖而上因解金龍寨之圍十八日李世玉敖天印擊賊於毛塘斬首數十級二十日賊攻攬子嶺郝永剛營槍礮環擊不退張曜率軍由河西鈔賊背賊譁潰斬首百餘級乘勝解馬寨之圍賊墮崖澗死者甚衆二十一日賊繞東山復攻郝永剛營我軍先於山口設伏突出要擊賊驚遁追至上集

二十二日賊分股犯廳城同知馬筮乾擊卻之賊退
踞馬磴夜攻二郎寨民團擊退二十三日復攻二郎
寨又擊走之二十五日賊繞出河西攻駐馬板山兩
寨張曜往救擒斬數百賊因壘石斷板橋川山口以
拒官軍二十八日羅輔臣由靈官崖進屯橋溝伐木
爲壘壘半成賊衆突至我軍憑半壘列隊擊退之追
殺十餘里郝永剛亦截殺攬子嶺擄糧賊是日藍二
順竄至西坪保英及高自秀邀之斃賊百餘賊敗至
護水關界嶺距西坪十餘里三十日川匪大股驟至

保英等鏖戰數時殺賊三百餘把總沈福全戰歿張
曜馳援敗賊於回馬溝張總愚知藍逆已至率衆分
犯郝永剛羅輔臣營我軍盡力截剿賊始引退李世
玉亦敗賊於毛塘十一月初四日川匪犯重陽店營
張曜督張士元等奮擊追殺二十餘里賊於花園關
築木壘死守初五日我軍自回馬溝繞出花園關後
直擣西坪攻破之賊向荆子關大路狂奔花園關賊
亦棄巢走至小陡嶺敖天印先已據其險要矢石交
下追兵自後擊之殪賊數百斃黃衣騎川馬賊三棄

資械無算狂奔百餘里竄據青山口地屬商南距荆子關八十餘里張曜令敖天印高自秀扼關前防回竄初九日張總愚分股犯撫子嶺鎖河口毛塘卧龍岡郝永剛羅輔臣李世玉周登高分路卻之各軍滾營而進十八日羅輔臣捨紮下鎖河口乘月築壘一夕而成與板橋川隔一河十九日賊見營壘糾衆出攻羅輔臣率隊截殺斃悍賊數十是夜孫之友會同馬筮乾襲破鎖河北雞山根賊營進踏河西賊壘斬首數百級張灣賊衆皆不戰而遁張曜聞之夜令各

營嚴備自督親軍由上鎖河循岸東行遙聞賊騎蹴
踏聲揮軍截之賊棄輜重狂走擒斬二百餘獲賊謀
言總愚欲往魯山嵩縣四棵樹暫屯再由潼關西竄
張曜遂令蔣希夷周登高自馬山口捨屯四棵樹令
湯聘珍率馬步追擊賊於二十一日攻內鄉縣城知
縣朱琨擊走之二十二日賊竄馬山口都司尹彥欽
前湖北大冶縣知縣齊偉率練長梁榮薛德王信等
敗之賊不得逞由方山蔓山一路竄南召西北李青
店張曜會同每承霖自馬山口追賊豫軍新練馬隊

副都統善慶色爾固善等統之會同僧營所遣翼長蘇克金道襄郊赴魯山扼賊西竄張之萬自許州移軍汝州督勦時僧格林沁已抵蒙城督總兵陳國瑞等一夕踏平苗逆七十餘壘斬苗沛霖擒石弓山捻首相盤及葛小牛鄒喚林龔耀等寘諸法程二老砍李大箇子魏羣兒率眾乞降皖北大定於是陳大喜率苗黨三千糾亳捻李允劉三貓等竄至汝陽信陽正陽桐柏各縣肆擾旋由唐縣竄赴隨州尹嘉賓等逐之出境與張曜等擊板橋川之賊同時事也賊既

竄據李青店白土岡諸處邊騎哨至魯山四棵樹於
時張曜葛承霖等各軍四面入山二十五日永奎周
明崑擊賊於板山坪張曜繼至斬首數百級擒賊日
張小安賊衆奔潰我軍屯板山坪各營連夜築壘詰
旦賊大至李世玉羅輔臣營未就幾爲所乘郝永剛
單體晉雷才貴等率隊至指揮盪決斬賊首數十級
千總廖尙烈戰歿賊翻山遁二十七日張曜擊賊於
白土岡賊以大股迎戰移時各軍踵至賊遁入山谷
十二月初四日葛承霖勦賊於留山堡副將張養吾

率所部繞山疾進賊驚潰我軍鼓銳衝擊俄見蜈蚣
旗數百突來接應勢將橫截我軍蜈蚣旗者張總愚
之選鋒死黨也承霖以生力兵禦之游擊白定燮劉
貴亨毛際惠大呼陷陣血戰兩時許斬首數百級逐
北十餘里初七日張曜督率張士元程之偉周明崑
等銜枚夜出縱火襲破賊營初八日賊馬步數千繞
北山至板山坪鈔我營後張曜繞北山之北拊賊背
都司楊春祥等殺入賊中賊隊大亂我軍乘之斬首
三百餘級初九日我軍設伏於稻田溝雙廟溝誘賊

大伏前後夾擊斃其四十二騎擒賊目張學文王雙成等是日賊分股掠馬牙山知縣曾照外委方振斗等率民團敗之而團長武生韓中選韓金鏢熊紹夢熊秋魏上豹魏成張文光張振聲霍玉祐等皆戰歿張之萬以賊注意西路而李青店白土岡居萬山中馬隊不得進惟以步軍分路扼防乃令總兵吳再升駐魯山之下湯葛承霖屯四棵樹下湯之西爲二郎廟二郎廟西百餘里爲馬市坪四棵樹之南爲界嶺界嶺南二十里爲迴龍溝西扼馬市坪則可屏蔽嶺

盧南守迴龍溝則可襟帶南召馬市坪距官軍板山坪營三四十里出迴龍溝則李青店賊壘在吾日中尋令吳再升由二郎廟進屯馬市坪葛承霖由界嶺進至迴龍溝闕南召一面示以空虛誘賊出走則以蘇克金等騎兵躡之時蘇克金在魯山張之萬屢致函令其移屯南召左近而蘇克金以爲非策十五日以後晝夜陰沍平地雪深尺許山中蹊徑莫辨各州縣饋運軍食草料多有不能至者葛承霖將進兵阻於迴龍溝之險溝長五十餘里賊據溝口而壘葛承

霖慮移營出溝爲賊所乘因議先由閒道擊散溝口之賊二十一日雪霽承霖選各營精銳攜椎斧攀巖鑿磴蟻附而上出溝口賊營之背賊大驚不戰而潰二十一日我軍乃以中左兩營自山溝出仍以前右兩營從兩旁山坡分進至趙家莊賊以萬衆來逼承霖以左右兩營與賊交鋒鏖鬪時許副將王有明把總張紹先深入賊中中斃殞將士憤恨戰益力適右營自山頂壓下賊駭愕承霖更率中前兩營橫出截擊縱橫盪決斬馘以千計賊狂奔我軍追至王家莊

焚賊營而返

皖匪十六

自葛承霖敗賊於迴龍溝口焚王家莊賊營後值歲除山中積雪賊喙伏張之萬由汝州檄諸軍移營進偏葛承霖移界嶺營於迴龍溝在李青店之北吳再升由二郎廟進屯南召之馬市坪在李青店西北張曜營板山坪在李青店西南聲勢聯絡約期並舉三年正月初六日吳再升率所部進抵馬市坪壘未就賊由李青店西北張灣驟至吳再升勒兵出擊叅將吳承敖知縣黃立鼇陷陣斃賊甚衆吳再升率馬勇

及洋槍隊繞山後闌截斬紅衣賊目各隊乘之火器
齊發賊驚潰越山奔竄我軍追至張家灣踏平賊卡
數處是日葛承霖知吳再升已移營亦由界嶺整軍
進合嵩鎮後營扼分水嶺顧後路令府經歷劉載轅
據迴龍溝口備衝突十二日五更承霖率中前左右
四營及親軍冒風雪出溝口黎明至化坪距李青店
三里令知府湯聘珍率左右兩營伏東山之麓自率
中前兩營渡澗擣賊巢擊斬哨賊於途俄聞西南西
北礮聲震地賊眾數千分路出西南一股直衝我軍

游擊彭心友率本部迎擊劉載轅率中營策應正酣
鬪間西北一股越山澗下流襲我後我伏兵出賊駭
奔承霖策馬怒呼將西南之賊壓退忽山北村後又
出悍賊四五千衝我軍先敗之賊反戈復鬪賊陣中
有馳馬指揮頭裹黃巾者游擊白定燮槍斃之賊氣
沮我軍乘勢斬賊數百餘賊奪路狂奔時風雪愈大
斂兵歸營十六日天稍霽賊馬步齊出犯西北馬市
坪營吳再升先以三成隊迎擊賊洶甚乃以全隊繼
之槍礮環施賊死拒游擊皋廣德中礮殞將士多傷

者再升率叅將吳永敖知縣黃立鰲等戰益力我軍
洋槍隊所向披靡追近賊巢擒斬數百夜獲李青店
逃人言賊畏各路兵厚知馬市坪稍單決意北趨已
於附近之小黃土嶺一帶分股屯踞以備接應張之
萬聞報飛檄副將尹嘉賓率所部取道南召守備賈
文田率所部自四棵樹前進均赴馬市坪會合吳再
升扼守要隘檄善慶率吉林黑龍江二起馬隊進屯
南召之石橋與張曜一軍遙爲聲勢扼南路十九日
賊馬步二千餘由李青店竄白河張曜繞山鈔截戰

一時久賊敗遁斬首四五十級張曜因念各營距白土岡賊營甚近賊備必嚴若遷敢死士二千繞北山先襲李青店出不意賊可破而白土岡之賊亦思潛襲官兵營是日五更張曜督兵疾進甫離營數里卽遇賊張曜急折回繞出臥石溝賊見兵從北至疑援師新到正彷徨間我軍齊出左右夾攻賊死傷枕藉呼號狂奔追至白土岡賊入壘死拒我軍奮勇進攻立破其街南一壘殺賊百餘忽李青店馬賊千餘風馳而至由兩面沙灘鈔我後路敗賊復出壘抗拒張

上乃陽爲列陣於前陰令游擊劉貴亨率所部由旁
峽扳崖鈔其後岡上之賊見後路絕驚譟而奔我軍
方乘勢擒殺而李青店大股四路援應值狂風大作
望見賊旗五色颺舉入雲我軍逆風不得施槍礮乃
收隊歸二十四日承霖由迴龍溝西出化坪甫立陣
賊騎大至游擊彭心友怒馬陷陣衝賊爲兩各隊槍
礮繼之斃賊百餘毀賊卡四是時張曜板山坪之營
旣扼賊西南使不得逞賊又聞蘇克金馬隊已分屯
南召色爾固善駐鎮平與善慶石橋之師相犄角乃

圖竄西北二十九日賊馬步五千撲馬市坪吳再升
營翻山越嶺一望無際吳再升令楚黔親軍分路迎
敵塵鬪一時之久再升槍斃領隊賊目賊譁潰我軍
乘勢追殺數里當是時賊已困如釜魚山口官軍更
番戰勝張之萬又奏調總兵宋慶一軍於皖僧格林
沁遣提督傅振邦至宛南助剿軍氣百倍遠近皆謂
掃蕩在此時矣而粵逆僞扶王陳得才僞端王藍成
春僞啟王梁成富僞遵王賴汶沈由漢中東竄一自
石泉漢陰出興安竄鄖陽一自西鄉紫陽磚坪平利

至竹山一自甯陝出鎮安趨商州皆會於南陽楚豫
震動張總愚聞粵賊至嗾其黨拚死出山圖合粵逆
二月初二日賊由西南奔竄爲色爾固善截回十一
日葛承霖至化坪遇馬賊四五百騎擊斃十餘賊反
奔俄黃衣賊首率衆三四千呼嘯羣集副將張養吾
游擊劉貴亨驟馬突賊陣追至午陳莊遙見李青店
西北紅旗徧野賊衆數千風馳而東絕我後路我軍
分途應敵勢幾不支適游擊白定燮等隊至諸將合
力環攻戰三時久賊始退十三日賊衆復出承霖合

槍礮環攻一黃衣馬賊應槍落馬衆掖之而去是夜
張曜選步卒襲白土岡燬其柵火光中見衆賊裸體
狂奔我軍刀矛攢刺擊殺無算惟街東一壘堅守不
動敗賊皆逃入十五日葛承霖遇賊化坪扼嶺而戰
都司胡德亮歿於陣三更賊由李青店全股衝張曜
營躍擊卻之乘勝追至白土岡賊不復進巢棄壘走
遂合李青店蹀賊折向西北馬市坪一路曜恐吳再
升等有失乃繞前策應時葛承霖猶嚴陣而出十六
日黎明至李青店擒馬賊詰之始知張總愚已西竄

矣賊至馬市坪以騎賊當前步賊繼後徑攻吳再升營再升令各營嚴備將士憑牆守禦槍箭無虛發賊衆多落馬抵死不退再升乃選銳卒親出拚擊敗之副將周登高尹嘉賓守備賈文田各率兵助戰追出二道河賊列陣於小黃土嶺尹嘉賓身先士卒手斬悍賊百餘賊狂竄蓋吳再升敗賊之時賊以此股羈我追師大股由北河口翻山疾趨南召之喬灘抵瑕蹈隙自正月二十九日之戰已決計取道於此也至是而張曜葛承霖等軍俱集會議追勦張之萬急檄

各軍出賊前扼西北留精壯防南召各山口檄新到
總兵宋慶一軍赴嵩縣調副都統善慶色爾因善馬
隊由鎮平南召與宋慶合勦而漢中髮逆已近浙內
交界之西峽口土匪陳大喜率眾竄湖北黃龍壩瑜
山諸處將援張總愚時總愚已竄嵩縣十九日由龍
王廟至黑峪二十一日張曜等軍及之戰黑峪街賊
竄盧氏之藥川廟子街三川諸處袤延二百餘里張
曜令總兵保英副將李士玉各軍仍扼黑峪自率張
士元尹嘉賓會合諸軍繞出盧氏分道防勦葛承霖

駐冷水鎮顧北路宋慶屯陶灣顧西路張曜駐三川
策應各路三月初八日宋慶至陶灣敗賊游騎初九
日賊以大股來撲宋慶督礮隊環擊斃賊無算賊乃
狂奔各軍方議會勦忽粵逆分股由商州東竄盧氏
距朱陽關百里遂合賈文田率所部扼守保英繼之
張曜葛承霖宋慶各軍皆有腹背受敵之勢乃激勵
將士更番疊進張總愚始於藥川迤西山口築四營
深溝高壘旣而屢爲官軍所敗賊衆傷亡極多各壘
皆爲我軍踏平賊不能支於十五夜盡棄輜重向東

南大坪頭一路攀越大嶺由廟子街羊子溝長陽河
二郎坪竄遁將由下關出馬山口奔鎮平內鄉此路
萬山奇險賊馬墮崖澗死者無數張曜等各留數營
駐藥川防朱陽關粵逆自率精銳踰險躡擊善慶色
爾固善率吉林黑龍江騎兵會合尹嘉賓張士元步
隊由黑峪山中大路徑趨馬山口與張曜宋慶葛承
霖等會齊前截後勦時粵逆頭股倪逆已由鄧州至
新野攻縣城端逆等股由西坪攻內鄉其尾股鍾得
終等爲總兵李殿元副將黃貴誠裴政等敗之荆子

關繞由屈元岡一路竄內鄉而陳大喜大股自鄧州
永青山南竄亦與粵逆合其朱陽關之賊漸由山中
南竄大勢趨重宛南二十三日張曜宋慶葛承霖善
慶色爾固善等馬步各軍同抵馬山口詢知張總愚
大股經寨前竄向內鄉纔一時許遂各整隊馳追忽
粵逆大股自內鄉之西坪巡檢司赤眉城竄至旌旗
蔽山谷我軍駐隊邀之游擊蔣希夷首先陷陣尹嘉
賓程之偉欽賊後善慶色爾固善以鐵騎橫截之戰
四時久斬首八百級擒二百餘賊向南狂竄其內鄧

新唐一路粵逆大小十餘股及陳大喜等縱橫旋繞無處非賊而張總愚自此遂與之合是時僧格林沁統全軍由河洛至宛張之萬檄各軍會之緊躡賊踪分道進勦賊由新鄧一路入楚四月初二日僧格林沁敗捻股於隨州之沙岡日口賊東竄犯信陽之平靖黃土兩關張之萬時駐南陽檄葛承霖一軍及連美賈文田馮聖傳李承先等營扼賊信陽十二日馮聖傳擊賊於城南三里店敗之十八日賊攻州城爲連美等擊走葛承霖亦敗賊於馮家莊賊衆紛向南

奔十九日承霖等敗賊於譚家河追出武勝關二十
二日各軍又連敗之於廣水驛長正河大山口石塘
諸處斬首三百餘級賊悉東竄前股僞端王藍成春
與陳大喜合竄黃州之下巴河二股僞遵王賴汶洸
與張總愚合由羅山宣化鎮竄至黑斗關爲副將徐
連陞一軍擊卻竄入黃州境三股僞扶王陳得才與
捻匪張佃江合由安陸竄至應山後股僞啟王梁成
富爲張曜等擊敗追至鄖西遁入陝境張之萬以東
路軍事日警檄張曜宋慶善慶色爾固善等馬步悉

往信正光羅一路扼要防勦皆聽僧格林沁調度賊
畏僧格林沁鐵騎盤旋於豫之光羅皖之英六楚之
蘄黃其地田塍交錯我軍不利馳騁而鬚逆則志在
赴援金陵阻於江楚防軍不能東下亦分踞於三省
之間自四月以後此出彼沒來去靡常張曜宋慶善
慶色爾固善等與皖楚諸軍大小數十戰遇賊卽擊
所擊皆粵逆而皖捻實與之合臨陣莫可辨晰故戰
事詳於粵匪部云

豫軍紀略卷十一

皖匪十七

秋八月張總愚由麻城竄黃安之七里坪初總愚與各股粵逆合從橫楚豫之交凡五閱月至是扶逆陳得才爲我軍破其沙河木城遂偕端逆藍成春自麻城東竄羅田尋與馬融和一股合而遵逆賴汶洸與總愚營壘最近扶逆句合不及總愚乃合遵逆及毫擒任柱牛老紅等別竄自此擒蹤始顯然可別矣張之萬時駐汝甯檄前敵諸軍就近由僧格林沁節制

僧格林沁令張曜徐連陞等各軍勦東竄之賊而令成保色爾固善宋慶善慶楊長春等躡西竄之賊八月初二日追至羅山之蘇家河陳家河未陣而賊猝至我軍小挫僧格林沁適親督軍至羅山九里關戰於蕭家河都統舒通額等皆戰歿將士死者甚多初五日賊圍羅山之永安寨初七日至潘新店豹子山大股據倒座灣初十日陳國瑞督軍追至敗賊於竹竿鋪十二日賊分竄光山之文殊寺張宋店僧格林沁令成保陣國瑞色爾固善宋慶善慶楊長春巴揚

阿等軍追擊十四日辰刻及於光山西南之人和砦
賊於南山列陣宋慶陳國瑞分東西迎擊戰三時久
賊愈聚愈多巴揚阿戰歿賊由新店長潭虎灣竄黃
安麻城分據東南之范店正南之苦竹坳西南之雙
山門卽以雙山門爲老巢總愚居其中二十六日陳
國瑞等從西南進攻衝散賊隊搶佔山卡礮臺令勁
兵守之自由雙山門追至石家埂接戰良久殺賊首
一斃賊無數賊譁然奔二十七日我軍五鼓進攻賊
已先時竄陳國瑞揮軍追之至黃安大山賊依險負

豫軍系圖 卷一 一
二
隅勢難仰攻乃營箭長河扼其回竄時扶逆等遠竄
張之萬檄張曜等軍馳回豫境由南溪進屯長嶺關
以顧北路九月初九日宋慶陳國瑞成保色爾固善
將本部出擊戰於麻城之槐子店斃賊數百追斬三
十餘里賊竄白杲我軍進至閭家河十四日至宋埠
偵知賊據新洲會副都統常星阿等率馬步軍至擊
退之賊折而東趨由上巴河撲蘄水其行剽疾僧格
林沁督諸軍追之張之萬以長嶺關一路有張曜扼
守令趙鴻舉率領蔣東才李大成彭心友等營扼松

子關一路各路官軍力扼西北二十二日僧格林沁
敗賊於蘄水北三家店追殺二十餘里賊竄縣東陳
家壩二十七日楚軍敗賊於青石嶺二十八日僧格
林沁敗賊於蘄州張家灣獅子口賊分兩股遁張總
愚等竄太湖宿松望江之間陳大喜等竄英山以東
芑茅街楊柳灣諸處漸近商城張之萬慮陳大喜回
竄汝郡檄王文行崔廷桂扼守光羅適中之地張曜
扼守金家寨益以趙鴻舉蔣東才彭心友等顧邊境
會各股粵逆十餘萬衆爲僧格林沁擊敗次第乞降

巨孽伏誅唯賴汶洸一股仍與張總愚合總愚復與
陳大喜折趣豫境據光山之沙窩十月二十一日陳
國瑞夜擊賊於沙窩之西擒斬數百賊竄新店復截
殺尾賊甚衆二十二日楊長春進軍擊賊斬首數十
級救出難民無算二十三日色爾固善宋慶會陳國
瑞戰於新店賊大敗追殺三十餘里時僧格林沁督
軍至羅山張之萬由汝甯馳往會商方略防賊西竄
遂調張曜屯唐縣令湯聘珍率新募之軍防宛南以
崔廷桂輔之令宋慶色爾固善楊長春等軍仍隨僧

格林沁躡賊西進而降衆經由汝光者叵測難恃張之萬以情形入告暫緩至宛會張頰各逆全數西竄十一月初九日僧格林沁擊賊於襄陽北蔣家溝賊死戰不退初十日竄至鄧州白洛堰十四日僧格林沁督軍追及戰於鄧境西南之唐坡賊傾衆出鬪降衆果不用命幾中變我軍更番衝擊復爲霧氣所乘遂失利僧格林沁率數十騎入鄧州收集敗軍十五十六等日賊攻鄧州城我軍擊退之賊竄東北腰店旋由南陽境之青華鎮保安寨窺郡城適道員張汝

梅將兵爲張之萬前驅至郡會同鎮府嚴防賊知有備竄鎮平之黑龍集先是湯聘珍率軍抵鎮平慮馬山口爲賊熟徑令彭心友邵春仁將所部入山扼之二十日崔廷桂令李承先率馬勇出探獲賊黨劉漢魁等言賊欲入山乃令金錦林王太朝兩營協勦遇賊於趙河相持一日夜二十二日湯聘珍崔廷桂等率各營並進斬其步隊賊首賊向西北逸張之萬由汝赴宛二十六日抵舞陽知賊勢趣重西北遂停軍於舞令王文行拔隊前進檄飭河陝汝三屬團練堅

壁清野扼賊北竄賊於鎮平境內盤旋數日屢爭馬
山口之險我軍皆擊卻之二十三日賊復乘夜攻營
彭心友設伏擊之賊皆反奔斬首十餘級山高冰滑
賊墮岩死者甚衆二十五日湯聘珍進屯石佛寺寨
賊相率北趨由南陽之石橋走南召奔魯山騎賊四
出二十九日薄魯山縣城署知縣楊宗頤督民團擊
卻之張之萬令湯聘珍等各軍繞道南召魯山出賊
前顧河洛以張曜宋慶兩軍新挫乃令汰舊部之弱
者益以臨勝四營及新募飛虎一營隨僧格林沁進

勦張之萬自駐葉縣時賊分據魯山之梁窪寶豐之
張八橋騎賊四出掠糧十二月初九日僧格林沁督
軍至寶豐賊騎數百駛近城僧格林沁設伏以伺賊
偵知逸去夜僧格林沁密飭勇目張玉等導官軍襲
賊壘賊先已驚走十一日僧格林沁令副將駱得勝
等再襲之銜枚而進破其張八橋賊壘賊奪路奔獲
其馬匹器械甚夥當張曜宋慶湯聘珍等先後馳抵
魯山也賊乘我未陳率黨猛攻張曜揮軍擊退乃築
營十一日各軍分道進列陣誘賊相持半日賊不敢

出十三日張曜選奮勇夜擊賊營拔柵而進斬首十餘級附近據匪皆聞風逸十五日張曜等復勒兵出途遇賊馬追斬數十至段店北忽梁窪援賊大至四面包鈔豫勝營外委王克仁誠字左營守備周步升皆戰歿十九日張曜宋慶湯聘珍等敗賊於魯山城北山坡二十日率各營由霍山廟間道攻賊巢伏馬勇於霍山廟西北我軍及巢大呼銳進賊驚起倉皇奔竄盡棄刀矛旗幟追至梁窪之西日向辰賊衆麤集我軍佯卻以誘之過霍山廟數里賊已入伏我軍

回戰馬勇突出鈔擊賊大敗陣斬無數生擒悍賊陳
六等二十一日僧格林沁復大敗賊於寶豐張曜等
偵知賊將遠竄於二十二日夜勒兵至魯山之廊店
遇賊逐之至瓦店東見山窪內衆賊蟻聚我軍薄之
賊欲迎拒而後路裏脅之衆已瓦解遂大敗竄汝州
二十四日僧格林沁先追及於臨汝鎮張曜等踵至
斬首數十級僧格林沁繞由洛陽進屯宜陽之韓城
鎮賊不敢西向至龍門復由伊陽之南翻山遁二十
六七等日張曜等軍分路進剿皆獲勝而皖軍郭寶

昌猝遇賊爲其所乘賊遂於二十九日回竄魯山四年正月初三日僧格林沁及賊於魯山戰不利副都統蘇倫保恆齡等皆力戰殞會陳國瑞將所部至賊不敢逼初四日賊走東北前隊賊逼近葉縣城張之萬親軍僅數百乃益爲疑兵遣死士馳精騎擊賊游兵斬首十餘級賊始退沿葉邊東走襄城僧軍踵至初六日夜遣陳國瑞選勁卒乘風雪進擊賊營賊衆大亂斬馘數百焚死者不可計追至石固驛郭店皆獲勝至尉氏賊復由西竄東南張之萬以省防緊要

檄令湯聘珍率所部進駐省城南門外賊不敢偏十
四日大風揚沙霰冰交集張曜部將周明崑周登高
等由洧川追賊至尉氏之保全寨擊賊於狂風大雪
間殺傷各相當賊由鄆陵南趨十七日各軍跟蹤進
十八日春壽蔣希夷乘賊不備破其數卡賊驚走我
軍追之截斬無數適僧格林沁大隊馳至復令各軍
過河馳擊忽援賊馬步擁集敗賊復反戈相向我軍
力戰竟日賊抵死不退馬隊爲賊所乘宋慶張曜見
事急急築營會同郭寶昌憑壘迎擊始得壓退二十

一日賊由臨潁圍城掠西平署知縣金福楸登陴嚴守礮斃白旗賊目賊沿洪河奔竄張曜宋慶等躡後雕韜僧格林沁駐軍鄆陵整部伍張之萬因有

旨令回顧省防遂由襄城督親軍回省會四川副將徐邦道將川勇二千至張之萬汰其老弱令馳赴南路會同張曜等視賊所向躡擊二十三日及於西平境時賊卡林立徐邦道乘夜襲之賊不虞官軍北至悉駭走由上蔡遂平之五溝營黃埠南竄沿途裹脅二十七日至汝陽破金鄉寨二十八日破唐營萬家

兩寨王文行率隊擊之斃賊十餘騎賊於三更遣黨
潛伏汝郡城東將襲城毛和熙時尚在城督同文武
嚴爲之備賊不得逞走正息新蔡之交各軍馳追僧
格林沁亦由鄆陵整軍而行 朝旨命張之萬省
防布置畢仍出省督勦不得恃有僧格林沁在豫遂
任賊縱橫到處蔓延等語之萬以豫軍盡隨僧格林
沁勦賊地方政事亦巡撫之責不能不暫留省城以
顧根本乃上書自陳其略曰臣以地方疆吏受
命督師掃盪賊氛是臣專責自抵任以來帶兵出省

東馳西驟已閱二年雖兩次肅清淮蔡而遇此髮捻
合竄各股未能迅致天討日久無功咎無可道
若復恃有僧格林沁在豫任賊狂竄蔓延則臣罪戾
滋深具有天良何敢出此臣部步隊本有三十餘營
合之上年 敕調來豫之吉林黑龍江馬隊共有
馬步一萬餘人以兵力計之原可與僧格林沁相輔
而行用收夾擊之效自上年賊竄馬山口而後所有
名營均隨僧格林沁追賊卽均歸僧格林沁調遣此
後臣由南陽移紮汝郡復由汝郡移紮葉縣襄城止

有親軍數百人隸臣左右此外如張曜宋慶湯聘珍等各隊均經僧格林沁派令追賊出境及此次追賊於魯寶之交或經年累月始得接見各營將領一次至地方團練止可責令守寨本非訓練之師難供征調之用伏查臣之官則巡撫也臣之責則勦賊也臣有勦賊之責而無勦賊之權且因有勦賊之名並不得稍盡巡撫之責何則地方公事分寄於藩臬兩司而總其成於巡撫也非兩司則公事無以分治非巡撫則兩司無所諮稟而行故巡撫兩司不可不朝夕

見面臣受任卽帶兵出省與兩司相見之日絕少遇有公事僅恃書函千里內外往返需時筆墨有難達之情事變有不齊之致函商已定則必憚於更端批荅稍遲將別滋夫疑竇人情睽隔久則猜度易生旁觀窺伺多則浮言胥動此則臣之久不在省於地方公事不能整頓之實情也假令臣所部兵勇尚足辦賊兩害相形則去其重自應專心兵事俟寇氛掃盪再爲整頓地方現在髮捻各股愈裹愈衆臣部親軍數百人而外更無兵將足資調遣臣名爲出省帶兵

寔則隨僧格林沁之後奉行

欽差大臣文書而

已儻臣果欲出號施令或與僧格林沁意見相左則前敵將士何所秉承是則非徒無益又將有損於軍事臣斷不敢鹵莽至此或謂臣不出省則僧格林沁後路無人一切軍火車馬草料米麩必致呼應不靈此則更非所慮也此時僧軍所需如挪營則用大車五六百兩兵過則日供草料各三四萬斤羽書一至咄嗟立辦固無俟撫臣之督催也臣在外已閱三年雖未嘗躬冒矢石而櫛風沐雨業已甘之若素必非

有所畏於出省而僧格林沁與臣共事二年每謂臣能顧大局臣亦非別存意見而藉詞以冀不出省者誠以軍務地方均屬 朝廷公事臣出省實與軍

務無所裨益而地方公事因之積壓不少此次到省據藩司蘇廷魁臬司王正誼屢以爲言勸臣奏請在省暫駐伏惟臣子萬不得已之苦衷非極艱難不敢直陳於 君父而地方一切應辦公事苟有補救亦可仰荅夫生成云云奏入 報可並諭僧格林

沁隨時察看軍情如必須張之萬出省卽行飛咨該

撫遵辦時賊方擾新蔡知縣章慶保令守備黨錫齡
集團擊走解徐家寨之圍殺馬賊十餘步賊百餘賊
犯汝南埠游擊王玉佩擊走之二月初四日賊渡汝
河撲寒凍寨徐邦道馳援斬悍賊數十騎生擒賊十
五都司郭紹欽歿於陣時陳大喜匪黨葉鳳成葉和
尚等率馬賊二十餘騎冒官兵至閭灣陰勾匪黨蔣
希夷知之誘擒殆盡復會郭寶昌敗賊於正陽之盧
岡小陳等寨初九日張暉宋慶抵寒凍乘夜探勦餘
賊皆驚走於是正陽信陽之間賊蹤四出擾及息縣

之士扶橋彭家店諸處知縣蔣奠之督勇擊走之十四日賊由陡溝大林店渡河後股尚阻北岸適張曜等軍追及感之淹斃無算先是張曜慮信陽空虛請毛昶熙預飭湯聘珍高自秀等軍馳援湯聘珍駐兵南關自督馬隊及叅將蔣東才都司鄒春楊等至東十八里鋪將擇地安營忽遇山岡馬賊蜂擁而下遂整隊迎戰千總蔣尚均揮戈直擣兵勇從之賊大駭遁回十五日黎明以前中左三營分列而以右營專司築壘賊以數百騎來犯我軍槍列如林立時擊退

至雙林寺賊忽回騎相持彼此對峙間賊之馬步大隊已由十八里鋪東北五里墩諸處擁至斜長十餘里別遣賊馬數十騎渡河至南城對岸三里店窺我後路湯聘珍急調高自秀一營守東面遙爲聲勢令各營抱隊穩紮部勒甫定雙林寺之賊卽渡河向三里店一路進攻信陽南關其十八里鋪五里墩之賊分南北兩路進我軍以槍礮環擊賊不少卻都司胡得勝守備丁萬春千總郭金友把總王九如趙昌虎蔣文行劉柏倫皆戰歿蔣東才及已革知縣談燮和

把總樂得勝等袒臂血戰歷二時久賊始退其攻南關者爲城中大礮轟擊退據中山店十六七等日張曜等軍至信陽夜擊獲勝十八日偵知賊大股在中山遂與成保郭寶昌合兵進攻賊折竄東北會陳國瑞督隊東來兩路夾擊張曜郭寶昌兩路大捷斬獲甚夥賊遁至五里店西南山中十九日賊由十八里廟山口突出勢洶甚各軍整隊截勦自己及申斬賊七八百二十日僧格林沁軍到令各軍緊追至陽河之北賊已由陡溝長臺關疾趨正北二十四日陳國

瑞敗賊於確山縣東之確山殲其長髮老賊二千餘
得馬三百賊由遂平西平北犯二十六日至鄆城二
十九日圍扶溝知縣鄒金生擊走之三月初一日由
尉氏通許犯杞縣知縣查以謙出奇鈔擊頗有斬擒
賊至蘭儀之儀封壩頭水口村及睢州之匡牆西陵
寺榆廂鋪諸處初三日賊騎駛過乾河掠考城之張
莊程莊大股悉入山東曹縣境僧格林沁追抵睢州
諭張曜等軍馳赴虞城防回竄潁亳自督馬步大軍
由考城追抵定陶張之萬檄湯聘珍崔廷桂北渡扼

直東豫三省之交嚴飭河北鎮道督率兵團分防各
隘保完善時賊騎剽疾數日間曹單定陶城武荷澤
鄆城鉅野金鄉濟甯諸處賊騎徧野 詔書責問

東境既有防兵何以任令闖入漫無準備僧格林沁
不肯截其北竄之路致令擾及完善措置殊未合宜

諭湖北巡撫吳昌壽遵照迭次諭旨帶兵直抵
豫境爲僧格林沁接替之軍迅將豫省餘匪奮力剿
除張之萬於吳昌壽到豫時飭令各營兵勇聽候調
遣張之萬以賊已去遣張曜宋慶蔣希夷等軍現屯

虞城高自秀駐宋郡中五臺寺徐邦道屯商邱劉口
集已敷防勦楚軍不利馳騁請免調吳昌壽來豫於
是命張之萬總督東河授吳昌壽爲河南巡撫
半月間賊由曲阜向東南滕嶧復渡運河折向東北
奔蘭山南趨郟城赴贛榆青口僧格林沁一路追勦
賊不得喘息三月二十九日賊由沐陽西竄峒崕窰
灣折走呂家湖西竄邳境尋入東省汶上縣境向濟
甯東平由開州袁家口渡運河向西南奔大名開州
長垣張之萬檄各軍嚴防黃河時已四月下旬吳昌

壽甫抵任令湯聘珍崔廷桂扼龍門口宋慶張曜蔣
希夷等軍駐考城會合聯絡與僧軍收夾擊之效黃
河各口渡船悉徙泊北岸調楚軍提督譚仁芳一軍
由許州進屯河干布置略定乃議渡河親駐滑濬督
師防勦

皖匪十八

張總愚賴汶洸等既竄鄆城西北水套中其地三面阻河僧格林沁以爲賊竄絕地須乘時爲一鼓盪平計督各軍晝夜進兵時賊已勾結鄆北伏莽數萬四路麇集官軍方接戰於曹郡城西伏賊盡出僧格林沁遂遇害將士死傷甚衆餘皆潰散四月二十四日也巡撫吳昌壽甫卽任聞報飛檄駐考城之張曜宋慶等軍固邊防勿輕戰檄湯聘珍崔廷桂力扼龍門口嚴飭河北鎮道會同扼守船隻悉徙北岸派員分

查僧營潰兵安插省城外免奸宄溷跡並奏言捻逆此番狂噬如虎生翼豫省兵力祇有宋慶張曜湯聘珍蔣希夷等步隊合計不過萬人三省馬隊可用者悉交善慶帶往僧格林沁前敵現有馬勇零隊尙待歸併成營臣所帶楚軍四營二千三百人初到豫省人地生疎現在北路屏藩止恃黃河一水則封疆之憂旣切畿輔之備愈殷臣一面督飭河北在防將士嚴守河隄梭巡堵禦其直東兩省河身綿長數百里誠恐防不勝防惟有請
旨飭下直東督撫合兩

省兵力聯集民團扼守河干務期周而至於僧營馬步
各軍經此大挫該營將領惟總兵陳國瑞素爲賊中
畏憚因憂讒畏譏不克自厚兵力致不能挽回此敗
現准將軍國瑞來咨該總兵身受重傷尙無下落設
使其人尙在收合餘燼或可有爲該總兵本有幫辦
軍務之責可否仰懇 天恩仍舊錄用責令殄滅
餘氛爲僧格林沁雪此仇恥捻逆以殘破之餘而能
折我 中朝柱石驟勝而驕死亡將至果蒙

聖明簡放重臣總統陳國瑞以驍敢善戰助之轉敗

爲功當必不遠軍無常形唯在 宸衷之敬畏與

天心相感召耳臣秣馬厲兵敬俟 朝命一

經總統有人便當會籌方略殫竭血誠誓清寇盜以

紓 宵旰之憂 上聞僧格林沁戰歿 宸

衷震悼卽日派乾清門侍衛克興阿岳林恩全吉凌

前赴軍營迎護僧格林沁靈柩回旗以國瑞等不能

救援主將分別革職成保等皆逮治閣敬銘張之萬

等坐貶有差其 欽差大臣關防令國瑞暫行護

理 賜僧格林沁祭葬飭立功各省建專祠其子

布彥諾謨祐襲親王爵其餘典禮皆有加另 賞

銀一萬兩給蒙古受傷官兵 予陣亡之內閣侍

讀學士全順等優卹附祀 命大學士兩江總督

曾國藩以 欽差大臣督辦直隸山東河南軍務

地方文武均歸節制 諭直東豫江皖等省聯絡

聲勢不分畛域會擊竄匪吳昌壽請就黃河船隻添

置礮位配以濱河弁兵往來駕駛賊來卽擊得

旨允行乃令崔廷桂先以所統兩鎮官兵就船操習

吳昌壽督親軍渡河駐滑縣親履河干察看布置以

黃河自考城縣屬之銅瓦廂決口北行當考城之西
封邱之東不過數十里卽出豫境而東其北岸地面
爲直隸之長垣開州清豐南樂又東出直隸境爲山
東之濮州范縣陽穀壽張茌平齊河濟陽濱州利津
各州縣地非三省同心合防難期周密因奏言黃河
北岸山東地面最長直隸次之河南最短儻賊得偷
渡無論由東由直由豫厥害唯均北岸渡口在豫省
者只有封邱所屬之尙店臣已派湯聘珍崔廷桂扼
守在直隸者則長垣屬之翟莊口竹林口與山東曹

州府屬之荷澤對峙在山東者則濮州范縣爲最要
又壽張屬之張秋鎮乃黃河穿運歸大清河處水平
岸狹往來遂爲官渡其上爲齊河其下爲李連橋皆
成官渡而李連橋尤狹最爲緊要其他私渡及水淺
處更未可悉數故防河以山東爲最要伏讀初三日

上諭崇厚已於初二日起程取道景州前赴畿
南著卽催調洋槍隊伍迅速赴景州一路扼防等因
臣伏念景州之防所以防運齊河之防所以防黃可
否請 旨飭下兵部左侍郎崇厚令其迅速督帶

洋槍隊伍前赴齊河一帶擇要駐紮賊不得渡黃何
由渡運則畿南之防固矣 詔崇厚斟酌情形慎

籌進止如劉長佑所派駐防景州之兵足數扼剿崇
厚即可進紮齊河並 諭直督劉長佑東撫閻敬

銘添籌礮船嚴防河路時賊衆縱橫於鄆城荷澤鉅
野及濮范沿河欲伐樹木排造船筏由長溝等處偷
渡運河竄至濟甯土圍以外邊騎至甯陽西南滋陽
兗州泰安境皆有賊 詔陳國瑞一軍移防張秋
以東沿河口岸劉銘傳張樹聲周盛藻詹啟綸劉松

山趙三元水陸等軍咸赴援剿催會國藩迅速北上
派軍會擊會國藩方懇辭節制三省之命

詔謂軍無統轄號令不一最爲兵家所忌會國藩更
事既多成效夙著若非節制三省恐呼應未能靈通
勿再固辭至所稱駐紮徐州專辦十二府州捻匪直
隸獨處河北應責成督臣另籌防兵不可調南岸之
師往來渡黃河南山東兩省除歸陳兗沂曹濟外其
餘各屬應責成兩省巡撫另籌防兵不可使剿捻之
師追逐千里永無歸宿等語著劉長佑閻敬銘吳昌

壽卽照會國藩所籌將應行防守事宜認真布置會
署兩江總督李鴻章恐賊北趨震驚畿輔令常鎮道
潘鼎新將淮勇十營由海道赴天津防剿 溫旨

褒獎謂能視國如家顧全大局是時各路援軍大集
於直東之間賊方盤踞長溝圍攻嘉祥縣城陳國瑞
劉銘傳丁寶楨各派勁旅攻拔長溝賊寨陳國瑞詹
啟綸等亦進兵獲捷解嘉祥之圍賊復遁回鄆濮分
竄蒙宿矣五月十六日張總愚賴汶洸等悉竄亳州
據雉河石弓山白龍王廟諸處煽惑裹脅逆燄大張

牛老紅竄據潁州府東北之江口集沙河沿任柱李允竄據宿州之臨渙集龍山諸處並僞張官軍旗幟襲破高爐集安徽藩司英翰方軍於雉河四面受敵皖事日急吳昌壽飭張曜宋慶等軍由烏橋集步步進逼程之偉將馬勇前驅赴亳湯聘珍譚仁芳扼鹿邑函商漕運總督吳棠請以銳師出濰溪口臨渙集一路擣其東北安徽巡撫喬松年簡勁旅由潁上太和進兵攻其東南豫軍由西北一路進兵爲四面擣巢之計程之偉行至商邱之劉家口與賊遇揮軍縱

擊截賊爲兩殲斃數百賊由烏樁集竄併亳東雒河之圍日急賊知我軍逼近句回賴汝洸牛老紅任柱等自白水河以東至義門鎮兩岸連築數十壘道路梗塞我軍若深入賊必由後路截我饒道進退失據張曜與宋慶蔣希夷湯聘珍程之偉等議於亳州迤東二十里之十九里溝四十里之釣魚臺五十里之白水村七十里之義門鎮分隊穩紮魚貫而進吳昌壽復檄譚仁芳由鹿邑進屯十九里溝俾張曜等得以所部兵力策應前敵閏五月初八日蔣希夷至義

門鎮遇賊衆自丁垵寺渡河立擊退之薄暮馬步賊復抵渦河北岸勢將偷渡擾我後蔣希夷以長槍擡礮回環轟擊賊始退吳昌壽以兵力尙單非三省會剿益以馬隊不能制勝因奏言雉河附近各圩皆爲逆匪盤踞英翰以孤軍困守四面皆賊危險非常臣疊次函咨江皖等省合兵會剿而齊集尙復需時臣伏念賊之長技在於飄忽獷悍來無可備去無可追官軍坐受其困及其飽掠歸巢似可四面兜圍以待檻馱釜魚之斃而其勢斷非一省兵力所能辦一日

衰旗再出則燎原之禍又不可言臣愚以爲目前之賊方圖喙伏則三省會勦誠爲萬不可失之機除劉銘傳一軍應遵 旨留顧北路之防其陳國瑞一軍既奉 旨追賊此時皖事日亟應請 飭下該總兵拔營速進至僧營現存馬隊計有千餘應請 飭令國瑞汰弱留強揀員統帶合陳國瑞步隊直趨雒河與豫軍約期進攻或由永城一路出賊東面以成掎角之勢並請 諭令會國藩喬松年檄調張得勝易開俊張樹聲周盛波等軍由蒙城宿州

剋期並進或批亢擣虛或附賊之背總期愈紮愈近
愈逼愈緊毋令賊蹤再得出竄庶幾戡亂有期又以
陳國瑞驍敢善戰所向有功惟生性崛強不能忍耐
是其血氣之勇不可無人在其左右隨時默化前任
安徽臬司張學醇爲陳國瑞素所信服且久經行陣
曉暢戎機請 旨由軍臺釋回監護陳國瑞之軍
又以豫省諸將中唯張曜一員嫻習韜鈴堪膺統領
之任其餘雖雄毅果敢各有所長而足以獨當一面
者甚乏其人請 飭調前任甘肅提督馬德昭來

豫統領新募之軍皆奉

俞允並飭將託倫布馬

隊官兵四百九十六員名改撥河南富森保馬隊三百餘名並善慶黑龍江馬隊一百八十餘名統交吳昌壽調遣會有劾張曜養賊貽患統兵二萬有餘並不進剿遂使賊氛復熾流入山東致僧格林沁以督師重臣力竭捐軀等語

上命吳昌壽確查具奏

吳昌壽乃就豫省上年軍情賊勢及張曜所部兵力之多寡與原奏所參各節有未合者逐條覆奏云捻首張總愚東竄李青店張曜追至板山坪中隔白土

岡張曜在板山坪日與白土岡之賊接仗而李青店之賊由馬市坪西竄實非張曜兵力所及至三年十一月僧軍失利於鄧州張曜力抵追賊遂爲僧格林沁所賞動以自隨至汝信確山之戰張曜復將步賊追殺殆盡僅餘馬賊竄擾山東僧格林沁留張曜等軍扼守豫邊以防回竄賊至曹郡裏脅愈多伏莽又起僧格林沁遂致授命疆場非由張曜之坐視不進也張曜由佐雜蒙恩拔至二品大員具有天良何敢如原奏所云以改用總兵之故心懷怨望臣初

撫豫圻誠如

聖諭所云無所用其迴護惟明查

暗訪張曜在豫帶兵有年不無微勞足錄至養賊貽患以及所帶兵勇到處搶掠均無實據又前後數年所帶之兵至多不過五六千人並無二萬有餘之數現經臣飭赴皖境勦辦大股髮捻益當勉以忠義迅掃妖氛如果初終異轍亦卽嚴叅不敢稍存徇隱疏人上諭以奮勉圖功毋再爲人指摘云時渦河北岸之盧營寨張機房以東南岸之廖樓龔李莊帖木兒營諸處皆爲賊據十三日張曜宋慶商令蔣希

夷率哨官蔣廣濟董建西莊啟元等渡河先攻北岸之賊接戰移時擒斬甚衆乘勝將北岸孟窩諸處村莊踞賊掃除十五日賊糾集馬步欲由丁堦寺寺兒集搶渡南岸亦爲我軍擊退次日張總愚張總道桂三魏羣等率大股由東北直趨河沿張曜等擊之賊循河西趨擇水淺處搶渡爲保英截回我軍遂進屯百尺河十八日攻廖樓擒首廖和尚堅壁拒守馬步援賊左右擁至各隊分應之蔣希夷冒矢石一躍而登擒廖和尚殲其衆遂駐軍廖樓距義門鎮六里中

阻帖木兒營及龔李莊二寨十九日正議進兵帖木兒寨之賊咸薙髮歸順張曜等察其誠乃勸勉而遣之并分隊屯其寨而龔李莊猶負固不服我軍三面進攻士皆踴躍爭先賊不能支越牆梟水遁擊斃無數其附近十餘寨皆至營門泣訴脅從之苦悉願反正於是西南一路始通我軍進抵義門鎮湯聘珍保英簡精銳馳擊河北丁壩寺釣魚臺寺兒集十九里溝之賊逐日皆有擒斬賊於章河西岸偷築數壘又糾集大股圍義門鎮義門距雉河四十里賊之所必

爭者二十三日張曜宋慶等督各軍分途進擊賊且
抗且走徹過章河近壘列陣與我軍相持張曜令李
永芳擊中路湯聘珍令蔣尙均擊左路蔣希夷令胡
詩擊右路餘隊列河沿接應各軍方接戰間忽騎賊
斜出左路勢將包鈔湯聘珍蔣希夷揮軍橫擊斬其
領隊賊目賊衆驚潰我軍追殺二里許賊復回拒適
程之偉率游擊穆清遠等馬隊馳至因擊走之追至
沙木橋斬馘六七百生擒何木濬等平其壘其北岸
來援各賊爲宋慶擊退捷聞 賞李永芳強勇巴

圍魯名號擢穆清遠叅將蔣尙均都司胡詩守備加
都司銜時賊之大股據張家花園扼雉河之衝恐我
軍再進遂於北岸倪村店伏賊騎欲斷我後路張躍
令程之偉往勦叅將劉慶雲穆清遠王進忠孫廣泰
千總李家昌等賈勇而前賊一接反奔擁車填塞街
口將士超乘而進斃賊二百餘於是議攻張家花園
擒首楊務等請援於張總愚添調馬步賊實其中並
分屯程家圍以拒官兵次日我軍分道進攻鏖戰移
時賊敗走乘勝直抵寨門礮石雨下豫勝營官楊春

祥骸中礮傷士卒亦多受傷不能克而臨勝營官鄧
林豐已將程家圍攻拔斬賊首高水高奎及餘賊甚
多二十日大雨如注宋慶親督兩營搶紮張家花園
之正東東南兩處賊屢出皆爲程之偉擊退卽夕壘
成二更雨愈甚賊棄寨出遁遇我軍截殺賊譁潰寨
橋毀自相踐踏賊屍枕藉斬馘不可勝計我軍進屯
余樓距雉河僅十八里賊見豫軍愈逼愈近而喬松
年所派張得勝等軍亦由高爐集擊賊獲勝賊乃分
兩股遁賴汶洸李允牛老紅等由渦河南岸退至雉

河西南張村鋪張總愚任柱等由渦河北岸退至雒
河西北之劉奶奶廟於是雒河圍遂解賊乘我軍深
入皖境乃間道分趨張總愚等繞竄商邱柘城賴汶
洸等旁趨潁州太和張曜等聞報卽日旋軍擬扼鹿
柘賊已於六月初七日圍攻柘城知縣恒志登陴嚴
守適張曜蔣希夷帶隊馳至賊卽解圍竄西南譚仁
芳軍過於途橫出擊之斬首四五十級初十日賊由
太康之安平寨馬廠明光集向正南西南紛竄邊騎
至睢州河隄砦孫居砦忽南忽北陳國瑞自柘城疾

馳抵睢截其北面賊遂趨扶溝知縣鄒金生督團禦
之賊肆擾於鄆陵通許西華長葛洧川尉氏十五日
至許州之五女店臨潁之張潘鎮大石橋十六日五
鼓我軍追及張曜商令宋慶爲頭隊蔣希夷爲二隊
各軍以次進發捲旗息鼓至朱曲賊壘大呼斫入槍
礮繼之賊潰奔我軍追殺數十賊奔襄郟吳昌壽恐
河洛空虛令駐防虎牢之徐邦道勤探防守飛檄譚
仁芳率楚軍四營扼河汝交界之白沙斷其入洛之
路又檄副將李世玉李承先賈文田將新募楚勇馳

往陳州勦分竄太和之賴汶洸等一股蓋六月十五
六等日賴逆已由皖境突入淮甯據距城二十餘里
之趙寨亦駸駸內犯也十九日張總愚竄寶豐圍城
知縣張書紳督兵圍縋城邀擊賊奔魯山知縣胡廷
楨擊卻之賊聞河洛有兵乃竄據南裕交界之橫山
神林大店諸處二十七日張曜宋慶等追及令程之
偉督馬隊張曜親率步隊策應與賊營對峙山岡賊
撲山麓我軍馬隊從高壓下步隊循山包鈔賊披靡
敗走斬擒數十三更張曜商令湯聘珍保英兩軍出

大路爲正兵宋慶由青山出賊後爲奇兵直趨橫山
賊壘叅將李寶林守備鄧林豐賈勇先登守賊驚起
我軍手刃數賊餘皆譁潰越砦亂竄我軍外截內控
斬戮無算遂克橫山寨獲芻糧馬羸甚多賊占村莊
十餘同時皆掃蕩而神林大店之賊亦聞風南遁會
賴汶洸一股自攻淮甯後竄至周口吳昌壽所派蔣
希夷一軍適至勒兵出擊擒長髮老賊二蔣希夷正
築壘賊忽大至希夷選死士前進無不一當十都司
蔣廣濟胡詩解衣搏戰斃賊尤衆練長趙鵬飛李慶

雲等率團助戰六時之久賊始敗奔我軍追殺二百
餘賊既大敗又聞李世玉等馬步將抵陳州遂竄西
華扶溝臨潁掠許州之秋湖栗園諸處遇陳國瑞軍
至夜率親兵二百人劫賊營斬賊百餘黎明賊大至
戰於新店集賊潰奔鳧水向舞陽西去勢將與張總
愚合股吳昌壽恐其北犯省城乃親督軍出駐許州
扼之檄陳國瑞駐於鄆舞之間斷其句合命張曜宋
慶等驅張總愚於宛勿令與賴逆相通時曾國藩所
派劉銘傳一軍已駐周口又添調烏爾圖那遜馬隊

援陳令周盛波一軍駐亳州託倫布等馬隊赴豫助
勦請 旨飭河南湖北各督撫於豫之鞏洛宛鄆
楚之隨棗麻黃各駐勁旅一枝變尾追之局爲攔頭
之師以有定之師制無定之寇 上是其議催令

迅速赴徐州居中調度六月二十八日張總愚攻裕
州敗竄餘旗店復趨唐縣知縣錢德昌擊卻之賊渡
白河至瓦店七月初四日襲據張旗營寨蔓延附近
村莊我軍於初六日追及張曜列營白河之東宋慶
夜督鄧林豐胡保林等渡河襲寨哨官馬玉奎先登

斫開寨門賊驚起巷戰逾時援賊大至我軍乃退次日張曜等先掃除寨外之賊進屯河岸張總愚率大股出拒我軍渡白河衝入賊隊宋慶湯聘珍督率姜桂題熊祥麟各部力擣中堅斃賊無數乘勝奪門進寨忽伏賊二千餘騎突出鈔我後我軍分路奮擊立斬首數百級遂復張旗寨賊向西南竄至鄧州北值七里河水勢驟漲不得渡乃折而西北掠鎮平之賈宋黑龍集伐木爲柵將久踞張曜乘兩夜擊之賊棄壘走十八日至塚頭集張曜令程之偉馬隊出城北

自率大隊由西北正西兩路逼進賊焚棄輜重悉力
反噬程之偉保英等大呼陷陣縱橫馳突賊殊死鬪
守備孫玉琢李家安李家昌等皆被傷游擊張萬均
都司郭振清張以勤千總張玉豐把總蔣尙友戰歿
將士死傷相繼裹創奮擊追抵李堂賊又折回迎拒
宋慶保英等力戰斬賊百餘始退竄我軍夜出賊前
扼諸潞河砦把總牛振宇邢國柱戰歿事聞與張萬
均等皆得 旨優卹賊圍新野知縣張象鼎登陴
固守賊南竄岡頭我軍躡追宋慶陳於河東張曜湯

聘珍陳於河西賊率衆來犯戰兩時久斃賊百餘追
斬十餘里賊竄鄧州之麟鳳里及鎮平之石佛寺將
奔馬山口張曜商令譚仁芳屯宛郡扼北路自率各
軍於八月初二日追抵鎮平至侯家集賊忽由馬山
口折回至龐家橋據之張曜等就近築壘逼其前保
英率豫勝三營扼鎮平之穰東爲犄角初三日賊衆
出犯各隊齊出應之戰半日久賊敗退我軍乘勝疾
追踏毀賊壘三殪賊甚衆次日賊將循山西竄我軍
三路進擊賊敗過小河我軍正追涉間忽賊騎自南

包鈔我軍幾動哨官王榮義臨陣退湯聘珍立斬之
軍乃振宋慶督隊自北截擊賊大敗初五日夜宋慶
乘風雨大作派隊往劫斬馘甚多生擒張三義郭旺
等賊紛竄南陽之清華鎮鄧州之先主山鎮平之侯
家集邊騎至鄧浙交界之李官橋復趨南陽攻破周
營畢營宋寨八月十五日夜突攻南陽府城署總兵
趙鴻舉知府張仙保知縣李瀛等親督兵練礮斃賊
目及賊黨百餘二十日我軍馳至宋慶邀其前湯聘
珍截其後張曜指揮各隊槍礮環施短兵繼接斃賊

數百二十三日我軍進攻畢寨賊先以馬隊依寨抗拒程之偉將騎兵突之湯聘珍督親兵要截之立斬驍悍賊數十礮子飛入圩所至迸裂賊乃棄寨遁畢寨旣克楚軍提督姜玉順軍與譚仁芳軍皆來會二十四日攻周寨宋慶湯聘珍選勁旅擊其西姜玉順譚仁芳以全力赴之賊不敢戰棄寨東遁其宋寨踞賊亦聞風竄均過銅河掠唐縣於是周宋二寨皆復賊往來賒旗店保安驛三十日我軍敗賊於橋頭寨生擒李振發等九月初一日張曜宋慶等督軍追勦

甫行五六里賊率眾迎拒鏖戰半時宋慶督洋槍隊
轟斃領隊賊目三張曜乘勢擊斬東哨馬賊百餘會
吳昌壽續遣前安徽臬司張學醇副都統善慶等軍
至遂會合追勦至唐縣三門寨賊望風遁竄至湖北
棗陽之柿莊一路其地多稻田埂隴交橫賊騎不能
馳乃折回仍欲攻宛郡張學醇善慶張曜宋慶等自
郭灘拔隊扼之初十日與賊遇我軍分隊左右邀擊
斃其執旗賊目追至邵渠河張學醇渡河再戰賊又
敗我軍逐北前阻白河水大不可涉賊情急反噬背

水死鬪張學醇大呼督戰賊矛及其喉幾殆適張曜
以生力軍至遂擊退賊屍枕藉我軍傷亡三百餘忝
領隆喜佐領慶福驍騎校德永千總郭春城把總王
世興等皆戰歿得 旨優卹張曜以賊有圖宛意

遂與善慶間道赴南陽會同鎮府防範賊由唐縣竄
賒旗店將攻據之張學醇追及選精壯於四更時銜
枚疾進及壘拋火彈賊驚竄斬殺無數追逐十數里
賊知宛郡有備乃由裕州南之柏坡竄魯山大股由
下湯西之馬樓駛向西北吳昌壽檄馬德昭崔廷桂

蔣希夷等坵河洛張學醇等繞汝州截之賊攻魯山
縣城火箭射入城燒街屋知縣胡廷楨急選線槍隊
縋城繞擊斃馬賊四十餘賊乃竄寶豐十月初一日
宋慶敗賊於寶豐之石橋賊由邾縣奔禹州張學醇
宋慶擊走之正追躡間賊復反戈從旁邀我輜重張
學醇急飭立營初九日四鼓令都司張魁元蔣尙均
等選壯勇五百前進宋慶張學醇保英等率各隊繼
之月光漸落火器齊發賊倉猝驚亂我軍刀斫矛刺
殲擒甚多賊壘一律踏平竄東北密縣新鄭境遇提

督馬德昭軍於小窰口左成元李承先等分兩翼進
新鄭知縣王椿率團丁助戰都司張魁元歿於陣豫
銳營有馬勇高萬容者臂中刀傷奪賊刀斫賊并奪
其馬而歸捷聞擢蔣尙均爲游擊郭春報爲都司

賞花翎宋得勝以千總用而拔高萬容爲外委

賞藍翎卹張魁元如制賊旣受剗狂奔由長葛鄆
陵東趨扶溝一路攻城池掠牲畜馬德昭蔣希夷等
軍自後躡追至鄆陵西北吉慶寨適賴牛各匪自甯
陵一路爲劉銘傳周盛波等軍擊敗西竄遂與張總

憲任柱等復合初賴汝洸等由舞陽西竄將追併張
總愚適張曜各軍躡深入宛境日追日遠而陳國
瑞駐圍城躡其後賴逆等不能句合乃折向東南七
月初三日攻西平之儀封寨知縣金福榘擊走之初
四日攻據吳樓寨由上蔡黃埠蔡溝里掠汝陽之金
鄉堡祖師廟爲副將王文行王玉佩等擊敗值陰雨
賊乘勢攻破上蔡之洙湖里寨塔橋寨洪橋寨及汝
陽之中和寨署汝甯知府徐久照汝陽知縣秦本提
會同王文行王玉佩等一戰獲捷遂復中和寨賊北

奔合大股賊攻上蔡十五日圍汝甯府城蔣希夷及
叅將黃祥興等逐之竄東南王文行等又敗之於汝
河南岸龔寨擒斬甚多賊東竄新息交界之居城王
文行等追敗之復竄項城之新興集爲團丁擊走掠
沈邱之姜寨廟岔及阜陽之黃花嶺李家橋皖撫喬
松年檄藩司英翰道員史念祖等邀擊於迎仙店敗
之並調張得勝一軍出固始合豫軍兜剿賊由阜陽
至固始之往流集知縣彭旭集團禦之賊知有備竄
息縣之包信里賈家寨剛李店邊騎至新蔡八月初

一日王文行黃祥興等自新蔡進兵斬騎賊甚眾初六日賊攻彭延庚寨焚岳城集將奪船渡河王文行等馳往截之賊不得渡據沈邱之瓦店華莊時蔣希夷一軍扼黃牛嶺會同皖軍總兵康錦文並劉銘傳所派提督唐殿魁道員劉盛藻等攻張窪賊巢大戰半日殲斃無算焚其巢於是揚河以北賊壘十餘皆掃平追至瓦店遇牛老紅等率眾迎拒我軍擊斬二千餘生擒數百克復民寨十餘獲牛馬數千其另股逆首李允在新蔡者攻鄒寨爲寨長鄒子興選精壯

奮擊斬一紅衣賊目卽李允也吳昌壽以捷狀聞擢
蔣希夷副將蔣廣濟游擊諸葛漢奎鄧開成蔣蘭江
守備賞鄒子與五品翎頂賊由新項奔汝陽之東岡
寺射橋及上蔡之黨家店十五日攻城知縣陳慶涵
擊走之十七日奔西華之逍遙集商水之雙陽樓邊
騎至郟城十八日圍扶溝爲知縣鄒金生擊退賊走
尉氏太康吳昌壽檄司道嚴防省垣令善慶李承先
統騎兵扼鄆扶二十日賊攻通許縣城知縣吳炳榮
督壯勇繼城出擊賊由陳留杞縣睢州奔蘭儀之乾

河灘二十四日大股悉竄考城之小宋集蔣希夷晝
夜奔馳士卒億甚吳昌壽令馬德昭助之並請調安
住富森保託倫布等馬隊來豫令崔廷桂督率礮船
上下梭巡嚴防河岸賊奔曹縣復折至蘭考沿河麇
聚二十九日攻考城聞馬德昭軍至悉奔直隸之長
垣縣境繞入曹州定陶鉅野鄆城復至曹縣據安陵
集金隄頭九月初七日焚姚村朱岡孟大夫集尋竄
江南蕭碭時張總愚等方在魯山吳昌壽以賴逆已
遠竄東省檄馬德昭馳顧西路賊眾遂折回豫境由

歸陳邊境徑趨鄆陵適與張總愚合十月十二日也
十三日馬德昭蔣希夷等軍戰於鄆陵吉慶寨白慶
雲陣於正南李承先陣於正東左成元陣於東南李
世玉陣於東北賊衆三面至剽悍異常我軍槍礮齊
發賊少卻程之偉將馬隊東北進蔣希夷將步隊正
北進戰三時久適張學醇宋慶保英等自西路馳至
我軍勇氣百倍殲斃賊二百餘生擒三十四獲鎧仗
軍資無數遊擊王應龍千總魏占魁戰歿奏聞
予卹賊奔許州吳昌壽所督各軍均已派出追賊僅

存善慶馬隊百餘乃令出城邀擊戰於八里營防禦
奇珍歿於陣至是賊復分股張總愚由襄陽掠舞陽
賴汝洸由臨潁奔郟城吳昌壽檄張學醇宋慶等軍
馳赴南陽勦張總愚而令馬德昭蔣希夷等追擊賴
汝洸於汝郡十月二十三日蔣希夷遇賊於西平之
觀音堂斃賊數十追奔十餘里二十四日夜賊攻營
蔣希夷令壯勇伏左右賊知有備而去我軍僞爲賊
隊潛襲賊營縱火大呼賊亂我軍大隊擁進兵刃所
及無不摧斃賊奔上蔡次日派守備胡詩諸葛漢奎

等劫西南賊營遇悍賊數十守橋口我軍冒槍礮進
鏖戰逾時破其二壘生擒逆首林安等十餘是夜又
派蔣尙萬等往劫上蔡賊營殺賊七八十平其壘二
十八日令叅將董建西由遂平西路進知縣何順成
由北路進斃賊數十附近各村盡復賊奔確山旁趨
汝甯十一月初一日確山知縣嵇文輅縋城擊賊賊
奔東南又分竄遂平之諸市店知縣文玉令守備崔
鳴岡劉大山等作嚮導蔣希夷親督各隊繼之三更
時襲奪賊卡一二乘勝進擣諸葛漢奎首先衝入矛斃

巨匪蘇大麻子連破逆壘三賊向東南竄我軍薄之於河淹斃無算賊走汝陽繞回確山奔信陽之蕭曹店梅黃寨初九日圍正陽縣城知縣白架登陴拒守賊竄銅鐘店走羅山十一日馬德昭追及命李承先伍慶雲李廣進等冒雪進征敗諸羅山之竹桿鋪十二日賊圍光山之杏山寨李承先等擊走之十四日追至光州值賊攻城承先等乘大霧馳進賊眾自相踐踏承先手刃紅衣馬賊二追至七里岡又斃賊數百獲賊首鍾孟林姚新元逆黨余驢子等十五日馬

德昭令左成元李世玉李承先等進兵戰於城西夜襲賊營斬千數百遂解光州之圍是役也李承先擢叅將伍慶雲李廣進擢游擊諸葛漢奎擢都司賊退至光州東南官渡白鴨江二十三日馬德昭等敗賊於鳳凰嘴再戰於七里岡三平寺皆有斬擒當是時賊前股已分竄商城固始光山息縣皆有賊署固始縣彭旭督團戰於西城適安徽巡撫喬松年派張得勝黃秉中兩軍來援合擊敗之二十七日再敗賊於陽關鋪賊奔墨斗關其後股仍與馬德昭相持於光

州十二月初一日令伍慶雲等邀戰於王家岡與蔣希夷各隊四面環攻槍礮雨發賊大股跳河死者甚眾各村踞賊羣出救援復爲左成元李世玉李承先等擊散追奔十餘里至夜馬德昭選壯勇襲賊巢賊驚亂不戰而潰悉向西南狂奔由光山之潑陂河白雀園南竄前隊已入湖北境後隊亦駸駸南向諭湖廣總督官文安徽巡撫喬松年會兵截擊諭會國藩飭劉銘傳一軍赴光固援剿諭吳昌壽令馬德昭蔣希夷等軍會同劉銘傳由西北兩路

將賊逼向東南不可縱令回竄平原以便豫軍專力
張總愚一股當張學醇宋慶等由襄城追剿張總愚
也賊由裕州疾趨南陽將圖郡城時張曜陳國瑞已
先後請假湖北總兵劉維楨駐軍唐縣提督姜玉順
及淮軍提督劉銘傳駐軍新野張學醇手書致約併
力辦賊十月二十一日賊由源潭至唐縣劉維楨分
三路擊之逼於河濱淹斃無算生擒張總愚之弟張
宗志及其黨十餘二十四日竄鄧州踞構林關二十
六日姜玉順督軍進剿賊以數千騎襲我營姜玉順

揮馬步縱擊斬首三百餘生擒黃衣賊首吳得勝及
夥賊二十餘十一月十一日宋慶抵鄧州先派騎兵
赴構林關挑戰令蔣東才將步隊伏於後騎兵誘賊
佯退賊入伏蔣東才突起槍箭紛集賊大敗時姜玉
順等駐構林關東南宋慶駐構林關西北劉維楨駐
構林關東北相爲犄角訂期進攻賊見我軍大集又
連受創於十五日棄寨西遁竄至文曲集我軍遂克
構林關二十二日賊竄浙川攻李官橋寨爲團勇擊
退二十六日賊折竄鄧州之厚坡據卧牛山二十八

日宋慶將各軍由厚坡黃梅岡進兵賊率眾來犯我軍施槍礮追擊十餘里至桃園岡斬獲賊黨二三百獲馬數十夜令哨官郭春報等襲破龍城寨賊營俘馘甚眾賊踞大王楹寨并攻韋寨二十九日宋慶令程永和王紹烈將兵援韋寨賊望見旗幟卽反奔王紹烈等與郭春報遇合兵追至大王楹寨敗賊甫入官兵拚至賊棄寨亂竄由北太山廟竄入新野迤南辛店鋪並擾湖北之樊城十二月初五日至襄陽之鄧家湖呂堰驛邊騎至堰家埠口陳家河旁及唐縣

之郭灘宋慶由趙岡魏家集進兵楚師劉維楨由唐
縣向郭灘蒼苔一路進兵是時賴牛等逆已入黃州
境張任二逆擾襄陽一路豫境無賊吳昌壽駐師西
平檄飭兩路追兵會同皖楚各軍出境援剿先是吳
昌壽以豫省軍務萬難措手乃自陳供職無狀具疏
以聞疏言人臣之道知而不言言而不盡皆罪
也能而不爲不能而強爲亦皆罪也敢以豫省軍務
之難微臣竭蹙貽誤之狀爲我皇上敬陳之賴
牛任張各逆均係失巢窮寇鋌而走險兇燄方張賴

汝洸等蕭礪折回益以湖團裹脅之賊不下三四萬人張總愚一股亦不下一二萬人分則東西牽掣備多而力單合則遠近蔓延賊衆而我寡當其萬馬奔馳颺飛電掣雖至勇之夫當之色變况驅疲師羸卒逼迫以嬰其鋒有不怯餒者乎故年餘以來止有尾追而無迎擊尾追而遠則無掾于生民焚掠之慘尾追而近則猛一回噬立見傷亡當此之際雖韓白復生無所用其勇良平復出無所用其智何則驅羊以逐狼本非其敵况驅十羊以逐百狼其何以免於必

敗乎計無復之不得不結營以自衛結營未成而賊已不知何往此賊勢之難也夫戰旣不足守或有餘憑恃險阻使之不得經過以老其師何莫非以逸待勞之計豫省西北雖多山險因生齒日繁山田日闢峭函澗陝古人一夫當關之地皆已犁爲田疇耕牛婦子可以上下其他髮路樵徑日久成蹊幾無人跡不通之處故山險不如水險豫省大川除黃河而外至大莫如淮然自桐柏發源所過光羅新息諸境淺深寬狹不一有非舟楫不通者有人馬可以鳧渡者

其他沙潁溱洧則到處皆可超越備左則右虛備右則左虛無所不備則無所不虛此地勢之難也古人凡爲固圍之計必先有防兵而後有戰兵防兵所以綢繆于牖戶戰兵所以角勝於疆場豫省固已無能戰之兵以防兵而言扼其入楚則申息宜防遏其入秦則淅內宜防慮其突潼關也則自鞏偃以至閿鄉之徑寶宜防恐其犯河朔也則自底柱以至銅瓦之隄岸宜防賊自曹單則蘭考宜防賊自蒙亳則鹿柘宜防賊自蕭楊則永夏宜防賊自阜太則沈項宜防

蓋他省皆有邊地而後有腹地豫則無處非邊卽無處非腹地之他竄必取徑於豫賊之飽歸又必盤旋於豫以現在兵力屯紮一隅猶不足以制其出入又安能無處不防無防不固此邊防之難也於是有爲堅壁清野之說者豈非所以濟戰守之窮豫省自團練以來大縣堡寨二百餘所小縣堡寨亦逾百所當寇至之時男女牲畜入寨糧石資財入寨人情一日不再食則饑果令野無所掠賊將槁餓以就擒耳然嚴冬之野可清而夏秋之野不可清禾稼垂熟之時

人可捋穗而食馬可弛銜而飽近日賊情狡獪所至之處多不發火小民無從驚覺賊騎已至始謀遷徙爲無及矣故堅壁清野不足以困賊而數年以來兵勇騷擾民間積怨已深仇殺官兵之案層見疊出現在三令五申嚴加約束兵漸不敢肆虐於民而百姓反閉關絕市以困官兵將欲破此積習計非旦暮之所能亦非條教號令之可爲力此堡寨之難也近日軍務以購糧爲第一要義曾國藩濟甯周口之軍每處必先儲米萬石可謂籌畫萬全然此二處皆係濱

臨淮運可以泛舟豫省賊之所經多在平原曠野無水可漕數石之重中人弗勝則必隨地購糧卽必到處耽閣賊因糧於地因糧於人無糶糴輦任之累故一日之程爲官兵數日所不能及然此猶近城近寨完善之地至於荒陬僻壤烽燹所餘則求一升之米一束之芻而不可得其良者忍餓而疲羸不肖者因饑而揆括兵氣蕙軍律廢賊勢張民怨積皆由於此此兵食之難也用兵之道火器爲先臣履任之初簡閱軍實擡礮烏槍等件製造率不如法或膛口不光

或身殼太笨或機括不靈火藥則稍橫提煉不精烘
然之地渣滓凝結帳房兵之所以棲止禦風雨也或
丈尺不足或布質麤疏不適於用而又不能經久臣
心竊異之將欲罪其承造之人而查閱成案則官定
之價減省太過縱使涓滴歸公亦不足以收精良之
效於是改弦更張但求器械之利無取價值之廉數
月以來製造無多而司庫已有不給之勢且近日賊
中洋槍甚多即使官兵槍礮合式已難比其裝放之
捷所以潘鼎新劉銘傳諸軍能於遇賊獲勝皆恃此

物而濟以炸礮臣向在嶺南深知其利然皆非豫省
所易猝辦卽欲販諸廣東上海等處而動需巨萬豫
省何能辦此此軍械之難也抑用兵之道貴精不貴
多使坐作進退一一整齊操縱擊刺一一靈便何嘗
不可以寡勝衆臣在軍中閱視隊伍豫省用兵十年
未嘗講求及此無論馬步兵勇大抵以竹桿槍爲利
器叩其所以不用槍礮之故則皆由於裝放之不能
如法此不訓練之過也自奏調提督馬德昭到營以
後遂責之操演然技未精而寇已深校未畢而賊又

至冀有日月之暇俾士卒習吾教訓而不可得將欲
稍忍須臾則累卵之危剝膚之痛何以自解乃知前
此在事諸臣所以不及講求者爲此此訓練之難也
雜霸之術必先富而後強卽聖賢論政亦足兵而必
先足食斷無府庫空虛公私窘乏而可以枵腹荷戈
之士僥倖於一戰者豫省歲入之數不足二百萬計
其出項中年常缺其半上忙以後藩庫罄如前次豫
省軍餼每月七萬有時養兵多至一二萬計一兵每日
所得雖糧石價平之時已不能求半飽臣稔知此弊

常思厚其廩餼未能遍及每月已多至十萬以外賴有賞給陳州贏餘銀十萬兩藩司又竭力攢湊僅數散放八月以後藩庫萬難爲濟於此之時欲求緩而無可緩欲請協而無可協欲抽釐而無可抽之釐欲勸捐而無可勸之捐譁潰之變卽在目前乃不得已而裁兵就饑裁兵之後饑未見其不缺而兵則愈單賊則愈熾盤踞腹心久而不去民旣失耕獲之期官豈有催科之術恐併此區區之兵亦無以養之矣此籌餼之難也夫豫省地處中原天下安危之所

繫也信陵用魏而六國之師直叩函關岳飛至朱仙
鎮而河北豪傑一時響應 國家建都燕京以河

朔爲門戶而河朔之屏蔽尤在河南使賊往來徑熟
致六府三州之地遂爲戎馬之場則黃河天險賊將
與我共之上下千餘里安能處處設防日日申儆乎
且兩湖雲貴諸省驛路之所經饒道之所出而可聽
其梗塞乎則賊之禍豫受之豫之禍天下受之此大
局之難也以難戰之兵難籌之饒當難制之寇而又
處難以自存之地此非文武兼資智勇足備豈能轉

敗爲功勝其任而愉快者乎平吳之功必待於王濬
入蔡之捷必奏於裴度江南之下必曹彬始成不殺
之仁澶淵之盟必寇準始收退虜之效今以魯鈍無
才迂疏寡效如臣者當此重寄故雖有曾國藩之節
制而臣不能稟承有官文喬松年閻敬銘之輔車而
臣不能藉助有劉銘傳潘鼎新周盛波之環列四境
而臣不能聯絡清夜捫心咎無可追此又報稱之難
也臣以縣令不二十年蒙 兩朝知遇擢至巡撫
受 恩不爲不厚移撫豫疆已逾半載毫無補救

負罪不爲不深儻再隱忍不言則臣之罪愈重異日

朝廷雖欲終始保全

寬大之恩臣亦無由

仰受矣惟求

治以應得之罪

簡任賢能畀

以閩寄拯生靈於水火鞏疆圉於苞桑中州幸甚天

下幸甚疏人

上諭吳昌壽所陳豫省軍務種種

棘手勢處萬難自係實在情形該省地當四衝備多
力分兵饜兩絀現在張總愚股匪與賴牛等逆併聚
豫省賊數益衆斷非一省兵力所能支會國藩本有
節制三省之責自當統籌全局前往援應且江皖兵

力較厚此時又無捻蹤竄擾所有原設四鎮兵勇自應移向西進步步進逼以期力遏狂氛該大臣亦當斟酌情形移營進紮就近督剿未可株守一隅致誤事機豫兵不習火器無以制賊蘇省所製火器較爲精良著李鴻章將洋槍鉛丸火藥酌量提撥派員迅解豫省並著曾國藩李鴻章各揀派熟習火器弁勇赴豫交吳昌壽調遣令其教演豫兵俾利攻剿吳昌壽所陳供職無狀自請治罪並請另簡賢能等語該撫受恩深重自當力爲其難不得以兵饑兩絀遽事

推諉卸責吳昌壽原摺並著鈔給曾國藩李鴻章閱
看蓋至是而豫省之事乃愈棘矣

豫軍紀略卷十二

皖匪十九

同治四年冬十二月賊由皖豫被劄入楚賴汶洸牛老紅股向黃安黃岡黃陂孝感諸境豫軍提督馬德昭副將蔣希夷追之張總愚股向襄陽豫軍總兵宋慶追之適楚軍成大吉營勇譁潰襄樊黃孝並警

欽差大臣兩江總督曾國藩因奏令淮軍提督劉銘傳率所部由光固麻城徑援黃州宋慶以十五日
至襄陽及賊於老范岡龍集夜率親兵襲賊壘立破

十餘村因進與楚師提督姜玉順軍會合二十日比
明宋慶姜玉順各簡所部精銳進攻賊傾巢出拒我
軍奮擊敗之追殺十數里燬竹篠鋪太坪店牛首朱
家坡諸賊巢獲悍目吳尹潰李中強張魁兒朱小安
哈得勝等並寘之法二十二日賊由楊家橋竄棗陽
之騎馬岡宋慶等慮其東竄與賴牛股合疾以馬隊
繞賊前賊乃不得東折向北駛二十三日分掠唐縣
新野南陽境二十五日圍新野屬之沙堰寨宋慶已
先檄游擊屈聖祥率兵勇間道馳入寨自督親兵及

左後兩營往援副將蔣東才守備鄧林楓魏鳳魁分西北兩路進親兵礮隊潛自寨西越東門出賊不意三面夾擊寨內兵齊出賊乃大潰追逐十餘里斬獲長髮老賊百餘沙堰寨圍遂解而新野屬之呂營陳營吳堂柴堂萬莊岡埠楊營所在皆爲賊據設卡於栗河鋪化陂莊江家莊裏脅日衆勢益張宋慶姜玉順謀先去其卡因以二十七日率兵繞扼呂營寨前二十八日分路進剿斃先鋒悍賊二百餘盡焚所設卡擒駱猾狼周安付等斬之二十九日宋慶以所部

列陣於吳堂呂營之前斷援賊姜玉順以開化三營直攻呂營分撥兵勇四路策應賊出馬步數千縱橫馳驟我軍屹不爲動賊勢漸靡尋退入寨援賊皆爲毅軍遮擊不得近副將姜河清奮身大呼躍登寨牆手刃十數賊各營弁勇繼之遂克呂營寨斬殺甚衆擒悍目吳小黑等是夕楊北集吳堂之賊竄併陳營復爲宋慶干總程允中截殺數十五年正月初一日我軍乘勝平賊壘十餘進逼陳營初二日五鼓諸寨賊廬至欲包鈔我軍宋慶先飭馬隊繞出賊後令壯

勇猛攻陳營西北賊方挫拒間姜玉順已飭三營由
寨東緣牆而上奮呼斫殺各軍響應內外賊皆惶懼
狂奔自相蹂踐及斬殺者不可勝算賊遂盡竄白秋
田九店諸處宋慶督兵蹙之復竄唐縣桐柏泌陽回
旋諸境上以十六七日至信陽交界之明港驛其至
信陽將南趨與賴牛股合適劉銘傳軍在楚界宋慶
復追之不容息賊恐前後受敵乃聚明港驛圖由確
遂西鄖乘間北犯其時賴牛股黨蔓延麻羅黃孝間
爲藍斯明等所敗復竄近光州巡撫吳昌壽策以張

遊入豫楚師姜玉順外惟宋慶一軍與之角逐於南陽新野諸境而舞葉一路無兵攔截則西北兩面皆可虞因請令馬德昭蔣希夷折回豫省由光羅正確徑赴舞葉自督副都統安住馬隊一千名總兵保英步隊二千名由許州取道臨潁鄆城進抵西平會勦奏 上報可且敕淮軍員外郎李昭慶馬隊赴豫協勦焉吳昌壽旋因公事鐫級 命湖北巡撫李鶴年爲河南巡撫二月張逆由明港驛李從店竄正陽時賴牛亦竄光州馬德昭軍爲鄂省所留蔣希夷

軍至正陽之宋店與賊遇擊斬總愚之姪張九賊竄汝陽之馬鄉西集楊樓叅將王文行擊之遂竄上蔡遂平二十六日副都統安住總兵保英率馬步進剿至距西平三十五里之古蔡寨遇賊突擊敗之二十七日黎明大股復至我軍列步隊於西平城南雙廟窰分馬隊爲南北兩翼安住槍斃騎馬賊目二匪眾死拒不退且由南面繞襲後路保英揮令豫勝前營轉向正南橫截豫勝後營向西南繞鈔以扼之馬步鏖戰數時賊始敗遁追殺二十餘里我兵亦有傷亡

是日也賊亦知蔣希夷已過遂平宋慶由信確躡進
且皆至古蔡寨乃分黨迎拒蔣希夷軍在前令韓大
武爲頭隊蔣廣濟胡詩分列左右莊啟元董建西策
應賊殊死鬪我軍少卻宋慶適至潛伏火器近村中
賊追韓大武等將至村村內礮矢齊發噴筒火箭飛
激如雨賊大駭敗蔣希夷軍乘勢回擊追奔十餘里
賊乃竄舞陽之武功鎮出山店諸處宋慶蔣希夷追
至舞陽賊方踞王莊劍坡營恃複澗深崖負嶠爲固
宋慶察其形勢可攻乃與軍士約鼓之則皆進卻立

者斬於是營官李寶林郭春報劉廷李振清姜桂題各以其隊爭先越澗姜桂題爲矛傷裹創復進每越一澗斬殺數十大隊繼之援賊爲蔣希夷軍所截遂拔王莊劍坡營賊壘擒僞偏將裴春賊目陳器卞虎等斬之武功之賊遂盡併於出山店宋慶蔣希夷進至出山店夜大雷雨賊越澗潛遁宋慶軍過澗甫築營忽馬步賊數千來攻宋慶急整隊迎敵蔣希夷已鈔出其後夾擊之復斃賊百餘賊乃全遁遂平吳昌壽上兩軍戰事

上嘉之擢游擊劉廷董建西叅

將用加副將銜守備胡詩都司用守備李振清都司
銜千總姜桂題守備用均 賞戴花翎外委姜萬

隆馬玉崑千總用均 賞戴藍翎而以陣亡之五

品藍翎領催委官石成六品藍翎領催委防禦阿克
達春卽補驍騎校五品花翎披甲防禦依臣保

敕部從優議卹賊之至遂平將踞紅山宋慶蔣希夷
追及據山梁連戰賊皆敗因由舞陽圍城竄禹州新
鄭先是黃河議立水師礮船駐石橋副將崔廷桂統
之賊馬直奔大隄將焚料塚奪船北渡崔廷桂率眾

登岸急擊立殺馬賊數十其奔河口者復爲師船大
礮轟殺十餘賊乃退屯鄭州之郭店而宋慶蔣希夷
亦馳至張逆謀知之潛伏馬賊於沿途村舍冀出不
意衝我軍宋慶隊素整馬賊突出爲營官張鳴禮吳
守義擊退賊乘大雨由鄭州竄中牟宋慶等追至夜
三鼓襲賊營胡詩莊啟元韓大武等奮呼直入賊衆
大亂裸殺無算其悍黨以死拒擁張逆而遁至朱仙
鎮防省副都統善慶出隊復擊殺賊數十於是由蘭
儀竄山東之曹州宋慶等追至考城吳昌壽檄宋慶

蔣希夷越境疾追令安任保英爲後應方部署前進
賴汶洸牛老紅股由光州竄阜陽復由阜陽折回豫
境以三月初三日紛擾沈邱項城鹿邑淮甯太康諸
縣初四日亥刻直犯扶溝縣城知縣鄒金生礮斃馬
步賊十餘賊乃竄西華通許陳留尉氏初六日至朱
仙鎮時馬德昭軍已回豫吳昌壽令與善慶各率所
部迎勦行十餘里遇馬賊數百我軍擊殺數十擒長
髮老賊六正法賊知省城備嚴乃西趨中牟馬德昭
部游擊李廣進都司谷瑞祥善慶部委叅領全福追

及敗之于總李家安手搏殺悍目彭中庭奪馬數十
賊遂踞鄭州白河諸處吳昌壽慮賊捨渡急檄水師
戒備復令李世玉四營馳扼楊橋渡口而以羽書徵
宋慶蔣希夷安住保英各隊迅回西路會勦賊由鄭
州迤南滎澤山路竄鞏縣之三家店金孤堆知縣袁
脩翰率勇禦之賊受創乃不敢西復由朱仙鎮通許
回竄十二日至陳留遇蔣希夷軍十三日蔣希夷令
胡詩周永南進攻大營各莊賊巢董建西霍殿章進
攻大馬各莊賊巢韓大武蔣廣濟伏東南備截擊四

路併發戰數時賊衆奔潰十四日黎明後賊復大至
蔣希夷據溝爲險占上風施槍礮長矛各隊踰溝奮
刺馬賊先敗把總蔣芳周藍翎外委李慶劉長春深
入陷陣歿士卒益奮前鬪步賊亦紛潰是日斬獲長
髮老賊甚多得羸馬千餘賊遂以十四五日由杞縣
睢州蘭儀考城疾駛入山東曹州府境於是賴張二
逆俱東豫軍扼要隘備回竄馬當二逆之蔓擾豫中
爲宋慶諸軍所雕勦技窮力竭皆思捨船北渡其不
得逞者水師礮船力也蔣芳周李慶劉長春後皆議

郵如制

庚子年

院程十九

新刊 皇朝 通志 卷一百一十一

--	--	--	--	--	--	--	--	--	--

皖匪二十

五年三月李鶴年受河南巡撫事張總愚賴汝洸牛老紅竄踞山東水套連撲運河爲官軍擊敗復竄河南商邱虞城夏邑李鶴年檄宋慶保英安住蔣希夷等隊自蘭考移赴歸德進剿劉銘傳軍亦自曹縣追至虞城大兵雲集賊乃奔竄江南劉銘傳追擊之於碭山賊知徐州備嚴復由碭山回竄虞城甯陵考城及商邱之劉家口是時張賴二逆忽分忽合牛老紅在張總愚股任柱在賴汝洸股任柱尤凶狡善戰出

沒江皖楚豫飄忽靡定豫中宿將改用總兵張曜請
假回籍葬親以所部交保英統帶宋慶一軍東西馳
逐宋慶漸以功顯於時爲賊所畏云四月十四日宋
慶保英追賊至睢州壩守備楊鴻禮李葆珠率馬隊
前隊猝與賊遇列隊迎戰步軍踵至賊退追殺二十
餘里獲賊首張全成賊大股方圍攻王家橋寨宋慶
等軍至圍解泰將李寶林劉鳳清游擊楊春祥都司
郭春報千總宋得勝姜桂題率親兵爲七起夜襲賊
營副將蔣東才叅將劉廷以大隊接應三鼓時疾馳

二十餘里抵賊巢張總愚糾黨出拒昏夜短兵相接
往復十餘次賊勢不支潰敗我軍連奪踞莊五所斃
賊三百餘擒擒首劉勤學郭文仲張得及長髮老賊
五十餘獲牲畜旗械甚夥賊乃遁竄豐沛李鶴年因
以其時布置省防河防出駐歸德親督堵剿而賴任
股匪復自江皖回竄永城淮軍總兵周盛岐皖軍總
兵程文炳追擊之遂竄夏邑宋慶等移軍就剿馬德
昭善慶繼之二十六日竄西南爲馬德昭善慶蔣希
夷軍截殺甚衆宋慶偵知賊大股復竄正西乃乘夜

疾回營於夏邑迤西之茅家營朱家寨距賊十里許
夜四鼓合叅將李寶林劉鳳清蔣東才劉廷襲賊營
將士皆銜枚疾走寶林先入賊卡各隊從之大呼奮
斫賊不及措立殺二百餘擒長髮賊劉方城孫鄉等
拔出難民數百餘賊紛竄二十八日大股聚夏邑西
三十里之大周集諸將並追至於是馬德昭保英以
所部營賊之東宋慶獨扼西面當賊鋒蔣希夷列隊
西南安住善慶各率馬隊張東西兩翼嚴陣待部勒
甫定賊馬步擁而出善慶麾旗蹙之勢少卻旋犯我

東哨分衆繞步營馬德昭倚營結陣槍礮驟發賊衆
應聲倒斃賊不得逞乃又衝我西哨宋慶麾令李寶
林劉鳳清迎擊而自率劉廷蔣東才大隊躡進馬德
昭保英蔣希夷各刺斜夾擊安住善慶馬隊分路包
鈔各殊死鬪自辰至午持不決宋慶所部毅字親軍
突前陷陣宋慶親率守備李振清楊萬年兩營線槍
環擊賊伏而又起則以長矛春刺刀槩近接摩刃無
聲久之賊大譁潰各軍乘勝追殺二十餘里始收隊
賊遂南趨亳州是役也斃賊千餘擒長髮者九十餘

中有捨目張料兒爲總愚之姪又僞雄天豫右提司
張義生並搆獲僞官執照訊明皆斬之得戰馬二百
餘我軍傷者百餘人陣亡二十三人奏入 上嘉
之賞劉廷換戴花翎擢蔣東才李寶林副將王國良
總兵薩尼布副都統悅松額防禦雙玉協領蔣廣濟
叅將胡詩游擊李家玉守備投誠勇目馬融和守備
銜藍翎傷亡兵勇撫卹有差李鶴年因奏言匪蹤遠
竄宜選將合兵整頓隊伍以備征勦而專責成其略
曰豫軍前敵步隊有南陽鎮總兵宋慶統帶毅字十

營前甘州提督馬德昭統帶安勇豫銳等五營記名
總兵保英統帶豫勝四營副將蔣希夷統帶輔衛四
營每統帶一員各有馬勇一二百名不等馬隊則吉
林副都統安住統帶吉林黑龍江四起原額一千來
豫半年轉戰奔馳傷亡十去其二又杭州副都統善
慶統帶吉林黑龍江馬隊二百七十員名河南駐防
馬隊及河北南陽歸德三鎮馬兵共七百名查馬隊
馬兵數雖二千而豫省馬兵槍箭技藝究不若吉林
黑龍江官兵之便捷善戰兩省馬隊除傷亡外實僅

千人不若歸併一起又查步隊二十三營偏師各領將多心渙兵分力單在前數年匪股既衆到處蔓延於是或一二營或四五營分道設防爲掎峙聲援之計今則張牛任賴聚爲兩股現有江皖各軍游擊追截是豫省之軍分防牽掣師勞無功不如專力攻勦以戰爲守此馬步兵勇所宜及時歸併者也賴逆自竄入亳境直向東南奔逸豫疆附近已無賊蹤臣因逆氛較遠暫檄宋慶等軍仍駐永城夏邑一帶以備征勦連日悉心訪察統帶馬隊之安住善慶二員皆

久於行陣而善慶在豫有年地利情形較熟擬將安住所帶之馬隊歸併善慶統帶其原帶之駐防三鎮等馬兵仍令隨同教練提督馬德昭紀律嚴明聲威素著總兵宋慶果敢任事賊所畏憚現將保英所帶之四營歸馬德昭統帶副將蔣希夷現有被揭事件其所帶四營暫令副將蔣東才接管撥歸宋慶統轄以專責成疏入 上悉從所請於是豫軍各營裁汰冗疲申明賞罰所至每多克捷其後起張曜於家復添練二十餘營遂成張宋兩軍卒平大逆而選將

練兵之策實始建於此五月十一日張牛股匪由江南蕭縣竄入碭山勢將西趨十二日邊馬已至虞碭交界其時宋慶馬德昭等軍以任賴一股竄入皖境後擾至宿州方由永夏一路進兵躡聞張牛股至乃星馳折赴虞城碭山迎擊善慶馬隊爲之策應十三日軍至虞城境牛王堦遇賊馬數百疾擊敗之追至碭虞交界之柳荻圈我軍逼賊壘爲營十四日黎明賊騎千餘來偪宋慶揮所部擊斃賊百餘擒擒日張得勝劉漢章張愜起孫嘉賓孔兆人劉荆保姚立

業等獲僞印一沿河踞莊悉奪回正馳逐間逆首張
總愚率千餘騎直犯我軍宋慶馬德昭急分隊夾擊
逆衆散而復合逾時始向東南退竄十五日宋慶馬
德昭夜襲賊營連奪所踞六莊斃悍捻五六百擒劉
化雲劉小等百餘天向明甫收隊卽有馬步大股回
衝我營宋慶急調各營自率親兵督戰馬德昭善慶
均馳至三面鈔賊腹背聞官兵槍礮聲皆匍伏不敢
起張總愚氣沮喪奮死突重圍遁去死者復三四百
先後得牲畜旗械無算於是張牛復大劊牛老紅遂

與張總愚分股獨跳入皖境未幾復由亳州闌入鹿
邑奔陳州至上蔡馬德昭軍一敗之於永定寨再敗
之於洪橋再敗之於上蔡城關擒髮逆陳喜新張魁
秀等牛老紅遂復與張逆合股張逆之敗南趨晝夜
避兵而行以五月十九二十等日從甯陵睢州竄杞
縣太康周家口亦麇聚於上蔡二十五日宋慶等軍
擊之於塔橋又敗之於大吳莊二十六日奪其朱戶
寨踞竄賊乃奔竄二十八日追及之於邵鎮張總愚
突引大股回撲相距隔一小河宋慶急令都司郭春

報姜桂題程允和等列陣於南蔣東才李寶林等領
隊扼其北傳知後隊速進營甫定賊已分隊踰河而
東潛鈔我軍後宋慶親率南隊越河西抵張逆時賊
勢張甚宋慶激勵將士都司郭春報干總吳會大呼
陷陣賊猶死拒我軍橫擊斃其執旗悍目屍相枕藉
羣賊驚亂戰至昏黑始潰奔我軍擒殺十餘里是日
斬賊百餘擒長髮張西德等五十六我兵傷亡亦以
百數夜二鼓守備鄧林楓往襲賊破所踞莊獲賊言
是戰陣斃外受重傷者二千餘大小頭目相聚號哭

勢甚窮蹙云二十九日馬德昭軍蹙之於十里鋪會
大雨賊踞百尺集六月初四日馬德昭進屯單莊初
五日宋慶軍至營甫定賊糾衆來犯叅將莊啟元等
併力壓退須臾賊又來犯相持未決馬德昭間出徑
擣賊巢殺賊二百餘方徹隊間回援之賊涉水包鈔
截我歸路官兵往來衝壓鏖戰良久斃賊甚衆我兵
亦多傷亡總兵王國良叅將王步雲守備謝聯陞皆
受傷初八日五鼓宋慶率親兵往襲賊奪所踞莊擒
賊目張效固賊遁初九日進至洪河截其後股盡棄

械鼻水淹斃殺死者無算賊計急決洪河阻我軍不得進難民言賊頭自有程四老坎楊霧者極狡詐皆爲官軍槍斃僞小王者亦死亂軍中云於是張牛合竄汝甯一路而賴任股匪復由皖境上犯竄至太康扶溝睢州杞縣延及陳留通許皆有賊騎宋慶等軍方與張牛相持未遑兼顧蓋斯時賊雖兩股人數愈衆所至劫掠羸馬騎多於步往來剽急已成流寇豫軍屢勦獲勝然顧此則失彼李鶴年深憂之以爲制賊不流非合圍必不能痛勦兵法十圍五攻校量賊

勢又非一省兵力所能辦會 上敕欽差大臣兩

江總督曾國藩進駐周家口督周盛波等軍會豫軍
辦賊與李鶴年所見合曾國藩策言張牛各股業經
遠竄洪河以西其勢必再渡淮而南任賴等逆旣由
下蔡西竄亦必上窺皖鄂我軍自需扼守沙河北岸
回竄之路應飭潘鼎新一軍在周口以上沙河北岸
擇要扼紮不必跟蹤追剿任賴等逆果已南渡再檄
調銘字一軍赴沙河北岸會同防守豫省各軍概防
沙河北岸不必縱橫跟追庶勞苦較少而成功反多

俟沙河之守已固逐捻於西南山多田少之處賊騎
不甚得力官軍較有把握云李鶴年據以入 告
因自歸德旋省布置省城防務令所調直隸總兵余
承恩一軍與崔廷桂水師會合以防河岸飭宋慶等
無遠追且定議自周家口以下至槐店止扼守沙河
自周家口以上至朱仙鎮止扼守賈魯河由曾國藩
派兵設防自朱仙鎮以北四十里至汴梁省城又北
三十里至黃河南岸無河可扼掘濠守之由李鶴年
派兵設防自槐店以下至正陽關仍守沙河由喬松

年派兵設防自正陽關以下卽係淮河由曾國藩派水師與皖軍會防扼賊馳竄蓋自剿捻以來多尾追之師主客勞逸勢不相及分地設防議自此始後雖事變屢出而大功底定實不外制賊不流之策信乎智者所見蓋略同云

皖匪二十一

五年六月巡撫李鶴年回省踏勘設防自朱仙鎮以北四十里至省城又北三十里至黃河南岸按段築牆分兵扼守而宋慶諸軍方追奔逐北勢難回徹李鶴年因以情人 告且請敕浙江巡撫飭總兵張曜迅速來豫於是豫省始有添練大軍之舉張牛股匪自百尺集敗竄距洪河迤北六月初十日圍攻五溝營寨馬德昭軍至潰竄是夜賊衆梟水謀劫我營擊退之十七日劉松山軍至高岡奪賊踞數莊二十

日復敗之於雙廟宋慶所部悉渡洪河以北與賊戰
馬德昭由黃橋夾擊擒捻首羅有法竇憫林等斬首
二百餘級賊東竄西平縣境牛老紅先至西平爲馬
德昭所派隊襲殺甚衆至是復合竄舞陽我軍疾追
值霖雨泥淖將士冒暑前進二十九日及諸葉縣之
保安驛賊衆盤踞寨外七里岡謂我軍阻積水不卽
至方造食各隊衝入賊大駭潰擒長髮老捻李老姚
陳羣王俄等餘衆南竄至裕州十里鋪賊見官兵馬
隊不多糾黨抗拒副將王步雲守備李家安千總李

家昌汪印干奮擊敗之追殺至清和寨擒髮賊賈思安等賊遂沿白河東岸張逆在前牛逆在後意將乘隙偷渡阻水以避官兵時馬德昭軍因任賴蔓繞陳杞檄徹回顧惟宋慶一軍與賊角逐七月初三日追及南陽之瓦店擒長髮馬賊謝學珠等賊由瓦店岡頭偷渡白河會大雨河漲我軍成橋以濟賊遂竄新野之老龍寨初九日至鄧州我軍追殺擒捻目岳振澹劉開誠等解鄧州圍初十日黎明及牛逆於州城西南之駱家莊副將李寶林叅將莊啟元劉鳳清率

所部奪賊踞莊三所戰方酣後路賊旗渡越刁河布
滿官軍之北宋慶乃率蔣東才分路督戰賊殊死鬪
我兵傷亡亦衆莊啟元李寶林頭腹皆被創都司鄧
開誠陣歿力戰三時之久子藥罄刀矛多缺折騎賊
均下馬手搏誓以死決宋慶乃合隊伍緊抱緩徹至
刁河橋口扼橋爲禦是役也官軍以急追牛逆故陷
賊圍中倉卒僅成一營張牛兩逆自西平舞陽皆在
沙河南北分股行至是復合勢特盛距官軍營半里
許樹柵掘溝以圍我宋慶夜遣鄧林楓馬玉崑突圍

出令蔣東才等與賊梭戰至三晝夜芻糧並竭將士
守愈堅後路各營爲刁河北岸賊騎所阻饒道絕鄧
林楓等至營申明大義兵勇皆感泣憤怒誓以死透
圍未至二里許鄧林楓懸大旗圍內軍懸旗應之十
二日夜宋慶親率游擊屈聖祥千總武會程允和自
內出鄧林楓等自外入遂毀圍並奪賊踞十餘莊擒
斬賊數百賊遁刁河南岸十四日復於袁莊追殺賊
數十賊乃竄南陽事 聞擢鄧林楓游擊賜鄧開
誠卹典二十二日賊至南陽之滌灘湘軍皖南鎮總

兵劉松山宣化鎮總兵張詩日軍並至與豫軍會合
遂連敗賊於尹家寨桑莊寨侯橋寨諸處賊至新野
之上仙岡列隊以待我軍分三路張詩日居中劉松
山右宋慶左併力前進張牛二逆親率悍黨猛攻湘
軍兩路合一結成方陣以劈山大礮洋礮洋槍連環
轟擊一時許賊屍枕藉猶冒死不退宋慶出本隊長
矛選鋒飛奔接應千總宋得勝程允和率親兵奮入
斃賊三百餘賊馬步始大潰湘軍合追計斃賊二千
餘擒長髮四百餘賊遂由南召翻山北竄恃山險爲

避兵計八月初三日至汝州境先是馬德昭軍撤回駐汝州賊至仙孤三山等寨馬德昭出隊州兵助之擒斬賊目穆添順陳幅沅等復敗之於焦村張村賊穿山遁上仙岡之戰哨官千總沈金藍翎把總鄧士炳死之皆議卹此張牛被勦事也其賴任股匪以六月竄繞睢州杞縣知州劉廷柏知縣查以謙擊退之山東臬司潘鼎新軍遇賊於杞境之石嶺岡油坊岡斬殪甚衆追至小武岡沙窩高陽集諸處總兵余承恩截賊於陳留東提督劉銘傳軍亦至賊乃南竄蘭

儀七月中牟新鄭禹州密縣長葛趨許州盤踞許
之禹城賀張諸村馬德昭軍至襄城謀賊衆分掠襄
城縣北之潁橋縣東之方窟茨溝臨潁縣之三星店
因以初七日拔隊繞前截擊沿途均有斬擒至禹州
黃岡寨賊方圍攻寨我軍奮前斬殪三百餘擒賊目
劉太清等正法初八九日復敗諸襄禹所屬之洪水
橋小黃莊提督周盛傳軍亦至許州會合十二日大
股復回竄沙河北岸擾及臨潁郟城等至中牟尉氏
與張牛台收降人桂錫植獲大逆魏羣斬之八月長

精成豫分當河漫處多浮沙旋築旋圯地勢太寬兵分則見寡初十日以後張牛賴任合股東趨至近省之巴店李口括民間整鑿綿被將毀平牆濠於十六日竄至黑堽逼近河岸水師守備劉洪泰開大礮轟擊賊循東而奔復爲守兵擊退遂併歸南路乘夜晦分隊撲牆潛於蘆花岡沙鬆處填濠穴牆逼李鶴年具疏以聞咨直隸山東安徽江南各視賊所向出兵邀截且檄宋慶等會合湘淮各軍追躡焉於是賊竄山東九月復回竄豫會李鶴年至周家口與會

國藩籌商勦務聞賊耗疾馳還豫省而賊已由陳留
通許犯省城馬德昭軍拒之敗賊於太平岡花翎都
司銜守備于得水藍翎千總李世寶戰歿賊南竄忽
又自南而北初九日事也初賊之東窺運河不得逞
乃圖決黃河斷流以徒涉宋慶謀知其謀飛以狀聞
李鶴年因檄保英蔣希夷各隊北行授計水師密爲
之備十一日賊薄河守備孔廣思船先至知府師長
怡守備劉洪泰船亦至賊掘黑堽隄師船大礮轟擊
不退適宋慶軍及崔廷桂礮船均至黑堽任柱乃部

分其衆退踞近河各莊將乘夜復掘宋慶台劉廷鄧
林楓襲其踞莊賊驚夜遁崔廷桂慮其復掘上游石
家樓因與宋慶約水陸並進偵知賊詭計欲誘官兵
西追乘間折回復掘乃密排步隊於石橋隄上而以
礮船緊泊埽下巳午之交賊馬步蜂擁回竄一路縱
火焚燒料物延及埽段煙燄彌空崔廷桂令水師開
大礮宋慶令李承先等從烈燄中殺入刀砍矛刺所
向無前礮船首尾連環轟擊賊衆紛倒宋慶乘勝親
督全隊猛擊之賊始潰敗西走越日於上游三十餘

里之滎澤壩復縱火掘隄是處爲黃河坐灣其日西
北風礮船上駛不利而埽面犯風之處波浪滔天埽
根料概半爲焚燬壩工蟄塌其勢岌岌忽東南風轉
水勢平順礮船起篷胸息至滎澤壩步隊隨至合力
轟擊斃賊數百餘衆南竄廟李寨蔣希夷伏兵突起
衝賊數段礮斃賊首任雙賊乃大潰追殺數里復斃
賊千餘獲賊供言逆衆仍欲渡運河擾山東云是日
隄掘二十餘丈深丈餘水勢洶湧已將氾濫搶築數
日始完固是役也實南北大局所繫其得化險爲夷

者雖曰兵力若有神相焉李鶴年因奏請河神扁額
且言逆衆既生狡謀必思再逞長隄千里防不勝防
意深憂之於是始有添練礮船之計而張牛任賴亦
自此遂分不復合矣張牛一股自中牟南竄許州爲
江蘇臬司劉秉璋軍所敗遂西竄襄郟由山路犯汝
州知州舒亨熙禦之復西竄伊陽境之車防鎮十九
二十等日掠洛河南岸窺河南府城知府陳肇鏞率
文武堵禦逆知有備乃折竄龍門白沙掠宜陽永甯
知縣恆倫陳延芬各嬰城守賊遂由韓城鎮觀音堂

鼠陝州外委薛位烈死之二十六日屢集州城西北
之太陽渡意將渡河河陝汝道趙書升陝州知州周
仁壽率衆急擊都司謝聯陞礮斃紅衣賊日及馬賊
十數賊勢少卻干總郭長貴受矛傷裹創力戰賊遂
由靈寶闖鄉疾馳入陝由是縱橫馳踞於關中渡河
之狡謀卒弗戢

皖匪二十二

賴任股匪自中牟陳留蘭儀考城東北竄山東荷澤曹縣諸境爲劉銘傳潘鼎新追敗之於魚臺金鄉因回竄豫境商邱甯陵犯歸德府城十月二十七日馬步至東北二關署總兵成景出兵擊斬擒目霸來住紀七李六等二十九日復至城下縱火游擊呂振河擊卻之復竄柘城爲周盛波劉秉璋軍所敗遂由太康奔淮甯晝夜急馳勢甚剽疾時西股入陝由華陰渭南尹家衛入南山犯藍田窺漢中李鶴年令保英

四營馳屯闔鄉大峪口復谷會國藩令劉松山一軍
駐陝州扼賊回竄兼顧河岸浙江提督鮑超所部靈
軍亦奉 命入陝會勦狃捻以故宋慶一軍得專
意賴任當賊之至淮甯也宋慶駐杞睢得報疾馳以
三十日抵淮甯之萬寨遇賊麕聚乃令劉廷蔣東才
李承先率所部精銳連破賊踞十餘莊復出奇兵由
陳州正南攻賊中堅立斃長髮三四百獲悍目蕭振
強雲炳徐有桂等賊敗西趨獲賊供言賊之輜重前
一夕渡沙河盡留馬步悍黨防追擊我軍因急起追

至牛家口賊衆已悉由淺處渡河宋慶渡河躡追十
一月初四五日賊由上蔡正陽兩日間狂奔三百里
以初六日至信陽州焚掠攻城南汝光道蒯賀蓀信
陽協副將尹嘉賓率衆抵禦夜縋壯勇薄賊營縱火
賊驚駭相踐踏死者甚衆越日宋慶軍追至賊已折
竄羅山宋慶追至羅山賊復竄光州固始截獲後賊
馬成等訊得賊狀因與周盛波約以豫軍由南路淮
軍由北路進夾擊之豫軍副將蔣東才叅將劉廷馳
至光州東南觀音堂偵知任柱大股不遠催軍疾進

賊不敢敵折向東奔我軍且追且殺至高店生擒逆首任傅張春及長髮三十餘得牲畜無數宋慶以未得及賊憤甚翼日疾馳三十餘里及任賴大股劉廷等大呼直前縱橫截擊賊擁衆回鬪我軍長槍勁旅奮勇決盪宋慶親兵復繞出賊後賊首尾不能兼顧乃潰奔追殺二十餘里斃賊五六百擒帶隊逆首李開陳瞞堂馬四典任縛盡牛洪緒等百餘斬之解散脅從三千餘賊遂竄光州南之白雀圍其竄州南王仔岡之賊爲周盛波所截殺亦甚衆大股遂入鄂境

擾麻城黃岡黃陂應山至天門李鶴年檄宋慶越追
因復奏言賊至天門其西南則江漢大川爲之間隔
其正北隨棗與豫省南陽所屬桐柏新野壤地相連
本月初六日准提督鮑超咨言東股賊勢較緊權宜
緩急移師赴楚會剿臣以現在賊勢及各路官兵會
剿情形計之除湖北本省郭松林彭毓橘等軍外張
樹珊周盛波周盛傳三軍計已深入楚境劉銘傳劉
秉璋均自確山進兵鮑超復自隨棗壓賊之背三路
兜圍南阻江漢籠山絡野賊衆已入阱中特恐猾逆

慣於避兵仍復乘虛紛竄則東趨熟徑又將回駛豫
疆光固信羅終屬無險可扼臣已飛檄宋慶於長馳
直進之時尤宜兼顧後路一遇賊衆回竄急繞出其
前毋令釜魚倖脫並飛催總兵張曜俟其到豫臣與
通盤籌議選將添兵稍有藉手卽出省擇要駐紮居
中調度復請添設水師一營黃河水師礮船自巡撫
吳昌壽倡設原募水勇五百名李鶴年至豫奏調歸
德鎮標兵一千名駐守河岸合三營歸副將崔廷桂
統帶至是復增募一營添造長龍杉板船十二隻合

前僱募民船統四十九隻以二十五隻配兵勇兩營
令奏調直隸知縣邵鉞守備劉洪泰統之泊汜水上
下梭巡往來策應其後屢有戰功黃河之防愈密時
西賊竄華州同州朝邑東賊竄鍾祥白口爲彭毓橘
郭松林所擊勢將復竄豫境李鶴年檄宋慶暫將後
隊回扼信桐交界以前隊選鋒六營馳往德安聽候
湖北巡撫曾國荃節制復令善慶馬隊移駐信羅以
相援應十二月十二日李鶴年出駐許州以練兵需
饒正月初十日奏言髮捻交訌以來惟豫省之民困

最深亦惟豫省之兵力最薄民困深則流亡載道歎
杼柚之既空兵力弱則轉徙無功慨斧斨之易缺患
貧患寡遂不敢避未能遠謀之誚而不得不存因人
成事之心 朝廷命將出師始以科爾沁親王僧

格林沁之忠勇性成繼以協辦大學士兩江總督曾
國藩之威望素著蠢茲小醜尙爾稽誅近且跳梁鄂
渚蔓擾秦關日長炎炎又將燎原於豫矣當此之時
而不思發憤以自強循隱目前創鉅痛深而不爲之
所具有天良豈竟忍於出此伏查十有餘年賊之旋

繞歸陳南汝幾至習爲故常卽其去而之他而皖楚
齊秦亦必假道於豫則滅賊之機惟豫操其樞紐而
豫軍自來馬步不滿二萬揆厥所由豫軍兵饑悉仰
地丁每年除減緩留支而外歲入不過一百六七十
萬漕折京饟雖逐年皆有帶欠而報解之數總在四
五十萬本省旗綠各營及城防製造又須二三十萬
其撥解本省軍饟銀多不過百萬而藩庫業已一空
如洗遇有偏災水旱羅掘俱窮卽不添一兵已無士
飽馬騰之效臣受恩深重洵任封圻向在京師親見

司農仰屋假使兵不議添而賊終可滅臣亦何敢稍
事虛靡惟豫軍現有兵力以防本境猶不足何論出
境以當一股猶不敷何論兩股萬一賊蹤屬集援師
未至我武不揚潰敗決裂何堪設想且長河一線南
北大局所關儻該逆故智復萌又豈眼前兵力所能
兼顧臣與藩司卞寶第等再四籌商僉謂以豫省現
在解京之款亦猶糶米之於太倉如留爲本省增募
之資則步隊可添萬人防剿均有裨益秉承 謨
訓仰賴 天威加以各省援軍同心協力果令寇

氛速殄以後夫耕婦織絲粒皆入 天儲一歲正

供可敵二歲省嗇於前必且取盈於後所幸 聖

明在上臣子無不可披瀝之隱衷饋饌旣充天下無

不可削平之劇寇是以不避 斧鉞干冒 尊

嚴伏乞 皇上俯念豫省軍事日棘非添兵不足

以勦賊非增饌不足以添兵准將前後奉撥京協各

饌及歷屆漕折暫緩一年留爲本省添隊練兵之用

詞意懇切 上俞所請於是賊擾襄陽之峪山黃

龍壩劉銘傳鮑超兩軍追擊超大敗賊於楊家峰拖

船埠永樂河諸處逆首任懷邦受傷遁謀言賊近唐
縣李鶴年因葉舞空虛無兵可調乃令蔣希夷率親
兵四營駐葉縣而令馬德昭所部屯許州復檄善慶
馬隊往信陽與宋慶會合二十一日宋慶軍遇賊於
唐縣之晉岡擒毫捻三十餘二十二日大股駛至桐
柏縣之平氏鎮馬步數十仗排列二十餘里我軍追
及以桂錫楨馬隊邀截賊馬宋慶居中劉廷王連三
爲左右翼三路並進槍礮間以長矛斃前鋒悍賊四
五百擒管帶外五營擒首王鳳池張周王卯劉平青

秦中游魯涑張用石中張成九等百餘賊乃南趨固
縣鎮小林店申陽臺入信陽州境二十四日賊於州
北五紀屯諸處縱火適善慶馬隊馳至因於州城北
面樹木叢雜處布列旌旗而令馬隊馳騁煙塵蔽空
賊驀見我軍不知虛實退回五紀屯善慶與南汝光
道蒯賀蓀謀言官兵馬隊不及千人又無步隊相輔
難以力鬪而賊勢甚銳不挫其鋒必且擾及城關爲
害愈大乃以是夜令所部馬勇改爲步隊銜枚疾行
直入賊館奮呼擊殺所部騎兵齊列莊外施槍礮壯

聲勢城上然大礮文武官紳率團協應賊驚覺拋戈棄械裸體狂奔自相蹂踐死者無算騎兵乘勢追殺賊乃敗向長臺關又折向明港驛陡溝宋慶由平氏兼程追至洋河賊又向羅山之五里店仙花鎮諸處善慶蔣東才各隊均至羅山與宋慶會合賊遂由光山縣屬之白雀園潑陂河復竄入楚省黃安縣境賊之由湖陽竄豫本意自鄧浙西趨出荆子關循商洛入秦與張逆股合疊爲諸軍所挫始折而東走復向東而北由北而南旬日間輾轉奔馳千有餘里二月

湖廣總督李鴻章進駐周家口代曾國藩督諸軍會
勦曾國藩回兩江任督籌兵饟李鶴年自許州馳與
李鴻章會議軍事以善慶馬隊助劉銘傳軍其後贛
榆之役捻首任柱爲善慶槍斃賴逆燬焉卒就衰滅
張曜至自浙遂添募十五營名其軍曰嵩武宋慶所
部亦酌增隊伍於是豫省始有大枝勁旅保英駐閩
一軍爲張曜舊部因令馬德昭所部前往換防以張
總愚句結猖逆復擾同朝意將捨渡復令馬德昭赴
援晉省駐河東爲之備賴任股由孝感應山雲夢京

山踞擾鍾祥之白口圖搶渡襄河聞霆軍移屯安陸復折趨京山天門漢川雲夢諸處潛冒官兵闌入信陽州屬之黃土岡雙和寨宋慶自桐柏回剿直隸提督劉銘傳方至桐柏之游河店亦回軍與宋慶謀以銘軍勦東雙合柳林之賊宋軍由游河之南進青石橋勦駱駝嶺之賊計定賊聞我軍進兵卽東南遁適遇周盛傳周盛波兩軍爲所擊敗本意出平靖關以劉秉璋李昭慶兩軍抵小河溪因旋竄應山孝感四月初旬事也李鶴年以秋讞回省事竣復至許州時

西賊爲山西臬司陳湜浙軍所敗遁去馬德昭復還
閩鄉方馬德昭赴晉李鶴年令直隸候補道段廣瀛
率精銳四營往代至是遂併留防西路東賊出沒於
豫之羅山楚之黃安其至黃安紫屏鋪爲劉銘傳軍
所敗其至陟山爲李昭慶軍所敗宋慶回扼信陽賊
遂以四月二十三日竄入新野越三日鄧鎮交界皆
有賊馬宋慶自信陽一日夜疾馳二百餘里及之於
張村潦河騎賊來嘗吾軍守備姜桂題擊敗之翼日
黎明宋慶令姜桂題率馬隊繞由鎮平迎截自與候

選道裘德俊親率各隊進至侯集方葺食賊至毀竈
前進劉廷蔣東才李承先列隊迎敵裘德俊督率築
營賊見我軍營壘成乃南去宋慶逐之任柱親率死
黨回拒我軍奮擊敗之擒斬悍目石老萬梅佳玉郭
所吳賴子路永倡陳家明陳尙達毛四虎等賊竄南
陽之瓦店泌陽之羊册周盛波軍自楚至皖迎擊敗
賊於福灣五月初二日賊犯裕州宋慶以賊行甚疾
令各營輕騎急追及之於裕州東北十餘里蔣東才
槍斃執旗賊目陣斬逆目戴刁孫友高同心王化徐

廣元等三百餘，歷葉縣襄城，近偃許州。時嵩武軍已成，駐八里橋。初四日午刻，騎賊蜂擁至李鶴年率張曜新軍各隊於橋南二里許，嚴陣待賊。遙見大燾急退，我軍追殺至頽橋石固驛，諸處擒其悍日林慶濤、胡幅濬、李貴如、李順子等，皆斬之。是日大風揚塵，陰霾晝晦。嵩武新軍及鋒始試列陣，嚴整士百，其勇州民於城上皆額手怵躍，以爲十餘年來未見如此之軍容也。越日，宋慶軍追至賊，遂竄中牟。鄭州知水師添設礮船，不敢犯。由洧川尉氏竄朱仙鎮，邊馬駛及。

省城七八里大隄內外藩司卞寶第等督率文武嬰城固守賊乃由陳留通許杞縣睢州蘭儀考城疾竄山東曹縣境賊衆日輒馳二三百里骸足俱腫潰宋慶軍亦以疾追疲乏與張曜新軍均暫駐蘭考備賊回竄會劉銘傳軍至睢州李鴻章移宋郡因會籌扼守陷賊之法其議以黃河舊隄東至江南徐州境四百餘里分段駐兵屯守與東省連防相峙使賊不得他竄合力兜圍其蘭儀東壩頭至曹縣王儉集一百五十里爲豫軍汎地張曜宋慶兩軍追賊出境卽就

此地駐守方布置營濠賊已由戴家廟沈家河諸處
竄過運河擾汶上曲阜直趨泰安有窺伺濟南暨東
三府之說劉銘傳潘鼎新軍先後拔赴濟甯李鶴年
因奏言運東平行四達無險可扼齊河濱臨黃河毘
連畿輔旣恐恣意奔突蹂躪完區復慮乘隙搶渡震
驚北路李鴻章統籌全局必有制勝之方而賊衆路
歧非厚集兵力不足痛挫凶鋒臣不敢存畛域之見
宋慶一軍雖追賊疲乏而勇往善戰且極與淮軍聯
絡應令出境助勦以期共殄寇氛於是令張曜暫駐

蘭考宋慶赴東省會合勦擊於是賊竄萊陽膠州李鴻章自歸德移駐濟甯與李鶴年書略曰賊成流寇須驅之於必困之於垂死之日會師合勦方爲上策山東青州迤東爲登萊地處海隅正可乘勢逼圍制賊使之不得再出擬以膠萊爲裏圈運河爲外圈合東淮皖豫四省兵力共圖聚殲自汶上開河至申口百五十里調派宋慶張曜兩軍分段扼守並令於運河西岸紮營留住東牆分人巡哨俟有替防之隊再派宋慶一軍助勦李鶴年深然之因令張宋

河楊家園三十五里分兵布守賊之前股在卽墨城東馬山以下後股尙踞蘭中水屯村距金口二十餘里邊馬時於沿河游駛意圖突圍張曜以沈家口運黃交匯之處河汊寬廣陸營難以周顧請調黃河水師入運助守李鶴年從之十六日五鼓任賴大股數萬自卽墨勞山裹糧疾馳猛衝我軍千總程允和所守地段程允和傳令牆丁點放槍礮賊不稍卻直抵牆下程允和所部僅三百人矛石並舉奮力鏖戰正相持間鄰段游擊蔣尙鈞於所部三百人中以二百

守牆親率百人繞出牆外潛襲賊後賈勇齊進奮呼
殺賊賊衆不辨多寡前後受敵兼以河牆逼近賊馬
不能馳驟遂大敗蔣尙鈞程允和乘勢追殺擒趙深
王羅等斃者以千計餘匪繞東急遁二十日遂於他
軍防段海神廟地方突過膠河宋慶聞報率隊躡追
沿途秋雨泥淖賊遂竄江南境之贛榆李鴻章以運
防緊要檄宋慶回駐原派地段會合張曜所部防守
賊竄海沐邳宿間爲淮軍所敗復由臺莊竄鄒滕嶧
諸縣境至濟甯州涉泗水至汶上東平將於戴廟安

山豫軍防所突竄宋慶等嚴飭各營憑牆力禦密令營官姜桂題桂錫楨各率馬勇由東平進勦九月二十三日姜桂題等至汶河值馬賊半渡邀擊之賊衆大敗遂不敢復窺運河由泰安沂水穆陵廟竄長山章邱鄒山臨朐東趨青州十月十九日劉銘傳會合豫軍善慶馬隊連敗賊於安邱毀賊壘二十餘擒斬不勝計二十四日至贛榆城下是日大霧善慶與劉銘傳分路迎擊賊衝我軍善慶親放洋槍轟斃逆首任柱餘賊負屍狂竄我軍乘勢追殺復斃數千賊勢

遂不能復振矣任柱者凶悍善戰賴賊倚之由是賴
賊勢孤黨渙復爲劉銘傳善慶軍連敗於壽光諸處
伏屍各數萬賴汶洗率死黨百餘竄江南至揚州從
者止十數人皆薙髮易裝僞爲商賈將遁海上以十
二月十二日爲華軍道員吳毓蘭部所獲送曾國藩
營斬首賴任之股遂滅

院匪二十三

初夏秋之間李鶴年自許州移軍杞縣復因直隸臬
匪蠢動回省布置北防兼顧西路時

欽差大臣

陝甘總督左宗棠率師由潼關進勦甘肅臬司劉典
取道商雒入秦湖北巡撫曾國荃檄提督姜玉順以
所部扼紮荆子關西賊張總愚由尹家衛一帶復擾
近華州李鶴年檄馬德昭段廣瀛分駐閩鄉縣境之
晉溝與姜玉順聯絡聲勢賊遂急趨北向竄陷綏德
分擾米脂以十一月二十二日由龍王辿乘河冰凍

合猛撲渡黃至山西省之吉州鄉甯諸處平蒲並警
李鶴年奏檄馬德昭一軍渡河出境援守運城急調
張曜宋慶兩軍回豫而賊已由絳州曲沃垣曲山僻
小路竄近豫疆以十二月初九日過邵原關至濟源
縣其時河北鎮總兵楊長春駐臨漳防梟匪因檄叅
將田慶和玉壽率隊馳往堵禦復飛調駐臨漳之楊
長春駐晉溝之段廣瀛駐山西運城之馬德昭各回
軍會勦水師總兵崔廷桂渡河協助賊自十三日至
二十三日紛擾河內武陟溫孟諸境水師統帶知縣

邵鉞遇賊於溫縣擊之獲勝田慶和等軍各有斬擒
上命宋慶一軍與秦晉之師前後夾擊以張曜
一軍專防河北與宋慶爲援從吏部侍郎毛昺熙奏
也於是宋張兩軍分道疾馳回豫二十四五等日賊
至獲嘉輝縣新鄉原武各境時自秦晉躡追之師則
有廣東陸路提督劉松山安徽壽春鎮總兵郭寶昌
其自運防移勦之淮軍則有湖廣總督李鴻章親督
直隸提督劉銘傳杭州副都統善慶都統溫德勒克
西自運防移勦之皖軍則有總兵程文炳自陝西移

繞直境進剿之師則有陝甘總督左宗棠親督各軍
直隸備禦之師則有大學士署直隸總督官文親督
各軍及都統春壽頭等侍衛陳國瑞所部天津備禦
之師則有三口通商大臣崇厚所派洋槍隊及天津
練勇官文李鴻章李鶴年並以督催迂遲鴻章

交部嚴加議處官文從寬免議 中旨嚴切各路

援師皆奮勇疾進宋慶張曜兩軍晝夜兼程衝冒風
雪以二十八日馳至衛輝偵知賊已由濬縣淇縣境
內北駛三十日迫及於湯陰縣屬之宜溝驛宋慶張

曜及道員裘德俊整隊進剿多所俘獲三鼓始抵城
下七年正月初一日連踏賊踞村莊二十餘所逆首
張總愚糾合全股抗拒賊馬數千由兩哨包鈔我軍
奮擊先敗其步賊馬賊勢亦不支乃東遁是日也戰
甚力叅將李永芳奉 旨以副將用守備馬玉崑
給勇號千總徐效孟唐廣興程允和並以守備用與
馬玉崑均 賞戴花翎初二日李鶴年奏以署糧
道尹耕雲及所部文武員弁出省督勦請 敕李
鴻章節制援軍且言制流寇之法無過堅壁清野請

子真宋史 卷三十一 三
飭下直隸總督順天府尹遴委循良牧令公正
紳耆實力舉辦蓋斯時賊盡易步爲騎一日夜奔馳
二三百里官軍不能繞扼所以爲慮者深遠也初八
日李鶴年至彰德撥本標一營回顧省防檄水師礮
勇撤回汜水孟津各口而令崔廷桂鎮封邱延津哨
巡後路楊長春以所部駐衛輝時賊已由臨洛關擾
順德張宋兩軍追之因悉調馬德昭段廣瀛隊赴彰
德初因待郎毛昶熙奏得 旨令宋慶張曜分道
人晉繞顧畿甸及賊竄懷慶機事猝變兩軍偵賊所

在擊勦賊行詭疾遂成尾追

上諭切責李鶴年

令據實覆奏並咎官文左宗棠李鴻章等於時各統
兵大員皆一再被 嚴旨益激勵將士進勦安徽

巡撫英翰山東巡撫丁寶楨皆各率兵赴援於是李
鶴年進至磁州張曜等追賊至廣平一捷賊遂由順
德雞澤平鄉鉅鹿隆平避兵疾駛我軍於堅冰沍雪
中馳逐手足皆皸坼恐其北犯震京師急由新河一
帶繞越前進以二月初三日至河間府之臥碑集初
四日至獻縣破賊踞莊劉松山郭寶昌軍亦至因合

擊賊南遁阻於滹沱遂沿河東竄初十日及之於深
州偵知逆首張總愚踞錢莊因以夜四鼓襲擊斃老
捻千餘奪羸馬旗械無數總愚率其死黨北竄十三
日及之於清苑縣之張登高碑店諸處復斬獲數百
十五日至深澤宋慶張曜等密約以三更逼賊所踞
西華集毀卡猝進連破數莊復感之於饒陽斃總愚
姪張五孩五孩極凶狡張逆倚之猶賴逆之有任柱
也由是賊氣奪遂西駛李鶴年恐其由大名回竄磁
州下隰沮洳非用兵地且處漳河北岸無險可扼因

復回本境布置漳防令馬德昭軍分屯內黃之楚旺
安陽之豐樂鎮於是賊阻滹沱仍圖北犯張曜宋慶
等追至大冉賊率眾橫拒擊斬甚多時二十六日也
二十七日晨大霧賊以全股北趨宋慶等軍緊躡昏
夜時有斬擒三月初二日賊回竄滑縣所屬之屯子
街初三日黎明馬德昭進軍疾擊敗之於羊觜頭李
家莊及新鎮河西初四日復敗之於汲縣初六日張
曜由輝縣雲門馳至修武之恩村適賊黨由清化斫
竹回駛驟遇我軍斬擒殆盡是日宋慶亦由獲嘉取

道至修武之待王集其地瀕近衛河正值馬德昭所部與賊相持宋慶督軍縱擊賊卽潰奔我軍前隊渡河搶占賊莊賊見過渡人數不多糾悍黨死拒我軍屢勝銳氣百倍酣戰兩時大隊悉至賊隊大敗是夕張曜軍亦來會初七日黎明同渡衛河行十餘里突見賊隊紛列揚塵袒衣意決死鬪時馬德昭隊亦至因共擊之槍礮如雨陣斃千餘解散數千我軍亦有傷亡時皖軍總兵牛師韓道員方長華率隊至修武迤南之三十里日薄暮忽見數十賊騎駛近呼投誠

牛師韓識其詐陽許之密設伏於要隘方長華隊在
衛河南岸馬德昭亦於西南遙應須臾逆眾果蜂擁
至牛師韓揮軍力戰號召伏兵三路齊進方長華從
後突起夾擊賊遂敗竄初七日復有賊馬數百犯皖
營爲營官牛允成劉廷兆擊退賊乃竄延津張曜宋
慶追至賊大股折回排牆而進張曜親率總兵程之
偉叅將李永芳短兵接鬪踰時賊眾負創不退適宋
慶所部副將李承先從右哨馳出因陷陣突擊賊始
潰敗我軍追殺二十里騎賊李全義等來降因盡得

賊情十二日追至滑縣張曜軍次吳村宋慶軍次悅家莊賊大股於數里外南北列拒領隊悍賊皆下馬執旗犯陣餘衆鼓譟而前宋慶所部正當賊鋒副將蔣東才躍馬入賊陣連殺執旗賊目各隊繼之賊勢挫會馬德昭軍踵至與張曜由南直鈔賊後賊乃大敗斬獲甚多降者益衆十三日追及又敗之時賊掠封邱一帶者爲劉松山郭寶昌程文炳諸軍所敗郭寶昌於陣間見張總愚策馬直前將手執之遇伏起受傷十四日賊由衛輝東竄旋折東北將襲奪我輜

重張曜等回擊敗之十七日復戰於封印步賊皆騎馬遁十八日至延津之石坡堦宋慶張曜分東西兩路包勦營官胡金安楊壽山首奮入各營繼之戰復勝是日賊黨分掠魏邱集蔣村馬德昭率所部及已革叅將王永慶飛虎隊乘賊不備直擣踞巢深入爲賊所困營官田宗勝謝聯陞等賈勇決鬪三時之久賊始遁守備李惠恩死之劉松山程文炳亦以是日敗賊於延津境賊遂由滑濬東北駛李鴻章營提督陳振邦副將劉正同都司魯朝斌守備高峻嶺均戰

歿奏入與李惠恩同議卹四月李鶴年移駐湯陰復
移駐滑縣賊竄天津被勦回颺復竄山東將越運河
西循熟徑肆擾二十四日以後由博平東昌荏平清
平諸境四向紛掠遇官兵截擊復由德州恩縣駛至
傅平荏平仍圖犯運河李鴻章方進駐臨清與李鶴
年議困賊於黃河北運河東徵各省兵臨河而壘以
馬軍守東昌而以淮豫諸軍之尤健者當賊凡三月
壘成賊求出不得各軍戰屢捷賊勢日蹙降者接踵
六月十二日復戰於玉林鎮其地在徒駭黃運河之

大甫河漲張曜宋慶誘賊入河套合擊之自旦
至暮短兵相接賊人馬相踐踏騎者或登屋壁困不
得出出者復陷泥淖中於是死者萬餘殘衆就淺水
處疊屍爲梁竄去自是張逆不復能軍矣諸軍復疊
敗之總愚挈其漏刃之衆尙思狡脫而東光南皮濟
陽武定等處黃運交溢均無竄路遂一意西南圖犯
東昌決運防張曜等晝夜躡勦不容喘息所至又爲
防運各軍擊退賊遂復竄東北六月二十八日五鼓
張曜等各率所部由荏平西南揮軍突擊擒斬無算

降衆紛紛倒戈賊愈孤疾駛北向復爲劉銘傳郭松
林善慶溫德勒克西馬步大隊邀截張曜宋慶潘鼎
新諸軍四面合擊賊瓦解張總愚屢自殺不殊遂自
沈於河張牛股滅皖匪之局遂結於是諸軍奏凱奉
旨加各統兵大員及在事文武爵賞有差